



An ornate decorative border surrounding the central text. It features classical figures: a cherub on the left holding a book, a woman on the right holding a staff, and a woman on the left holding a globe. In the center, there is a lamp and a snake. The border is highly detailed with scrollwork and floral motifs.

OTIVM
SINE LITERIS
MORS EST

Seneca

Ex Libris Joannis Nenoini

1874



D. 1.



M. TULLII
CICERONIS
OPERA.

Recensuit J. N. LALLEMAND.

TOMUS DECIMUS.



PARISIIS,

Apud { SAILLANT, viâ S. Joannis Bellov.
DESAINT, viâ Fœneâ.
BARBOU, viâ Mathurinenfium.

M DCC LXVIII.





M. TULLII
CICERONIS
OPERA.
TOMUS DECIMUS.

HOC VOLUME
continentur

DE LEGIBUS LIBRI III.

DE OFFICIIS LIBRI III.

DE SENECTUTE.

DE AMICITIA.

PARADOXA.

PHILOSOPHICORUM FRAGMENTA, in quibus
SOMNIUM SCIPIONIS.





DE LEGIBUS,

LIBER PRIMUS.

EDITIS de Republica libris, Cicero de Legibus scribere instituit, & suæ reipublicæ, quam ex populi potestate, & optimatum auctoritate temperarat, leges dare consentaneas. Cujus disputationis principium repetit ex Stoicorum disciplina, quorum instituto, emendationem vitiorum, commendationemque virtutum, æternâ & immortali lege contineri tradit, totamque legis hujus principis & ultimæ vim & potestatem libri primi explicatione complectitur. Lex autem illa ultima ab eo describitur Mens dei optimi maximi, omnia ratione jubentis & vetantis, a qua hominum vera lex proficiscitur, quæ est Ratio sapientis apta ad jubendum.

Tomus X. A

2 DE LEGIBUS,

dum & vetandum. Atque hoc primi libri argumentum est. Secundus constitutionem religionis & sacerdotum continet: tertius magistratuum descriptionem. Disputatio de jure populi Romani librorum erat sequentium, qui vel ab auctore scripti non sunt, vel temporis injuriâ intercederunt. Quin ii, quos habemus, non videntur ab ipso auctore editi, sed eo jam interfecto publicati. Horum enim non meminit libro posteriore de Divinatione, desuntque in iis præmia, quibus aliàs uti solebat in dialogis, ut ipse indicat Epist. ad Atticum 4, 16. & 13, 32. TURNEBUS.

T. POMPONIUS ATTICUS.

M. T. CICERO. Q. FRATER.

I. ^ATTICUS. Lucus quidem ille, & hæc Arpinatium quercus agnoscitur, sæpe a me lectus in Mario. Si manet illa quercus, hæc est profectò; etenim est sanè vetus. QUINTUS. Manet verò, Attice noster, & semper manebit; fata est enim ingenio:

LIBER PRIMUS. 3

ullius autem agricolæ cultu stirps tam diu-
urna, quàm poëtæ versu, seminari potest.

ATT. Quo tandem modo, Quinte? aut
quale est istuc, quod poëtæ serunt? mihi
nim videris, fratrem laudando, suffragari
ibi.

2. Q. Sit ita sanè. Verumtamen, dum
latinè loquentur litteræ, quercus huic lo-
co non deerit, quæ Mariana dicatur; ea-
ue, ut ait Scævola de fratris mei Mario,

anescet seclis innumerabilibus.

lisi fortè Athenæ tuæ sempiternam in ar-
e oleam tenere potuerunt; aut, quòd Ho-
mericus Ulysses Deli se proceram & te-
eram palmam vidisse dixit, hodie mons-
tant eandem: multaque alia multis locis
iutius commemoratione manent, quàm
aturâ stare potuerunt. Quare glandifera
a quercus, ex qua olim evolavit

antia fulva Jovis, mirandâ visa figurâ,

nc sit hæc: sed quum eam tempestas,
tustasve consumpsêrit, tamen erit his in-
is quercus, quam Marianam quercum
cent.

3. ATT. Non dubito id quidem: sed hoc
n non ex te, Quinte, quæro, verùm ex
o poëta, tuine versus hanc quercum se-
rint, an ita factum de Mario, ut scribis,
eperis? MARCUS. Respondebo tibi e-

A ij

4 *DE LEGIBUS,*

quidem, sed non antè, quàm mihi tu ipse responderis, Attice, certène, non longè a tuis ædibus inambulans, post excessum suum Romulus Proculo Julio dixerit, se deum esse, & Quirinum vocari, templumque sibi dedicari in eo loco juss'erit? & Athenis, non longè item a tua illa antiqua domo, Orithyiam Aquilo fustulerit? sic enim est traditum.

4. ATT. Quorsum tandem, aut cur ista quæris? M. Nihil fanè, nisi ne nimis diligenter anquiras in ea, quæ isto modo memoriæ sint prodita. ATT. Atqui multa quærentur in Mario, fictane, an vera sint; & a nonnullis, quòd & in recenti memoria, & in Arpinati homine, vel severitas a te postulatur. M. Et hercule, ego me cupio non mendacem putari: sed tamen nonnulli isti, Tite, faciunt imperitè, qui in isto periculo non ut a poëta, sed ut a teste, veritatem exigant: nec dubito, quin iidem, & cum Egeria collocutum Numam, & ab aquila Tarquinio apicem impositum putent. Q. Intelligo, te, frater, alias in historia leges observandas putare, alias in poëmate. M. Quippe quum in illa ad veritatem quæque referantur, in hoc ad delectationem pleraque: quamquam & apud Herodotum, patrem historiæ, & apud Theopompum sunt innumerabiles fabulæ.

II. ATT. Teneo quam optabam occasionem, neque omittam. M. Quam tandem, Tite? ATT. Postulatur a te jamdiu, vel flagitatur potius historia: sic enim putant, te illam tractante, effici posse, ut in hoc etiam genere Græciæ nihil cedamus. Atque, ut audias, quid ego ipse sentiam, non solum mihi videris eorum studiis, qui litteris delectantur, sed etiam patriæ debere hoc munus; ut ea, quæ salva per te est, per te eundem sit ornata: abest enim historia litteris nostris, ut & ipse intelligo, & ex te persæpe audio: potes autem tu profectò satisfacere in ea, quippe quum sit opus, ut tibi quidem videri solet, unum hoc oratorium maximè.

6. Quamobrem aggredere, quæsumus, & sume ad hanc rem tempus, quæ est a nostris hominibus adhuc aut ignorata, aut relictæ. Nam post annales pontificum maximorum, quibus nihil potest esse jucundius, si aut ad Fabium, aut ad eum, qui tibi semper in ore est, Catonem, aut ad Pisonem, aut ad Fannium, aut ad Ventonium venias, quamquam ex his alius lio plus habet virium, tamen quid tam xile, quàm isti omnes? Fannii autem æti conjunctus Antipater paulò inflavit vehementius, habuitque vires agrestes ille videm atque horridas, sine nitore ac pastâ, sed tamen admonere reliquos po-

6 *DE LEGIBUS,*

tuit, ut accuratius scriberent. Ecce autem successere huic Gellii, Clodius, Asellio: nihil ad Cœlium, sed potius ad antiquorum languorem atque inscitiam.

7. Nam quid Macrum numerem? cujus loquacitas habet aliquid argutiarum; nec id tamen ex illa erudita Græcorum copia, sed ex librariolis Latinis: in orationibus autem multus & ineptus ad summam impudentiam. Sisenna, ejus amicus, omnes adhuc nostros scriptores, nisi qui fortè nondum ediderunt, de quibus existimare non possumus, facile superavit. Is tamen neque orator in numero vestro umquam est habitus, & in historia puerile quiddam confectatur; ut unum Clitarchum, neque præterea quemquam, de Græcis legisse videatur: eum tamen velle duntaxat imitari; quem si assequi posset, aliquantum ab optimo tamen abesset. Quare tuum est munus: hoc a te expectatur, nisi quid Quinto videtur secus.

III. Q. Mihi verò nihil; & sæpe de isto collocuti sumus: sed est quædam inter nos parva dissensio. ATT. Quæ tandem? Q. A quibus temporibus scribendi capiamur exordium: ego enim ab ultimis censeo, quoniam illa sic scripta sunt, ut nelegantur quidem; ipse autem æqualem ætatis suæ memoriam deposcit, ut ea complectatur, quibus ipse interfuit. ATT. Ego

verò huic potius assentior : sunt enim maximæ res in hac memoria atque ætate nostra : tum autem hominis amicissimi Cn. Pompeii laudes illustrabit : incurret etiam in illummet memorabilem annum suum : quæ ab isto malo prædicari, quàm, ut aiunt, de Remo & Romulo. M. Intellico equidem a me istum laborem jamdiu postulari, Attice ; quem non recusarem, si mihi ullum tribueretur vacuum tempus & liberum : neque enim occupatâ operâ, neque impedito animo, res tanta suscipi potest : utrumque opus est, & curâ vacare, & negotio.

9. ATT. Quid ? ad cetera, quæ scripsisti plura quàm quisquam e nostris, quod tibi tandem tempus vacuum fuit concessum ? M. Subsiciva quædam tempora incurrunt, quæ ego perire non patior : ut si qui dies ad rusticandum dati sint, ad eorum numerum accommodentur, quæ scribimus. Historia verò nec institui potest, nisi præparato otio ; nec exiguo tempore absolvi : & ego animi pendere soleo, quum semel quid orsus traducor aliò ; neque tam facillè interrupta contexo, quàm absolvo instituta.

10. ATT. Legationem aliquam nimirum oratio ista postulat, aut ejusmodi quampiam cessionem liberam atque otiosam. M. Ego verò ætatis potius vacationi confide-

bam; quum præsertim non recusarem, quò minùs more patrio sedens in solio consulentibus responderem, senectutisque non inertis grato atque honesto fungerer munere: sic enim mihi liceret & isti rei, quam desideras, & multis uberioribus atque majoribus, operæ, quantum vellem, dare.

IV. ATT. Atqui vereor, ne istam causam nemo noscat: tibi que semper dicendum sit, & eò magis, quòd te ipse mutasti, & aliud dicendi instituisti genus: ut quemadmodum Roscius, familiaris tuus, in senectute numeros in cantu ceciderat, ipsasque tardiores fecerat tibias; sic tu a contentionibus, quibus summis uti solebas, quotidie relaxes aliquid, ut jam oratio tua non multum a philosophorum lenitate absit: quod sustinere quum vel summa senectus posse videatur, nullam tibi a causis vacationem video dari.

12. Q. At mehercule ego arbitrabar posse id populo nostro probari, si te ad jus respondendum dedisses: quamobrem, quum placebit, experiendum tibi censeo. M. Id, si quidem, Quinte, nullum esset in experiendo periculum: sed vereor, ne, dum minuere velim laborem, augeam, atque ad illam causarum operam, ad quam ego numquam, nisi paratus & meditatus accedo, adjungatur hæc juris interpreta-

tio, quæ non tam mihi molesta sit propter laborem, quàm quòd dicendi cogitationem auferat, sine qua ad nullam majorem unquam causam sum ausus accedere.

13. ATT. Quin igitur ista ipsa explicas nobis his subsicivis, ut ais, temporibus, & conscribis de jure civili subtilius, quàm ceteri? Nam a primo tempore ætatis juri studere te memini, quum ipse etiam ad Scævola ventitarem; neque unquam mihi visus es ita te ad dicendum dedisse, ut jus civile contemneres. M. In longum sermonem me vocas, Attice: quem tamen, nisi Quintus aliud quid nos agere mavult, suscipiam; & quoniam vacui sumus, dicam. Q. Ego verò libenter audierim: quid enim agam potius? aut in quo melius hunc consumam diem?

14. M. Quin igitur ad illa spatia nostra, sedesque pergimus? ubi, quum satis erit deambulatum, requiescemus: nec profectò nobis delectatio deerit, aliud ex alio quærentibus. ATT. Nos verò: & hæc quidem adire sic placet, per ripam & umbram. Sed jam ordire explicare, quæso, de jure civili quid sentias. M. Egone? summos fuisse in civitate nostra viros, qui id interpretari populo, & responsitare soliti sint: sed eos magna profectos, in parvis esse versatos. Quid enim est tantum, quantum jus civitatis? quid autem

tam exiguum, quàm est munus hoc eorum, qui consuluntur; quamquam est populo necessarium? Nec verò eos, qui ei muneri præfuerunt, universi juris expertes fuisse existimo: sed hoc civile quod vocant, eatenus exercuerunt, quoad populum præstare voluerunt; id autem incognitum est; minúsque in usu necessarium. Quamobrem quò me vocas? aut quid hortaris? ut libellos conficiam de stillicidiorum ac de parietum jure? aut ut stipulationum, & judiciorum formulas componam? quæ & conscripta sunt a multis diligenter, & sunt humiliora, quàm illa, quæ a vobis exspectari puto.

V. ATT. Atqui, si quæres, ego quid exspectem; quoniam scriptum est a te de optimo reipublicæ statu, consequens esse videtur, ut scribas tu idem de legibus: sic enim fecisse video Platonem illum tuum, quem tu admiraris, quem omnibus anteponis, quem maximè diligis. M. Visne igitur, ut ille Crete cum Clinia, & cum Lacedæmonio Megillo, æstivo, quemadmodum describit, die, in cupressetis Gnosiorum, & spatiis silvestribus, crebrò insistens, interdum acquiescens, de institutis rerum publicarum, ac de optimis legibus disputat; sic nos inter has procerissimas populos, in viridi opacaque ripa inambulantes, tum autem residentes, quæramus

LIBER PRIMUS. 11

idem de rebus aliquid uberius , quàm
oprensus usus desiderat?

16. ATT. Ego verò ista audire cupio.
1. Quid ait Quintus ? Q. Nulla de re
magis. M. Et rectè quidem : nam sic ha-
etote , nullo in genere disputandi magis
onestè patefieri , quid sit homini tribu-
um naturâ ; quantam vim rerum optima-
um mens humana contineat ; cuius mu-
eris colendi efficiendique causâ nati &
lucem editi simus ; quæ sit conjunctio ho-
inum , quæ naturalis societas inter ip-
os : his enim explicatis , fons legum &
uris inveniri potest.

17. ATT. Non ergo a prætoris edicto ;
t plerique nunc ; neque a XII. tabulis ,
t superiores ; sed penitus ex intima phi-
sophia hauriendam juris disciplinam pu-
is. M. Non enim id quærimus hoc ser-
tione , Pomponi , quemadmodum cavea-
us in jure , aut quid de quaque consul-
tione respondeamus. Sit ista res magna ,
cut est ; quæ quondam a multis claris
iris , nunc ab uno summâ auctoritate &
ientia sustinetur. Sed nobis ita complec-
enda in hac disputatione tota causa est
niversi juris , ac legum , ut hoc , civile
uod dicimus , in parvum quemdam &
ngustum locum concludatur : natura enim
uris explicanda est nobis , eaque ab ho-
minis repetenda natura : considerandæ le-

A vj

ges, quibus civitates regi debeant: tum hæc tractanda quæ composita sunt & descripta, jura & jussa populorum, in quibus ne nostri quidem populi latebunt, quæ vocantur, jura civilia.

VI. Q. Altè verò, &, ut oportet, a capite, frater, repetis quod quærimus; & qui aliter jus civile tradunt, non tam justitiæ, quàm litigandi tradunt vias. M. Non est ita, Quinte; ac potius ignoratio juris litigiosa est, quàm scientia. Sed hæc posterius: nunc juris principia videamus. Igitur doctissimis viris proficisci placuit a lege; haud scio an rectè, si modò, ut iidem definiunt, Lex est ratio summa, insita in natura, quæ jubet ea, quæ facienda sunt, prohibetque contraria. Eadem ratio quum est in hominis mente confirmata & confecta, lex est.

19. Itaque arbitrantur, prudentiam esse legem, cujus ea vis sit, ut rectè facere jubeat; vetet delinquere; eamque rem illi Græco putant nomine, a suum cuique tribuendo appellatam; ego nostro a legendo: nam ut illi æquitatis, sic nos delectûs vim in lege ponimus; & proprium tamen utrumque legis est. Quod si ita rectè dicitur, ut mihi quidem plerumque videri solet; a lege ducendum est juris exordium: ea est enim naturæ vis; ea mens ratioque prudentis; ea juris atque injuriæ regu-

1. Sed quoniam in populari ratione omnis nostra versatur oratio, populariter interdum loqui necesse erit, & eam legem, quæ scripto sancit quod vult, aut jubendo, aut vetando, ut vulgus, appellare. Constituendi verò juris ab illa summa lege capiamus exordium, quæ seculis omnibus intè nata est, quàm scripta lex ulla, aut quàm omnino civitas constituta.

20. Q. Commodius verò, & ad rationem instituti sermonis sapientius. M. Visne ergo ipsius juris ortum a fonte repetamus? quo invento, non erit dubium, quò sint hæc referenda, quæ quærimus. Q. Ego verò ita faciendum esse censeo. ATT. Me quoque adscribito fratris sententiæ. M. Quoniam igitur ejus reipublicæ, quam optimam esse docuit in illis sex libris Scipio, tenendus est nobis & servandus status, omnesque leges accommodandæ ad illud civitatis genus, ferendi etiam mores, nec scriptis omnia sancienda; repetam stirpem juris a natura, quâ duce est nobis omnis disputatio explicanda. ATT. Rectissimè: & quidem istâ duce errari nullo pacto potest.

VII. M. Dædne igitur hoc nobis, Pomponi (nam Quinti novî sententiam) deorum immortalium vi, naturâ, ratione, potestate, mente, numine, sive quod est aliud verbum, quo planius significem quod volo, naturam omnem regi? nam si hoc

A. non probas, ab eo nobis causa ordianda est potissimum. ATT. Do sanè, si postulas: etenim propter hunc concentum avium, strepitumque fluminum, non vereor condiscipulorum ne quis exaudiat. M. Atqui cavendum est: solent enim, id quod virorum bonorum est, admodum irasci: nec verò ferent, si audierint, te primum caput viri optimi prodidisse; in quo scripsit, *Nihil curare deum, nec sui, nec alieni.*

22. ATT. Perge, quæso, nam id, quod tibi concessi, quorsum pertineat, exspecto. M. Non faciam longius: huc enim pertinet, animal hoc providum, sagax, multiplex, acutum, memor, plenum rationis & consilii, quem vocamus *Hominem*, præclarâ quadam conditione generatum esse a supremo Deo: solum est enim ex tot animantium generibus atque naturis, particeps rationis & cogitationis, quum cetera sint omnia expertia. Quid est autem, non dicam in homine, sed in omni coelo atque terrâ, ratione divinius? quæ quum adolevit atque perfecta est, nominatur rite Sapientia.

23. Est igitur (quoniam nihil est ratione melius, eaque & in homine, & in deo) prima homini cum deo rationis societas. Inter quos autem ratio, inter eosdem etiam recta ratio communis est. Quæ

quum sit lex, lege quoque consociati homines cum diis putandi sumus. Inter quos porro est communio legis, inter eos communio juris est. Quibus autem hæc sunt inter eos communia, & civitatis ejusdem habendi sunt. Si verò iisdem imperiis & potestatibus parent ii, multò etiam magis. Parent autem huic cœlesti descriptioni, mentique divinæ & præpotenti deo: ut jam universus hic mundus, una civitas communis deorum atque hominum existimanda: & quod in civitatibus ratione quadam, de qua dicetur idoneo loco, agnationibus familiarum distinguuntur status, id in rerum natura tantò est magnificentius, tantòque præclarius, ut homines deorum agnatione & gente teneantur.

VIII. Nam quum de natura hominis quæritur, disputari solet (& nimirum ita sunt, ut disputantur) perpetuis cursibus, conversionibus cœlestibus existisse quamdam maturitatem ferendi generis humani; quod sparsum in terras, atque solum, divino auctum sit animorum munere: quumque alia, quibus cohærent homines, e mortali genere sumpserint, quæ fragilia essent & caduca, animum esse ingeneratum a deo: ex quo verè vel agnatio nobis cum cœlestibus, vel genus, vel stirps appellari potest. Itaque ex tot generibus nullum est animal, præter hominem,

quod habeat notitiam aliquam dei; ipsisque in hominibus nulla gens est neque tam immansueta, neque tam fera, quæ non, etiam si ignoret qualem habere deum deceat, tamen habendum sciat.

25. Ex quo efficitur illud, ut is agnoscat Deum, qui, unde ortus sit, quasi recordetur, ac noscat. Jam verò virtus eadem in homine ac deo est, neque ullo alio in genere præterea. Est autem virtus nihil aliud, quàm in se perfecta, & ad summum perducta natura: est igitur homini cum deo similitudo. Quod quum ita sit, quæ tandem potest esse propior certiorve cognatio? Itaque ad hominum commoditates & usus tantam rerum ubertatem natura largita est, ut ea, quæ gignuntur, donata consultò nobis, non fortuitò nata videantur: nec solum ea, quæ frugibus atque baccis terræ fœtu profunduntur, sed etiam pecudes; quòd perspicuum sit, partim esse ad usum hominum, partim ad fructum, partim ad vescendum procreatas. Artes verò innumerabiles repertæ sunt, docente naturâ: quam imitata ratio, res ad vitam necessarias solerter consecuta est.

IX. Ipsum autem hominem eadem natura non solum celeritate mentis ornavit, sed etiam sensus, tamquam satellites, attribuit, ac nuntios; & rerum plurimarum

obscuras, nec fatis enodatas intelligentias, quasi fundamenta quædam scientiæ: figuramque corporisabilem & aptam ingenio humano dedit: nam quum ceteras animantes abjecisset ad pastum, solum hominem erexit, ad cœlique quasi cognationis domiciliique pristini conspectum excitavit: tum speciem ita formavit oris, ut in ea penitus reconditos mores effingeret.

27. Nam & oculi nimis arguti, quemadmodum animo affecti simus, loquuntur: & is, qui appellatur *vultus*, qui nullo in animante esse, præter hominem, potest, indicat mores, cujus vim Græci norunt, nomen omnino non habent. Omitto opportunitates habilitatesque reliqui corporis, moderationem vocis, orationis vim, quæ conciliatrix est humanæ maximè societatis. Neque enim omnia sunt hujus disputationis ac temporis; & hunc locum fatis, ut mihi videtur, in iis libris, quos legistis, expressit Scipio. Nunc quoniam hominem, quod principium reliquarum rerum esse voluit, generavit & ornavit Deus, perspicuum sit illud (ne omnia differantur) ipsam per se naturam longius progredi: quæ etiam nullo docente profecta ab iis, quorum, ex prima & inchoata intelligentia, genera cognovit, confirmat ipsa per se rationem & perficit.

X. ATT. Dii immortales, quàm tu lon-

gè juris principia repetis! atque ita, ut ego non modò ad illa non properem, quæ exspectabam a te de jure civili, sed facilè patiar te hunc diem vel totum in isto sermone consumere: sunt enim hæc majora, quæ aliorum causâ fortasse complecteris, quàm ipsa illa, quorum hæc causâ præparantur. M. Sunt hæc quidem magna, quæ nunc breviter attinguntur: sed omnium, quæ in hominum doctorum disputatione versantur, nihil est profectò præstabilius, quam planè intelligi nos ad justitiam esse natos, neque opinione, sed naturâ constitutum esse jus. Id jam patebit, si hominum inter ipsos societatem conjunctionemque perspexeris.

29. Nihil est enim unum uni tam simile, tam par, quàm omnes inter nosmetipsos sumus. Quòd si depravatio consuetudinum, si opinionum varietas non imbecillitatem animorum torqueret, & flecteret quocumque cœpisset; sui nemo ipse tam similis esset, quàm omnes sunt omnium: itaque quæcumque est hominis definitio, una in omnes valet.

30. Quod argumenti fatis est, nullam dissimilitudinem esse in genere: quæ si esset, non una omnes definitio containeret. Etenim ratio, quâ unâ præstamus belluis, per quam conjecturâ valemus, argumentamur, refellimus, differimus, conficimus

aliquid, concludimus, certè est communis; doctrina differens, discendi quidem facultas par. Nam & sensibus eadem omnia comprehenduntur; & ea, quæ movent sensus, itidem movent omnium: quæque in animis imprimuntur, de quibus antè dixi, inchoatæ intelligentiæ, similiter in omnibus imprimuntur: interpretæque est mentis oratio, verbis discrepans, sententiis congruens. Nec est quisquam gentis ullius, qui ducem naturam nactus, ad virtutem pervenire non possit.

XI. Nec solum in rectis, sed etiam in pravitatibus, insignis est humani generis similitudo: nam & voluptate capiuntur omnes; quæ etsi est illecebra turpitudinis, tamen habet quiddam simile naturalis boni: lenitate enim & suavitate delectans, sic ab errore mentis, tamquam salutare aliquid, adsciscitur: similique inscitiâ mors fugitur, quasi dissolutio naturæ; vita expetitur, quia nos, in quo nati sumus, continet: dolor in maximis malis ducitur, quum suâ asperitate, tum quòd naturæ interitus videtur sequi: propterque honestatis & gloriæ similitudinem, beati, qui honorati sunt, videntur; miseri autem, qui inglorii.

32. Molestiæ, lætitiæ, cupiditates, timores, similiter omnium mentes pervagantur; nec, si opiniones aliæ sunt apud

alios, idcirco, qui canem & felem, ut deos, colunt, non eadem superstitione, quâ ceteræ gentes, conflictantur. Quæ autem natio non comitatem, non benignitatem, non gratum animum & beneficii memorem diligit? quæ superbos, quæ maleficos, quæ crudeles, quæ ingratos non aspernatur, non odit? Quibus ex rebus quum omne genus hominum sociatum inter se esse intelligatur, illud extremum est, quod rectè vivendi ratio meliores efficit. Quæ si approbatis, pergam ad reliqua: sin quid requiritis, id explicemus prius. ATT. Nos verò nihil; ut pro utroque respondeam.

XII. M. Sequitur igitur, ad participandum alium ab alio, communicandumque inter omnes, justos naturâ nos esse factos. Atque hoc in omni hac disputatione sic intelligi volo, jus, quod dicam, naturâ esse; tantam autem esse corruptelam malæ consuetudinis, ut ab ea tamquam igniculi exstinguantur a natura dati, exorianturque & confirmentur vitia contraria. Quod si, quo modo est naturâ, sic judicio, homines, *humani* (ut ait poëta) *nihil a se alienum putarent*, coleretur jus æquè ab omnibus: quibus enim ratio a natura data est, iisdem etiam recta ratio data est: ergo & lex, quæ est recta ratio in jubendo & vetando: si lex, jus quoque. At om-

nibus ratio: jus igitur datum est omnibus: rectéque Socrates execrari eum solebat, qui primus utilitatem a natura sejunxisset: id enim querebatur caput esse exitiorum omnium.

34. Unde est illa Pythagorea vox τὰ τῶν φίλων κοινὰ , καὶ φίλων ισότης. Ex quo perspicitur, quum hanc benevolentiam tam latè longéque diffusam vir sapiens in aliquem pari virtute præditum contulerit, tum illud effici, quod quibusdam incredibile videatur, sit autem necessarium, ut nihilò sese plus, quàm alterum diligat: quid enim est, quod differat, quum sint cuncta paria? Quòd si interesse quippiam tantulum modò potuerit, jam amicitiae nomen occiderit; cujus est ea vis, ut, simul atque sibi aliquid, quàm alteri, maluerit, nulla sit. Quæ præmuniuntur omnia reliquo sermoni disputationique nostræ, quò faciliùs jus in natura esse positum, intelligi possit. De quo quum perpauca dixero, tum ad jus civile veniam, ex quo hæc omnis nata est oratio.

XIII. Q. Tu verò jam perpauca scilicet: ex iis enim, quæ dixisti, Attico videtur, mihi quidem certè, ex natura ortum esse jus. ATT. An mihi aliter videri possit, quum hæc jam perfecta sint: primum, quasi muneribus deorum nos esse

instructos & ornatos : secundò autem ; unam esse hominum inter ipsos vivendi parem communemque rationem : deinde omnes inter se naturali quadam indulgentiâ & benevolentia , tum etiam societate juris contineri ? quæ quum vera esse , rectè , ut arbitror , concesserimus ; qui jam licet nobis a natura leges & jura sejungere ?

36. M. Rectè dicis ; & res sic se habet. Verùm philosophorum more , non veterum quidem illorum , sed eorum , qui quasi officinas instruxerunt sapientiæ , quæ fusè olim disputabantur ac liberè , ea nunc articulatim distinctèque dicuntur : nec enim satisfieri censent huic loco , qui nunc est in manibus , nisi separatim hoc ipsum , naturâ esse jus , disputarint. ATT. Et scilicet tua libertas differendi amissa est ; aut tu is es , qui in disputando non tuum judicium sequare , sed auctoritati aliorum pareas ?

37. M. Non semper , Tite : sed iter hujus sermonis quod sit , vides. Ad respublicas firmandas , & ad stabiliendas vires , sanandos populos , omnis nostra pergit oratio. Quocirca vereor committere , ut non bene provisâ & diligenter explorata principia ponantur : nec tamen ut omnibus probentur (nam id fieri non potest) sed ut iis , qui omnia recta atque honesta per se expetenda duxerunt , & aut nihil omni-

no in bonis numerandum, nisi quod per seipsum laudabile esset, aut certè nullum habendum magnum bonum, nisi quod verè laudari suâ sponte posset.

38. His omnibus (sive in Academia vetere cum Speusippo, Xenocrate, Polemone manserunt: sive Aristotelem & Theophrastum, cum illis re congruentes, genere docendi paulum differentes, secuti sunt: sive, ut Zenoni visum est, rebus non commutatis, immutaverunt vocabula: sive etiam Aristonis difficilem atque arduam, sed jam tamen fractam & convictam sectam secuti sunt, ut, virtutibus exceptis atque vitiis, cetera in summa æqualitate ponerent) his omnibus hæc, quæ dixi, probantur.

39. Sibi autem indulgentes, & corpori deservientes, atque omnia, quæ sequantur in vita, quæque fugiant, voluptatibus & doloribus ponderantes, etiam si vera dicunt (nihil enim opus est hoc loco litibus) in hortulis suis jubeamus dicere, atque etiam ab omni societate reipublicæ, cujus partem nec norunt ullam, nec umquam nosse voluerunt, paulisper faceffant, rogemus. Perturbatricem autem harum omnium rerum Academiam, hanc ab Arcesila & Carneade recentem, exoremus, ut sileat: nam si invaserit in hæc, quæ satis scitè nobis instructa & composita vi-

dentur, nimias edet ruinas: quam quidem ego placare cupio, submovere non audeo.

*** *Desunt hic nonnulla, fortasse de peccati conscientia & scelerum pœnis..*

XIV. Nam & in iis sine illius suffimentis expiati sumus. At verò scelerum in homines atque impietatum nulla expiatio est. Itaque pœnas luunt, non tam judiciis (quæ quondam nusquam erant, hodie multifariam nulla sunt; ubi sunt tamen, persæpe falsa sunt) quàm conscientiâ; ut eos agitent insectenturque furia, non ardentibus tædis, sicut in fabulis, sed angore conscientia, fraudisque cruciatu. Quòd si homines ab injuria, pœna, non natura arcere deberet, quænam sollicitudo vexaret impios, sublato suppliciorum metu? quorum tamen nemo tam audax umquam fuit, quin aut abnueret a se commissum esse facinus, aut justì sui doloris causam aliquam fingeret, defensionemque facinoris a naturæ jure aliquo quæreret. Quæ si appellare audent impii, quo tandem studio colentur a bonis? Quòd si pœna, si metus supplicii, non ipsa turpitudine, deterret ab injuriosa facinorosaque vita; nemo est injustus: at incauti potius habendi sunt improbi.

41. Tum autem qui non ipso honesto movemur, ut boni viri simus, sed utilitate

tate aliquâ atque fructu , callidi fumus , non boni. Nam quid faciet is homo in tenebris , qui nihil timet nisi testem & judicem ? quid in deserto loco nactus , quem multo auro spoliare possit , imbecillum atque solum ? noster quidem hic naturâ justus vir ac bonus , etiam colloquetur , juvabit , in viam deducet : is verò , qui nihil alterius causâ facit , & metitur suis commodis omnia , videtis , credo , quid sit acturus. Quòd si negabit se illi vitam erepturum , & aurum ablaturum , numquam ob eam causam negabit , quod id naturâ turpe judicet ; sed quòd metuat , ne emanet , id est , ne malum habeat. O rem dignam , in qua non modò docti , verùm etiam agrestes erubescant !

XV. Jam verò illud stultissimum , existimare omnia justa esse , quæ scita sint in populorum institutis , aut legibus. Etiamne , si quæ leges sint tyrannorum ? si triginta illi Athenis leges imponere voluissent , aut , si omnes Athenienses delectarentur tyrannicis legibus , num idcirco hæ leges justæ haberentur ? nihilò , credo , magis illâ , quam interrex noster tulit , ut dictator quem vellet civium , indictâ causâ , impunè posset occidere. Est enim unum jus , quo devincta est hominum societas , & quod lex constituit una ; quæ lex est recta ratio imperandi atque prohiben-

di; quam qui ignorat, is est injustus, si-
ve est illa scripta uspiam, sive nusquam.
Quòd si justitia est obtemperatio scriptis
legibus institutisque populorum, & si, ut
iidem dicunt, utilitate omnia metienda
sunt; negliget leges, easque perrumpet,
si poterit, is, qui sibi eam rem fructuo-
sam putabit fore. Ita fit ut nulla sit om-
nino justitia, si neque naturâ est; & ea,
quæ propter utilitatem constituitur, utili-
tate aliâ convellitur.

43. Atqui, si natura confirmatura jus
non erit, virtutes omnes tollantur: ubi
enim liberalitas, ubi patriæ caritas, ubi
pietas, ubi aut bene merendi de altero, aut
referendæ gratiæ voluntas poterit exsiste-
re? nam hæc nascentur ex eo, quòd na-
turâ propensi sumus ad diligendos homi-
nes; quod fundamentum juris est: neque
solum in homines obsequia, sed etiam in
deos cæremoniæ religionesque tolluntur;
quas non metu, sed eâ conjunctione, quæ
est homini cum deo, conservandas puto.

XVI. Quòd si populorum jussis, si
principum decretis, si sententiis judicum,
jura constituerentur; jus esset latrocinari:
jus, adulterare: jus, testamenta falsa sup-
ponere, si hæc suffragiis, aut scitis multi-
tudinis probarentur. Quæ si tanta potestas
est stultorum sententiis atque jussis, ut
eorum suffragiis rerum natura vertatur;

cur non fanciunt , ut , quæ mala perniciosaque sunt , habeantur pro bonis ac salutaribus ? aut cur , quum jus ex injuria lex facere possit , bonum eadem facere non possit ex malo ? Atqui nos legem bonam a mala , nullâ aliâ nisi naturæ normâ dividere possumus. Nec solum jus & injuria a natura dijudicantur , sed omnino omnia honesta ac turpia ; nam & communis intelligentia nobis notas res efficit. eas ; quas in animis nostris inchoavit , ut honesta in virtute ponantur , in vitiis turpia.

45. Hæc autem in opinione existimare , non in naturâ posita , dementis est. Nam nec arboris , nec equi virtus quæ dicitur (in quo abutimur nomine) in opinione sita est , sed in natura. Quod si ita est ; honesta quoque & turpia naturâ dijudicanda sunt. Nam si opinione universa virtus , eadem ejus etiam partes probarentur. Quis igitur prudentem , & ; ut ita dicam , catum , non ex ipsius habitu , sed ex aliqua re externa judicet ? Est enim virtus perfecta ratio ; quod certè in natura est : igitur omnis honestas eodem modo.

XVII. Nam ut vera & falsa , ut consequentia & contraria , suâ sponte , non alienâ judicantur ; sic constans & perpetua ratio vitæ , quæ est virtus , itemque inconstantia , quod est vitium , suâ naturâ probatur. Nos ingenia juvenum naturâ ju-

dicamus; non item virtutes & vitia, quæ exsistunt ab ingeniis, judicabuntur? an ea non aliter? honesta & turpia non ad naturam referri necesse erit? Quod laudabile bonum est, in se habeat quod laudetur necesse est: ipsum enim bonum, non est opinionibus, sed naturâ: nam ni ita esset, beati quoque opinione essent; quo quid dici potest stultius? Quare quum & bonum, & malum naturâ judicetur, & ea sint principia naturæ; certè honesta quoque & turpia simili ratione dijudicanda, & ad naturam referenda sunt.

47. Sed perturbat nos opinionum varietas, hominumque dissensio: & quia non idem contingit in sensibus, hos naturâ certos putamus; illa, quæ aliis sic, aliis secus, nec iisdem semper uno modo videntur, ficta esse ducimus: quod est longè aliter. Nam sensus nostros non parens, non nutrix, non magister, non poëta, non scena depravat, non multitudinis consensus abducit a vero. Animis omnes tenduntur insidiæ, vel ab iis, quos modò enumeravi, qui teneros & rudes quum acceperunt, inficiunt, & flectunt, ut volunt; vel ab ea, quæ penitus in omni sensu implicata insidet, imitatrix boni, voluptas, malorum autem mater omnium; cujus blanditiis corrupti, quæ naturâ bona sunt, quia dulcedine hac & scabie carent, non cernimus fatis.

XVIII. Sequitur (ut conclusa mihi jam hæc sit omnis ratio) id quod ante oculos ex iis est , quæ dicta sunt , & jus , & omne honestum suâ sponte esse expetendum. Etenim omnes viri boni ipsam æquitatem & jus ipsum amant ; nec est viri boni , errare , & diligere quod per se non sit diligendum. Per se igitur jus est expetendum & colendum : quod si jus est ; etiam justitia : sic in ea reliquæ quoque virtutes per se colendæ sunt. Quid liberalitas ? gratuitane est , an mercenaria ? si sine præmio benigna est , gratuita ; si cum mercede , conducta : nec est dubium , quin is , qui liberalis benignusve dicitur , officium , non fructum sequatur. Ergo item justitia nihil exprimit præmii , nihil pretii : per se igitur expetitur ; eademque omnium virtutum causa , atque sententia est.

49. Atque etiam si emolumentis , non suâ sponte virtus expenditur , una erit virtus , quæ malitia rectissimè dicetur. Ut enim quisque maximè ad suum commodum refert quæcumque agit , ita minimè est vir bonus ; ut , qui virtutem præmio metiuntur , nullam virtutem , nisi malitiam putent. Ubi enim beneficus , si nemo alterius causâ benignè facit ? ubi gratus , si non eum ipsum , cui referunt gratiam , cernunt grati ? ubi illa sancta amicitia , si

non ipse amicus per se amatur toto pectore, ut dicitur? qui etiam deferendus & abjiciendus est, desperatis emolumentis & fructibus: quo quid potest dici immanius? Quòd si amicitia per se colenda est, societas quoque hominum, & æqualitas, & justitia, per se expetenda. Quod ni ita est, omnino justitia nulla est: id enim injustissimum ipsum est, justitiæ mercedem quærere.

XIX. Quid verò de modestia, quid de temperantia, quid de continentia, quid de verecundia, pudore, pudicitiaque dicemus? infamiæne metu non esse petulantes; an legum & judiciorum? Innocentes ergo & verecundi sunt, ut bene audiant, & ut rumorem bonum colligant? Erubescunt pudici etiam de pudicitia loqui. Ac me nimis istorum philosophorum pudet, qui nullum vitium vitare, nisi judicio ipso notatum, putant.

§ 1. Quid enim? possumus eos, qui a stupro arcentur infamiæ metu, pudicos dicere, quum ipsa infamia propter rei turpitudinem consequatur? nam quid aut laudari ritè, aut vituperari potest, si ab ejus natura recesseris, quod aut laudandum, aut vituperandum putes? An corporis pravitates, si erunt perinsignes, habebunt aliquid offensionis; animi deformitas non habebit? cujus turpitude ex ipsis vi-

tiis facillimè percipi potest : quid enim foedius avaritiâ , quid immanius libidine , quid contemptius timiditate , quid abjectius tarditate & stultitiâ dici potest ? Quid ergo ? eos , qui singulis vitiis excellunt , aut etiam pluribus , propter damna , aut detrimenta , aut cruciatus aliquos , miseros esse dicimus , an propter vim turpitudinemque vitiorum ? quod item ad contrariam laudem in virtute dici potest.

52. Postremò , si propter alias res virtus expetitur , melius esse aliquid , quàm virtutem , necesse est. Pecuniamne igitur ? an honores ? an formam ? an valetudinem ? quæ & , quum adsunt , perparva sunt ; & , quàm diu affutura sint , certum sciri nullo modo potest : an (quod turpissimum dictu est) voluptatem ? at in ea quidem spernenda & repudianda , virtus vel maximè cernitur. Viderisne , quanta series rerum sententiarumque sit ; atque ut ex alio alia nectantur ? quin labebar longius , nisi me retinuissem.

XX. Q. Quò tandem ? libenter enim , frater , ad istam orationem tecum prolaberer. M. Ad finem bonorum , quò referuntur , & cujus apiscendi causâ sunt facienda omnia : controversam rem , & plenam dissensionis inter doctissimos , sed aliquando tamen judicandam. ATT. Quì istuc fieri potest , L. Gellio mortuo ? M.

Quid tandem id ad rem? ATT. Quia me Athenis audire ex Phædro meo memini, Gellium, familiarem tuum, quum pro consule ex prætura in Græciam venisset, Athenis philosophos, qui tum erant, in locum unum convocasse, ipsisque magnopere auctorem fuisse, ut aliquando controversiarum aliquem facerent modum: quòd si essent eo animo, ut nollent ætatem in litibus conterere, posse rem convenire: & simul operam suam illis esse pollicitum, si posset inter eos aliquid convenire. M. Jocularè istuc quidem, Pomponi, & a multis sæpe derisum: sed ego planè vellem me arbitrum inter antiquam Academiam & Zenonem datum. ATT. Quo tandem istuc modo? M. Quia de re una solum dissident, de ceteris mirificè congruunt. ATT. Ain' tandem? unanè est solum dissensio? M. Quæ quidem ad rem pertineat, una: quippe quum antiqui omnes, quod secundum naturam esset, quo juvaremur in vita, bonum esse decreverint; hic, nisi quod honestum esset, nihil putarit bonum. ATT. Perparvam verò controversiam dicis, ac non eam, quæ dirimat omnia? M. Probè quidem sentis, si re, ac non verbis dissiderent.

XXI. ATT. Ergo assentiris Antiocho familiari meo (magistro enim non audeo dicere) quocum vixi, & qui me ex nostris

pene convellit hortulis , deduxitque in Academiam perpauculis passibus. M. Vir iste fuit ille quidem prudens & acutus , & in suo genere perfectus , mihi que , ut scis , familiaris ; cui tamen ego assentiar in omnibus , necne , mox videro : hoc dico , controversiam totam istam posse sedari.

55. ATT. Quî istuc tandem vides ? M. Quia , si , ut Chius Aristo dixit , solum bonum esse diceret , quod honestum esset , malumque , quod turpe ; ceteras res omnes planè pares , ac ne minimùm quidem , utrùm adessent , an abessent , interesse ; valde a Xenocrate & Aristotele , & ab illa Platonis familia discreparet ; essetque inter eos de re maxima , & de omni vivendi ratione dissensio. Nunc verò quum decus , quod antiqui summum bonum esse dixerunt , hic solum bonum dicat ; item dedecus , quod illi summum malum , hic solum : divitias , valetudinem , pulchritudinem , commodas res appellet , non bonas ; paupertatem , debilitatem , dolorem , incommodas , non malas : sentit idem , quod Xenocrates , quod Aristoteles ; loquitur alio modo. Ex hac autem non rerum , sed verborum discordia , controversia nata est de finibus ; in qua quoniam usufruptionem XII tabulæ inter quinque pedes esse voluerunt , depasci veterem possessionem Academiæ ab hoc acuto homi-

ne non sinemus ; nec Maniliâ lege singuli , sed ex iis tres arbitri fines regemus.

56. Q. Quamnam igitur sententiam dicimus ? M. Requiri placere terminos , quos Socrates pegerit ; iisque parere. Q. Præclare , frater , jam nunc a te verba usurpantur civilis juris & legum ; quo de genere exspecto disputationem tuam : nam ista quidem magna dijudicatio est , ut ex te ipso sæpe cognovi. Sed certè res ita se habent , ut ex natura vivere , summum bonum sit , id est , vitâ modicâ & aptâ , virtute perfrui : aut naturam sequi , & ejus quasi lege vivere , id est , nihil , quantum in ipso sit , prætermittere , quò minus ea , quæ natura postulet , consequatur , quòd inter hæc velit virtute tamquam lege vivere. Quapropter hoc dijudicari nescio an unquam , sed hoc sermone certè non potest , si quidem id , quod suscepimus , perfecturi simus.

XXII. ATT. At ego huc declinabam nec irvitus. Q. Licebit aliàs : nunc id agamus , quod cœpimus , quum præsertim ad id nihil pertineat hæc de summo malo bonoque dissensio. M. Prudentissimè , Quinte , dicis : nam quæ a me adhuc dicta sunt , ***

58. Q. Nec Lycurgi leges , nec Solonis , neque Charondæ , neque Zaleuci , nec nostras XII tabulas , nec plebiscita de-

sidero : sed te existimo quum populis , tum etiam singulis hodierno sermone leges vivendi & disciplinam daturum. M. Est hujus verò disputationis , Quinte , proprium id , quod exspectas : atque utinam esset etiam facultatis meæ ! Sed profectò ita se res habet , ut , quoniam vitiorum emendatricem , legem esse oportet , commendatricemque virtutum , ab ea vivendi doctrina ducatur. Ita sit , ut mater omnium bonarum artium sapientia sit ; a cujus amore Græco verbo philosophia nomen invenit , quâ nihil a diis immortalibus uberius , nihil florentius , nihil præstabilius hominum vitæ datum est : hæc enim una nos quum ceteras res omnes , tum , quod est difficillimum , docuit , ut nosmet ipsos nosceremus : cujus præcepti tanta vis , tanta sententia est , ut ea non homini cuipiam , sed Delphico deo tribueretur.

59. Nam qui se ipse norit , primùm aliquid sentiet se habere divinum , ingeniumque in se suum , sicut simulacrum aliquod , dedicatum putabit ; tantoque munere deorum semper dignum aliquid & faciet , & sentiet : & , quum se ipse perspexerit , totumque tentarit , intelliget , quemadmodum a natura subornatus in vitam venerit , quantaque instrumenta habeat ad obtinendam adipiscendamque sa-

pientiam : quoniam principiò rerum omnium quasi adumbratas intelligentias animo ac mente conceperit ; quibus illustratus , sapientiâ duce , bonum virum , & ob eam ipsam causam cernat se beatum fore.

XXIII. Nam quum animus , cognitis perceptisque virtutibus , a corporis obsequio indulgentiaque discesserit , voluptatemque , sicut labem aliquam decoris , opprefferit , omnemque mortis dolorisque timorem effugerit , societatemque caritatis coierit cum suis , omnesque naturâ conjunctos , suos duxerit , cultumque deorum , & puram religionem susceperit , & exacuerit illam , ut oculorum , sic ingenii aciem , ad bona deligenda , & rejicienda contraria ; quæ virtus ex providendo est appellata prudentia : quid eo dici , aut excogitari poterit beatius ?

61. Idemque quum cœlum , terras , maria , rerumque omnium naturam perspexerit , eaque unde generata , quò recurrant , quando , quo modo obitura , quid in iis mortale & caducum , quid divinum æternumque sit , viderit , ipsumque ea moderantem & regentem pene prehenderit , seseque non unis circumdatum mœnibus , popularem alicujus definiti loci , sed civem totius mundi , quasi unius urbis , agnoverit : in hac ille ma-

gnificentia rerum, atque in hoc conspectu & cognitione naturæ, dii immortales! quàm ipse se noscet? quod Apollo præcepit Pythius: quàm contemnet, quàm despiciet, quàm pro nihilo putabit ea, quæ vulgò dicuntur amplissima?

XXIV. Atque hæc omnia, quasi sepi-mento aliquo, vallabit differendi ratione, veri & falsi judicandi scientiâ, & arte quadam intelligendi, quid quamque rem sequatur, & quid sit cuique contrarium. Quumque se ad civilem societatem natum senferit, non solum illâ subtili disputatione sibi utendum putabit, sed etiam fusâ latius perpetuâ oratione, quâ regat populos, quâ stabiliat leges, quâ castiget improbos, quâ tueatur bonos, quâ laudet claros viros; quâ præcepta salutis & laudes aptè ad persuadendum edât suis civibus; quâ hortari ad decus, revocare a flagitio, consolari possit afflictos; factaque & consulta fortium & sapientum, cum improborum ignominia, sempiternis monumentis prodere. Quæ quum tot res tantæque sint, quæ inesse in homine perspiciantur ab iis, qui se ipsi velint nosse, earum parens est, educatrixque sapientia.

63. ATT. Laudata quidem a te graviter & verè. Sed quorsum hæc pertinent? M. Primùm ad ea, Pomponi, de quibus acturi jam sumus; quæ tanta esse volumus:

38 *DE LEGIBUS, LIBER I.*

non enim erunt, nisi ea fuerint, unde illa manant, amplissima. Deinde facio & libenter, & ut spero, rectè, quòd eam, cujus studio teneor, quæque me eum, quicumque sum, effecit, non possum silentio præterire. ATT. Verò facis & meritò, & ipse: fuitque id, ut dicis, in hoc sermone faciendum.





DE LEGIBUS,

LIBER SECUNDUS.

CIVITATIS jus, aut ad res & rationes hominum, aut ad religiones & cæremonias Deorum, comparatum est: hoc divinum, illud humanum dicimus. Sed quum divini potior sit & antiquior cura (deum enim ut colamus in lucem editi sumus, religionemque ac pietatem natura nobis inſevit) Cicero meritò a religionis constitutione incæpit, & eam in hunc librum contulit. Cujus disputationem ab ultima lege, quæ mens Dei est ratione cogentis & verantis, & ab humana, quæ ratio est sapientis, legi divinæ consentiens, ut a capite, arcessit: nam ab his, ut fontibus, jura nostra fluunt, eoque referri debent. Addit deinde, Platonis more, legis præmium: ei legem de religione subjungit, quam a Numæ Pontificumque

Rom. decretis educit. Postremò hujus suasionem & explicationem reddit. TURNEBUS.

I. **A**TTICUS. Sed visne, quoniam & factis jam ambulatum est, & tibi aliud dicendi initium sumendum est, locum mutemus, & in insula, quæ est in Fibreno (nam opinor illi alteri flumini nomen esse) sermoni reliquo demus operam, sedentes? M. Sanè quidem: nam illo loco libentissimè soleo uti, sive quid mecum ipse cogito, sive aut scribo, aut lego.

2. **ATT.** Equidem qui nunc primùm huc venerim, fatiari non queo; magnificasque villas & pavimenta marmorea, & laqueata tecta contemno: ductus verò aquarum, quos isti Nilos & Euripos vocant, quis non, quum hæc videat, irriferit? Itaque, ut tu paulò antè de lege & de jure differens, ad naturam referebas omnia, sic in his ipsis rebus, quæ ad quietem animi delectationemque quærentur, natura dominatur. Quare antea mirabar (nihil enim his in locis nisi saxa & montes cogitabam; idque ut facerem, & orationibus inducebar tuis, & versibus) sed mirabar, ut dixi, te tam valde hoc loco delectari: nunc contrà miror, te, quum Româ ab sis, usquam potius esse.

3. M. Ego verò, quum licet plures dies abesse, præsertim hoc tempore anni, & amœnitatem hanc & salubritatem sequor; rarò autem licet. Sed nimirum me alia quoque causa delectat, quæ te non attingit ita. ATT. Quæ tandem ista causa est? M. Quia, si verum dicimus, hæc est mea, & hujus fratris mei germana patria: hinc enim orti stirpe antiquissimâ: hinc sacra, hinc genus, hinc majorum multa vestigia. Quid plura? hanc vides villam, ut nunc quidem est, lautius ædificatam patris nostri studio; qui quum esset infirmâ valetudine, hinc ferè ætatem egit in litteris: sed hoc ipso in loco quum avus viveret, & antiquo more parva esset villa, ut illa Curiana in Sabinis, me scito esse natum. Quare inest nescio quid, & latet in animo ac sensu meo, quo me plus hic locus fortasse delectet: siquidem etiam ille sapientissimus vir, Ithacam ut videret, immortalitatem scribitur repudiasse.

II. ATT. Ego verò tibi istam justam causam puto, cur huc libentiùs venias, atque hunc locum diligas. Quin ipse, verè dicam, sum illi villæ amicior modò factus, atque huic omni solo, in quo tu ortus & procreatus es: movemur enim nescio quo pacto locis ipsis, in quibus eorum, quos diligimus, aut admiramur, adsunt vestigia: me quidem ipsæ illæ nostræ Athenæ

non tam operibus magnificis exquisitisque antiquorum artibus delectant , quàm recordatione summorum virorum , ubi quisque habitare , ubi sedere , ubi disputare sit solitus ; studiosèque eorum etiam sepulcra contemplor. Quare istum , ubi tu es natus , plus amabo posthac locum.

5. M. Gaudeo igitur , me incunabula pene mea tibi ostendisse. ATT. Equidem me cognosse admodum gaudeo : sed illud tamen quale est , quod paulò antè dixisti ; hunc locum (idem ego te accipio dicere Arpinum) germanam patriam esse vestram ? numquid duas habetis patrias ? an est una illa patria communis ? nisi fortè sapienti illi Catoni fuit patria non Roma , sed Tusculum. M. Ego mehercule & illi , & omnibus municipibus duas esse censeo patrias ; unam naturæ , alteram civitatis : ut ille Cato , quum esset Tusculi natus , in populi Romani civitatem susceptus est : itaque , quum ortu Tusculanus esset , civitate Romanus , habuit alteram loci patriam , alteram juris : ut vestri Attici , postquam Theseus eosdem migrare ex agris , & in astu , quod appellatur , omnes se conferre jussit , & Sunii erant iidem & Attici ; sic nos & eam patriam ducimus , ubi nati ; & illam , quâ excepti sumus. Sed necesse est , caritate eam præstare , in qua reipublicæ nomen & universæ civita-

LIBER SECUNDUS. 43

tis est; pro qua mori, & cui nos totos dedere, & in qua nostra omnia ponere, & quasi consecrare debemus. Dulcis autem non multò secus est ea, quæ genuit, quàm illa, quæ excepit: itaque ego hanc meam esse patriam prorsus numquam negabo, dum illa sit major, & hæc in ea contineatur.

III. ATT. Rectè igitur Magnus ille noster, me audiente, posuit in iudicio, quum pro Balbo tecum simul diceret, rempublicam nostram justissimas huic municipio gratias agere posse, quòd ex eo duo sui conservatores exstitissent; ut jam videar adduci, hanc quoque, quæ te procreavit, esse patriam tuam. Sed ventum in insulam est. Hæc verò nihil est amœnius. Etenim hoc quasi rostro funditur Fibrenus, & divisus æqualiter in duas partes latera hæc alluit, rapidèque dilapsus citò in unum confluit, & tantum complectitur, quod satis sit modicæ palæstræ loci: quo effecto, tamquam id habuerit operis ac muneris, ut hanc nobis efficeret sedem ad disputandum, statim præcipitat in Lirem, &, quasi in familiam patriciam venerit, amittit nomen obscurius, Liremque multò gelidiorem facit: nec enim ullum hòc frigidius flumen attigi, quum ad multa accesserim, ut vix pede tentare id possim: quod in Phædro Platonis facit, Socrates.

7. M. Est verò ita: sed tamen huic amœnitate, quemadmodum ex Quinto sæpe audio, Thyamis Epirotes tuus ille nihil, opinor, concesserit. Q. Est ita, ut dicis: cave enim putes Attici nostri Amaltheo platanisque illis quidquam esse præclarioris. Sed, si videtur, considamus hîc in umbra, atque ad eam partem sermonis, ex qua egressi sumus, revertamur. M. Præclare exigis, Quinte: at ego effugisse arbitrabar: sed tibi horum nihil debere potest. Q. Ordire igitur: nam hunc tibi totum dicamus diem.

M. *A Jove Musarum primordia,*

sicut in Arati carmine orsi sumus. Q. Quorsum istuc? M. Quia nunc itidem ab eodem, & a ceteris diis immortalibus sunt nobis agendi capienda primordia. Q. Optime verò, frater; & fieri sic decet.

IV. M. Videamus igitur rursus, priusquam aggrediamur ad leges singulas, vim naturamque legis, ne, quum referenda sint ad eam nobis omnia, labamur interdum errore sermonis, ignoremusque vim sermonis ejus, quo jura nobis definienda sint. Q. Sanè quidem, hercule; & est ista recta docendi via. M. Hanc igitur video sapientissimorum fuisse sententiam, legem neque hominum ingeniis excogitam, nec scitum aliquod esse populorum,

fed æternum quiddam , quod univerſum mundum regeret , imperandi , prohibendi-
que ſapientiâ. Ita principem legem illam
& ultimam , mentem eſſe dicebant , om-
nia ratione aut cogentis , aut vetantis dei ,
ex qua illa lex , quam dii humano generi
dederunt , rectè eſt laudata : eſt enim ratio ,
mensque ſapientis , ad jubendum , & ad
deterrendum idonea.

9. Q. Aliquoties jam iſte locus a te tac-
tus eſt : ſed antè , quàm ad populares leges
venias , vim iſtius cœleſtis legis explana ,
ſi placet ; ne æſtus nos conſuetudinis ab-
ſorbeat , & ad ſermonis morem uſitati tra-
hat. M. A parvis enim , Quinte , didici-
mus , *SI IN JUS VOCAT* , atque ejusmodi
alias , leges nominare : ſed verò intelligi
ſic oportet , & hæc , & alia juffa ac vetita
populorum , vim non habere ad rectè fac-
ta vocandi , & a peccatis avocandi : quæ
vis non modò ſenior eſt , quàm ætas
populorum & civitatum , ſed æqualis il-
lius , cœlum atque terras tuentis & regen-
tis dei.

10. Neque enim eſſe mens divina ſine
ratione poteſt , nec ratio divina non hanc
vim in rectis praviſque ſanciendis habere :
nec , quia nuſquam erat ſcriptum , ut con-
tra omnes hoſtium copias in ponte unus
aſſiſteret , a tergoque pontem interſcindi
juberet , idcirco minùs Coclitem illum

rem gessisse tantam, fortitudinis lege atque imperio putabimus: nec, si regnante Tarquinio nulla erat Romæ scripta lex de stupris, idcirco non contra illam legem sempiternam Sex. Tarquinius vim Lucretiæ, Tricipitini filiæ, attulit: erat enim ratio profecta a rerum natura, & ad rectè faciendum impellens, & a delicto avocans; quæ non tum denique incipit lex esse, quum scripta est, sed tum, quum orta est; orta autem simul est cum mente divina: quamobrem lex vera atque princeps, apta ad jubendum, & ad vetandum, ratio est recta summi Jovis.

V. Q. Assentior, frater, ut quod est rectum, verum quoque sit, neque cum litteris, quibus scita scribuntur, aut oria-
tur, aut occidat. M. Ergo ut illa divina mens, summa lex est; item, quum in homine est perfecta, & in mente sapientis. Quæ sunt autem variè, & ad tempus descripta populi, favore magis, quàm re, legum nomen tenent: omnem enim legem, quæ quidem rectè lex appellari possit, esse laudabilem, quibusdam talibus argumentis docent. Constat profectò ad salutem civium, civitatumque incolumitatem, vitamque hominum quietam & beatam, conditas esse leges; eosque, qui primùm ejusmodi scita sanxerint, populis ostendisse, ea se scripturos atque laturos,

quibus illi adscriptis susceptisque, honestè beatèque viverent; quæque ita composita sanctaque essent, eas leges videlicet nominarunt. Ex quo intelligi par est, eos, qui perniciofa & injusta populis jussa descripserint, quum contrà fecerint, quàm polliciti professique sint, quidvis potiùs tulisse, quàm leges; ut perspicuum esse possit, in ipso nomine legis interpretando inesse vim & sententiam justì, & juris legendi.

12. Quæro igitur a te, Quinte, sicut illi solent; Quo si civitas careat, ob eam ipsam causam, quòd eo careat, pro nihilo habenda sit, id estne numerandum in bonis? Q. Ac maximis quidem. M. Lege autem carens civitas, ane ob ipsum habenda nullo loco? Q. Dici aliter non potest. M. Necesse est igitur, legem haberi in rebus optimis. Q. Prorsus assentior.

13. M. Quid, quòd multa perniciosè, multa pestiferè sciscuntur in populis, quæ non magis legis nomen attingunt, quàm si latrones aliqua confessu suo sanxerint? Nam neque medicorum præcepta dici verè possent, si quæ inscii imperitique pro salutaribus mortifera conscripserint; neque in populo lex, cuicuiusmodi fuerit illa, etiam si perniciosum aliquid populus acceperit. Ergo est lex justorum injustorum;

que distinctio, ad illam antiquissimam; & rerum omnium principem expressa naturam, ad quam leges hominum diriguntur, quæ supplicio improbos afficiunt, defendunt ac tuentur bonos.

VI. Q. Præclarè intelligo: nec verò jam aliam esse ullam legem puto non modò habendam, sed ne appellandam quidem. M. Igitur tu Titias & Apuleias leges nullas putas? Q. Ego verò ne Livias quidem. M. Et rectè, quæ præsertim uno versiculo senatûs, puncto temporis, sublatae sint: lex autem illa, cujus vim explicavi, neque tolli, neque abrogari potest.

15. Q. Eas tu igitur leges rogabis videlicet, quæ numquam abrogentur? M. Certè, si modò acceptæ a vobis duobus erunt. Sed, ut vir doctissimus fecit Plato, atque idem gravissimus philosophorum omnium, qui princeps de republica conscripsit, idemque separatim de legibus ejus, id mihi credo esse faciendum; ut priusquam ipsam legem recitem, de ejus legis laude dicam: quod idem & Zaleucum, & Charondam fecisse video; quum quidem illi non studii & delectationis, sed reipublicæ causâ leges civitatibus suis scripserint: quos imitatus Plato, videlicet hoc quoque legis putavit esse, persuadere aliquid, non omnia vi ac minis cogere. Q. Quid, quòd Zaleucum
istum

LIBER SECUNDUS. 49

istum negat ullum fuisse Timæus? M. At Theophrastus auctor haud deterior, meâ quidem sententiâ (meliorem multi) nominat; commemorant verò ipsius cives, nostri clientes, Locri. Sed sive fuit, sive non fuit, nihil ad rem: loquimur, quod traditum est.

VII. Sit igitur jam hoc a principio persuasum civibus, dominos esse omnium rerum, ac moderatores deos; eaque quæ gerantur, eorum geri ditione, ac numine; eosdemque optimè de genere hominum mereri; &, qualis quisque sit, quid agat, quid in se admittat, quâ mente, quâ pietate colat religiones, intueri; piorumque & impiorum habere rationem. His enim rebus imbutæ mentes, haud sanè abhorrebunt ab utili, & a vera sententia. Quid enim est verius, quam neminem esse oportere tam stultè arrogantem, ut in se rationem & mentem putet inesse, in cœlo mundoque non putet? aut ea, quæ vix summâ ingenii ratione comprehendat, nullâ ratione moveri putet? quem verò astro- rum ordines, quem dierum noctiumque vicissitudines, quem mensium temperatio, quemque ea, quæ gignuntur nobis ad fruendum, non gratum esse cogant; hunc hominem omnino numerare quî decet? Quumque omnia, quæ rationem habent, præstent iis, quæ sint rationis expertia;

nefasque sit dicere, ullam rem præstare naturæ omnium rerum; rationem inesse in ea confitendum est. Utiles esse autem opiniones has, quis neget, quum intelligat, quàm multa firmentur jurejurando; quantæ salutis sint fœderum religiones; quàm multos divini supplicii metus a scelere revocarit; quàmque sancta sit societas civium inter ipsos, diis immortalibus interpositis tum iudicibus, tum testibus?

17. Habes legis præmium: sic enim hoc appellat Plato. Q. Habeo verò, frater: & in hoc admodum delector, quòd in aliis rebus aliisque sententiis versaris, atque ille: nihil enim tam dissimile est, quàm vel ea, quæ antè dixisti, vel hoc ipsum legis exordium. Unum illud mihi videris imitari, orationis genus. M. Vellem fortasse: quis enim id potest, aut umquam poterit imitari? nam sententias interpretari perfacile est. Quod quidem ego facerem, nisi planè esse vellem meus: quid enim negotii est, eadem propè verbis iisdem conversa dicere? Q. Prorsus assentior. Verùm, ut modò tute dixisti, te esse malo tuum. Sed jam exprome, si placet, istas leges de religione.

18. M. Expromam equidem, ut poterò: &, quoniam & locus & sermo familiaris est, legum leges voce proponam. Q. Quidnam id est? M. Sunt certa legum

LIBER SECUNDUS. 51

verba, Quinte, neque ita prisca, ut in veteribus XII sacratisque legibus; & tamen, quò plus auctoritatis habeant, paulò antiquiora, quàm hic sermo est. Eum morem igitur cum brevitate, si potero, consequar. Leges autem a me edentur non perfectæ; nam esset infinitum: sed ipsæ summæ rerum atque sententiæ. Q. Ita verò necesse est: quare audiamus.

VIII. M. *Ad divos adeunto castè: pietatem adhibento: opes amovento. Qui secus faxit, deus ipse vindex erit. Separatim nemo habessit deos: neve novos, sed nec advenas, nisi publicè adscitos, privatim colunto. Constructa a patribus delubra habento: lucos in agris habento, & larum sedes. Ritus familiæ patrumque servanto. Divos, & eos, qui cælestes semper habiti, colunto, & ollos, quos endo cælo merita vocaverint, Herculem, Liberum, Æsculapium, Castorem, Pollucem, Quirinum: ast olla, propter quæ datur homini adscensus in cælum, Mentem, Virtutem, Pietatem, Fidem; earumque laudum delubra sunt: nec ulla vitiorum sacra solemnia obeunto. Feriis jurgia amovento, easque in famulis, operibus patratis, habento: itaque, ut cadant in annuis amfractibus, descriptum esto: certasque fruges, certasque baccas sacerdotes publicè libanto: hoc certis sacrificiis, ac diebus. Itemque alios ad dies ubertatem lactis, fatusque*

servanto : idque ne committi possit , ad eam rem & rationem , cursus annuos sacerdotes finiunto : quæque quoique divo decoræ gratæque sint hostiæ , providento : divisque aliis alii sacerdotes , omnibus pontifices , singulis flamines sunt. Virgines Vestales in urbe custodiunto ignem foci publici sempiternum.

20. Quoque hæc privatim & publicè modo ritumque fiant , discunto ignari a publicis sacerdotibus : eorum autem duo genera sunt ; unum , quod præsit cæremoniis & sacris : alterum , quod interpretetur fatidicorum & vatum effata incognita , quum senatus populusque adsciverit. Interpretes autem Jovis optimi maximi publici augures signis & auspiciis postea vidento : disciplinam tenento.

21. Sacerdotes vineta virgetaque , & salutem populi auguranto. Quique agent rem duelli , quique popularem , auspicium præmonento , ollique obtemperanto. Divorumque iras providento , iisque apparento. Cælique fulgura regionibus ratis temperanto : urbemque , & agros , & templa liberata , & effata habento : quæque augur injusta , nefasta , vitiosa , dira defixerit , irrita infectaque sunt : quique non paruerit , capitale esto.

IX. Fæderum , pacis , belli , induciarum oratores , fetiales , judices duo sunt : bella disceptanto. Prodigia , portenta ad Etruscos aruspices , si senatus jusserit , deferunto : Etruriaque principes disciplinam doceto.

LIBER SECUNDUS. 53

Quibus divis creverint, procuranto: iidemque fulgura atque obslita pianto. Nocturna mulierum sacrificia ne sunt, præter olla, quæ pro populo rite fiant: neve quem initiant, nisi ut assolet Cereri, Græco sacro.

22. Sacrum commissum, quod neque expiari poterit, impiè commissum est: quod expiari poterit, publici sacerdotes expiant. Ludis publicis, quod sive curriculo, sive certatione corporum fiat, popularem lætitiâ in cantu & fidibus, & tibiis moderant; eamque cum divûm honore jungunt. Ex patriis ritibus optima colunt. Præter Idææ matris famulos, eosque justis diebus, ne quis stipem cogito. Sacrum, sacrove commendatum qui clepserit rapseritve, parricida esto. Perjurii pœna divina, exitium; humana, dedecus. Incestum pontifices supremo supplicio sanciunt. Impius ne audeto placare donis iram deorum. Cautè vota reddunt. Pœna violati juris esto. Ne quis agrum consecrato: auri, argenti, eboris sacrandi modus esto. Sacra privata perpetua manent. Deorum Manium jura, sancta sunt. Hos letho datos, divos habent. Sumptum in ollos luctumque minuunt.

X. ATT. Conclusa quidem est a te magna lex, sanè quàm breviter; &, ut mihi quidem videtur, non multum discrepat ista constitutio religionum a legibus Numæ nostrisque moribus. M. An censes, quum

in illis de republica libris persuadere videatur Africanus, omnium rerumpublicarum nostram veterem illam fuisse optimam, non necesse esse optimæ reipublicæ leges dare consentaneas? ATT. Immo prorsus ita censeo. M. Ergo adeo expectate leges, quæ genus illud optimum reipublicæ contineant; &, si quæ fortè a me hodie rogabuntur, quæ non sint in nostra republica, nec fuerint, tamen erant ferè in more majorum, qui tum, ut lex, valebat.

24. ATT. Suade igitur, si placet, istam ipsam legem, ut ego, UTI ROGAS, possim edicere. M. Ain' tandem, Attice, non es edicturus aliter? ATT. Prorsus majorem quidem rem nullam sciscam aliter: in minoribus, si voles, remittam hoc tibi. M. Atque mea quidem sententia est. At, ne longum fiat, videtè. ATT. Utinam quidem! quid enim agere malumus? M. *Castè* jubet lex adire ad deos, animo videlicet, in quo sunt omnia: nec tollit castimoniam corporis; sed hoc oportet intelligi, quum multum animus corpori præstet, observeturque, ut casto corpore adeatur, multò esse in animis id servandum magis. Nam illud vel aspersione aquæ, vel dierum numero tollitur; animi labes nec diuturnitate vanescere, nec am-
nibus ullis elui potest.

25. Quòd autem *pietatem* adhiberi, *opes* amoveri jubet, significat probitatem gratam esse deo; sumptum esse removendum: quid est enim, quum paupertatem divitiis etiam inter homines esse æqualem velimus, cur eam, sumptu ad sacra addito, deorum aditu arceamus? præsertim quum ipsi deo nihil minùs gratum futurum sit, quàm non omnibus patere ad se placandum & colendum viam. Quòd autem non iudex, sed deus ipse *vindex* constituitur, præsentis pœnæ metu religio confirmari videtur. Suosque deos, aut novos, aut alienigenas coli, confusione habet religionum, & ignotas cæremonias etiam sacerdotibus. Nam a patribus acceptos deos ita placet coli, si huic legi paruerunt ipsi. Patrum delubra esse in urbibus censeo: nec sequor magos Persarum; quibus auctoribus Xerxes inflammasse templa Græciæ dicitur, quòd parietibus includerent deos, quibus omnia deberent esse patentia ac libera, quorumque hic mundus omnis templum esset & domus.

XI. Meliùs Græci, atque nostri: qui, ut augerent pietatem in deos, easdem illos, quas nos, urbes incolere voluerunt: affert enim hæc opinio religionem utilem civitatibus: siquidem & illud bene dictum est a Pythagora, doctissimo viro,

Tum maximè & pietatem, & religionem versari in animis, quum rebus divinis operam daremus; & quod Thales, qui sapientissimus in septem fuit, Homines existimare oportere, omnia quæ cernerentur, deorum esse plena: fore enim omnes castiores, veluti qui in fanis essent maximè religiosi. Est enim quadam opinione species deorum in oculis, non solum in mentibus.

27. Eademque rationem luci habent in agris: neque ea, quæ a majoribus prodita est quum dominis, tum famulis, posita in fundi villæque conspectu, religio Larum repudianda est. Jam ritus familiæ patrumque servare, id est (quoniam antiquitas proximè accedit ad deos) a diis quasi traditam religionem tueri. Quod autem ex hominum genere consecratos, sicut Herculem & ceteros, coli lex jubet, indicat omnium quidem animos immortales esse, sed fortium bonorumque divinos.

28. Bene verò, quòd Mens, Pietas, Virtus, Fides, consecratur manu: quarum omnium Romæ dedicata publicè templa sunt; ut illa qui habeant (habent autem omnes boni) deos ipsos in animis suis collocatos putent. Nam illud vitiosum Athenis, quòd, Cylonio scelere expiato, Epimenide Crete suadente, fecerunt Con-

turneliæ fanum & Impudentiæ. Virtutes enim, non vitia, consecrare decet. Araque vetus stat in Palatio, Febris: & altera Esquiliis, Malæ Fortunæ: quæ omnia ejusmodi detestanda atque repudianda sunt. Quodd si fingenda sunt nomina, Vicæ Potæ potiùs vincendi, potiundique, Stasfandique cognomina Statoris, & Invicti Jovis, rerumque expetendarum nomina, Salutis, Honoris, Opis, Victoriæ: quoniamque expectatione rerum bonarum, erigitur animus, rectè etiam a Calatino Spes consecrata est: Fortunaque sit vel *Hujusce diei*, nam valet in omnes dies; vel *Respiciens*, ad opem ferendam; vel *Fors*, in quo incerti casus significantur magis; vel *Primigenia*, a gignendo; *Comes*; tum ***

Desunt hîc alia Fortuna cognomina.

XII. Feriarum festorumque dierum ratio in liberis quietem habet litium & iurgiorum; in servis, operum & laborum; quas compositor anni conferre debet & ad perfectionem operum rusticorum: quod tempus, ut sacrificiorum libamenta ferventur, foetusque pecorum, quæ dicta in lege sunt, diligenter habenda ratio intercalandi est; quod institutum peritè a Numma, posteriorum pontificum negligentia dissolutum est. Jam illud ex institutis pon-

tificum & aruspicum non mutandum est; quibus hostiis immolandum cuique deo, cui majoribus, cui lactentibus, cui maribus, cui feminis. Plures autem deorum omnium, singuli singulorum sacerdotes, & respondendi juris, & cum fide tuendarum religionum facultatem afferunt. Quumque Vesta, quasi focus urbis, ut Græco nomine est appellata (quod nos propè idem Græcum interpretatum nomen tenemus) consepta sit; ei colendæ virgines præsent, ut advigiletur facilius ad custodiam ignis, & sentiant mulieres in natura feminarum omnem castitatem peti.

30. Quod sequitur verò, non solum ad religionem pertinet, sed etiam ad civitatis statum, ut sine iis, qui sacris publicè præsent, religioni privatae satisfacere non possint: continet enim, reipublicæ consilio & auctoritate optimatum semper populum indigere. Descriptioque sacerdotum nullum justæ religionis genus prætermittit: nam sunt ad placandos deos alii constituti, qui sacris præsent solennibus; ad interpretanda alii prædicta vatum; neque multi tamen, ne esset infinitum, neve ea ipsa, quæ suscepta publicè essent; quisquam extra collegium nosset.

31. Maximum autem & præstantissimum in republica jus est augurum, & cum auctoritate conjunctum: neque verò

hoc, quia sum ipse augur, ita sentio, sed quia sic existimare nos est necesse. Quid enim majus est, si de jure quærimus, quàm posse a summis imperiis & summis potestatibus comitiatus & concilia, vel instituta dimittere, vel habita rescindere? quid gravius, quàm rem susceptam dirimi, si unus augur ALIO DIE dixerit? quid magnificentius, quàm posse decernere, ut magistratu se abdicent consules? quid religiosius, quàm cum populo, cum plebe agendi jus, aut dare, aut non dare? quid? legem, si non jure rogata est, tollere? ut Titiam decreto collegii; ut Livias, consilio Philippi, consulis & auguris: nihil domi, nihil foris per magistratus gestum, sine eorum auctoritate posse cuiquam probari?

XIII. ATT. Age, jam ista video, fateorque esse magna: sed est in collegio vestro inter Marcellum & Appium, optimos augures, magna dissensio (nam eorum ego in libros incidi) quum alteri placeat, auspicia ista ad utilitatem esse reipublicæ composita; alteri disciplina vestra quasi divinare videatur prorsus posse. Hac tu de re, quæro quid sentias. M. Egone? divinationem, quam Græci *μαρτυρη* appellant, esse censeo, & hujus hanc ipsam partem, quæ est in avibus ceterisque signis disciplinæ nostræ; quòd quum summos deos esse concedamus, eorumque mente mundum regi,

& eorumdem benignitatem hominum consulere generi, & posse nobis signa rerum futurarum ostendere, non video cur esse divinationem negem.

33. Sunt autem ea, quæ posui, ex quibus id, quod volumus, efficitur & cogitur. Jam verò permultorum exemplorum & nostra est plena respublica, & omnia regna, omnesque populi, cunctæque gentes, augurum prædictis multa incredibiliter vera cecidisse. Neque enim Polyidi, neque Melampodis, neque Mopsi, neque Amphiarai, neque Calchantis, neque Heleni tantum nomen fuisset, neque tot nationes id ad hoc tempus retinuissent, Arabum, Phryguni, Lycaonum, Cilicum, maximèque Pisidarum, nisi vetustas ea certa esse docuisset: nec verò Romulus noster auspicatò urbem condidisset, neque Attii Navii nomen memoriâ floreret tam diu, nisi hi omnes multa ad veritatem admirabilia dixissent. Sed dubium non est, quin hæc disciplina & ars augurum evanuerit jam & vetustate & negligentia. Itaque neque illi assentior, qui hanc scientiam negat umquam in nostro collegio fuisse; neque illi, qui esse etiam nunc putat: quæ mihi videtur apud majores fuisse dupliciter, ut ad reipublicæ tempus nonnumquam, ad agendi consilium sæpissime pertineret.

34. ATT. Credo, hercle, ita esse, isti-

LIBER SECUNDUS. 61

que rationi potissimum assentior. Sed redde cetera. M. Reddam verò, &, si potero, brevi.

XIV. Sequitur enim de jure belli; in quo & suscipiendo, & gerendo, & depouendo jus ut plurimum valet, & fides: horumque ut publici interpretes essent, lege sancimus. Jam de aruspicum religione, de expiationibus & procurationibus satis superque in ipsa lege dictum puto. ATT. Assentior, quoniam omnis hæc in religione versatur oratio. M. At verò, quod sequitur, quomodo aut tu assentire, aut ego reprehendam, sanè quæro, Tite.

35. ATT. Quid tandem est? M. De nocturnis sacrificiis mulierum. ATT. Ego verò assentior; excepto præsertim in ipsa lege solenni sacrificio ac publico. M. Quid ergo agat Iacchus Eumolpidæque nostri, & augusta illa mysteria, siquidem sacra nocturna tollimus? non enim populo Romano, sed omnibus bonis firmisque populis leges damus.

36. ATT. Excipis, credo, illa, quibus ipsi initiati sumus. M. Ego verò excipiam. Nam mihi quum multa eximia divinaque videntur Athenæ tuæ peperisse, atque in vita hominum attulisse, tum nihil melius illis mysteriis, quibus ex agresti immanique vita exculti ad humanitatem, & mitigati sumus: *Initia*que ut appellantur, ita

re verâ principia vitæ cognovimus; neque solum cum lætitia vivendi rationem accepimus, sed etiam cum spe meliore moriendi. Quid autem mihi displiceat in nocturnis, poëtæ indicant comici. Quâ licentiâ Romæ datâ, quidnam egisset ille, qui in sacrificium cogitatam libidinem intulit, quò ne imprudentiam quidem oculorum adjici fas fuit? *ATT.* Tu verò istam Romæ legem rogato: nobis nostras ne ademeris.

XV. M. Ad nostra igitur revertor; quibus profectò diligentissimè fanciendum est, ut mulierum famam multorum oculis lux clara custodiat, initienturque eo ritu Cereri, quo Romæ initiantur. Quo in genere severitatem majorum senatûs vetus auctoritas de Bacchanalibus, & consulum, exercitu adhibito, quæstio animadversioque declarat. Atque omnia nocturna, ne nos duriores fortè videamur, in media Græcia Diagondas Thebanus lege perpetuâ sustulit. Novos verò deos, & in his colendis nocturnas pervigilationes sic Aristophanes, facetissimus poëta veteris comœdiæ, vexat, ut apud eum Sabazius, & quidam alii dii peregrini judicati, e civitate ejiciantur. Publicus autem sacerdos imprudentiam consilio expiatam metu liberet; audaciam in admittendis religionibus foedis damnet, atque impiam judicet.

38. Jam ludi publici quoniam sunt caveâ circoque divisi, sint corporum certatione (cursu, & pugilatione, & luctatione) curriculisque equorum usque ad certam victoriam circo constitutis; caveæ cantu, ac fidibus & tibiis; dummodo ea moderata sint, ut lege præscribitur: assentior enim Platoni, nihil tam facile in animos teneros atque molles influere, quàm varios canendi sonos: quorum dici vix potest quanta sit vis in utramque partem. Namque & incitat languentes, & languefacit excitatos, & tum remittit animos, tum contrahit: civitatumque hoc multarum in Græcia interfuit, antiquum vocum servare modum; quarum mores lapsi ad mollietiam, pariter sunt immutati cum cantibus, aut hac dulcedine corruptelâque depravati, ut quidam putant; aut, quum severitas eorum ob alia vitia cecidisset, tum fuit in auribus animisque mutatis etiam huic mutationi locus.

39. Quamobrem ille quidem sapientissimus Græciæ vir, longèque doctissimus, valde hanc labem veretur: negat enim mutari posse musicas leges sine mutatione legum publicarum. Ego nec tam valde id timendum, nec planè contemnendum puto. Illa quidem, quæ solebant quondam compleri severitate jucundâ Livianis & Nævianis modis; nunc, ut eadem exsultent; cervices oculosque pariter cum mo-

dorum flexionibus torqueant. Graviter olim ista vindicabat vetus illa Græcia, longè providens, quàm sensim perniciēs illap̄sa civium animos, malis studiis, malisque doctrinis repentè totas civitates everteret; si quidem illa severa Lacedæmon nervos jussit, quos plures quàm septem haberet, in Timothei fidibus demi.

XVI. Deinceps in lege est, ut de ritibus patriis colantur optimi: de quo quum consuerent Athenienses Apollinem Pythium, quas potissimùm religiones teneant; oraculum editum est, *Eas quæ essent in more majorum*. Quò quum iterum venissent, majorumque morem dixissent sæpe esse mutatum, quæsivissentque, quem morem potissimùm sequerentur e variis; respondit, *Optimum*. Et profectò ita est, ut id habendum sit antiquissimum & deo proximum, quod sit optimum. Stipem fustulimus, nisi eam, quam ad paucos dies propriam Idææ Matris excepimus: implet enim superstitione animos, & exhaurit domos. Sacrilego pœna est, neque ei soli, qui sacrum abstulerit, sed etiam ei, qui sacro commendatum; quod & nunc multis fit in fanis. Alexander in Cilicia deposuisse apud Solos in delubro pecuniam dicitur; & Atheniensis Clisthenes Junoni Samiæ, civis egregius, quum rebus timeret suis, filiarum dotes credidit. Sed jam

LIBER SECUNDUS. 65

de perjuriis: de incestis nihil fanè hoc quidem loco disputandum est.

41. *Donis impii ne placare audeant deos.* Platonem audiant, qui vetat dubitare, quâ sit mente futurus deus; quum vir nemo bonus ab improbo se donari velit. Diligentia votorum fatis in lege dicta est, ac voti sponsio, quâ obligamur deo. Pœna verò violatæ religionis justam recusationem non habet. Quid ego hîc sceleratorum utar exemplis? quorum sunt plenæ tragœdiæ. Quæ ante oculos sunt, ea potius attingantur: etsi hæc commemoratio vereor ne supra hominis fortunam esse videatur; tamen, quoniam mihi sermo est apud vos, nihil reticebo; velimque hoc, quod loquar, diis immortalibus gratum potius videri, quàm grave. *** *Paucula desunt.*

XVII. Omnia tum perditorum civium scelere, discessu meo, religionum jura polluta sunt: vexati nostri Lares familiares: in eorum sedibus exædificatum templum Licentiæ: pulsus a delubris is, qui illa servarat. Circumspicite celeriter animo (nihil enim attinet quemquam nominari) qui sint rerum exitus consecuti. Nos, qui illam custodem urbis, omnibus ereptis nostris rebus ac perditis, violari ab impiis passi non sumus, eamque ex nostra domo in ipsius patris domum detulimus, judicia senatûs, Italiæ, gentium denique omnium,

conservatæ patriæ consecuti sumus ; quo quid accidere potuit homini præclarius ? Quorum scelere religiones tum prostratæ afflictæque sunt, partim ex illis distracti ac dissipati jacent : qui verò ex iis & horum scelerum principes fuerunt, & præter ceteros in omni religione impii, non solum vitâ cruciati atque dedecore, verùm etiam sepulturâ ac justis exsequiarum caruerunt.

43. Q. Equidem ista agnosco, frater, & meritas diis gratias ago : sed nimis sæpe secus aliquantò videmus evadere. M. Non enim, Quinte, rectè existimamus, quæ pœna divina sit ; & opinionibus vulgi rapimur in errorem, nec vera cernimus : morte, aut dolore corporis, aut luctu animi, aut offensione judicii, hominum misérias ponderamus ; quæ fateor humana esse & multis bonis viris accidisse : sceleris autem est pœna tristis ; & præter eos eventus, qui sequuntur, per se ipsa maxima est. Vidimus eos, qui nisi odissent patriam, numquam inimici nobis fuissent, ardentes quum cupiditate, tum metu, tum conscientia ; quid agerent, modò timentes ; vicissim contemnentes religiones ; judicia perrupta ab iisdem ; corrupta hominum, non deorum.

44. Reprimam jam, & non insequar longius, eoque minùs, quò plus pœnarum habeo, quàm petivi : tantum ponam, dupli-

LIBER SECUNDUS. 67

cem pœnam esse divinam, quòd constaret
& ex vexandis vivorum animis, & eâ famâ mortuorum, ut eorum exitium & iudicio vivorum & gaudio comprobetur.

XVIII. *Agri autem ne consecrentur.* Platonî prorsus assentior, qui, si modò interpretari potuero, his ferè verbis utitur.
» Terra igitur, ut focus domiciliorum,
» sacra deorum omnium est: quocirca ne
» quis iterum idem consecrato. Aurum autem
» & argentum in urbibus & privatim,
» & in fanis invidiosa res est. Tum ebur
» ex inani corpore extractum, haud satis
» castum donum deo. Jam æs atque ferum
» duelli instrumenta, non fani. Lignum
» autem quod qui voluerit, uno e
» ligno dedicato, itemque lapideum, in
» delubris communibus. Textile ne operosius,
» quàm mulieris opus menstruum.
» Color autem albus, præcipuè decorus
» deo est tum in ceteris, tum maximè in
» textili. Tincta verò absint, nisi a bellicis
» insignibus. Divinissima autem dona,
» aves & formæ ab uno pictore uno absolutæ
» die: itemque cetera hujus exempli dona sunt.
» Hæc illi placent: sed ego cetera non tam restrictè præfinio,
» vel hominum vitiis, vel subsidii temporum victus.
» Terræ cultum segniorem suspicor fore, si ad eam tuendam,
» ferroque subigendam, superstitionis aliquid accesserit.

46. ATT. Habeo ista. Nunc de sacris perpetuis, & de Manium jure restat. M. O miram memoriam, Pomponi, tuam! at mihi ista exciderant. ATT. Ita credo; sed tamen hoc magis eas res & memini & exspecto, quod & ad pontificium jus & ad civile pertinent. M. Verò; & apertissima sunt istis de rebus & responsa & scripta multa; & ego in hoc omni sermone nostro, quod ad cumque legis genus me disputatio nostra deduxerit, tractabo, quoad potero, ejus ipsius generis jus civile nostrum: sed ita, locus ipse ut notus sit, ex quo ducatur quæque pars juris; ut non difficile sit, qui paulum modò ingenio possit moveri, quæcumque nova causa consultatiove acciderit, ejus tenere jus, quum scias a quo sit capite repetendum.

XIX. Sed jurisconsulti, sive erroris obijciendi causâ, quò plura & difficiliora scire videantur; sive, quod similis veri est, ignoratione docendi (nam non solum scire aliquid, artis est, sed quædam ars etiam docendi) sæpe, quod positum est in una cognitione, id in infinita dispartiuntur: velut in hoc ipso genere, quàm magnum illud Scævola faciunt, pontifices ambo, & iidem juris peritissimi? Sæpe, inquit Publii filius, ex patre audiui, pontificem neminem bonum esse, nisi qui jus civile cognosset. Totumne? quid ita? quid enim ad ponti-

ficem, de jure parietum, aut aquarum, aut ullo omnino? Ergo, quod cum religione conjunctum est: id autem quantulum est? de sacris, credo, de votis, de feriis, de sepulcris, & si quid ejusmodi est. Cur igitur hæc tanta facimus, quum cetera perparva sint? De sacris autem, qui locus patet latius, hæc sit una sententia, ut conserventur semper, & deinceps familiis prodantur, & ut in lege posui, *perpetua sint sacra*.

48. Hoc uno posito, hæc jura pontificum auctoritate consecuta sunt, ut, ne morte patrisfamiliæ sacrorum memoria occideret, iis essent ea adjuncta, ad quos ejusdem morte pecunia venerit. Hoc uno posito, quod est ad cognitionem disciplinæ fati, innumerabilia nascuntur, quibus implentur jurisconsultorum libri: quærentur enim, qui adstringantur sacris. Heredum causa justissima est: nulla est enim persona, quæ ad vicem ejus, qui è vita enigraverit, propius accedat. Deinde qui morte testamentove ejus tantumdem capiat, quantum omnes heredes. Id quoque ordine: est enim ad id, quod propositum est, accommodatum. Tertio loco, si nemo sit heres, is, qui de bonis, quæ ejus fuerint, quum moritur, usu ceperit plurimum possidendo. Quarto, si nemo sit qui ullam rem ceperit; de creditoribus ejus, qui plurimum servet. Extrema illa persona est,

ut is, qui ei, qui mortuus sit, pecuniam debuerit, neminique eam solverit, perinde habeatur, quasi eam pecuniam ceperit.

XX. Hæc nos a Scævola didicimus; non ita descripta ab antiquis. Nam illi quidem his verbis docebant, tribus modis sacris adstringi: hereditate; aut, si maiorem partem pecuniæ capiat; aut, si major pars pecuniæ legata est, si inde quippiam ceperit. Sed pontificem sequamur.

§ 0. Videtis igitur omnia pendere ex uno illo, quod pontifices pecuniam sacris coniungi volunt; iisdemque ferias & cæremónias adscribendas putant. Atque etiam dant hoc Scævolæ, quod est partitio: ut, si in testamento deducta, scripta non sit, ipsique minus ceperint, quàm omnibus heredibus relinquatur, sacris ne alligentur. In donatione hoc iidem secus interpretantur: & quod paterfamiliâs in ejus donatione, qui in ipsius potestate esset, approbavit, ratum est; quod eo insciente factum est, si id is non approbat, ratum non est.

§ 1. His propositis, quæstiunculæ multæ nascuntur; quas qui non intelligat, si ad caput referat, per se ipse facîle perspiciat. Veluti si minus quis cepisset, ne sacris alligaretur; ac post de ejus heredibus aliquis exegisset pro sua parte id, quod ab eo, cujus ipse heres esset, prætermissum fuisset; eaque pecuniâ non minor esset fac-

ta cum superiore exactione, quàm hereditibus omnibus esset relicta; qui eam pecuniam exegisset, solum sine coheredibus, sacris alligari. Quin etiam cavent, ut, cui plus legatum sit, quàm sine religione capere liceat, is per æs & libram heredem testamenti solvat; propterea quòd eo loco res est, ita solutâ hereditate, quasi ea pecunia legata non esset.

XXI. Hoc ego loco multisque aliis quaero a vobis, Scævolæ pontifices maximi, & homines, meo quidem iudicio, acutissimi, quid sit, quod ad jus pontificium civile appetatis: civilis enim juris scientiâ pontificium quodam modo tollitis: nam sacra cum pecunia, pontificum auctoritate, nullâ lege, conjuncta sunt. Itaque si vos tantummodo pontifices essetis, pontificalis maneret auctoritas: sed quòd iidem juris civilis estis peritissimi, hac scientiâ illam eluditis. Placuit P. Scævolæ & Coruncanio, pontificibus maximis, itemque ceteris, qui tantumdem caperet, quantum omnes heredes, sacris alligari.

§3. Habeo jus pontificium. Quid huc accessit ex jure civili? partitionis caput, scriptum cautè, ut centum nummi deducerentur. Inventa est ratio, cur pecunia factorum molestiâ liberaretur. Quòd si hoc, qui testamentum faciebat, cavere noluisset, admonet jurisconsultus hic quidem ipse

Mucius, pontifex idem, ut minùs capiat, quàm omnibus hêredibus relinquatur. Super dicebant qui quid cepisset, adstringi. Rursus sacris liberantur. Hoc verò nihîl ad pontificium jus, & e medio est jure civili, ut per æs & libram heredem testamenti solvant, & eodem loco res sit, quasi ea pecunia legata non esset, si is, cui legatum est, stipulatus est id ipsum, quod legatum est, ut ea pecunia ex stipulatione debeatur; sitque ea non *alligata sacris*.

§4. *Venio nunc ad Manium jura, quæ majores nostri & sapientissimè instituerunt; & religiosissimè coluerunt: Februario autem mense, qui tunc extremus anni mensis erat; mortuis parentari voluerunt: quod tamen D. Brutus, ut scriptum a Sisenna est, Decembri facere solebat. Cujus ego rei causam quum mecum quærerem, Brutum reperiẽbam idcirco a more majorum discessisse (nam Sisennam video causam, cur is vetus institutum non servarit, ignorare; Brutum autem majorum institutum temerè neglexisse non sit mihi veri simile) doctum hominem fanè, cujus fuit Accius perfamiliaris: sed mensẽ, credo, extremum anni, ut veteres Februarium, sic hic Decembrem sequebatur. Hostiã autem maximã parentare, pietati esse adjunctum putabat.*

XXII. Jam tanta religio est sepulcrorum, ut extera sacra & gentem inferri fas negent

LIBER SECUNDUS. 73

negent esse ; idque apud majores nostros A. Torquatus in gente Popilia judicavit. Nec verò tam denicales , quæ a nece appellatæ sunt , quia residentur mortuis , quàm ceterorum cœlestium quieti dies , *feriæ* nominarentur , nisi majores eos , qui ex hac vita migrassent , in deorum numero esse voluissent. Eas in eos dies conferre jus , quibus neque ipsius , neque publicæ feriæ sint : totaque hujus juris compositio pontificalis magnam religionem cæremoniæque declarat. Neque necesse est edisseri a nobis , quæ finis funestæ familiæ ; quod genus sacrificii Lare vervecibus fiat ; quemadmodum os rejectum terræ obtegatur ; quæque in porca contracta jura sint ; quo tempore incipiat sepulcrum esse , & religione teneatur.

56. At mihi quidem antiquissimum sepulturæ genus id fuisse videtur , quo apud Xenophontem Cyrus utitur : redditur enim terræ corpus , & ita locatum ac situm , quasi operimento matris obducitur : eodemque ritu in eo sepulcro , quod procul ad Fontis aras , regem nostrum Numam conditum accepimus ; gentemque Corneliam usque ad memoriam nostram hac sepulturâ scimus esse usam. C. Marii sitas reliquias apud Anienem , dissipari jussit Sulla victor , acerbore odio incitatus , quàm si tam sapiens fuisset , quàm fuit vehemens.

Tomus X.

D

57. Quod haud scio an timens suo corpori posse accidere, primus e patriciis Corneliis igni voluit cremari: declarat enim Ennius de Africano, *Hic est ille situs*. Verè: nam siti dicuntur ii, qui conditi sunt: nec tamen eorum antè sepulcrum est, quàm iusta facta & corpus incensum est. Et quod nunc communiter in omnibus sepultis penitus, humati dicuntur; id erat proprium tum in iis, quos humus injecta contegeret: eumque morem jus pontificale confirmat. Nam priusquam in eos injecta gleba est, locus ille, ubi crematum est corpus, nihil habet religionis: injectâ glebâ, tum & illic humatus est, & gleba vocatur; ac tum denique multa religiosa jura complectitur. Itaque in eo, qui in navi necatus, deinde in mare projectus esset, decrevit P. Mucius, familiam puram, quòd os supra terram non exstaret: porcam heredi esse contractam, & habendas triduum ferias, & porco feminâ piaculum pati: si in mari mortuus esset, eadem, præter piaculum & ferias.

XXIII. ATT. Video, quæ sint in pontificio jure. Sed quæro, quidnam sit in legibus. M. Pauca sanè, Tite, &, uti arbitror, non ignota vobis. Sed ea non tam ad religionem spectant, quàm ad jus sepulcrorum. *Hominem mortuum*, inquit lex in XII tabulis, *in urbe ne sepelito, neve urito*. Credo, vel propter ignis periculum. Quod autem addit, *neve urito*,

indicat, non qui uratur, sepeliri, sed qui humetur. ATT. Quid, qui post XII in urbe sepulti sunt, clari viri? M. Credo, Tite, fuisse, aut eos, quibus hoc ante hanc legem virtutis causâ tributum est, ut Publicolæ, ut Tuberto, quod eorum posterii jure tenuerunt; aut eos, si qui hoc, ut C. Fabricius, virtutis causâ, soluti legibus, consecuti sunt. Sed in urbe sepeliri lex vetat. Sic decretum a pontificum collegio, non esse jus in loco publico fieri sepulcrum. Nostis extra portam Collinam, ædem Honoris: & aram in eo loco fuisse, memoriæ proditum est: ad eam quum lamina esset inventa, & in ea scriptum, DOMINA HONORIS; ea causa fuit ædis hujus dedicandæ. Sed quum multa in eo loco sepulcra fuissent, exarata sunt: statuit enim collegium, locum publicum non potuisse privatâ religione obligari.

59. Jam cetera in XII minuendi sumptus lamentationesque funeris, translata de Solonis ferè legibus. *Hoc plus*, inquit, *ne facito. Rogum asciâ ne polito*. Nostis, quæ sequuntur. Discebamus enim pueri XII, ut carmen necessarium; quas jam nemo discit. Extenuato igitur sumptu, tribus riciniis, & vinculis purpuræ, & decem tibicinibus, tollit etiam lamentationem. *Mulieres genas ne radunto, neve lessum funeris ergo habento*. Hoc veteres interpretes, Sex. Ælius, L. Acilius non satis se intelligere dixerunt, sed

fuspiciari vestimenti aliquod genus funebris: L. Ælius, lessum, quasi lugubrem ejulationem, ut vox ipsa significat: quod eò magis iudico verum esse, quia lex Solonis id ipsum vetat. Hæc laudabilia, & locupletibus ferè cum plebe communia. Quod quidem maximè e natura est, tolli fortunæ discrimen in morte.

XXIV. Cetera item funebria, quibus luctus augetur, Duodecim sustulerunt. *Homini*, inquit, *mortuo ne ossa legito, quò post funus faciat.* Excipit bellicam peregrinamque mortem. Hæc præterea sunt in legibus de unctura; quibus *servilis unctura* tollitur, omnisque *circumpotatio*. Quæ & rectè tolluntur, neque tollerentur, nisi fuissent. *Ne sumptuosa respersio, ne longæ coronæ, ne accerræ* prætereant. Illa jam significatio est, laudis ornamenta ad mortuos pertinere, quòd *coronam virtute partam*, & ei, qui peperisset, & ejus parenti, sine fraude esse lex impositam jubet: credoque, quod erat facitatum, ut uni plura fierent, lectique plures sternerentur; id quoque ne fieret, lege sanctum est. Qua in lege quum esset, *Neve aurum addito*, quàm humanè excipit altera lex, *Quoi auro dentes vincti escunt, ast im cum illo sepelire urereve, se fraude esto.* Et simul illud videtote, aliud habitum esse, sepelire, & urere.

61. Duæ sunt præterea leges de sepulcris;

LIBER SECUNDUS. 77

quarum altera privatorum ædificiis, altera ipsis sepulcris cavet. Nam quòd *rogum bustumve novum* vetat *propius sexaginta pedes adjici ædes alienas, invito domino*; incendium videtur arcere. Quòd autem *forum*, id est, vestibulum sepulcri, *bustumve, usucapi* vetat; tuetur jus sepulcrorum. Hæc habemus in duodecim; sanè secundum naturam, quæ norma legis est. Reliqua sunt in more: funus ut indicatur, si quid ludorum; dominusque funeris utatur accenso atque liCTORIBUS. *Honoratorum virorum laudes in concione memorantur, easque etiam cantu ad tibicinem prosequuntur*; cui nomen *neniæ*: quo vocabulo etiam Græcis cantus lugubres nominantur.

XXV. Q. Gaudeo nostra jura ad naturam accommodari; majorumque sapientiâ admodum delector. M. Sed credo, Quinte, ut ceteri sumptûs, sic etiam sepulcrorum modum rectè requiri: quos enim ad sumptus progressa jam ista res sit, in C. Figuli sepulcro vides. Sed credo minimam olim istius rei fuisse cupiditatem, alioquin multa exstarent exempla majorum. Nostræ quidem legis interpretes, quo capite jubentur sumptus & luctum remove a deorum Manium jure, hoc intelligunt, in primis sepulcrorum magnificentiam esse minuendam.

63. Nec hæc a sapientissimis legum scriptoribus neglecta sunt: nam & Athenis jam

ille mos a Cecrope, ut aiunt, permansit, hoc jus terrâ humandi, quam quum proximi injecerant, obductaque terra erat, frugibus obferebatur; ut sinus & gremium quasi matris mortuo tribueretur; solum autem frugibus expiatum ut vivis redderetur. Sequebantur epulæ, quas inibant parentes coronati: apud quas de mortui laude, quum quid veri erat, prædicatum; nam mentiri nefas habebatur: ac iusta confecta erant.

64. Posteaquam, ut scribit Phalereus, sumptuosa fieri funera & lamentabilia cœpissent, Solonis lege sublata sunt: quam legem eisdem prope verbis nostri decemviri in undecimam tabulam conjecerunt. Nam de tribus riciniis, & pleraque alia Solonis sunt: de lamentis verò expressa verbis sunt, *Mulieres genas ne radunto, neve lessum fune-
ris ergo habento.*

XXVI. De sepulcris autem nihil est apud Solonem ampliùs, quàm, *Ne quis ea deleat, neve alienum inferat*: pœnaque est, *Si quis bustum* (nam id puto appellari *τύμβος*) *aut monumentum*, inquit, *aut columnam violarit, dejecerit, fregerit.* Sed pòst aliquantò propter has amplitudines sepulcrorum, quas in Ceramicò videmus, lege sanctum est, *ne quis sepulcrum faceret operosius, quàm quod decem homines effecerint triduo.* Neque id opere tectorio exornari, nec Hermas hos, quos vocant, licebat imponi; nec de mortui

laude, nisi in publicis sepulturis, nec ab alio, nisi qui publicè ad eam rem constitutus esset, dici licebat. Sublata etiam erat celebritas virorum ac mulierum, quò lamentatio minueretur: habet enim luctum concursus hominum.

66. Quocirca Pittacus omnino accedere quemquam vetat in funus aliorum. Sed ait rursus idem Demetrius, increbuisse eam funerum sepulcrorumque magnificentiam, quæ nunc ferè Romæ est; quam consuetudinem lege minuit ipse: fuit enim hic vir, ut scitis, non solum eruditissimus, sed etiam civis e republica maximè, tuendæque civitatis peritissimus. Iste igitur sumptum minuit non solum pœnâ, sed etiam tempore: ante lucem enim iussit efferri. Sepulcris autem novis finivit modum: nam super terræ tumulum noluit quid statui, nisi columellam tribus cubitis ne altiore, aut mensam, aut labellum: & huic procurationi certum magistratum præfecerat.

XXVII. Hæc igitur Athenienses tui. Sed videamus Platonem, qui iusta funerum rejicit ad interpretes religionum; quem nos morem tenemus: de sepulcris autem dicit hæc. » Vetat ex agro culto, eove, qui coli » possit, ullam partem fumi sepulcro: sed, » quæ natura agri tantummodo efficere possit; » ut mortuorum corpora sine detrimento vivorum recipiat, ea potissimum ut

80 DE LEGIBUS LIBER II.

» compleatur : quæ autem terra fruges fer-
 » re , & , ut mater , cibos suppeditare pos-
 » sit , eam ne quis nobis minuat , neve vi-
 » vus , neve mortuus.

68. » Exstrui autem vetat sepulcrum al-
 » tius , quàm quod quinque diebus homines
 » quinque absolverint : nec e lapide excita-
 » ri plus , nec imponi , quàm quod capiat
 » laudem mortui , incisam ne plus quatuor
 » heroicis versibus ; » quos *longos* appel-
 lat Ennius. Habemus igitur hujus quoque
 auctoritatem de sepulcris summi viri ; a quo
 iterum funerum sumptus præfinitur ex cen-
 sibus a minis quinque usque ad minam.
 Deinceps dicit eadem illa de immortalitate
 animorum , & reliquâ post mortem tran-
 quillitate bonorum , pœnis impiorum.

69. Habetis igitur explicatum omnem , ut
 arbitror , religionis locum. Q. Nos verò , fra-
 ter , & copiosè quidem : sed perge ad cetera.
 M. Pergam equidem : & quoniam libitum
 est vobis me ad hæc impellere , hodierno
 semone conficiam , spero ; hoc præsertim
 die : video enim Platonem idem fecisse , om-
 nemque orationem ejus de legibus perora-
 tam esse uno æstivo die. Sic igitur faciam ,
 & dicam de magistratibus : id enim est pro-
 fectò , quod constitutâ religione republi-
 cam contineat maximè. ATT. Tu verò dic ,
 & istam rationem , quam cœpisti , tene.



DE LEGIBUS,

LIBER TERTIUS.

CONSTITUTO religionum jure, deinceps civitatis gubernatores rectoresque describit. Nam quum nihil reipublicæ ~~inimiciæ~~ sit exitius, quæ florentissimas nationes, imperiaque potentissima interdum subvertit; secundum Deos nihil prius ducere legislator debet, quàm ut rectè & ordine magistratuum descriptionem componat. Primum ergo in legis exordio magistratum definit, eique cives ut pareant hortatur. Deinde legem de magistratuum descriptione, potestate, imperio sancit. Subjungit, ut libro secundo, ejus interpretationem & æquitatem; quod legistatorem Plato facere jubet. Postremò præparationem addit ad libros sequentes, qui desiderantur. TURNEBUS.

I. **M**ARCUS. Sequar igitur, ut institui, divinum illum vium; quem quadam admiratione commotus, sæpius fortasse laudo, quàm necesse est. **ATT.** Platonem videlicet dicis. **M.** Istam ipsum, Attice. **ATT.** Tu verò eum nec nimis valde umquam, nec nimis sæpe laudaveris: nam hoc mihi etiam nostri illi, qui neminem, nisi suum, laudari volunt, concedunt, ut eum arbitrato meo diligam. **M.** Bene hercle faciunt: quid enim est elegantia tuâ dignius? cuius & vita, & oratio consecuta mihi videtur difficillimam illam societatem gravitatis cum humanitate. **ATT.** Sanè gaudeo, quòd te interpellavi, quandoquidem tam præclarum mihi dedisti iudicii tui testimonium. Sed perge, ut cœperas. **M.** Laudemus igitur prius legem ipsam veris & propriis generis sui laudibus. **ATT.** Sanè quidem, sicut de religionum lege fecisti.

2. **M.** Videtis igitur, magistratûs hanc esse vim, ut præsit, præscribatque recta, & utilia, & conjuncta cum legibus. Ut enim magistratibus leges, ita populo præfunt magistratus; verèque dici potest, magistratum legem esse loquentem, legem autem mutum magistratum.

3. Nihil porrò tam aptum est ad jus conditionemque naturæ (quod quum dico, legem a me dici, nihilque aliud intel-

ligi volo) quàm imperium; sine quo nec domus ulla, nec civitas, nec gens, nec hominum universum genus stare, nec rerum natura omnis, nec ipse mundus potest: nam & hic deo paret, & huic obediunt maria terræque, & hominum vita jussis supremæ legis obtemperat.

II. Atque, ut ad hæc citiora veniam, & notiora nobis; omnes antiquæ gentes regibus quondam paruerunt: quod genus imperii primum ad homines iustissimos & sapientissimos deferrebat, idque in republica nostra maximè valuit, quoad ei regalis potestas præfuit: deinde etiam deinceps posteris prodebatur; quod & in his etiam, qui nunc regnantur, manet. Quibus autem regia potestas non placuit, non ii nemini, sed non semper uni parere voluerunt. Nos autem, quoniam leges damus liberis populis; quæque de optima republica sentiremus, in sex libris antè diximus; accommodabimus hoc tempore leges ad illum, quem probamus, civitatis statum.

5. Magistratibus igitur opus est; sine quorum prudentia ac diligentia esse civitas non potest: quorum descriptione omnis reipublicæ moderatio continetur. Neque solum iis præscribendus est imperandi, sed etiam civibus obtemperandi modus: nam & qui bene imperat, paruerit ali-

quando necesse est; & qui modestè paret; videtur, qui aliquando imperet, dignus esse. Itaque oportet & eum, qui paret, sperare se aliquo tempore imperaturum; & illum, qui imperat, cogitare, brevi tempore sibi esse parendum. Nec verò solùm ut obtemperarent obediuntque magistratibus, sed etiam ut eos colant diligentque, præscribimus, ut Charondas in suis facit legibus. Noster verò Plato Titanum e genere statuit eos, qui, ut illi cœlestibus, sic hi adversentur magistratibus. Quæ quum ita sint, ad ipsas jam leges veniamus, si placet. ATT. Mihi verò & istud, & ordo iste rerum placet.

III. M. *Iusta imperia sunt; iisque cives modestè, ac sine recusatione parento. Magistratus nec obedientem & noxium civem multâ, vinculis, verberibusve coerceto, nî par, majorve potestas, populusve prohibesit; ad quos provocatio esto. Quum magistratus judicassit inrogassitve; per populum multæ, pænæ certatio esto. Militiæ ab eo, qui imperabit, provocatio ne esto; quodque is, qui bellum geret, imperassit, jus ratumque esto. Minores magistratus, partiti juris, plures in plera sunt. Militiæ, quibus jussi erunt, imperanto, eorumque tribuni sunt. Domi pecuniam publicam custodiunt: vincula fontium servant: capitalia vindicant: æs, argentum, aurumve publicè signant:*

lites contractas judicanto: quodcumque senatus creverit, agunto.

7. *Suntoque ædiles cæratōres urbis, annonæ, ludorumque solennium: ollisque ad honoris amplioris gradum is primus adscensus esto. Censores populi ævitates, soboles, familias, pecuniasque censento: urbis templa, vias, aquas, ararium, vectigalia tuento: populique partes in tribus distribuunto: exin pecunias, ævitates, ordines partiunto: equitum peditumque prolem describunto: cælibes esse prohibento: mores populi regunto: probrum in senatu ne relinquunto: bini sunt: magistratum quinquennium habento: reliqui magistratus annui sunt: eaque potestas semper esto.*

8. *Juris disceptator, qui privata judicet, judicarive jubeat, prætor esto: is juris civilis custos esto: huic potestate pari, quotcumque senatus creverit populusve jufferit, tot sunt. Regio imperio duo sunt: iique præeundo, judicando, consulendo prætores, iudices, consules appellantur: militiæ, summum jus habento, nemini parento: ollis salus populi suprema lex esto. Eundem magistratum, ni interfuerint decem anni, ne quis capito. Ævitatem annali lege servant. Ast quando duellum gravius, discordiæve civium escunt, ænus, ne amplius sex menses, si senatus creverit, idem juris, quod duo consules, teneto: isque æve sinistrâ dictus, populi mæ-*

gister esto. Equitem cumque qui regat habeto pari jure cum eo, quicumque erit juris disceptator. Ast quando consul is est, magisterve populi; reliqui magistratus ne sunt.

9. Auspicia patrum sunt; ollique ex se produnt, qui comitiatu creare consules rite possint. Imperia, potestates, legationes, quum senatus creverit populusve jusserit, ex urbe exeunt: duella iusta iuste gerunt: sociis parcunt: se & servos continent: populi sui gloriam augent: domum cum laude redeunt: rei suæ ergo ne quis legatus esto. Plebes quos pro se contra vim, auxilli ergo, decem creassit, tribuni ejus sunt; quodque ii prohibessint, quodque plebem rogassint, ratum esto; sanctique sunt: neve plebem orbam tribunis relinquunt. Omnes magistratus auspicium iudiciumque habent; ex quois senatus esto: ejus decreta rata sunt: ast ni potestas par majorve prohibessit, senatus consulta perscripta servant. Is ordo vitio vacato: ceteris specimen esto. Creatio magistratuum. iudicia, populi iussa, vetita, quum suffragio sciscuntur, optimatibus nota, plebi libera sunt.

IV. At si quid erit, quod extra magistratus cœratore æsus sit, qui cæret populus creato, eique jus cœrandi dato. Cum populo patribusque agendi jus esto consuli, prætori, magistro populi equitumque, eique, quem produnt pares consulum rogandorum ergo:

LIBER TERTIUS. 87

tribunisque, quos sibi plebes rogassit, jus esto cum patribus agendi: iidem, ad plebem, quod assus erit, ferunto. Quæ cum populo, quæque in patribus agentur, modica sunt.

II. Senatori, qui nec aderit, aut causa, aut culpa esto. Loco senator, & modo oratio: causas populi teneto. Vis in populo adesto. Par majorve potestas plus valet. Ast qui turbassit in agendo, fraus actoris esto. Intercessor rei malæ, salutaris civis esto. Qui agent, auspicia servanto: auguri publico parento: promulgata, proposita, in ærario cognita, agunto: nec plus, quàm de singulis rebus consulunto: rem populum docento: doceri a magistratibus privatisque patiunto. Privilegia ne irroganto. De capite civis, nisi per maximum comitiatum, ollosque, quos censores in partibus populi locassint, ne ferunto: donum ne capiunto, nec danto, neve petendâ, neve gerendâ, neve gestâ potestate. Quod quis earum rerum migrassit, noxiæ pæna par esto. Censores fide legem custodiunto. Privati ad eos acta referunto: nec eò magis lege liberi sunt.

V. Lex recitata est. Discedite, & tabellam jubebo dari. Q. Quàm brevi, frater, in conspectu posita est a te omnium magistratuum descriptio: sed ea pene nostræ civitatis; etsi a te paulum allatum est novi. M. Rectissimè, Quinte, animadver-

tis: hæc est enim, quam Scipio laudat in libris, & quam maximè probat temperationem reipublicæ; quæ effici non potuisset, nisi tali descriptione magistratuum: nam sic habetote, magistratibus, iisque, qui præsent, contineri rempublicam, & ex eorum compositione, quod cujusque reipublicæ genus sit, intelligi. Quæ res quum sapientissimè moderatissimèque constituta esset a majoribus nostris, nihil habui, fanè non multum, quod putarem novandum in legibus.

13. ATT. Reddes igitur nobis, ut in religionis lege fecisti admonitu & rogatu meo, sic de magistratibus, ut disputes, quibus de causis maximè placeat ista descriptio. M. Faciam, Attice, ut vis; & locum istum totum, ut a doctissimis Græciæ quæsitum & disputatum est, explicabo; &, ut institui, nostra jura attingam. ATT. Istud maximè exspecto differendi genus. M. Atqui pleraque sunt dicta in illis libris, quum de optima republica quæreretur. Sed hujus loci de magistratibus sunt propria quædam a Theophrasto primùm, deinde a Dione Stoico quæsitæ subtiliùs.

VI. ATT. Ain' tandem? etiam a Stoicis ista tractata sunt? M. Non fanè, nisi ab eo, quem modò nominavi; & postea a magno homine, & in primis erudito, Panætio. Nam veteres verbo tenus, acutè illi qui-

dem, sed non ad hunc usum popularem atque civilem, de republica dislerebant. Ab Academica familia magis ista manarunt, Platone principe: post Aristoteles illustravit omnem hunc civilem in disputando locum, Heraclidesque Ponticus, profectus ab eodem Platone. Theophrastus verò institutus ab Aristotele, habitavit, ut scitis, in eo genere rerum: ab eodemque Aristotele doctus Dicæarchus, huic rationi studioque non defuit. Post a Theophrasto Phalereus ille Demetrius, de quo feci suprâ mentionem, mirabiliter doctrinam ex umbraculis eruditorum otioque, non modò in solem atque in pulverem, sed in ipsum discrimen aciemque produxit. Nam & mediocriter doctos magnos in republica viros, & doctissimos homines non nimis in republica versatos, multos commemorare possumus. Qui verò utrâque re excelleret, ut doctrinæ studiis & regendâ civitate princeps esset, quis facîle, præter hunc, inveniri potest?

VII. ATT. Puto posse, & quidem aliquem de tribus nobis. Sed perge, ut cœperas. M. Quæsitum igitur ab illis est, placeretne unum in civitate esse magistratum, cui reliqui parerent; quod exactis regibus intelligo placuisse nostris majoribus. Sed quoniam regale civitatis genus, probatum quondam, postea non tam regni, quàm regis vitium, repudiatum est;

nomen tantum videbitur regis repudiatum, res manebit, si unus omnibus reliquis magistratibus imperabit.

16. Quare nec ephori Lacedæmone sine causa a Theopompo oppositi regibus; nec apud nos consulibus tribuni. Nam illud quidem ipsum, quod in jure positum est, habet consul, ut ei reliqui magistratus omnes pareant, excepto tribuno, qui post exstitit, ne id, quod fuerat, esset: hoc enim primum minuit consulare jus, quod exstitit ipse, qui eo non teneretur; deinde quod attulit auxilium reliquis non modò magistratibus, sed etiam privatis, consuli non parentibus.

17. Q. Magnum dicis malum: nam, istâ potestate natâ, gravitas optimatum cecidit, convaluitque jus multitudinis. M. Non est ita, Quinte: non enim jus illud solum superbius populo, sed violentius videri necesse erat: quò posteaquam modica & sapiens temperatio accessit, conversâ lex in omnes est ***

Deest hujus legis explicatio a principio ad hæc verba n. 9.

VIII. *Domum cum laude redeunto.* Nihil enim, præter laudem, bonis atque innocentibus, neque ex hostibus, neque a sociis reportandum. Jam illud apertum profectò est, nihil esse turpius, quàm quemquam legari nisi reipublicæ causâ. Omitto

quemadmodum isti se gerant atque gesserint, qui legatione hereditates, aut syngraphas suas persequuntur. In hominibus est hoc fortasse vitium. Sed quæro, quid reapse sit turpius, quàm sine procuratione senator legatus, sine mandatis, sine ullo reipublicæ munere? quod quidem genus legationis ego consul, quamquam ad commodum senatûs pertinere videbatur, tamen approbante senatu frequentissimo, nisi mihi levissimus tribunus plebis tum intercessisset, sustulissem: tamen minui tempus, &, quod erat infinitum, annum feci: ita turpitudine manet, diuturnitate sublatâ. Sed jam, si placet, de provinciis decedatur, in urbemque redeatur. ATT. Nobis verò placet; sed iis, qui in provinciis sunt, minimè placet.

19. M. At verò, Tite, si pareant his legibus, nihil erit his urbe, nihil domo suâ dulcius; nec laboriosius molestiusque provinciâ. Sed sequitur lex, quæ sancit eam tribunorum plebis potestatem, quæ in re publica nostra; de qua differi nihil necesse est. Q. At mehercule ego, frater, quæro, de ista potestate quid sentias: nam mihi quidem pestifera videtur, quippe quæ in seditione, & ad seditionem nata sit: cujus primum ortum si recordari volumus, inter arma civium, & occupatis, & obsessis urbis locis, procreatum videmus: deinde

quum esset citò ablegatus, tamquam ex XII tabulis, insignis ad deformitatem puer, brevi tempore recreatus, multoque tetrior & foedior natus est.

IX. Quæ enim ille non edidit? qui primum, ut impio dignum fuit, patribus omnem honorem eripuit; omnia infima summis paria fecit, turbavit, miscuit: quum afflisset principum gravitatem, numquam tamen conquievit. Atque ut C. Flaminium, atque ea, quæ jam prisca sunt, relinquam; quid juris bonis viris Tib. Gracchi tribunatus reliquit? etsi quinquennio antè, D. Brutum & P. Scipionem consules, quos & quantos viros! homo omnium infimus & sordidissimus, tribunus plebis, C. Curiatius in vincula conjecit; quod antè factum non erat. C. verò Gracchus ruinis & iis sicis, quas ipse se projecisse in forum dixit, quibus digladiarentur inter se cives, nonne omnem reipublicæ statum permutavit? Quid jam de Saturnini supplicio, reliquisque dicam? quos ne depellere quidem a se sine ferro potuit respublica?

21. Cur autem aut vetera, aut aliena proferamus potius, quàm & nostra, & recentia? quis umquam tam audax, tam inimicus nobis fuisset, ut cogitaret umquam de statu nostro labefactando, nisi mucronem aliquem tribunitium exacuisset in nos? quem quum homines scelerati ac perditum,

non modò ulla in domo, sed nulla in gente reperirent, gentes sibi in tenebris reipublicæ perturbandas putaverunt. Quod nobis quidem egregium, & ad immortalitatem memoriæ gloriosum, neminem in nos mercede ullâ tribunum potuisse reperiri, nisi cui ne esse quidem licuisset tribuno.

22. Sed ille quas strages edidit? eas videlicet, quas sine ratione, ac sine ulla spe bona furor edere potuit impuræ belluæ, multorum inflammatus furoribus. Quamobrem in ista quidem re vehementer Sullam probo, qui tribunis plebis suâ lege injuriæ faciendæ potestatem ademerit, auxilii ferendi reliquerit: Pompeiumque nostrum ceteris rebus omnibus, semper amplissimis summisque effero laudibus; de tribunitia potestate taceo: nec enim reprehendere libet, nec laudare possum.

X. M. Vitia quidem tribunatûs præclare, Quinte, perspicis. Sed est iniqua in omni re accusanda, prætermisiss bonis, malorum enumeratio, vitiorumque selectio. Nam isto quidem modo vel consulatus vituperio est, si consulum, quos enumerare nolo, peccata collegeris. Ego enim fateor in ista ipsa potestate inesse quiddam mali: sed bonum, quod est quæsitum in ea, sine isto malo non haberemus. Nimia potestas est tribunorum plebis: quis negat?

sed vis populi multò sævior multoque vehementior, quæ ducem quòd habet, interdum lenior est, quàm si nullum haberet. Dux enim suo periculo progredi cogitat; populi impetus periculi rationem sui non habet.

24. At aliquando incenditur. Et quidem sæpe sedatur: quod enim est tam desperatum collegium, in quo nemo e decem sanâ mente sit? Quin ipsum Tib. Gracchum non solum nectus, sed etiam sublatus intercessor fregerat. Quid enim illum aliud perculit, nisi quòd potestatem intercedendi collegæ abrogavit? Sed tu sapientiam majorum in hoc vide. Concessâ plebi a patribus istâ potestate, arma ceciderunt; restincta seditio est: inventum est temperamentum, quo tenuiores cum principibus æquari se putarint; in quo uno fuit civitatis salus. At duo Gracchi fuerunt. Et præter eos quamvis enumeres multos licet, quum deni creentur: nonnullos in omni memoria reperies perniciosos tribunos; leves, etiam non bonos fortasse plures. Invidiâ quidem summus ordo caret: plebes de suo jure periculosas contentiones nullas facit. Quamobrem aut exigendi reges non fuerunt; aut plebi re, non verbo danda libertas: quæ tamen sic data est, ut multis præclarissimis addiceretur, ut auctoritati principum cederet.

XI. Nostra autem causa, quæ, optime & dulcissime frater, incidit in tribunitiam potestatem, nihil habuit contentionis cum tribunatu: non enim plebs incitata nostris rebus invidit; sed vincula soluta sunt, & servitia incitata, adjuncto terrore etiam militari. Neque nobis cum illa tum peste certamen fuit, sed cum gravissimo reipublicæ tempore; cui si non cessissem, non diuturnum beneficii mei patria fructum tulisset. Atque hoc rei exitus indicavit. Quis enim non modò liber, sed etiam servus libertate dignus fuit, cui nostra salus cara non esset?

26. Quòd si is casus fuisset rerum, quas pro salute reipublicæ gessimus, ut non omnibus gratus esset; & si nos multitudinis vis furentis inflammata invidiâ pepulisset; si tribunus aliquis in me populum, sicut Gracchus in Lænatem, Saturninus in Metellum, incitasset; ferremus, ô Quinte frater, consolarenturque nos non tam philosophi, qui Athenis fuerunt, qui hoc facere debent, quàm clarissimi viri, qui illâ urbe pulsi, carere ingrata civitate, quàm manere in improba maluerunt. Pompeium verò quòd una ista in re non ita valde probas, vix fatis mihi illud videris attendere, non solùm ei, quid esset optimum, videndum fuisse, sed etiam quid necessarium: sensit enim deberi non posse

huic civitati illam potestatem: quippe quam tantopere populus noster ignotam expetisset, qui posset carere cognita? sapientis autem civis fuit, causam nec perniciosam, & ita popularem, ut non posset obsisti, perniciosè populari civi non relinquere. Scis solere, frater, in hujusmodi sermone, ut transiri aliò possit, AD MODUM, dici.

XII. ATT. Prorsus ita est. Q. Haud equidem assentior: tu tamen ad reliqua pergas velim. M. Perseveras tu quidem, & in tua vetere sententia permanes. Q. Nunc mehercule. ATT. Ego sanè a Quinto nostro dissentio. Sed ea, quæ restant, audiamus. M. Deinceps igitur omnibus magistratibus auspicia & judicia dantur: judicia, ut esset populi potestas, ad quam provocaretur; auspicia, ut multos inutiles comitiatus, probabiles impedirent moræ: sæpe enim populi impetum injustum auspiciis dii immortales represserunt. Ex his autem, qui magistratum ceperunt, quòd senatus efficitur, populare id sanè, neminem in summum locum, nisi per populum, venire, sublatâ cooptatione censoriâ: sed præstò est hujus vitii temperatio, quòd senatûs lege nostrâ confirmatur auctoritas.

28. Sequitur enim: *Ejus decreta rata sunt*. Nam ita se res habet, ut, si senatus dominus sit publici concilii, quodque is creverit, defendant omnes; &, si ordines
reliqui,

reliqui, principis ordinis consilio rempublicam gubernari velint, possit, ex temperatione juris; quum potestas in populo, auctoritas in senatu sit, teneri ille moderatus & concors civitatis status, præsertim si proximæ legi parebitur. Nam proximum est, *Is ordo vitio careto: ceteris specimen esto.* Q. Præclara verò, frater, ista lex est, & latè patet, ut vitio careat ordo; & censorem quærit interpretem. ATT. Ille verò, etsi tuus totus est ordo, gratissimamque memoriam retinet consulatûs tui, pace tuâ dixerim, non modò censores, sed etiam iudices omnes potest defatigare.

XIII. M. Omitte ista, Attice: non enim de hoc senatu, nec his de hominibus, qui nunc sunt, sed de futuris, si qui fortè his legibus parere voluerint, hæc habetur oratio. Nam quum omni vitio carere lex iubeat, ne veniet quidem in eum ordinem quisquam vitii particeps: id autem difficile factum est, nisi educatione quadam & disciplinâ; de qua dicemus aliquid fortasse, si quid fuerit loci, aut temporis. ATT. Locus certè non deerit, quoniam tenes ordinem legum; tempus verò largitur longitudo diei. Ego autem, etiam si præterieris, repetam a te istum de educatione & de disciplina locum. M. Tu verò & istum, Attice, & si quem alium præterii.

30. *Ceteris specimen esto.* Quod si est,
Tomus X. E

tenemus omnia. Ut enim cupiditatibus principum & vitiis infici solet tota civitas; sic emendari & corrigi continentia. Vir magnus & nobis omnibus amicus, L. Lucullus, ferebatur quàm commodissimè respondisse, quum esset obiecta magnificentia villæ Tusculanæ, duo se habere vicinos; superiorem, equitem Romanum; inferiorem, libertinum: quorum quum essent magnificæ villæ, concedi sibi oportere, quod iis, qui inferioris ordinis essent, liceret. Non vides, Luculle, a te id ipsum natum, ut illi cuperent? quibus id, si tu non faceres, non liceret. Quis enim ferret istos, quum videret eorum villas signis & tabulis refertas, partim publicis, partim etiam sacris & religiosis? quis non frangeret eorum libidines, nisi illi ipsi, qui eas frangere deberent, eisdem tenerentur?

XIV. Nec enim tantum mali est peccare principes (quamquam est magnum hoc per se ipsum malum) quantum illud, quod permulti imitatores principum existunt. Nam licet videre, si velis replicare memoriam temporum, qualescumque summi civitatis viri fuerint, talem civitatem fuisse; quæcumque mutatio morum in principes extiterit, eandem in populo secutam: idque haud paulò est verius, quàm quod Platoni nostro placet, qui musicorum cantibus ait mutatis, mutari civitatum status.

Ego autem nobilium vitâ victuque mutato, mores mutari civitatum puto. Quòd perniciosius de republica merentur vitiosi principes, quòd non solum vitia concipiunt ipsi, sed ea infundunt in civitatem; neque solum obsunt, quòd ipsi corrumpuntur, sed etiam quòd corrumpunt, plusque exemplo, quàm peccato nocent.

32. Atque hæc lex dilatata in ordinem cunctum, coangustari etiam potest: pauci enim, atque admodum pauci, honore & gloriâ amplificati, vel corrumpere mores civitatis, vel corrigere possunt. Sed hæc & nunc satis, & in illis libris tractata sunt diligentius: quare ad reliqua veniamus. Proximum autem est de suffragiis; quæ jubeo *nota esse optimatibus, populo libera.* ATT. Ita mehercule attendi, nec satis intellexi, quid sibi lex, aut quid verba ista velint.

XV. M. Dicam, Tite, & versabor in re difficili, ac multum & sæpe quæsita, suffragia in magistratu mandando, aut reo judicando, aut lege aut rogatione sciscenda, clam, an palam ferre, melius esset. ATT. An etiam id dubium est? Q. Vereor, ne a te rursus dissentiam. M. Non facies, Quinte: nam ego in ista sum sententia, quâ te fuisse semper scio, nihil ut fuerit in suffragiis voce melius; sed, obtineri an possit, videndum est.

34. Q. Frater, bonâ tuâ veniâ dixerim, ista sententia maximè & fallit imperitos, & obest sæpissime reipublicæ, quum aliquid verum & rectum esse dicitur, sed obtineri, id est, obsisti posse populo, negatur. Primùm enim obsistitur, quum agitur severè: deinde vi opprimi in bona causa est melius, quàm malæ cedere. Quis autem non sentit, auctoritatem omnem optimatum tabellariam legem abstulisse? quam populus liber numquam desideravit; idem, oppressus dominatu ac potentiâ principum, flagitavit. Itaque graviora judicia de potentissimis hominibus exstant vocis, quàm tabellæ. Quamobrem suffragandi nimia libido in non bonis causis eripienda fuit potentibus, non latebra danda populo, in qua, bonis ignorantibus quid quisque sentiret, tabella vitiosum occultaret suffragium.

XVI. Itaque isti rationi neque lator quisquam est inventus, nec auctor umquam bonus. Sunt enim quatuor leges tabellariæ: quarum prima de magistratibus mandandis; ea est Gabinia, lata ab homine ignoto & sordido. Secuta biennio pòst Cassia est, de populi judicio; ea a nobili homine lata est, L. Cassio, sed, pace familiæ dixerim, dissidente a bonis, atque omni rumusculos populares ratione aucupante. Carbonis est tertia de jubendis legibus ac vetandis, seditiosi atque improbi civis; cui ne

reditus quidem ad bonos, salutem a bonis potuit afferre.

36. Uno in genere relinqui videbatur vocis suffragium, quod ipse Cassius exceperat, perduellionis. Dedit huic quoque iudicio Cœlius tabellam, doluitque, quoad vixit, se, ut opprimeret C. Popilium, novisse & reipublicæ. Et avus quidem noster singulari virtute in hoc municipio, quoad vixit, restitit Marco Gratidio, cuius in matrimonio sororem, aviam nostram, habebat, ferenti legem tabellariam: excitabat enim fluctus in simpulo, ut dicitur, Gratidius, quos post filius ejus Marius in Ægæo excitavit mari. Ac nostro quidem avo, quum res esset ad se delata, Scaurus consul, *Utinam*, inquit, *Marce Cicero, isto animo atque virtute in summa republica nobiscum versari, quàm in municipali maluisses.*

37. Quamobrem, quoniam non recognoscimus nunc leges populi Romani, sed aut repetimus ereptas, aut novas scribimus; non quid ab hoc populo obtineri possit, sed quid optimum sit, tibi dicendum puto. Nam Cassiæ legis culpam Scipio tuus sustinet, quo auctore lata esse dicitur. Tu, si tabellariam tuleris, ipse præstabis: nec enim mihi placet, nec Attico nostro, quantum e vultu ejus intelligo.

XVII. ATT. Mihi verò nihil umquam

E iij

populare placuit; eamque optimam rempublicam esse duco, quam hic consul constituerat, quæ sit in potestatem optimorum. M. Vos demum, ut video, legem antiquastis sine tabella. Sed ego, etsi satis dixit pro se in illis libris Scipio, tamen libertatem istam largior populo, ut & auctoritate valeant, & utantur boni. Sic enim a me recitata lex est de suffragiis. *Optimatibus nota: plebi libera sunt.* Quæ lex hanc sententiam continet, ut omnes leges tolleret, quæ postea latæ sunt, quæ tegunt omni ratione suffragium, ne quis inspiciat tabellam, ne roget, ne appellet.

39. Pontes etiam lex Maria fecit angustos. Quæ si opposita sunt ambitiosis, ut sunt ferè, non reprehendo: sin valuerint tantum leges, ut ne sint ambitus; habeat fanè populus tabellam, quasi vindicem libertatis, dummodo hæc optimo cuique & gravissimo civi ostendatur, ultroque offeratur, uti in eo sit ipso libertas, in quo populo potestas honestè bonis gratificandi datur. Eoque nunc fit illud, quod a te modò, Quinte, dictum est, ut minùs multos tabella condemnet, quàm solebat vox, quia populo licere satis est. Hoc re-tento, reliqua voluntas auctoritati, aut gratiæ traditur. Itaque, ut omittam largitione corrupta suffragia, non vides, si quando ambitus sileat, quæri in suffragiis,

quid optimi viri sentiant? Quamobrem lege nostrâ libertatis species datur, bonorum auctoritas retinetur, contentionis causa tollitur.

XVIII. Deinde sequitur, quibus jus sit cum populo agendi, aut cum senatu: gravis, &, ut arbitror, præclara lex. *Quæ cum populo, quæque in patribus agentur, modica sunt*; id est, modesta atque sedata. Actor enim moderatur, & fingit non modò mentem ac voluntates, sed pene vultus eorum, apud quos agit; quod est in senatu non difficile: est enim senator is, cujus non ad auditorem referatur animus, sed qui per se ipse spectari velit. Huic jussa tria sunt: ut adsit; nam gravitatem res habet, quum frequens ordo est: ut loco dicat, id est, rogatus: ut modo, ne sit infinitus; nam brevitatis non modò senatoris, sed etiam oratoris magna laus est in sententia. Nec est umquam longâ oratione utendum, nisi, aut peccante senatu, quod fit ambitione sæpissime, nullo magistratu adjuvante, tolli diem utile est; aut quum tanta causa est, ut opus sit oratoris copia vel ad hortandum, vel ad docendum: quorum generum in utroque magnus noster Cato est.

41. Quodque addit, *Causas populi teneto*, est senatori necessarium nosse rempublicam; idque latè patet: quid habeat

militum, quid valeat ærario, quos socios respublica habeat, quos amicos, quos stipendiarios, quâ quisque sit lege, conditione, fœdere: tenere consuetudinem decernendi, nosse exempla majorum. Videtis jam, genus hoc omne scientiæ, diligentiae, memoriæ esse, sine quo paratus esse senator nullo pacto potest.

42. Deinceps sunt cum populo actiones: in quibus primum & maximum, *Vis abesto*: nihil est enim exitiosius civitatibus, nihil tam contrarium juri & legibus, nihil minùs civile & humanum, quàm, compositâ & constitutâ republicâ, quidquam agi per vim. Parere jubet intercessori; quo nihil præstantius: impediri enim bonam rem melius, quàm concedi malæ.

XIX. Quòd verò actoris jubeo esse fraudem, id totum dixi ex Crassi, sapientissimi hominis, sententiâ, quem est senatus secutus, quum decrevisset, C. Claudio consule de Cn. Carbonis seditione referente, invito eo, qui cum populo ageret, seditionem non posse fieri, quippe cui liceat concilium, simul atque intercessum, turbæque cœptum sit, dimittere. Quod qui permovet, quum agi nihil potest, vim quærit; cujus impunitatem amittit hac lege. Sequitur illud: *Intercessor rei malæ, salutaris civis esto*. Quis non studiosè reipublicæ subvenerit, hac tam præclarâ legis voce laudatus?

43. Sunt deinde posita deinceps , quæ habemus etiam in publicis institutis atque legibus : *Auspicia servanto , auguri parento*. Est autem boni auguris , meminisse maximis reipublicæ temporibus præstò esse debere , Jovique optimo maximo se consiliarium atque administrum datum , ut sibi eos , quos in auspicio esse jusserit ; cœlique partes sibi definitas esse traditas , e quibus sæpe opem reipublicæ ferre possit. Deinde de promulgatione , de singulis rebus agendis , de privatis , magistratibusve audiendis.

44. Tum leges præclarissimæ de XII tabulis tralatæ duæ ; quarum altera privilegia tollit , altera de capite civis rogari , nisi maximo comitiatu , vetat. Nondum cognitis seditiosis , tribunis plebis ne cogitatis quidem , admirandum tantum majores in posterum providisse : in privatos homines leges ferri noluerunt : id est enim privilegium ; quo quid est injustius ? quum legis hæc vis sit , scitum esse & jussum in omnes : ferri de singulis , nisi centuriatis comitiis , noluerunt ; descriptus enim populus censu , ordinibus , ætatibus , plus adhibet ad suffragium consilii , quàm fusè in tribus convocatus.

45. Quò veriùs in causa nostra vir magni ingenii , summæque prudentiæ , L. Cotta , dicebat , nihil omnino actum esse

de nobis. Præter enim quàm quodd comitia illa essent armis gesta servilibus, præterea neque tributa capitis comitia rata esse possent, neque ulla privilegii: quocirca nihil nobis opus esse lege, de quibus nihil omnino actum esset legibus. Sed visum est & nobis, & clarissimis viris melius, de quo servi & latrones scivisse se aliquid dicerent, de hoc eodem cunctam Italiam quid sentiret, ostendere.

XX. Sequuntur de captis pecuniis, & de ambitu leges. Quæ quum magis judiciis, quàm verbis sancienda sint, adjungitur, *Noxiæ pœna par esto*, ut in suo vitio quisque plectatur: vis, capite: avaritia, multâ: honoris cupiditas, ignominiâ sancitur. Extremæ leges sunt nobis non usitatæ; reipublicæ, necessariæ. Legum custodiam nullam habemus: itaque hæ leges sunt, quas apparitores nostri volunt; a librariis petimus; publicis litteris consignatam memoriam publicam nullam habemus. Græci hoc diligentius, apud quos νομοφύλακες creantur: nec hi solum litteras (nam id quidem etiam apud majores nostros erat) sed etiam facta hominum observabant, ad legesque revocabant.

47. Hæc detur cura censoribus; quandoquidem eos in republica semper volumus esse. Apud eosdem, qui magistra-

tu abierint, edant & exponant, quid in magistratu gesserint; deque iis censores præjudicent. Hoc in Græcia fit, publicè constitutis accusatoribus. Qui quidem graves esse non possunt, nisi sint voluntarii. Quocirca melius est, rationes referri, causamque exponi censoribus: integram tamen legem accusatori iudicioque servari. Sed satis jam disputatum est de magistratibus, nisi fortè quid desideratis. ATT. Si nos tacemus, locus ipse nos admonet, quid tibi sit deinde dicendum. M. Mihine? de judiciis arbitror, Pompeoni: id est enim junctum magistratibus.

48. ATT. Quid? de jure populi Romani, quemadmodum instituisti, dicendum nihil putas? M. Quid tandem hoc loco est, quod requiras? ATT. Egone? quod ignorari ab iis, qui in republica versantur, turpissimum puto. Nam, ut modò a te dictum est, leges a librariis lego; sic animadverto, plerosque magistratus ignorance juris sui tantum sapere, quantum apparitores velint. Quamobrem, si de sacrorum alienatione dicendum putasti, quoniam de religione leges proposueras; faciendum tibi est, ut, magistratibus lege constitutis, de potestate, tum de jure disputes.

49. M. Faciam breviter, si consequi potuero: nam pluribus verbis scripsit ad

108 *DE LEGIBUS, LIBER III.*

patrem tuum M. Junius sodalis , peritè ;
meo quidem judicio , & diligenter. At de
jure naturæ cogitare per nos , atque dice-
re debemus ; de jure populi Romani ,
quæ relicta sunt & tradita. ΑΤΤ. Sic
profectò cenſeo ; & id ipſum , quod dicis ,
exſpecto.





DE OFFICIIS

AD M. FILIUM,

LIBER PRIMUS.

QUÆSTIO de Officiis communis est omnium philosophorum, sed his pene propria, qui summum bonum honestate metiuntur, nempe Academicorum, Peripateticorum, & Stoicorum, qui in constituendo summo bono verbis magis, quàm re discrepabant. Sequitur in hac quæstione Cicero potissimum Stoicos, & quinque facit genera deliberationis in consilio capiendo: primum, honestumne factu sit, an turpe, quod in deliberationem cadit; alterum, conducaturne, an noceat; reliqua verò, ubi cum honesto pugnat id, quod utile videtur, & quum aliud alio ho-

nestius aut utilius videtur, utrum alteri sit præponendum. In tres igitur partes totam disputationem distribuit, quarum prima est de honesto, altera de utili, sed dupliciter utraque; tertia de comparatione eorum. Primum formam quamdam honesti exhibet a natura humana ductam, ejusque quatuor partes facit, sapientiam, justitiam, temperantiam, & fortitudinem, seu magnitudinem animi, ex quibus singulis certa quædam officia nascuntur; ac de his quatuor partibus fusè disputat, & quomodo ab iis officia ducantur, ostendit. Subjicit de comparatione honesti, de duobus honestis utrum honestius. ERNESTUS.

De his libris Plinius in præfatione: Quæ volumina ejus ediscenda, non modò in manibus habenda nosti. Cæpit eos scribere Cicero post interfectum Cæsarem, quum solus consul esset Antonius. Epist. 13. libri 15. ad Atticum: sed absolvit Hirtio & Pansâ coff. paulò ante mortem

LIBER PRIMUS. III

*suam, ut cognoscitur ex libro 16.
earumdem epistolarum. MURETUS.*

I. **Q**UAMQUAM te, Marce fili, annum jam audientem Cratippum, idque Athenis, abundare oportet præceptis institutisque philosophiæ, propter summam & doctoris auctoritatem, & urbis, quorum alter te scientiâ augere potest, altera exemplis; tamen, ut ipse ad meam utilitatem semper cum Græcis Latina conjunxi, neque id in philosophia solum, sed etiam in dicendi exercitatione feci; idem tibi censeo faciendum, ut par sis in utriusque orationis facultate. Quam quidem ad rem, nos (ut videmur) magnum attulimus adjumentum hominibus nostris; ut non modò Græcarum litterarum rudes, sed etiam docti, aliquantum se arbitrentur adeptos & ad dicendum, & ad judicandum.

2. Quamobrem disces tu quidem a principe hujus ætatis philosophorum, & disces, quamdiu voles; tamdiu autem velle debes, quoad te, quantum proficias, non pœnitebit. Sed tamen nostra legens, non multum a Peripateticis dissidentia, quoniam utrique, & Socratici, & Platonici esse volumus; de rebus ipsis utere tuo judicio; nihil enim impedio: orationem autem Latinam profectò legendis nostris ef-

ficies plenior. Nec verò arroganter hoc dictum existimari velim : nam philosophandi scientiam concedens multis ; quod est oratoris proprium , aptè , distinctè , ornatè dicere , quoniam in eo studio ætatem consumpsi , si id mihi assumo , videor id meo jure quodam modo vindicare.

3. Quamobrem magnopere te hortor , mi Cicero , ut non solum orationes meas , sed hos etiam de philosophia libros , qui se jam illis ferè æquarunt , studiosè legas. Vis enim dicendi major est in illis ; sed hoc quoque colendum est æquabile & temperatum orationis genus. Et id quidem nemini video Græcorum adhuc contigisse , ut idem utroque in genere laboraret , sequereturque & illud forense dicendi , & hoc quietum disputandi genus ; nisi fortè Demetrius Phalereus in hoc numero haberi potest , disputator subtilis , orator parum vehemens , dulcis tamen , ut Theophrasti discipulum possis agnoscere. Nos autem quantum in utroque profecerimus , aliorum sit judicium ; utrumque certè secuti sumus. Equidem & Platonem existimo , si genus forense dicendi tractare voluisset , gravissimè & copiosissimè potuisse dicere ; & Demosthenem , si illa , quæ a Platone didicerat , tenuisset , & pronuntiare voluisset , ornatè splendidè-

que facere potuisse : eodemque modo de Aristotele & Isocrate judico ; quorum uterque suo studio delectatus , contempsit alterum.

II. Sed quum statuissem scribere ad te aliquid hoc tempore , & multa posthac , ab eo ordiri volui maximè quod & ætati tuæ esset aptissimum , & auctoritati meæ gravissimum. Nam quum multa sint in philosophia & gravia , & utilia , accuratè copiosèque a philosophis disputata , patere latissimè videntur ea , quæ de officiis tradita ab illis & præcepta sunt. Nulla enim vitæ pars neque publicis , neque privatis ; neque forensibus , neque domesticis in rebus ; neque si tecum agas quid , neque si cum altero contrahas , vacare officio potest : in eoque colendo sita vitæ est honestas omnis , & in negligendo turpitude.

5. Atque hæc quidem quæstio communis est omnium philosophorum : quis est enim , qui nullis officii præceptis tradendis philosophum se audeat dicere ? Sed sunt nonnullæ disciplinæ , quæ propositis bonorum & malorum finibus officium omne pervertunt : nam qui summum bonum sic instituit , ut nihil habeat cum virtute conjunctum ; idque suis commodis , non honestate metitur ; hic si sibi ipse consentiat , & non interdum naturæ bonitate vincatur , neque amicitiam colere possit ,

nec justitiam , nec liberalitatem. Fortis verò , dolorem summum malum judicans ; aut temperans , voluptatem summum bonum statuens , esse certè nullo modo potest.

6. Quæ quamquam ita sint in promptu , ut res disputatione non egeat , tamen sunt a nobis alio loco disputata. Hæ disciplinæ igitur si sibi consentaneæ esse velint , de officio nihil queant dicere : neque ulla officii præcepta firma , stabilia , conjuncta naturæ , tradi possunt , nisi aut ab iis , qui solam , aut ab iis , qui maximè honestatem propter se dicant expetendam. Itaque propria est ea præceptio Stoicorum , Academicorum , Peripateticorum ; quoniam Aristonis , Pyrrhonis , Herilli , jam pridem explosa sententia est : qui tamen haberent jus suum disputandi de officio , si rerum aliquem delectum reliquissent , ut ad officii inventionem aditus esset. Sequemur igitur hoc quidem tempore , & hac in quæstione potissimum Stoicos , non ut interpretes ; sed , ut solemus , e fontibus eorum , judicio arbitrioque nostro , quantum , quoque modo videbitur , hauriemus. Placet igitur , quoniam omnis disputatione de officio futura est , antè definire , quid sit officium ; quod a Panætio prætermissum esse miror : omnis enim , quæ a ratione suscipitur de aliqua re , institu-

tio, debet a definitione proficisci; ut intelligatur, quid sit id, de quo disputetur.

III. Omnis de officio duplex est quaestio: unum genus est, quod pertinet ad finem bonorum; alterum, quod positum est in praeceptis, quibus in omnes partes usus vitae conformari possit. Superioris generis huiusmodi exempla sunt: omniane officia perfecta sint; num quod officium aliud alio majus sit; & quae sunt generis ejusdem. Quorum autem officiorum praecepta traduntur, ea, quamquam pertinent ad finem bonorum, tamen id minus apparet, quia magis ad institutionem vitae communis spectare videntur: de quibus est nobis his libris explicandum.

8. Atque etiam alia divisio est officii: nam & medium quoddam officium, dicitur, & perfectum. Perfectum officium, rectum (opinor) vocemus, quod Græci κατόρθωμα, hoc autem commune καθήκον vocant. Atque ea sic definiunt, ut, rectum quod sit, id perfectum officium esse definiant; medium autem officium id esse dicant, quod, cur factum sit, ratio probabilis reddi possit.

9. Triplex igitur est, ut Panætio videtur, consilii capiendi deliberatio: nam, honestumne factu sit, an turpe, dubitant, id, quod in deliberationem cadit; in quo considerando sæpe animi in contrarias

sententias distrahuntur. Tum autem aut anquirunt, aut consultant, ad vitæ commoditatem jucunditatemque, ad facultates rerum atque copias, ad opes, ad potentiam, quibus & se possint juvare & suos, conducat id necne, de quo deliberant; quæ deliberatio omnis in rationem utilitatis cadit. Tertium dubitandi genus est, quum pugnare videtur cum honesto id, quod videtur esse utile: quum enim utilitas ad se rapere, honestas contrà revocare ad se videtur, fit ut distrahatur deliberando animus, afferatque ancipitem curam cogitandi.

10. Hac divisione (quum præterire aliquid maximum vitium in dividendo sit) duo prætermissa sunt. Nec enim solum utrum honestum, an turpe sit, deliberari solet, sed etiam, duobus propositis honestis, utrum honestius: itemque duobus propositis utilibus, utrum utilius. Ita, quam ille triplicem putavit esse rationem, in quinque partes distribui debere reperitur. Primum igitur est de honesto, sed dupliciter: tum pari ratione de utili: post de comparatione eorum differendum.

IV. Principiò generi animantium omni est a natura tributum, ut se, vitam, corpusque tueatur, declinetque ea, quæ nocitura videantur, omniaque, quæ sint ad vivendum necessaria, anquirat, & paret,

ut pastum , ut latibula , ut alia ejusdem generis. Commune item animantium omnium est conjunctionis appetitus , procreandi causâ , & cura quædam eorum , quæ procreata sunt. Sed inter hominem & belluam hoc maximè interest , quòd hæc tantum , quantum sensu movetur , ad id solum , quod adest , quodque præsens est , se accommodat , paululum admodum sentiens præteritum , aut futurum. Homo autem (quòd rationis est particeps , per quam consequentia cernit , causas rerum videt , earumque progressus , & quasi antecessiones non ignorat , similitudines comparat , & rebus præsentibus adjungit , atque annectit futuras) facilè totius vitæ cursum videt , ad eamque degendam præparat res necessarias.

12. Eademque natura vi rationis hominem conciliat homini , & ad orationis , & ad vitæ societatem ; ingeneratque in primis præcipuum quemdam amorem in eos , qui procreati sunt ; impellitque , ut hominum cœtus celebrari inter se , & a se obiri velit ; ob easque causas studeat parare ea , quæ suppeditent & ad cultum , & ad victum ; nec sibi soli , sed conjugii , liberis , ceterisque , quos caros habeat , tuerique debeat : quæ cura exsuscitat etiam animos , & majores ad rem gerendam facit.

13. In primisque hominis est propria veri inquisitio atque investigatio. Itaque quum sumus necessariis negotiis curisque vacui, tum avemus aliquid videre, audire, addiscere; cognitionemque rerum aut occultarum, aut admirabilium ad beatè vivendum necessariam ducimus: ex quo intelligitur, quod verum, simplex, sincerumque sit, id esse naturæ hominis aptissimum. Huic veri videndi cupiditati adjuncta est appetitio quædam principatûs, ut nemini parere animus bene a natura informatus velit, nisi præcipienti, aut docenti, aut utilitatis causâ, justè & legitimè imperanti: ex quo animi magnitudo exsistit, humanarumque rerum contemptio.

14. Nec verò illa parva vis naturæ est rationisque, quòd unum hoc animal sentit quis sit ordo; quid sit, quod deceat; in factis dictisque qui modus. Itaque eorum ipsorum, quæ adspectu sentiuntur, nullum aliud animal pulchritudinem, venustatem, convenientiam partium sentit: quam similitudinem natura ratioque ab oculis ad animum transferens, multò etiam magis pulchritudinem, constantiam, ordinem in consiliis factisque conservandum putat; cavetque, ne quid indecorè effeminatève faciat; tum in omnibus & opinionibus, & factis, ne quid libidinosè

aut faciat aut cogitet: quibus ex rebus conflatur & efficitur id, quod quærimus, honestum; quod etiam si nobilitatum non sit, tamen honestum sit; quodque verè dicimus, etiam si a nullo laudetur, naturâ esse laudabile.

V. Formam quidem ipsam, Marce fili, & tamquam faciem honesti vides; quæ si oculis cerneretur, mirabiles amores (ut ait Plato) excitaret sapientiæ. Sed omne, quod honestum est, id quatuor partium oritur ex aliqua: aut enim in perspicientia veri, solertiaque versatur; aut in hominum societate tuenda,tribuendoque suum cuique, & rerum contractarum fide; aut in animi excelsi atque invicti magnitudine ac robore; aut in omnium, quæ fiunt, quæque dicuntur, ordine & modo, in quo inest modestia & temperantia.

15. Quæ quatuor quamquam inter se colligata atque implicata sunt, tamen ex singulis certa officiorum genera nascuntur: velut ex ea parte, quæ prima descripta est, in qua sapientiam & prudentiam ponimus, inest indagatio atque inventio veri; ejusque virtutis hoc munus est proprium.

16. Ut enim quisque maximè perspicit, quid in re quaque verissimum sit, quique acutissimè & celerrimè potest & videre, & explicare rationem, is pru-

dentissimus & sapientissimus rite haberi solet. Quocirca huic, quasi materia, quam tractet, & in qua versetur, subjecta est veritas.

17. Reliquis autem tribus virtutibus necessitates propositæ sunt ad eas res parandas tuendasque, quibus actio vitæ continetur: ut & societas hominum, conjunctioque servetur; & animi excellentia magnitudoque tum in augendis opibus, utilitatibusque & sibi, & suis comparandis, tum multò magis in his ipsis despiciendis eluceat. Ordo autem, & constantia, & moderatio, & ea, quæ sunt his similia, versantur in eo genere, ad quod adhibenda est actio quædam, non solum mentis agitatio. His enim rebus, quæ tractantur in vita, modum quemdam & ordinem adhibentes, honestatem & decus conservabimus.

VI. Ex quatuor autem locis, in quos honesti naturam vimque diyisimus, primus ille, qui in veri cognitione consistit, maximè naturam attingit humanam. Omnes enim trahimur & ducimur ad cognitionis & scientiæ cupiditatem: in qua excellere pulchrum putamus; labi autem, errare, nescire, decipi, & malum, & turpe ducimus. In hoc genere & naturali, & honesto, duo vitia vitanda sunt: unum, ne incognita pro cognitis habeamus, hisque

que temerè assentiamur; quod vitium ef-
fugere qui volet (omnes autem velle
debent) adhibebit ad considerandas res
& tempus, & diligentiam.

19. Alterum est vitium, quòd quidam
nimis magnum studium, multamque ope-
ram in res obscuras atque difficiles confe-
runt, easdemque non necessarias. Quibus
vitiis declinatis, quod in rebus honestis
& cognitione dignis operæ curæque po-
netur, id jure laudabitur: ut in astrologia
C. Sulpicium audivimus; in geometria
Sex. Pompeium ipsi cognovimus; multos
in dialecticis, plures in jure civili: quæ
omnes artes in veri investigatione versan-
tur: cujus studio a rebus gerendis abduci,
contra officium est. Virtutis enim laus om-
nis in actione consistit: a qua tamen sæpe
fit intermissio; multique dantur ad studia
reditus: tum agitatio mentis, quæ num-
quam acquiescit, potest nos in studiis co-
gnitionis etiam sine opera nostra contine-
re. Omnis autem cogitatio motusque ani-
mi, aut in consiliis capiendis de rebus
honestis, & pertinentibus ad bene beatè-
que vivendum, aut in studiis scientiæ, co-
gnitionisque versatur. Ac de primo qui-
dem officii fonte diximus.

VII. De tribus autem reliquis latissimè
patet ea ratio, quâ societas hominum in-
ter ipsos, & vitæ quasi communitas con-

tinetur : cujus partes duæ sunt : justitia , in qua virtutis splendor est maximus , ex qua boni viri nominantur ; & huic conjuncta beneficentia , quam eandem vel benignitatem , vel liberalitatem appellari licet. Sed justitiæ primum munus est , ut ne cui quis noceat , nisi lacessitus injuriâ : deinde , ut communibus utatur pro communibus , privatis ut suis.

21. Sunt autem privata nulla naturâ : sed aut veteri occupatione , ut qui quondam in vacua venerunt ; aut victoriâ , ut qui bello potiti sunt ; aut lege , pactione , conditione , sorte : ex quo fit , ut ager Arpinas , Arpinatium dicatur ; Tusculanus , Tusculanorum. Similisque est privatarum possessionum descriptio : ex quo , quia suum cujusque fit , eorum , quæ naturâ fuerant communia , quod cuique obtingit , id quisque teneat : e quo si qui sibi appetet , violabit jus humanæ societatis.

22. Sed quoniam (ut præclare scriptum est a Platone) non nobis solum nati sumus , ortusque nostri partem patria vindicat , partem amici ; atque ita placet Stoicis , quæ in terris gignuntur , ad usum hominum omnia creari , homines autem hominum causâ esse generatos , ut ipsi inter se , aliis alii prodesse possent ; in hoc naturam debemus ducem sequi , commu-

nes utilitates in medium afferre , mutatione officiorum , dando , accipiendo : tum artibus , tum operâ , tum facultatibus devincire hominum inter homines societatem.

23. Fundamentum est autem justitiæ fides ; id est , dictorum , conventorumque constantia & veritas : ex quo (quamquam hoc videbitur fortasse cuiuspiam durius , tamen audeamus imitari Stoicos , qui studiose exquirunt , unde verba sint ducta) credamus , quia fiat , quod dictum est , appellatam fidem. Sed injustitiæ genera duo sunt : unum eorum , qui inferunt ; alterum eorum , qui ab iis , quibus inferitur , si possint , non propulsant injuriam. Nam , qui injustè impetum in quempiam facit , aut irâ , aut aliquâ perturbatione incitatus , is quasi manus afferre videtur socio : qui autem non defendit , nec obsistit , si potest , injuriæ , tam est in vitio , quàm si parentes , aut amicos , aut patriam deserat. .

24. Atque illæ quidem injuriæ , quæ nocendi causâ de industria inferuntur , sæpe a metu proficiscuntur , quum is , qui nocere alteri cogitat , timet ne , nisi id fecerit , ipse aliquo afficiatur incommodo. Maximam autem partem ad injuriam faciendam aggrediuntur , ut adipiscantur ea , quæ concupiverunt ; in quo vitio latissimè patet avaritia.

VIII. Expetuntur autem divitiæ quum ad usus vitæ necessarios, tum ad perfrueudas voluptates. In quibus autem major est animus, in iis pecuniæ cupiditas spectat ad opes, & ad gratificandi facultatem; ut nuper M. Crassus negabat, ullam fatis magnam pecuniam esse ei, qui in republica princeps vellet esse, cujus fructibus exercitum alere non posset. Delectant etiam magnifici apparatus, vitæque cultus cum elegantia & copia; quibus rebus effectum est, ut infinita pecuniæ cupiditas esset. Nec verò rei familiaris amplificatio, nemini nocens, vituperanda: sed fugienda semper injuria est.

26. Maximè autem adducuntur plerique ut eos justitiæ capiat oblivio, quum in imperiorum, honorum, gloriæ cupiditatem inciderint. Quod enim est apud Ennium,

Nulla sancta societas, nec fides regni est:

id latius patet: nam quidquid ejusmodi est, in quo non possint plures excellere, in eo fit plerumque tanta contentio, ut difficillimum sit sanctam servare societatem. Declaravit id modò temeritas C. Cæsaris, qui omnia jura divina atque humana pervertit, propter eum, quem sibi ipse opinionis errore finxerat, principatum. Est autem in hoc genere molestum, quòd in maximis animis, splendidissimisque in-

geniis plerumque exsistunt honoris , imperiij , potentiae , gloriae cupiditates : quò magis cavendum est , ne quid in eo genere peccetur.

27. Sed in omni injustitia permultum interest , utrùm perturbatione aliquâ animi , quæ plerumque brevis est , & ad tempus ; an consultò , & cogitata fiat injuria. Leviora enim sunt , quæ repentino aliquo motu accidunt , quàm ea , quæ meditata & præparata inferuntur. Ac de inferenda quidem injuria satis dictum est.

IX. Prætermittendæ autem defensionis , deferendique officii plures solent esse causæ. Nam , aut inimicitias , aut laborem , aut sumptus suscipere nolunt ; aut etiam negligentiam , pigritiam , inertiam ; aut suis studiis quibusdam occupationibusve sic impediuntur , ut eos , quos tutari debeant , desertos esse patiantur. Itaque videndum est , ne non satis sit id , quod apud Platonem est in philosophos dictum , quòd in veri investigatione versentur , quòdque ea , quæ plerique vehementer expetunt , de quibus inter se digladiari solent , contemnant , & pro nihilo ducant , propterea justos esse. Nam dum alterum justitiæ genus assequuntur , inferendam ne cui noceant injuriam ; in alterum incidunt : discendi enim studio impediti , quos tueri debent , deserunt. Itaque eos ad rempublicam ne ac-

cessuros quidem putant, nisi coactos; æquius autem erat id voluntate fieri: nam hoc ipsum ita justum est, quod rectè fit, si est voluntarium.

29. Sunt etiam, qui aut studio rei familiaris tuendæ, aut odio quodam hominum, suum se negotium agere dicant, ne facere cuiquam videantur injuriam: qui altero injustitiæ genere vacant; in alterum incurrunt: deserunt enim vitæ societatem, quia nihil conferunt in eam studii, nihil operæ, nihil facultatum.

30. Quoniam igitur duobus generibus injustitiæ propositis, adjunximus causas utriusque generis, easque res antè constituimus, quibus justitia continetur; facilè, quod cujusque temporis officium sit, poterimus, nisi nosmet ipsos valde amabimus, judicare. Est enim difficilis cura rerum alienarum: quamquam Terentianus ille Chremes *humani nihil a se alienum putat*. Sed tamen, quia magis ea percipimus atque sentimus, quæ nobis ipsis aut prospera, aut adversa eveniunt, quàm illa, quæ ceteris, quæ quasi longo intervallo interjecto videmus; aliter de illis, ac de nobis judicamus. Quocirca bene præcipiunt, qui vetant quidquam agere, quod dubites; æquum sit, an iniquum: æquitas enim lucet ipsa per se; dubitatio cogitationem significat injuriæ.

X. Sed incidunt sæpe tempora, quum ea, quæ maximè videntur digna esse justo homine, eoque, quem virum bonum dicimus, commutantur, fiuntque contraria; ut non reddere depositum, etiam promissum non facere, quæque pertinent ad veritatem, & ad fidem, ea migrare interdum, & non servare, sit justum. Referri enim decet ad ea, quæ proposui in principio, fundamenta justitiæ: primum, ut ne cui noceatur; deinde, ut communi utilitati serviatur.

32. Quum tempora commutantur, commutatur officium; & non semper est idem. Potest enim accidere promissum aliquod, & conventum, ut id effici sit inutile, vel ei, cui promissum sit, vel ei, qui promiserit. Nam si, ut in fabulis est, Neptunus, quod Theseo promiserat, non fecisset, Theseus filio Hippolyto non esset orbatus. Ex tribus enim optatis, ut scribitur, hoc erat tertium, quod de Hippolyti interitu iratus optavit; quo impetrato, in maximos luctus incidit. Nec promissa igitur servanda sunt ea, quæ sint iis, quibus promiseris, inutilia: nec, si plus tibi noceant, quàm illi prosint, cui promiseris, contra officium est, majus anteponi minori: ut, si constitueris te cuiquam advocatum in rem præsentem esse venturum, atque interim graviter ægro-

tare filius cœperit , non sit contra officium , non facere quod dixeris ; magisque ille , cui promissum sit , ab officio discedat , si se destitutum queratur. Jam illis promissis standum non esse , quis non videt , quæ coactus quis metu , quæ deceptus dolo promiserit ? Quæ quidem pleraque jure prætorio liberantur , nonnulla legibus.

33. Exsistunt etiam sæpe injuriæ calumniâ quadam , & nimis callidâ , sed malitiosâ juris interpretatione : ex quo illud , *Summum jus , summa injuria* , factum est jam tritum sermone proverbium. Quo in genere etiam in republica multa peccantur , ut ille , qui , quum triginta dierum essent cum hoste pactæ induciæ , noctu populabatur agros , quòd dierum essent pactæ , non noctium induciæ. Ne noster quidem probandus , si verum est , Q. Fabium Labeonem , seu quem alium (nihil enim præter auditum habeo) arbitrum Nolanis & Neapolitanis de finibus a senatu datum , quum ad locum venisset , cum utrisque separatim locutum , ut ne cupidè quid agerent , ne appetenter ; atque ut regredi , quàm progredi mallent. Id quum utrique fecissent , aliquantum agri in medio relictum est. Itaque illorum fines , sicut ipsi dixerant , terminavit ; in medio relictum quod erat , populo Romano adjudicavit.

cavit. Decipere hoc quidem est, non judicare: quocirca in omni re fugienda est talis solertia.

. XI. Sunt autem quædam officia etiam adversus eos servanda, a quibus injuriam acceperis. Est enim ulciscendi & puniendi modus: atque haud scio, an satis sit eum, qui laccessierit, injuriæ suæ poenitere; ut & ipse ne quid tale posthac, & ceteri sint ad injuriam tardiores.

34. Atque in republica maximè conservanda sunt jura belli. Nam quum sint duo genera decertandi, unum per disceptationem, alterum per vim; quumque illud proprium sit hominis, hoc belluarum: confugiendum est ad posterius, si uti non licet superiore.

35. Quare suscipienda quidem bella sunt ob eam causam, ut sine injuria in pace vivatur: partâ autem victoriâ, conservandi sunt ii, qui non crudeles in bello, non immanes fuerunt; ut majores nostri Tusculanos, Æquos, Volscos, Sabinos, Hernicos in civitatem etiam acceperunt: at Carthaginem & Numantiam funditus sustulerunt. Nollem Corinthum: sed credo aliquid secutos, opportunitatem loci maximè, ne posset aliquando ad bellum faciendum locus ipse adhortari. Meâ quidem sententiâ, paci, quæ nihil habitura sit insidiarum, semper est consulendum:

in quo si mihi esset obtemperatum; si non optimam, at aliquam rempublicam, quæ nunc nulla est, haberemus. Et quum iis, quos vi deviceris, consulendum est; tum ii, qui, armis positis, ad imperatorum fidem confugient, quamvis murum aries percusserit, recipiendi sunt: in quo tantopere apud nostros justitia culta est, ut ii, qui civitates, aut nationes devictas bello in fidem recepissent, earum patroni essent more majorum.

36. Ac belli quidem æquitas sanctissime fetiali populi Romani jure perscripta est: ex quo intelligi potest, nullum bellum esse justum, nisi quod aut rebus repetitis geratur, aut denuntiatum antè sit & indictum. Hostilius imperator tenebat provinciam; in cujus exercitu Catonis filius tiro militabat. Quum autem Hostilio videretur unam dimittere legionem, Catonis quoque filium, qui in eadem legione militabat, dimisit. Sed quum amore pugnandi in exercitu remansisset, Cato ad Hostilium scripsit; ut, si eum pateretur in exercitu remanere, secundo eum obligaret militiæ sacramento; quia, priore amisso, jure cum hostibus pugnare non poterat: adeo summa erat observatio in bello movendo. Mi quidem Catonis senis epistola est ad M. filium, in qua scripsit, » Se audisse, eum missum factum esse a

» consule, quum in Macedonia Persico
 » bello miles esset. Monet igitur ut ca-
 » veat, ne prœlium ineat: negat enim
 » ius esse; qui miles non sit, pugnare
 » cum hoste.

XII. Equidem illud etiam animadverto,
 quodd qui proprio nomine perduellis es-
 set, is hostis vocaretur, lenitate verbi
 tristitiam rei mitigatam. Hostis enim apud
 majores nostros is dicebatur, quem nunc
 peregrinum dicimus. Indicant duodecim
 tabulæ: AUT STATUS DIES CUM HOSTE.
 Itemque, ADVERSUS HOSTEM ÆTERNA
 AUCTORITAS. Quid ad hanc mansuetudi-
 nem addi potest? eum quicum bella ge-
 ras, tam molli nomine appellari? Quam-
 quam id nomen durius jam effecit vetus-
 tas: a peregrino enim recessit, & pro-
 priè in eo, qui arma contrà ferret, re-
 mansit.

38. Quum verò de imperio decertatur,
 belloque quæritur gloria, causas omnino
 subesse tamen oportet easdem, quas dixi
 paulò antè iustas causas esse bellorum:
 sed ea bella, quibus imperii gloria pro-
 posita est, minùs acerbè gerenda sunt. Ut
 enim cum civi aliter contendimus, si est
 inimicus; aliter, si competitor: cum al-
 tero certamen honoris & dignitatis est;
 cum altero capitis & famæ: sic cum Cel-
 tiberis, cum Cimbris bellum, ut cum ini-

32 *DE OFFICIIS,*

micis gerebatur, uter esset, non uter imperaret; cum Latinis, Sabinis, Samnitibus, Pœnis, Pyrrho, de imperio dimicabatur. Pœni fœdifragi, crudelis Annibal, reliqui justiores. Pyrrhi quidem de captivis reddendis, illa præclara:

*Nec mi aurum posco, nec mi pretium dederitis:
Nec cauponantes bellum, sed belligerantes,
Ferro, non auro vitam cernamus utrique.
Vosne velit, an me regnare hera, quidve ferat,
Fors,*

*Virtute experiamur. Et hoc simul accipe dictum:
Quorum virtuti belli fortuna pepercit,
Eorundem me libertati parcere certum est;
Dano, ducite, doque, volentibu' cum magnis diis.*

XIII. Regalis sanè & digna Æacidarum gente sententia. Atque etiam si quid singuli, temporibus adducti, hosti promiserint, est in eo ipso fides conservanda: ut primo Punico bello Regulus captus a Pœnis, quum de captivis commutandis Romam missus esset, jurassetque se rediturum; primum, ut venit, captivos reddendos in senatu non censuit: deinde, quum retineretur a propinquis, & ab amicis, ad supplicium redire maluit quàm fidem hosti datam fallere.

40. Ac de bellicis quidem officiis satis dictum est. Meminerimus autem, etiam

adversus infimos justitiam esse servandam. Est autem infima conditio & fortuna servorum; quibus, non malè præcipiunt, qui ita jubent uti, ut mercenariis: operam exigendam; justa præbenda.

41. Quum autem duobus modis, id est, aut vi, aut fraude fiat injuria: fraus, quasi vulpeculæ; vis, leonis videtur: utrumque homine alienissimum: sed fraus odio digna majore. Totius autem injustitiæ nulla capitalior est, quàm eorum, qui quum maximè fallunt, id agunt, ut viri boni esse videantur. De justitia satis dictum est.

XIV. Deinceps (ut erat propositum) de beneficentia ac liberalitate dicatur; quâ quidem nihil est naturæ hominis accommodatius: sed habet multas cautiones. Videndum est enim primùm ne obsit benignitas, & iis ipsis, quibus benignè videbitur fieri, & ceteris: deinde, ne major benignitas sit, quàm facultates: tum ut pro dignitate cuique tribuatur: id enim est justitiæ fundamentum, ad quam hæc referenda sunt omnia. Nam & qui gratificantur cuiquam, quod obsit illi, cui prodesse velle videantur, non benefici, neque liberales, sed perniciosi atque assentatores judicandi sunt: & qui aliis nocent, ut in alios liberales sint, in eadem sunt injustitia, ut si in suam rem aliena convertant.

43. Sunt autem multi, & quidem cupidi splendoris & gloriæ, qui eripiunt aliis, quod aliis largiantur; hique arbitrantur se beneficos in suos amicos visum iri, si locupletent eos quacumque ratione. Id autem tantum abest ab officio, ut nihil magis officio possit esse contrarium. Videndum est igitur, ut eâ liberalitate utamur, quæ prosit amicis, noceat nemini. Quare L. Sullæ, & C. Cæsaris pecuniarum translatio a justis dominis ad alienos non debet liberalis videri: nihil enim liberale, quod non idem justum.

44. Alter erat locus cautionis, nè benignitas major esset, quàm facultates; quòd, qui benigniores volunt esse, quàm res patitur, primum in eo peccant, quòd injuriosi sunt in proximos: quas enim copias his & suppeditari æquius est, & relinquere, eas transferunt ad alienos. Inest autem in tali liberalitate cupiditas plerumque rapiendi & auferendi per injuriam, ut ad largiendum suppetant copiae. Videre etiam licet plerosque non tam naturâ liberales, quàm quâdam gloriâ ductos, ut benefici videantur, facere multa, quæ proficisci ab ostentatione magis, quàm a voluntate videantur. Talis autem simulatio vanitati est conjunctior, quàm aut liberalitati, aut honestati.

45. Tertium est propositum, ut in be-

neficientia delectus esset dignitatis; in quo & mores ejus erunt spectandi, in quem beneficium conferetur, & animus erga nos, & communitas ac societas vitæ, & ad nostras utilitates officia antè collata: quæ ut concurrant omnia, optabile est; sin minus, plures causæ majoresque ponderis plus habebunt.

XV. Quoniam autem vivitur non cum perfectis hominibus, plenèque sapientibus, sed cum iis, in quibus præclarè agitur, si sunt simulacra virtutis; etiam hoc intelligendum puto, neminem omnino esse negligendum, in quo aliqua significatio virtutis appareat; colendum autem esse ita quemque maximè, ut quisque maximè virtutibus his lenioribus erit ornatus, modestiâ, temperantiâ, hæc ipsâ, de qua jam multa dicta sunt, justitiâ. Nam fortis animus, & magnus in homine non perfecto, nec sapiente, ferventior plerumque: illæ viritutes virum bonum videntur potius attingere.

47. Atque hæc in moribus. De benevolentia autem, quam quisque habeat erga nos, primùm illud est in officio, ut ei plurimùm tribuamus, a quo plurimùm diligimur: sed benevolentiam non adolescentulorum more, ardore quodam amoris, sed stabilitate potius & constantiâ judicemus. Sin erunt merita, ut non ineun-

da, sed referenda sit gratia; major quædam cura adhibenda est: nullum enim officium referendâ gratiâ magis necessarium est.

48. Quòd si ea, quæ utenda acceperis, majore mensurâ, si modò possis, jubet reddere Hesiodus; quidnam beneficio provocati facere debemus? an imitari agros fertiles, qui multò plus afferunt, quàm acceperunt? Etenim si in eos, quos speramus nobis profuturos, non dubitamus officia conferre; quales in eos esse debemus, qui jam profuerunt? Nam quum duo genera liberalitatis sint, unum dandi beneficii, alterum reddendi; demus, necne, in nostra potestate est: non reddere, viro bono non licet, modò id facere possit sine injuria.

49. Acceptorum autem beneficiorum sunt delectus habendi; nec dubium, quin maximo cuique plurimùm debeat: in quo tamen in primis, quo quisque animo, studio, benevolentia fecerit, ponderandum est. Multi enim faciunt multa temeritate quadam, sine judicio, vel modo, in omnes repentino quodam, quasi vento, impetu animi incitati: quæ beneficia æquè magna non sunt habenda, atque ea, quæ judicio, consideratè, constanterque delata sunt. Sed in collocando beneficio, & in referenda gratia, si ce-

tera paria sint, hoc maximè officii est, ut quisque maximè opis indigeat, ita ei potissimum opitulari: quod contrà fit a plerisque: a quo enim plurimum sperant, etiamsi ille his non eget, tamen ei potissimum inserviunt.

XVI. Optimè autem societas hominum conjunctioque servabitur, si ut quisque erit conjunctissimus, ita in eum benignitatis plurimum conferetur. Sed quæ naturâ principia sint communitatis & societatis humanæ, repetendum altiùs videtur. Est enim primum, quod cernitur in universi generis humani societate: ejus autem vinculum est, ratio & oratio; quæ docendo, discendo, communicando, disceptando, judicando, conciliat inter se homines, conjungitque naturali quadam societate. Neque ullâ re longiùs absumus a natura ferarum; in quibus inesse fortitudinem sæpe dicimus, ut in equis, in leonibus; justitiam, æquitatem, bonitatem non dicimus. Sunt enim rationis & orationis expertes.

§1. Ac latissimè quidem patens hominibus inter ipsos, omnibus inter omnes, societas hæc est; in qua omnium rerum, quas ad communem hominum usum natura genuit, est servanda communitas: ut quæ descripta sunt legibus & jure civili, hæc ita teneantur, ut sit constitutum: e

quibus ipsis cetera sic observentur, ut in Græcorum proverbio est: *Amicorum esse omnia communia*. Omnia autem communia hominum videntur ea, quæ sunt generis ejus, quod ab Ennio positum in una re, transferri in multas potest.

*Homo qui erranti comiter monstrat viam,
Quasi lumen de suo lumine accendat, facit;
Nihilò minùs ut ipsi luceat, quum illi accenderit.*

§2. Una ex re fatis præcipitur, ut, quidquid sine detrimento possit commodari, id tribuatur vel ignoto. Ex quo sunt illa communia, Non præhibere aquâ profluentes; Pati ab igne ignem capere, si quis velit; Consilium fidele deliberanti dare: quæ sunt iis utilia, qui accipiunt; danti non molesta. Quare & his utendum est, & semper aliquid ad communem utilitatem afferendum. Sed quoniam copiarum parvæ singulorum sunt; eorum autem, qui his egeant, infinita est multitudo: vulgaris liberalitas referenda est ad illum Ennii finem, *Nihilò minùs ut ipsi luceat*; ut facultas sit, quâ in nostros simus liberales.

XVII. Gradus autem plures sunt societatis hominum. Ut enim ab infinita illa discedatur, propior est ejusdem gentis, nationis, linguæ, quâ maximè homines junguntur: interius etiam est, ejusdem esse civitatis. Multa enim sunt civibus in-

ter se communia; forum, fanæ, porticus, viæ, leges, jura, judicia, suffragia, consuetudines præterea & familiaritates, multisque cum multis res rationesque contractæ. Arctior verò colligatio est societatis propinquorum: ab illa enim immensa societate humani generis in exiguum angustumque concluditur.

54. Nam quum sit hoc naturâ commune animantium, ut habeant libidinem procreandi, prima societas in ipso conjugio est: proxima in liberis: deinde una domus, communia omnia. Id autem est principium urbis, & quasi seminarium reipublicæ. Sequuntur fratrum conjunctiones: post consobrinorum, sobrinorumque, qui, quum unâ domo jam capi non possint, in alias domos, tamquam in colonias exeunt. Sequuntur connubia & affinitates; ex quibus etiam plures propinqui: quæ propagatio & soboles origo est rerumpublicarum. Sanguinis autem conjunctio, benevolentiam devincit homines & caritate: magnum est enim, eadem habere monumenta majorum, iisdem uti sacris, sepulcra habere communia.

55. Sed omnium societatum nulla præstantior est, nulla firmior, quàm quum viri boni, moribus similes, sunt familiaritate conjuncti. Illud enim honestum (quod sæpe dicimus) etiam si in alio

cernimus, tamen nos movet, atque illi, in quo id inesse videtur, amicos facit.

56. Et quamquam omnis virtus nos ad se allicit, facitque ut eos diligamus, in quibus ipsa inesse videatur; tamen justitia & liberalitas id maximè efficit: nihil autem est amabilius, nec copulativius, quàm morum similitudo bonorum. In quibus enim eadem studia sunt, eademque voluntates, in his fit, ut æquè quisque altero delectetur, ac se ipso; efficiturque id, quod Pythagoras vult in amicitia, ut unus fiat ex pluribus. Magna etiam illa communitas est, quæ conficitur ex beneficiis ultro citro datis acceptis; quæ mutua, & grata dum sunt, inter quos ea sunt, firmâ illi devinciuntur societate.

57. Sed quum omnia ratione animoque lustraris, omnium societatum nulla est gravior, nulla carior, quàm ea, quæ cum republica est unicuique nostrum. Cari sunt parentes, cari liberi, propinqui, familiares: sed omnes omnium caritates patria una complexa est; pro qua quis bonus dubitet mortem oppetere, si ei sit profuturus? Quò est detestabilior istorum immanitas, qui lacerarunt omni scelere patriam, & in ea funditus delenda occupati & sunt, & fuerunt.

58. Sed si contentio quædam & comparatio fiat, quibus plurimumtribuendum

sit officii, principes sint patria & parentes, quorum beneficiis maximè obligati sumus: proximi, liberi, totaque domus, quæ spectat in nos solos, neque aliud ullum potest habere perfugium: deinceps bene convenientes propinqui, quibuscum etiam communis plerumque fortuna est. Qamobrem necessaria præsidia vitæ debentur iis maximè, quos antè dixi: vita autem, victusque communis, consilia, sermones, cohortationes, consolationes, interdum etiam objurgationes in amicitiiis vigent maximè: estque ea jucundissima amicitia, quam similitudo morum conjugavit.

XVIII. Sed in his omnibus officiis tribuendis videndum erit, quid cuique maximè necesse sit, & quid quisque nobiscum vel sine nobis aut possit consequi, aut non possit. Ita non iidem erunt necessitudinum gradus, qui temporum. Sunt quædam officia, quæ aliis magis, quàm aliis debeantur; ut vicinum citiùs adjuveris in fructibus percipiendis, quàm aut fratrem, aut familiarem. At, si lis in iudicio sit, propinquum potiùs & amicum, quàm vicinum defenderis. Hæc igitur, & talia, circumspicienda sunt in omni officio; & consuetudo exercitatioque capienda, ut boni ratiocinadores officiorum esse possimus, & addendo deducendoque vi-

dere , quæ reliqui summa fiat : ex quo , quantum cuique debeat , intelligas.

60. Sed ut nec medici , nec imperatores , nec oratores , quamvis artis præcepta perceperint , quidquam magnâ laude dignum sine usu & exercitatione consequi possunt ; sic officii conservandi præcepta traduntur illa quidem , ut facimus ipsi ; sed rei magnitudo usum quoque exercitationemque desiderat. Atque ab iis rebus , quæ sunt in jure societatis humanæ , quemadmodum ducatur honestum , ex quo aptum est officium , satis ferè diximus.

61. Intelligendum est autem , quum proposita sint genera quatuor , e quibus honestas officiumque manaret , splendidissimum videri , quod animo magno , elatoque , humanasque res despiciente factum sit. Itaque in probris maximè in promptu est , si quid tale dici potest :

*Vos etenim juvenes , animum geritis muliebrem ;
Illa virago viri.*

& si quid ejusmodi :

Salmaci , da spolia , sine sudore & sanguine.

Contràque in laudibus , quæ magno animo , & fortiter excellenterque gesta sunt , ea nescio quomodo quasi pleniore ore

laudamus. Hinc rhetorum campus de Marathone, Salamine, Plataeis, Thermopylis, Leuctris: hinc noster Cocles, hinc Decii, hinc Cn. & P. Scipiones, hinc M. Marcellus, innumerabilesque alii; maximeque ipse populus Romanus animi magnitudine excellit. Declaratur autem studium bellicae gloriae, quod statuas quoque videmus ornatu ferè militari.

XIX. Sed ea animi elatio, quae cernitur in periculis & laboribus, si iustitiâ vacat, pugnatque non pro salute communi, sed pro suis commodis, in vitio est: non enim modò id virtutis non est, sed potius immanitatis, omnem humanitatem repellentis. Itaque probè definitur a Stoicis fortitudo, quum eam, virtutem esse dicunt propugnantem pro aequitate. Quocirca nemo, qui fortitudinis gloriam consecutus est insidiis & malitiâ, laudem est adeptus: nihil enim honestum esse potest, quod iustitiâ vacat.

63. Præclarum igitur Platonis illud: Non solum, inquit, scientia quae est remota a iustitia, calliditas potius, quam sapientia, est appellanda; verum etiam animus paratus ad periculum, si suâ cupiditate, non utilitate communi, impellitur, audaciae potius nomen habeat, quam fortitudinis. Itaque viros fortes & magnanimos, eosdem bonos & simplices; veritatis amicos

minimèque fallaces esse volumus : quæ sunt ex media laude iustitiæ.

64. Sed illud odiosum est, quòd in hac elatione & magnitudine animi, facillimè pertinacia & nimia cupiditas principatûs innascitur. Ut enim apud Platonem est, omnem morem Lacedæmoniorum inflammatum esse cupiditate vincendi; sic, ut quisque animi magnitudine maximè excellit, ita maximè vult princeps omnium, vel potius solus esse. Difficile autem est, quum præstare omnibus concupieris, servare æquitatem, quæ est iustitiæ maximè propria. Ex quo fit, ut neque disceptatione vinci se, nec ullo publico ac legitimo jure patiantur; exsistuntque in republica plerumque largitores, & factiosi, ut opes quàm maximas consequantur, & sint vi potius superiores, quàm iustitiâ pares. Sed quò difficilius, hoc præclarius: nullum enim tempus est, quod iustitiâ vacare debeat.

65. Fortes igitur & magnanimi sunt habendi, non qui faciunt, sed qui propulsant injuriam. Vera autem & sapiens animi magnitudo honestum illud, quod maximè natura sequitur, in factis positum, non in gloria judicat; principemque se esse mavult, quàm videri. Etenim qui ex errore imperitiæ multitudinis pendet, hic in magnis viris non est habendus. Facillimè

mè autem ad res injustas impellitur , ut quisque altissimo animo est , gloriæ cupiditate : qui locus est sanè lubricus , quod vix invenitur , qui laboribus susceptis , periculisque aditis , non quasi mercedem rerum gestarum desideret gloriam.

XX. Omnino fortis animus , & magnus , duabus rebus maximè cernitur ; quarum una in rerum externarum despicientia ponitur , quum persuasum sit , nihil hominem , nisi quod honestum decorumque sit , aut admirari , aut optare , aut expetere oportere ; nullique neque homini , neque perturbationi animi , nec fortunæ succumbere. Altera est res , ut , quum ita sis affectus animo , ut suprà dixi , res geras magnas illas quidem , & maximè utiles , sed & vehementer arduas plenasque laborum & periculorum tum vitæ , tum multarum rerum , quæ ad vitam pertinent.

67. Harum rerum duarum splendor omnis & amplitudo , addo etiam utilitatem , in posteriore est ; causa autem & ratio efficiens magnos viros , est in priore. In eo enim est illud , quod excellentes animos , & humana contemnentes facit : id autem ipsum cernitur in duobus , si & solum id , quod honestum sit , bonum judices , & ab omni animi perturbatione liber sis. Nam & ea , quæ eximia plerisque & præclara

videntur , parva ducere , eaque ratione stabili firmâque contemnere , fortis animi magnique ducendum est ; & ea , quæ videntur acerba , quæ multa & varia in hominum vita fortunaque versantur , ita ferre , ut nihil a statu naturæ discedas , nihil a dignitate sapientis , robusti animi est , magnæque constantiæ.

68. Non est autem consentaneum , qui metu non frangatur , eum frangi cupiditate ; nec , qui invictum se a labore præstiterit , vinci a voluptate. Quamobrem & hæc videnda ; & pecuniæ fugienda cupiditas : nihil enim est tam angusti animi tamque parvi , quàm amare divitias ; nihil honestius magnificentiusque , quàm pecuniam contemnere , si non habeas ; si habeas , ad beneficentiam liberalitatemque conferre. Cavenda est etiam gloriæ cupiditas , ut suprâ dixi ; eripit enim libertatem , pro qua magnanimis viris omnis debet esse contentio. Nec verò imperia expetenda , ac potius , aut non accipienda interdum , aut deponenda nonnumquam.

69. Vacandum autem est omni animi perturbatione , tum cupiditate & metu , tum etiam ægritudine , & voluptate nimia , & iracundiâ ; ut tranquillitas animi & securitas adsit , quæ affert quum constantiam , tum etiam dignitatem. Multi autem & sunt , & fuerunt , qui eam ,

quam dico, tranquillitatem expetentes, a negotiis publicis se removerint, ad otiumque confugerint. In his & nobilissimi philosophi, longéque principes, & quidam homines severi & graves, nec populi, nec principum mores ferre poterunt; vixeruntque nonnulli in agris, delectati re suâ familiari. His idem propositum fuit, quod regibus, ut ne quâ re egerent, ne cui parerent, libertate uterentur; cujus proprium est, sic vivere, ut velis.

XXI. Quare quum hoc commune sit potentiae cupidorum cum iis, quos dixi, otiosis; alteri se adipisci id posse arbitrantur, si opes magnas habeant; alteri, si contenti sint & suo, & parvo: in quo neutrorum omnino contemnenda est sententia: sed & faciliior, & tutior, & minus aliis gravis aut molesta vita est otiosorum; fructuosior autem hominum generi, & ad claritatem amplitudinemque aptior eorum, qui se ad rempublicam & ad res magnas gerendas accommodaverunt.

71. Quapropter & iis forsitan concedendum sit, rempublicam non capeissentibus, qui excellenti ingenio, doctrinae sese dediderunt; & iis, qui aut valetudinis imbecillitate, aut aliquâ graviore causâ impediti, a republica recesserunt,

quum ejus administrandæ potestatem aliis, laudemque concederent. Quibus autem talis nulla sit causa, si despiciere se dicant ea, quæ plerique admirantur, imperia & magistratus, iis non modò non laudi, verum etiam vitio dandum puto: quorum judicium in eo, quòd gloriam contemnunt & pro nihilo putant, difficile factum est non probare; sed videntur labores & molestias tum offensionum, tum repulsarum, quasi quamdam ignominiam timere, & infamiam. Sunt enim, qui in rebus contrariis parum sibi constent, voluptatem severissimè contemnunt, in dolore sint molliores: gloriam negligant, frangantur infamiâ: atque ea quidem non factis constanter.

72. Sed iis, qui habent a natura adjumenta rerum gerendarum, abjectâ omnium cunctatione, adipiscendi magistratus, & gerenda respublica est: nec enim aliter aut regi civitas, aut declarari animi magnitudo potest. Capeissentibus autem rempublicam nihilò minùs, quàm philosophis, haud scio an magis etiam, & magnificentia, & despicientia adhibenda est rerum humanarum, &, quam sæpe dico, tranquillitas animi, atque securitas; si quidem nec anxii futuri sunt, & cum gravitate constantiaque victuri. Quæ eò faciliora sunt philosophis, quò minùs mul-

ta, patent in eorum vita, quæ fortuna feriat, & quò minùs multis rebus egent; & quia, si quid adversi eveniat, tam graviter cadere non possunt. Quocirca non sine causa majores motus animorum concitantur, majoraque efficienda rempublicam gerentibus, quàm quietis; quò magis his & magnitudo animi est adhibenda, & vacuitas ab angoribus.

73. Ad rem gerendam autem qui accedit, caveat, ne id modò consideret, quàm illa res honesta sit; sed etiam, ut habeat efficiendi facultatem: in quo ipso considerandum est, ne aut temerè desperet, propter ignaviam; aut nimis confidat propter cupiditatem. In omnibus autem negotiis, priùs, quàm aggrediare, adhibenda est præparatio diligens.

XXII. Sed quum plerique arbitrentur res bellicas majores esse, quàm urbanas, minuenda est hæc opinio: multi enim bella sæpe quæsierunt propter gloriæ cupiditatem; atque id in magnis animis ingeniisque plerumque contingit; eoque magis, si sunt ad rem militarem apti, & cupidi bellorum gerendorum. Verè autem si volumus judicare, multæ res exstiterunt urbanæ majores clariorefque, quàm bellicæ.

75. Quamvis enim Themistocles jure laudetur, & sit ejus nomen, quàm Solo-

nis, illustrius, citeturque Salamis, clarissimæ testis victoriæ, quæ anteponatur consilio Solonis, ei, quo primum constituit Areopagitas; non minus præclarum hoc, quàm illud, judicandum est. Illud enim semel profuit, hoc semper proderit civitati: hoc consilio leges Atheniensium, hoc majorum instituta servantur. Et Themistocles quidem nihil dixerit, in quo ipse Areopagum adjuverit; at ille verè, a se adjutum Themistoclem. Est enim bellum gestum consilio senatûs ejus, qui a Solone erat constitutus.

76. Licet eadem de Pausania, Lyfandroque dicere; quorum rebus gestis quamquam imperitum Lacedæmoniis dilatatum putatur; tamen ne minima quidem ex parte Lycurgi legibus & disciplinæ conferendi sunt. Quin etiam ob has ipsas causas & parentiores habuerunt exercitus, & fortiores. Mihi quidem neque pueris nobis, M. Scaurus C. Mario, neque, quum versaremur in republicâ, Q. Catulus Cn. Pompeio cedere videbantur. Parvi enim sunt foris arma, nisi est consilium domi. Nec plus Africanus, singularis & vir, & imperator, in excindenda Numantia reipublicæ profuit, quàm eodem tempore P. Nasica privatus, quum Tib. Gracchum interemit: quamquam hæc quidem res non solum ex domestica est ra-

LIBER PRIMUS. 151

tione ; attingit etiam bellicam , quoniam vi , manuque confecta est : sed tamen id ipsum gestum est consilio urbano , sine exercitu.

77. Illud autem optimum est , in quo invadi solere ab improbis & invidis me audio :

Cedant arma togæ , concedat laurea laudi.

Ut enim alios omittam , nobis rempublicam gubernantibus nonne togæ arma cessere ? neque enim in republica periculum fuit gravius umquam , nec majus otium. Ita consiliis diligentiaque nostrâ celeriter de manibus audacissimorum civium delapsa arma impia ceciderunt. Quæ res igitur gesta umquam in bello tanta ? qui triumphus conferendus ?

78. Licet enim mihi , Marce fili , apud te gloriari , ad quem & hereditas hujus gloriæ , & factorum imitatio pertinet. Mihi quidem certè vir abundans bellicis laudibus , Cn. Pompeius , multis audientibus , hoc tribuit , ut diceret , frustra se triumphum tertium deportaturum fuisse , nisi meo in rempublicam beneficio , ubi triumpharet , esset habiturus. Sunt ergo domesticæ fortitudines non inferiores militari-
bus ; in quibus plus etiam , quàm in his , operæ studiique ponendum est.

XXIII. Omnino illud honestum , quod

G iv

ex animo excelso magnificoque quærimus, animi efficitur, non corporis viribus. Exercendum tamen corpus, & ita afficiendum est, ut obedire consilio rationique possit in exsequendis negotiis, & in labore tolerando. Honestum autem id, quod exquirimus, totum est positum in animi cura & cogitatione; in quo non minorem utilitatem afferunt, qui togati reipublicæ præfunt, quàm qui bellum gerunt. Itaque eorum consilio sæpe aut non suscepta, aut confecta bella sunt, nonnumquam etiam illata; ut M. Catonis bellum tertium Punicum, in quo etiam mortui valuit auctoritas.

80. Quare expetenda quidem magis est decernendi ratio, quàm decertandi fortitudo: sed cavendum, ne id bellandi magis fugâ, quàm utilitatis ratione faciamus. Bellum autem ita suscipiatur, ut nihil aliud, nisi pax quæsita videatur. Fortis verò & constantis est, non perturbati in rebus asperis, nec tumultuantem de gradu dejici, ut dicitur; sed præsentis animi uti consilio, nec a ratione discedere.

81. Quamquam hoc animi, illud etiam ingenii magni est, præcipere cogitatione futura, & aliquantò antè constituere, quid accidere possit in utramque partem; &, quid agendum sit, quum quid evenerit; nec committere, ut aliquando dicendum

sit, *Non putaram*. Hæc sunt opera magni animi, & excelsi, & prudentiâ consilioque fidentis. Temerè autem in acie versari, & manu cum hoste conflagere, immane quiddam & belluarum simile est: sed quum tempus necessitasque postulat, decertandum manu est, & mors servituti turpitudinique anteponenda.

XXIV. De evertendis autem diripiendisque urbibus valde considerandum est, ne quid temerè, ne quid crudeliter: idque viri magni est, rebus agitatis, punire fontes; multitudinem conservare; in omni fortuna, recta atque honesta retinere. Ut enim sunt, quemadmodum supra dixi, qui urbanis rebus bellicas anteponant; sic reperies multos, quibus periculosa & calida consilia, quietis & cogitatis splendidiora, & majora videantur.

83. Numquam omnino periculi fugâ committendum est, ut imbelles timidique videamur: sed fugiendum etiam illud, ne offeramus nos periculis sine causa; quò nihil potest esse stultius. Quapropter in adeundis periculis consuetudo imitanda medicorum est, qui leviter ægrotantes leniter curant; gravioribus autem morbis periculosas curationes & ancipites adhibere coguntur. Quare in tranquillo tempestatem adversam optare, dementis est; subvenire autem tempestati quavis ratio-

ne, sapientis: eoque magis, si plus adipiscare re explicatâ boni, quàm addubitâtâ mali. Periculosæ autem rerum actiones partim iis sunt, qui eas suscipiunt, partim reipublicæ. Itemque alii de vita, alii de gloria, & benevolentia civium in discrimen vocantur. Promptiores igitur debemus esse ad nostra pericula, quàm ad communia, dimicareque paratius de honore & gloria, quàm de ceteris commodis.

84. Inveni autem multi sunt, qui non modò pecuniam, sed vitam etiam profunderè pro patria parati essent; iidem gloriæ jacturam ne minimam quidem facere vellent, ne reipublicâ quidem postulante: ut Callicratidas, qui quum Lacedæmoniorum dux fuisset Peloponnesiaco bello, multaque fecisset egregiè, evertit ad extremum omnia, quum consilio non paruit eorum, qui classem ab Arginussis removendam, nec cum Atheniensibus dimicandum putabant. Quibus ille respondit, Lacedæmonios, classe illâ amisâ, aliam parare posse, se fugere sine suo dedecore non posse. Atque hæc quidem Lacedæmoniis plaga mediocris fuit; illa pestifera, quâ, quum Cleombrotus, invidiam timens, temerè cum Epaminonda conflixisset, Lacedæmoniorum opes corruerunt. Quantò Q. Maximus melius? de quo Ennius:

Unus Homo nobis cunctando restituit rem :

Non ponebat enim rumores ante salutem :

Ergo magisque magisque viri nunc gloria claret.

Quod genus peccandi vitandum est etiam in rebus urbanis. Sunt enim , qui , quod sentiunt , etsi optimum sit , tamen invidiæ metu non audent dicere.

XXV. Omnino qui reipublicæ præfuri sunt , duo Platonis præcepta teneant : unum , ut utilitatem civium sic tueantur , ut quæcumque agunt , ad eam referant , obliti commodorum suorum ; alterum , ut totum corpus reipublicæ curent , ne , dum partem aliquam tuentur , reliquas deserant. Ut enim tutela , sic procuratio reipublicæ ad utilitatem eorum , qui commissi sunt , non ad eorum , quibus commissa est , gerenda est. Qui autem parti civium consulunt , partem negligunt , rem perniciosissimam in civitatem inducunt , seditionem atque discordiam ; ex quo evenit , ut alii populares , alii studiosi optimi ejusque videantur , pauci universorum.

86. Hinc apud Athenienses magnæ discordiæ ; in nostra republica non solum seditiones , sed pestifera etiam bella civilia : quæ gravis & fortis civis , & in republica dignus principatu , fugiet atque oderit ; tradetque se totum reipublicæ , neque opes , aut potentiam consecrabitur ; totamque

eam sic tuebitur , ut omnibus consulat. Nec verò criminibus falsis in odium aut invidiam quemquam vocabit : omninoque ita justitiæ honestatique adhærescet , ut , dum ea conservet , quamvis graviter offendant , mortemque oppetat potius , quàm deferat illa , quæ dixi.

87. Miserrima est omnino ambitio , honorumque contentio : de qua præclare apud eundem est Platonem : » Similiter » facere eos , qui inter se contenderent , » uter potius rempublicam administraret , » ut si nautæ certarent , quis eorum potissimum gubernaret. Idemque præcepit , ut eos adversarios existimemus , qui arma contra ferant ; non eos , qui suo judicio tueri rempublicam velint : qualis fuit inter P. Africanum , & Q. Metellum sine acerbitate dissensio.

88. Nec verò audiendi , qui graviter irascendum inimicis putabunt , idque magnanimi & fortis viri esse censebunt. Nihil enim laudabilius , nihil magno & præclaro viro dignius placabilitate atque clementiâ. In liberis verò populis , & in juris æquabilitate , exercenda etiam est facilitas , & altitudo animi , quæ dicitur ; ne , si irascamur aut intempestivè accedentibus , aut impudenter rogantibus , in morositatem inutilem & odiosam incidamus. Et tamen ita probanda est mansuetudo.

atque clementia, ut adhibeatur, reipublicæ causâ, severitas, sine qua administrari civitas non potest. Omnis autem & animadversio, & castigatio, contumeliâ vacare debet; neque ad ejus, qui punitur aliquem, aut verbis castigat, sed ad reipublicæ utilitatem referri.

89. Cavendum est etiam, ne major pœna, quàm culpa sit; & ne iisdem de causis alii plectantur, alii ne appellentur quidem. Prohibenda autem maximè est ira in puniendo: numquam enim iratus qui accedet ad pœnam, mediocritatem illam tenebit, quæ est inter nimium & parum; quæ placet Peripateticis, & rectè placet, modò ne laudarent iracundiam, & dicerent utiliter a natura datam. Illa verò omnibus in rebus repudianda est; optandumque, ut ii, qui præsunt reipublicæ, legum similes sint, quæ ad puniendum non iracundiâ, sed æquitate ducuntur.

XXVI. Atque etiam in rebus prosperis, & ad voluntatem nostram fluentibus, superbiam, fastidium, arrogantiamque magnopere fugiamus: nam ut adversas res, sic secundas immoderatè ferre, levitatis est; præclaraque est æquabilitas in omni vita, & idem semper vultus, eademque frons, ut de Socrate, item de C. Lælio accepimus. Philippum quidem Macedo-

num regem, rebus gestis & gloriâ superatum a filio; facilitate & humanitate video superiorem fuisse. Itaque alter semper magnus, alter sæpe turpissimus fuit; ut rectè præcipere videantur, qui movent, ut quantò superiores sumus, tantò nos geramus summissius. Panætius quidem Africanum auditorem, & familiarem suum, solitum ait dicere, ut equos, propter crebras contentiones præliorum ferocitate exultantes, domitoribus tradere soleant, ut his facilioribus possint uti; sic homines secundis rebus effrenatos, sibi præsidentes, tamquam in gyrationis & doctrinæ duci oportere, ut perspicerent rerum humanarum imbecillitatem, varietatemque fortunæ.

91. Atque etiam in secundissimis rebus maximè est utendum consilio amicorum, hisque major etiam, quàm antè, tribuenda auctoritas: iisdemque temporibus cavendum est, ne assentatoribus patefaciamus aures, nec adulari nos sinamus; in quo falli facile est: tales enim nos tunc esse putamus, ut jure laudemur; ex quo nascuntur innumerabilia peccata, quum homines inflati opinionibus, turpiter irridentur, & in maximis versantur erroribus. Sed hæc quidem hætenus.

92. Illud autem sic est judicandum, maximas geri res, & maximi animi ab

iis, qui respublicas regant, quod earum administratio latissimè pateat, ad plurimosque pertineat: esse autem magni animi, & fuisse multos etiam in vita otiosa, qui aut investigarent, aut conarentur magna quædam, seseque suarum rerum finibus continerent; aut interjecti inter philosophos, & eos, qui rempublicam administrarent, delectarentur re suâ familiarî, non eam quidem omni ratione exaggerantes, neque excludentes ab ejus usu suos; potiùsque & amicis impertientes, & reipublicæ, si quando usus esset. Quæ primùm bene parta sit, nullo neque turpi quæstu, neque odioso: tum quàm plurimis, modò dignis, se utilem præbeat: deinde augeatur ratione, diligentia, parcimonia; nec libidini potius luxuriæque, quàm liberalitati & beneficentiæ pateat. Hæc præscripta fervantem licet magnificè, graviter, animosèque vivere, atque etiam simpliciter, fideliter, vitæque hominum amicè.

XXVII. Sequitur, ut de una reliqua parte honestatis dicendum sit; in qua verecundia, & quasi quidam ornatus vitæ, temperantia & modestia, omnisque sedatio perturbationum animi, & rerum modus cernitur. Hoc loco continetur id, quod dici Latinè *decorum* potest: Græcè enim *εὐσέβεια* dicitur. Hujus vis ea est, ut ab ho-

nesto non queat separari. Nam & quod decet, honestum est; & quod honestum est, decet.

94. Qualis autem differentia sit honesti & decori, facilius intelligi, quàm explari potest: quidquid est enim, quod deceat, id tum apparet, quum antegressa est honestas. Itaque non solum in hac parte honestatis, de qua hoc loco differendum est, sed etiam in tribus superioribus, quid deceat, apparet: nam & ratione uti, atque oratione prudenter; & agere quod agas, consideratè; omnique in re quid sit veri, videre & tueri decet: contràque falli, errare, labi, decipi tam dedecet, quàm delirare & mente esse captum. Et iusta omnia, decora sunt; iniusta contrà, ut turpia, sic indecora. Similis & ratio fortitudinis: quod enim viriliter animoque magno fit, id dignum viro & decorum videtur; quod contrà, id ut turpe, sic indecorum.

95. Quare pertinet quidem ad omnem honestatem hoc, quod dico, decorum; & ita pertinet, ut non reconditâ quadam ratione cernatur, sed sit in promptu: est enim quiddam, idque intelligitur in omni virtute, quod deceat; quod cogitatione magis a virtute potest, quàm re separari. Ut venustas & pulchritudo corporis fecerini non potest a valetudine; sic hoc, de

quo loquimur decorum, totum illud quidem est cum virtute confusum; sed mente & cogitatione distinguitur.

96. Est autem ejus descriptio duplex: nam & generale quoddam decorum intelligimus, quod in omni honestate versatur; & aliud huic subjectum, quod pertinet ad singulas partes honestatis. Atque illud superius sic ferè definiri solet: Decorum id esse, quod consentaneum sit hominis excellentiæ, in eo, in quo natura ejus a reliquis animantibus differat. Quæ autem pars subjecta generi est, eam sic definiunt, ut id decorum esse velint, quod ita naturæ consentaneum sit, ut in eo moderatio & temperantia appareat cum specie quadam liberali.

XXVIII. Hæc ita intelligi, existimare possumus ex eo decoro, quod poëtæ sequuntur; de quo alio loco plura dici solent. Sed tum servare illud poëtas dicimus, quod deceat, quum id, quod quaque personâ dignum est, & fit, & dicitur. Ut, si Æacus, aut Minos diceret

*Oderint dum metuant: aut, Natis sepulcro ipse est
parens:*

indecorum videretur; quòd eos fuisse justos accepimus. At Atreo dicente, plausus excitantur: est enim digna personâ oratio. Sed poëtæ quid quemque deceat, ex per-

sona judicabunt : nobis autem personam imposuit ipsa natura , magna cum excellentia præstantiaque animantium reliquarum.

98. Quocirca poëtæ in magna varietate personarum , etiam vitiosis quid conveniat , & quid deceat , videbunt ; nobis autem quum a natura constantiæ , moderationis , temperantiæ , verecundiæ partes datæ sint ; quumque eadem natura doceat non negligere , quemadmodum nos adversus homines geramus ; efficitur , ut & illud , quod ad omnem honestatem pertinet , decorum , quàm latè fusum sit , appareat ; & hoc , quod spectatur in unoquoque genere virtutis. Ut enim pulchritudo corporis aptâ compositione membrorum movet oculos , & delectat hoc ipso , quòd inter se omnes partes cum quodam lepore consentiunt ; sic hoc decorum , quod elucet in vita , movet approbationem eorum , quibuscum vivitur , ordine , & constantiâ , & moderatione dictorum omnium atque factorum.

99. Adhibenda est igitur quædam reverentia adversus homines , & optimi cuiusque , & reliquorum : nam negligere quid de se quisque sentiat , non solum arrogantis est , sed etiam omnino dissoluti. Est autem quod differat , in hominum ratione habenda , inter justitiam & verecun-

LIBER PRIMUS. 163

diam. Justitiæ partes sunt, non violare homines; verecundiæ, non offendere; in quo maximè perspicitur vis decori. His igitur expositis, quale sit id, quod decere dicimus, intellectum puto.

100. Officium autem, quod ab eo ducitur, hanc primùm habet viam, quæ deducit ad convenientiam conservationemque naturæ: quam si sequemur ducem, numquam aberrabimus; sequemurque & id, quod acutum & perspicax naturâ est; & id, quod ad hominum consociationem accommodatum; & id, quod vehemens atque forte. Sed maxima vis decori in hac inest parte, de qua disputamus: neque enim solum corporis, qui ad naturam apti sunt, sed multò etiam magis animi motus probandi, qui item ad naturam accommodati sunt.

101. Duplex est enim vis animorum, atque naturæ: una pars in appetitu posita est, quæ est ~~ipsum~~ Græcè, quæ hominem huc & illuc rapit; altera in ratione, quæ docet, & explanat, quid faciendum fugiendumque sit: ita fit, ut ratio præsit, appetitus obtemperet.

XXIX. Omnis autem actio vacare debet temeritate, & negligentia; nec verò agere quidquam, cujus non possit causam probabilem reddere. Hæc est enim ferè descriptio officii. Efficiendum autem est,

ut appetitus rationi obediant, eamque neque præcurrant, nec propter pigritiam, aut ignaviam deferant; sintque tranquilli, atque omni perturbatione animi careant. Ex quo elucebit omnis constantia, omnisque moderatio: nam qui appetitus longius evagantur, & tamquam exultantes sive cupiendo, sive fugiendo, non satis a ratione retinentur, hi sine dubio finem & modum transeunt: relinquunt enim & abjiciunt obedientiam, nec rationi parent, cui sunt subiecti lege naturæ: a quibus non modò animi perturbantur, sed etiam corpora. Licet ora ipsa cernere iratorum, aut eorum, qui aut libidine aliquâ, aut metu commoti sunt, aut voluptate nimia gestiunt; quorum omnium vultus, voces, motus, statusque mutantur.

103. Ex quibus illud intelligitur (ut ad officii formam revertamur) appetitus omnes contrahendos sedandosque, excitandamque animadversionem & diligentiam, ut ne quid temerè ac fortuitu, inconsideratè, negligenterque agamus. Neque enim ita generati a natura sumus, ut ad ludum & jocum facti esse videamur; sed ad severitatem potius, & ad quædam studia graviora atque majora. Ludo autem & joco uti illo quidem licet; sed sicut somno & quietibus ceteris, tum quum gravibus seriisque rebus satisfecerimus. Ip-

sumque genus jocandi non profusum, nec immodestum, sed ingenuum & facetum esse debet. Ut enim pueris non omnem ludendi licentiam damus, sed eam, quæ ab honestis actionibus non sit aliena; sic in ipso joco aliquod probi ingenii lumen eluceat.

104. Duplex omnino est jocandi genus: unum illiberale, petulans, flagitiosum, obscœnum; alterum, elegans, urbanum, ingeniosum, facetum: quo genere non modò Plautus noster, & Atticorum antiqua comœdia, sed etiam philosophorum Socraticorum libri referti sunt: multaue multorum facetè dicta; ut ea, quæ a sene Catone collecta sunt, quæ vocant ἀποφθίγματα. Facilis igitur est distinctio ingenui & illiberalis joci: alter est, si tempore fit, ac remisso animo, libero dignus; alter ne homine quidem, si rerum turpitudini adhibetur verborum obscœnitas. Ludendi etiam est quidam modus retinendus, ut ne nimis omnia profundamus, elatique voluptate in aliquam turpitudinem delabamur. Suppeditant autem & campus noster, & studia venandi, honesta exempla ludendi.

XXX. Sed pertinet ad omnem officii quæstionem, semper in promptu habere, quantum natura hominis pecudibus reliquisque belluis antecedit. Illæ nihil sen-

tiunt, nisi voluptatem, ad eamque feruntur omni impetu: hominis autem mens discendo alitur, & cogitando, semper aliquid aut anquirat, aut agit, videndique & audiendi delectatione ducitur. Quin etiam si quis est paulò ad voluptates propensior, modò ne sit ex pecudum genere (sunt enim quidam homines non re, sed nomine) sed si quis est paulò erectior, quamvis voluptate capiatur, occultat & dissimulat appetitum voluptatis, propter verecundiam.

106. Ex quo intelligitur, corporis voluptatem non satis esse dignam hominis præstantiâ, eamque contemni & rejici oportere: sin sit quisquam qui aliquid tribuat voluptati, diligenter ei tenendum esse ejus fruendæ modum. Itaque victus cultusque corporis ad valetudinem referantur, & ad vires, non ad voluptatem. Atque etiam si considerare volumus, quæ sit in natura excellentia & dignitas; intelligemus, quàm sit turpe, diffluere luxuriâ, & delicatè ac molliter vivere; quàmque honestum, parcè, continenter, severè, sobriè.

107. Intelligendum est etiam, duabus quasi nos a natura indutos esse personis; quarum una est communis, ex eo, quòd omnes participes sumus rationis præstantiæque ejus, quâ antecellimus bestiis; a

qua omne honestum decorumque trahitur, & ex qua ratio inveniendi officii exquiritur; altera autem, quæ propriè singulis est tributa. Ut enim in corporibus magnæ dissimilitudines sunt (alios enim videmus velocitate ad cursum, alios viribus ad luctandum valere: itemque in formis aliis dignitatem inesse, aliis venustatem) sic in animis exsistunt etiam majores varietates.

198. Erat in L. Crasso, & in L. Philippo multus lepos: major etiam magisque de industria in C. Cæsare, Lucii filio. At iisdem temporibus in M. Scauro, & in M. Druso adolescente, singularis severitas: in C. Lælio multa hilaritas: in ejus familiari Scipione ambitio major, vita tristior. De Græcis autem, dulcem & facetum, festivique sermonis, atque in omni oratione simulatorem, quem *σῖπας* Græci nominaverunt, Socratem accepimus: contrà, Pythagoram & Periclem summam auctoritatem consecutos, sine ulla hilaritate. Callidum Annibalem, ex Pœnorum; ex nostris ducibus Q. Maximum accepimus: facilè celare, tacere, dissimulare, insidiari, præcipere hostium consilia. In quo genere Græci Themistoclem & Pheræum Jasonem ceteris anteponunt: in primisque versutum & callidum factum Solonis, qui, quò & tutior

vita ejus esset, & plus aliquantò reipublicæ prodesset, furere se simulavit.

109. Sunt his alii multum dispares; simplices & aperti; qui nihil ex occulto, nihil ex insidiis agendum putant, veritatis cultores, fraudis inimici: itemque alii, qui quidvis perpetiantur, cuivis deserviant, dum, quod velint, consequantur, ut Sullæ M. Crassum videbamus. Quò in genere versutissimum & patientissimum Lacedæmonium Lyfandrum accepimus; contraque Callicratidam, qui præfectus classi proximus post Lyfandrum fuit. Itemque in sermonibus alium quemque, quamvis præpotens sit, efficere, ut unus de multis esse videatur: quod in Catulo, & in patre, & in filio; idemque in Q. Mucio Mancina vidimus. Audivi ex majoribus natu hoc idem fuisse in P. Scipione Nasica; contraque patrem ejus, illum, qui Tib. Gracchi conatus perditos vindicavit, nullam comitatem habuisse sermonis: ne Xenocratem quidem, severissimum philosophorum, ob eamque rem ipsam magnum clarumque fuisse. Innumerabiles aliæ dissimilitudines sunt naturæ morumque, minimè tamen vituperandorum.

XXXI. Admodum autem tenenda sunt sua cuique, non vitiosa, sed tamen propria, quò faciliùs decorum illud, quod quærimus, retineatur: sic enim est faciendum,

dum, ut contra universam naturam nihil contendamus; eâ tamen conservatâ, propriam naturam sequamur; ut, etiam si sint alia graviora atque meliora, tamen nos studia nostra naturæ regulâ metiamur: neque enim attinet repugnare naturæ, nec quidquam sequi, quod assequi nequeas. Ex quo magis emergit, quale sit decorum illud, ideo, quia nihil decet invitâ (ut aiunt) Minervâ, id est, adversante & repugnante naturâ.

111. Omnino si quidquam est decorum, nihil est profectò magis, quàm æquabilitas universæ vitæ, tum singularum actionum; quam conservare non possis, si aliorum naturam imitans, omittas tuam. Ut enim sermone eo debemus uti, qui notus est nobis, ne, ut quidam, Græca verba inculcantes, jure optimo irrideamur; sic in actiones omnemque vitam nullam discrepantiam conferre debemus.

112. Atque hæc differentia naturarum tantam habet vim, ut nonnumquam mortem sibi ipse consciscere alius debeat, alius in eadem causa non debeat. Num enim alia in causa M. Cato fuit, alia ceteri, qui se in Africa Cæsari tradiderunt? Atqui ceteris forsitan vitio datum esset, si se interemissent, propterea quòd eorum vita lenior, & mores fuerant faciliores; Catoni autem quum incredibilem tribuis-

set natura gravitatem, eamque ipse perpetuâ constantiâ roboravisset, semperque in proposito susceptoque consilio permansisset, moriendum potius, quàm tyranni vultus adspiciendus fuit.

113. Quàm multa passus est Ulysses in illo errore diuturno, quum & mulieribus (si Circe & Calypso mulieres appellandæ sunt) inserviret, & in omni sermone omnibus affabilem & jucundum se esse vellet? domi verò etiam contumelias servorum ancillarumque pertulit, ut ad id aliquando, quod cupiebat, perveniret. At Ajax, quo animo traditur, millies optetere mortem, quàm illa perpeti maluisset.

114. Quæ contemplantes expendere oportebit, quid quisque habeat sui; eaque moderari, nec velle experiri, quàm se aliena deceant: id enim maximè quemque decet, quod est cujusque suum maximè. Suum igitur quisque noscat ingenium, acremque se & bonorum & vitiorum suorum judicem præbeat; ne scenici plus, quàm nos, videantur habere prudentiæ: illi enim non optimas, sed sibi accommodatissimas fabulas eligunt. Quî voce freti sunt, Epigonos, Medumque; qui gestu, Menalippam, Clytæmnestram: semper Rupilius quem ego memini, Antiozam; non sæpe Æsopus Ajacem. Ergo

histrio hoc videbit in scena , quod non videbit sapiens in vita ? Ad quas igitur res aptissimi erimus , in iis potissimum elaborabimus : sin aliquando necessitas nos ad ea detruserit , quæ nostri ingenii non erunt ; omnis adhibenda erit cura , meditatio , diligentia , ut ea , si non decorè , at quàm minimùm indecorè facere possimus. Nec tam est enitendum , ut bona , quæ nobis data non sint , sequamur , quàm ut vitia fugiamus.

XXXII. Ac duabus iis personis , quas suprà dixi , tertia adjungitur , quam casus aliquis aut tempus imponit ; quarta etiam , quam nobismet ipsis judicio nostro accommodamus. Nam regna , imperia , nobilitates , honores , divitiæ , opes , eaque , quæ sunt his contraria , in casu sita , temporibus gubernantur ; ipsi autem quam personam gerere velimus , a nostra voluntate proficiscitur : itaque se alii ad philosophiam , alii ad jus civile , alii ad eloquentiam applicant ; ipsarumque virtutum in alia alius mavult excellere.

116. Quorum verò patres , aut majores aliquâ gloriâ præstiterunt , ii student plerumque eodem in genere laudis excellere ; ut Q. Mucius , P. filius , in jure civili ; Pauli filius Africanus in re militari. Quidam autem ad eas laudes , quas a patribus acceperunt , addunt aliquam

suam ; ut hic idem Africanus eloquentiâ cumulavit bellicam gloriam : quod idem fecit Timotheus , Cononis filius , qui , quum belli laude non inferior fuisset , quàm pater ; ad eam laudem , doctrinæ & ingenii gloriam adjecit. Fit autem interdum , ut nonnulli , omisâ imitatione majorum , suum quoddam institutum consequantur ; maximèque in eo plerumque elaborant ii , qui magna sibi proponunt , obscuris orti majoribus.

117. Hæc igitur omnia , quum quærimus quid deceat , complecti animo & cogitatione debemus. In primis autem constituendum est , quos nos , & quales esse velimus , & in quo genere vitæ ; quæ deliberatio est omnium difficillima. Ineunte enim adolescentiâ , quum est maxima imbecillitas consilii , tum id sibi quisque genus ætatis degendæ constituit , quod maximè adamavit. Itaque antè implicatur aliquo certo genere cursuque vivendi , quàm potuit , quid optimum esset , judicare.

118. Nam quòd Herculem Prodicium dicunt (ut est apud Xenophontem) quum primùm pubesceret (quod tempus a natura ad deligendum , quam quisque viam vivendi sit ingressurus , datum est) exisse in solitudinem , atque sibi sedentem , diu secum multumque dubitasse , quum duas cerneret vias , unam Voluptatis , alteram

Virtutis, utram ingredi melius esset; hoc Herculi, Jovis fatu edito, potuit fortasse contingere; nobis non item, qui imitatur, quos cuique visum est, atque ad eorum studia institutaque impellimur: plerique autem parentum præceptis imbuti, ad eorum consuetudinem moremque deducimur: alii multitudinis judicio feruntur, quæque majori parti pulcherri-
ma videntur, ea maximè exoptant: nonnulli tamen sive felicitate quadam, sive bonitate naturæ, sive parentum disciplinâ, rectam vitæ secuti sunt viam.

XXXIII. Illud autem maximè rarum genus est eorum, qui aut eccellente ingenii magnitudine, aut præclarâ eruditione atque doctrinâ, aut utrâque re ornati, spatium etiam deliberandi habuerunt, quem potissimum vitæ cursum sequi vel-
lent; in qua deliberatione ad suam cujusque naturam consilium est omne revocandum. Nam quum in omnibus quæ aguntur, ex eo modo, quo quisque natus est, ut suprà dictum est, quid deceat exquirimus; tum in tota vita constituenda, multò est ei rei cura major adhibenda, ut constare in vitæ perpetuitate possimus nobismet ipsis, nec in ullo officio claudicare.

120. Ad hanc autem rationem quoniam maximam vim natura habet, fortuna

proximam; utriusque omnino ratio habenda est in deligendo genere vitæ; sed naturæ magis: multò enim & firmitior est, & constantior: ut fortuna nonnumquam tamquam ipsa mortalis, cum immortalis natura pugnare videatur. Qui igitur ad naturæ suæ non vitiosæ genus, consilium vivendi omne contulerit, is constantiam teneat: id enim maximè decet: nisi forte se intellexerit errasse in deligendo genere vitæ. Quod si acciderit (potest autem accidere) facienda morum institutorumque mutatio est: eam mutationem, si tempora adjuvabunt, faciliùs commodiùsque faciemus; sin minùs, sensim erit pedetentimque facienda; ut amicitias, quæ minùs delectent, & minùs probentur, magis decere censent sapientes sensim ~~diminuere~~, quàm repentiè præcidere. Commutato autem genere vitæ, omni ratione curandum est, ut id bono consilio fecisse videamur.

121. Sed quoniam paulò antè dictum est, imitandos esse majores; primùm illud exceptum sit, ne vitia sint imitanda: deinde, si natura non feret, ut quædam imitari possint, ut superioris Africani filius, qui hunc Paulo natum adoptavit, propter infirmitatem valetudinis non tam potuit patris similis esse, quàm ille fuerat sui. Si igitur non poterit sive causas defensitare, sive populum concionibus te-

nere, sive bella gerere; illa tamen præstare debet, quæ erunt in ipsius potestate, justitiam, fidem, liberalitatem, modestiam, temperantiam, quò minùs ab eo id, quod desit, requiratur. Optima autem hereditas a patribus traditur liberis, omnique patrimonio præstantior, gloria virtutis rerumque gestarum; cui dederi esse, nefas & impium judicandum est.

XXXIV. Et quoniam officia non eadem disparibus ætatibus tribuuntur, aliaque sunt juvenum, alia seniorum; aliquid etiam de hac distinctione dicendum est. Est igitur adolescentis, majores natu vereri, exque his deligere optimos & probatissimos, quorum consilio atque auctoritate nitatur: ineuntis enim ætatis inscientia, senum constituenda & regenda prudentiâ est. Maximè autem hæc ætas a libidinibus arcenda est, exercendaque in labore patientiaque & animi, & corporis; ut eorum & in bellicis, & in civilibus officiis vigeat industria. Atque etiam quum relaxare animos, & dare se jucunditati volent, caveant intemperantiam, meminerint verecundiæ; quod erit facilius, si in ejusmodi quidem rebus majores natu volent interesse.

123. Senibus autem labores corporis minuendi, exercitationes animi etiam augendæ videntur: danda verò opera, ut

& amicos , & juventutem , & maximè rempublicam consilio & prudentiâ quàm plurimùm adjuvent. Nihil autem magis cavendum est senectuti , quàm ne languori se desidiæque dedat. Luxuria verò quum omni ætati turpis , tum senectuti fœdissima est: sin autem libidinum etiam intemperantia accesserit , duplex malum est , quòd & ipsa senectus concipit dedecus , & facit adolescentium impudentiorem intemperantiam.

124. Ac ne illud quidem alienum est , de magistratuum , de privatorum , de civium , de peregrinorum officiis dicere. Est igitur proprium munus magistratûs , intelligere , se gerere personam civitatis , debereque ejus dignitatem & decus sustinere , servare leges , jura describere , ea fidei suæ commissa meminisse. Privatum autem oportet æquo & pari cum civibus jure vivere , neque summissum & abjectum , neque se efferentem ; tum in republica ea velle , quæ tranquilla & honesta sint : talem enim & sentire bonum civem , & dicere solemus.

125. Peregrini autem & incolæ officium est , nihil præter suum negotium agere , nihil de alieno anquirere , minimèque in aliena esse republica curiosum. Ita ferè officia reperientur , quum quæretur , quid deceat , & quid aptum sit personis , tem-

poribus, ætatibus. Nihil est autem, quod tam deceat, quàm in omni re gerenda, consilioque capiendo servare constantiam.

XXXV. Sed quoniam decorum illud in omnibus factis & dictis, in corporis denique motu & statu cernitur, idque positum est in tribus rebus, formositate, ordine, ornatu ad actionem apto, difficilibus ad eloquendum, sed satis erit intelligi; in his autem tribus continetur cura etiam illa, ut probemur iis, quibuscum, apud quosque vivamus: his quoque de rebus pauca dicantur.

127. Principiò, corporis nostri magnam natura ipsa videtur habuisse rationem; quæ formam nostram, reliquamque figuram, in qua esset species honesta, eam posuit in promptu; quæ autem partes corporis ad naturæ necessitatem datæ, adspectum essent deformem habituræ atque turpem, eas contextit, atque abdidit. Hanc naturæ tam diligentem fabricam imitata est hominum verecundia. Quæ enim natura occultavit, eadem omnes, qui sanâ mente sunt, removent ab oculis; ipsique necessitati dant operam ut quàm occultissimè pareant: quarumque partium corporis usus sunt necessarii, eas neque partes, neque earum usus suis nominibus appellant; quodque facere turpe non est, modò occultè, id dicere obscœnum est.

Itaque nec aperta actio rerum illarum petulantia vacat, nec orationis obscœnitas.

128. Nec verò audiendi sunt Cynici, aut si qui fuerunt Stoici pene Cynici, qui reprehendunt, & irrident, quòd ea, quæ turpia re non sint, nominibus ac verbis flagitiosa ducamus; illa autem, quæ turpia sint, nominibus appellemus suis. Latrocinari, fraudare, adulterari, re turpe est; sed dicitur non obscœnè: liberis dare operam, re honestum est, nomine obscœnum: pluraque in eam sententiam ab eisdem contra verecundiam disputantur. Nos autem naturam sequamur, & omne, quod abhorret ab oculorum auriumque approbatione, fugiamus. Status, incessus, sessio, accusatio, vultus, oculi, manuum motus, teneant illud decorum,

129. Quibus in rebus duo maximè sunt fugienda, ne quid effeminatum, aut molle, & ne quid durum, aut rusticum sit. Nec verò histrionibus oratoribusque concedendum est, ut iis hæc apta sint, nobis dissoluta. Scenicorum quidem mos tantam habet veteri disciplinâ verecundiam, ut in scenam sine subligaculo prodeat nemo: verentur enim, ne, si quo casu evenerit, ut corporis partes quædam aperiantur, adspiciantur non decorè. Nostro quidem more cum parentibus puberes filii, cum foceris generi non lavantur. Retinenda est

igitur hujus generis verecundia , præsertim naturâ ipsâ magistrâ & duce.

XXXVI. Quum autem pulchritudinis duo genera sint , quorum in altero venustas sit , in altero dignitas ; venustatem , muliebre ducere debemus ; dignitatem , virilem. Ergo & a formâ removeatur omnis viro non dignus ornatus ; & huic simile vitium in gestu motuque caveatur. Nam & palæstrici motus sæpe sunt odiosiores ; & histrionum nonnulli gestus inepti non vacant offensione ; & in utroque genere , quæ sunt recta & simplicia , laudantur. Formæ autem dignitas , coloris bonitate tuenda est ; color , exercitationibus corporis. Adhibenda est præterea munditia non odiosa , neque exquisita nimis ; tantum quæ fugiat agrestem & inhumanam negligentiam. Eadem ratio est habenda vestitus ; in quo (sicut in plerisque rebus) mediocritas optima est.

131. Cavendum est autem , ne aut tarditatibus utamur in gressu mollioribus , ut pomparum ferculis similes esse videamur , aut in festinationibus suscipiamus nimias celeritates ; quæ quum fiunt , anhelitus moventur , vultus mutantur , ora torquentur ; ex quibus magna significatio fit , non adesse constantiam. Sed multò etiam magis elaborandum est , ne animi motus a natura recedant ; quod assequemur , si ca-

vebimus, ne in perturbationes atque examinationes incidamus; & si attentos animos ad decori conservationem tenebimus. Motus autem animorum duplices sunt; alteri, cogitationis; alteri, appetitûs. Cogitatio in vero exquirendo maximè versatur; appetitus impellit ad agendum. Curandum est igitur, ut cogitatione ad res quàm optimas utamur; appetitum rationi obedientem præbeamus.

XXXVII. Et quoniam magna vis orationis est, eaque duplex; altera, contentionis; altera, sermonis: contentio disceptationibus tribuatur judiciorum, concionum, senatûs; sermo in circulis, disputationibus, congressionibus familiarium versetur; persequatur etiam convivia. Contentionis præcepta rhetorum sunt; nulla sermonis: quamquam haud scio, an possint hæc quoque esse. Sed discipulorum studiis inveniuntur magistri; huic autem qui studeant, sunt nulli: rhetorum turbâ referta omnia: quamquam quæ verborum sententiarumque præcepta sunt, eadem ad sermonem pertinebunt.

133. Sed quum orationis indicem, vocem habeamus; in voce autem duo sequamur, ut clara sit, ut suavis; utrumque omnino a natura petendum est: verum alterum exercitatio augebit, alterum imitatio præse loquentium, & leniter. Nihil

aliud fuit in Catulis, ut eos exquisito iudicio putares uti litterarum; quamquam erant litterati; sed & alii: hi autem optime uti linguâ Latinâ putabantur. Sonus erat dulcis: litteræ neque expressæ nimis, neque oppressæ, ne aut obscurum esset, aut putidum: sine contentione vox, nec languens; nec canora. Uberior oratio L. Crassi, nec minus faceta: sed bene loquendi de Catulis opinio non minor. Sale verò & facetiis Cæsar, Catuli patris frater, vicit omnes; ut in ipso illo forensi genere dicendi contentiones aliorum sermone vinceret.

134. In omnibus igitur his elaborandum est; si in omni re, quid deceat, exquirimus. Sit igitur hic sermo, in quo Socratici maxime excellunt, lenis, minimèque pertinax: insit in eo lepos. Nec verò, tamquam in possessionem suam venerit, excludat alios: sed quum reliquis in rebus, tum in sermone communi, vicissitudinem non iniquam putet: ac videat in primis, quibus de rebus loquatur: si seriis, severitatem adhibeat; si jocosis, leporem: in primisque provideat, ne sermo vitium aliquod indicet inesse in moribus; quod maxime tum solet evenire, quum studiosè de absentibus detrahendi causâ, aut per ridiculum, aut severè, maledicè, contumeliosèque dicitur.

135. Habentur autem plerumque sermones aut de domesticis negotiis, aut de republica, aut de artium studiis atque doctrina. Danda igitur opera est, ut etiam si aberrare ad alia cœperit, ad hæc revocetur oratio: sed, utcumque aderunt res: neque enim omnes iisdem de rebus, nec omni tempore similiter delectamur. Animadvertendum est etiam, quatenus sermo delectationem habeat; &, ut incipiendi ratio fuerit, ita sit desinendi modus.

XXXVIII. Sed quomodo in omni vita rectissimè præcipitur, ut perturbationes fugiamus, id est, motus animi nimios, rationi non obtemperantes; sic ejusmodi motibus sermo debet vacare, ne aut ira exsistat, aut cupiditas aliqua, aut pigritia, aut ignavia, aut tale aliquid appareat: maximeque curandum est, ut eos, quibuscum sermonem conferimus, & vereri, & diligere videamur. Objurgationes etiam nonnumquam incidunt necessariae, in quibus utendum est fortasse & vocis contentione majore, & verborum gravitate accriore: id agendum etiam, ut ne ea facere videamur irati: sed, ut ad urendum & secandum, sic & ad hoc genus castigandi, rarò invitique veniemus; nec umquam, nisi necessariò, si nulla reperietur alia medicina: sed tamen ira procul absit, cum qua nihil rectè fieri, nihil consideratè potest.

137. Magna autem ex parte clementi castigatione licet uti, gravitate tamen adjuncta, ut & severitas adhibeatur, & contumelia repellatur: atque etiam illud ipsum, quod acerbitatis habet objurgatio, significandum est, ipsius causâ, qui objurgetur, susceptum esse. Rectum est autem, etiam in illis contentionibus, quæ cum inimicissimis fiunt, etiam si nobis indigna audiamus, tamen gravitatem retinere, iracundiam repellere: quæ enim cum aliqua perturbatione fiunt, ea nec constanter fieri possunt, neque iis, qui adsunt, probari. Deforme etiam est de se ipso prædicare, falsa præsertim, & cum irrisione audientium imitari militem gloriosum.

XXXIX. Et quoniam omnia persequimur (volumus quidem certè) dicendum est etiam, qualem hominis honorati & principis domum placeat esse, cujus finis est usus; ad quem accommodanda est ædificandi descriptio: & tamen adhibenda dignitatis commoditatisque diligentia. Cn. Octavio, qui primus ex illa familia consul factus est, honori fuisse accepimus, quòd præclaram ædificasset in Palatio, & plenam dignitatis domum; quæ quum vulgò viseretur, suffragata domino, novo homini, ad consulatum putabatur: hanc Scaurus demolitus, accessionem adjunxit ædibus. Itaque ille in suam domum con-

fulatum primus attulit; hic summi & clarissimi viri filius, in domum multiplicatam, non repulsam solum retulit, sed ignominiam, etiam calamitatem.

139. Ornanda est enim dignitas domo, non ex domo dignitas tota quaerenda; nec domo dominus, sed domino domus honestanda est: & ut in ceteris habenda ratio non sui solum, sed etiam aliorum; sic in domo clari hominis, in quam & hospites multi recipiendi, & admittenda hominum cujusque modi multitudo, adhibenda est cura laxitatis: aliter ampla domus dedecori domino saepe fit, si est in ea solitudo; & maxime, si aliquando alio domino solita est frequentari: odiosum est enim, quum a praetereuntibus dicitur:

O domus antiqua, heu quam dispari dominare domino!

quod quidem his temporibus in multis licet dicere.

140. Cavendum autem est, praesertim si ipse aedifices, ne extra modum sumptu & magnificentia prodeas; quo in genere multum mali etiam in exemplo est: studiosè enim plerique, praesertim in hanc partem, facta principum imitantur; ut L. Luculli, summi viri, virtutem, quis? at quam multi villarum magnificentiam

imitati sunt? quarum quidem certè est adhibendus modus, ad mediocritatemque revocandus: eademque mediocritas ad omnem usum cultumque vitæ transferenda est. Sed hæc hætenus.

141. In omni autem actione suscipienda, tria sunt tenenda: primum, ut appetitus rationi pareat; quo nihil est ad officia conservanda accommodatius: deinde, ut animadvertatur, quantâ illa res sit, quam efficere velimus; ut neve major, neve minor, cura & opera suscipiatur, quàm causa postulet: tertium est, ut caveamus, ut ea, quæ pertinent ad liberalem spèciem & dignitatem, moderata sint. Modus autem est optimus, decus ipsum tenere, de quo antè diximus, nec progredi longiùs. Horum tamen trium præstantissimum est, appetitum obtemperare rationi.

XL. Deinceps de ordine rerum & temporum opportunitate dicendum est. Hac autem scientiâ continetur ea, quam Græci *ἰσότης* nominant; non hæc, quam interpretamur modestiam, quo in verbo modus inest: sed illa *ἰσότης*, in qua intelligitur ordinis conservatio. Itaque, ut eandem nos modestiam appellemus, sic definitur a Stoicis, ut modestia sit scientia earum rerum, quæ agentur, aut dicentur, loco suo collocandarum: itaque videtur eadem vis ordinis & collocationis fore.

186. *DE OFFICIIS,*

Nam & ordinem sic definiunt , compositionem rerum aptis & accommodatis locis : locum autem actionis , opportunitatem temporis esse dicunt : tempus autem actionis opportunum , Græcè *ἐυκαιρία* , Latinè appellatur *occasio*. Sic fit , ut modestia hæc , quam ita interpretamur , ut dixi , scientia sit opportunitatis idoneorum ad agendum temporum.

143. Sed potest eadem esse prudentiæ definitio , de qua principiò diximus : hoc autem loco de moderatione , & temperantiâ , & harum similibus virtutibus quaerimus. Itaque , quæ erant prudentiæ propria , suo loco dicta sunt : quæ autem harum virtutum , de quibus jamdiu loquimur , quæ pertinent ad verecundiam , & ad eorum approbationem , quibuscum vivimus , nunc dicenda sunt.

144. Talis est igitur ordo actionum adhibendus , ut , quemadmodum in oratione constanti , sic in vita omnia sint apta inter se , & convenientia. Turpe est enim , valdeque vitiosum , in re severâ convivii dicta , aut delicatum aliquem inferre sermonem. Bene Pericles , quum haberet collegam in prætura Sophoclem poëtam , hique de communi officio convenissent , & casu formosus puer præteriret , dixissetque Sophocles , O puerum pulchrum , Pericle ! *At enim prætorem , Sophocle , de-*

cet non solum manus, sed etiam oculos abstinentes habere. Atqui hoc idem Sophocles si in athletarum probatione dixisset, iustâ reprehensione caruisset: tanta vis est & loci, & temporis. Ut si quis, quum causam sit acturus, in itinere, aut in ambulatione secum ipse meditetur, aut si quid aliud attentius cogitet, non reprehendatur; at hoc idem si in convivio faciat, inhumanus videatur, inscientiâ temporis.

145. Sed ea, quæ multum ab humanitate discrepant, ut, si quis in foro cantet, aut si qua est alia magna perversitas, facile apparent, nec magnopere admonitionem & præcepta desiderant: quæ autem parva videntur esse delicta, neque a multis intelligi possunt, ab iis est diligentius declinandum: ut in fidibus, aut in tibiis, quamvis paulum discrepent, tamen id a sciente animadverti solet; sic videndum est in vita, ne fortè quid discrepet, vel multò etiam magis, quò major & melior actionum, quàm sonorum concentus est.

XLI. Itaque, ut in fidibus musicorum aures vel minima sentiunt; sic nos, si acres ac diligentes esse volumus, animadvertoresque vitiorum, magna sæpe intelligemus ex parvis. Ex oculorum obtutu, ex superciliorum aut remissione, aut contractione, ex mœstitia, ex hilaritate, ex risu, ex locutione, ex reticentia, ex con-

tentione vocis, ex submissione, ex ceteris similibus, facile judicabimus, quid eorum aptè fiat, quid ab officio naturaque discrepet. Quo in genere non est incommodum, quale quodque eorum sit, ex aliis judicare; ut si quid dedeceat in aliis, vitemus ipsi: fit enim nescio quo modo, ut magis in aliis cernamus, quàm in nobismet ipsis, si quid delinquitur: itaque facillimè corriguntur in discendo, quorum vitia imitantur, emendandi causâ, magistri.

147. Nec verò alienum est, ad ea eligenda, quæ dubitationem afferunt, adhibere doctos homines; vel etiam usu peritos, & quid his de quoque officii genere placeat, exquirere. Major enim pars eò ferè deferri solet, quò a natura ipsa deducitur: in quibus videndum est, non modò quid quisque loquatur, sed etiam, quid quisque sentiat, atque etiam, qua de causa quisque sentiat. Ut enim pictores, & ii, qui signa fabricantur, & verò etiam poëtæ, suum quisque opus a vulgò considerari vult, ut, si quid reprehensum sit a pluribus, id corrigatur, hique & secum, & cum aliis quid in eo peccatum sit, exquirunt; sic aliorum judicio permulta nobis & facienda, & non facienda, & mutanda, & corrigenda sunt.

148. Quæ verò more aguntur institutisque civilibus, de iis nihil est præcipiendum: illa enim ipsa præcepta sunt; nec quemquam hoc errore duci oportet, ut, si quid Socrates aut Aristippus contra morem consuetudinemque civilem fecerint locutivæ sint, idem sibi arbitretur licere. Magnis illi, & divinis bonis hanc licentiam assequebantur. Cynicorum verò ratio, tota est ejicienda: est enim inimica verecundiæ, sine qua nihil rectum esse potest, nihil honestum.

149. Eos autem, quorum vita perspecta in rebus honestis atque magnis est, bene de republica sentientes, ac bene meritos, aut merentes, sicut aliquo honore aut imperio affectos, observare & colere debemus: tribuere etiam multum senectuti: cedere iis, qui magistratum habebunt: habere delectum civis & peregrini; in ipsoque peregrino, privatimne, an publicè venerit: ad summum, ne agam de singulis, communem totius generis hominum conciliationem & confociationem colere, tueri, servare debemus.

XLII. Jam de artificiis & quæstibus, qui liberales habendi, qui sordidi sint, hæc ferè accepimus. Primum improbantur ii quæstus, qui in odia hominum incurrunt; ut portitorum, ut fœneratorum.

Illiberales autem & fordidi quæstus mercenariorum, omniumque, quorum operæ, non quorum artes emuntur: est enim illis ipsa merces auctoramentum servitutis. Sordidi etiam putandi, qui mercantur a mercatoribus, quod statim vendant; nihil enim proficiunt, nisi admodum mentiantur; nec verò quidquam est turpius vanitate: opificesque omnes in fordida arte versantur; nec enim quidquam ingenuum potest habere officina: minimæque artes hæ probandæ, quæ ministræ sunt voluptatum, *cetarii, lanii, coqui, sartores, piscatores*, ut ait Terentius. Adde huc, si placet, unguentarios, saltatores, totumque ludum talarium.

151. Quibus autem artibus aut prudentia major inest, aut non mediocris utilitas quæritur, ut medicina, ut architectura, ut doctrina rerum honestarum, hæ sunt iis, quorum ordini conveniunt, honestæ. Mercatura autem, si tenuis est, fordida putanda est; sin magna & copiosa, multa undique apportans, multisque sine vanitate impartiens, non est admodum vituperanda: atque etiam, si fatiata quæstu, vel contenta potius, ut sæpe ex alto in portum, sic ex ipso portu se in agros possessionesque contulerit, videtur jure optimo posse laudari. Omnium autem rerum, ex quibus aliquid acquiri-

LIBER PRIMUS. 191

tur , nihil est agriculturâ melius , nihil uberius , nihil dulcius , nihil homine , nihil libero dignius ; de qua , quoniam in Catone majore satis multa diximus , illic assumes , quæ ad hunc locum pertinebunt.

XLIII. Sed ab iis partibus , quæ sunt honestatis , quemadmodum officia ducebantur , satis expositum videtur. Eorum autem ipsorum , quæ honesta sunt , potest incidere sæpe contentio & comparatio ; de duobus honestis utrum honestius : qui locus a Panætio est prætermissus. Nam quum omnis honestas manet a partibus quatuor , quarum una sit cognitionis ; altera , communitalis ; tertia , magnanimitatis ; quarta , moderationis : hæ in deligendo officio sæpe inter se comparentur , necesse est.

153. Placet igitur , aptiora esse naturæ ea officia , quæ ex communitate , quàm ea , quæ ex cognitione ducantur ; idque hoc argumento confirmari potest , quòd , si contigerit ea vita sapienti , ut in omnium rerum affluentibus copiis , quamvis omnia , quæ cognitione digna sunt , summo otio secum ipse consideret & contempletur ; tamen , si solitudo tanta sit , ut hominem videre non possit , excedat e vita. Princepsque omnium virtutum est illa sapientia , quam *σοφία* vocant : pru-

dentiam enim, quam Græci *φρόνησις*, aliam quamdam intelligimus, quæ est rerum expetendarum fugiendarumque scientia. Illa autem sapientia, quam principem dixi, rerum est divinarum atque humanarum scientia; in qua continetur decorum & hominum communitas & societas inter ipsos. Ea si maxima est, ut est certè; necesse est, quod a communitate ducatur officium, id esse maximum. Etenim cognitio contemplatioque naturæ manca quodam modo atque inchoata sit, si nulla actio rerum consequatur: ea autem actio in hominum commodis tuendis maximè cernitur.

154. Pertinet igitur ad societatem generis humani: ergo hæc cognitioni anteponenda est: atque id optimus quisque re ipsâ ostendit, & judicat. Quis enim est tam cupidus in perspicienda cognoscendaque rerum natura, ut, si ei tractanti contemplantique res cognitione dignissimas, subitò sit allatum periculum discrimenque patriæ, cui subvenire opitularique possit, non illa omnia relinquat atque abjiciat, etiam si dinumerare se stellas, aut metiri mundi magnitudinem posse arbitretur? atque hoc idem in parentis, in amici re, aut periculo fecerit. Quibus rebus intelligitur, studiis officiisque scientiæ præponenda esse officia justitiæ,

justitiæ, quæ pertinent ad hominum utilitatem; quâ nihil homini esse debet antiquius.

XLIV. Atque illi, quorum studia vitæque omnis in rerum cognitione versata est, tamen ab augendis hominum utilitatibus & commodis non recesserunt. Nam & erudierunt multos, quò meliores cives, utilioresque rebus suis publicis essent; ut Thebanum Epaminondam Lysis Pythagoreus, Syracusium Dionem Plato, multique multos: nosque ipsi, quidquid ad rempublicam attulimus (si modò aliquid attulimus) a doctoribus, atque a doctrina instructi ad eam, & ornati accessimus.

156. Neque solùm vivi atque præsentes studiosos discendi erudiunt, atque docent; sed hoc idem etiam post mortem monumentis litterarum assequuntur: nec enim locus ullus prætermisus est ab iis, qui ad leges, qui ad mores, qui ad disciplinam reipublicæ pertineret; ut otium suum ad nostrum negotium contulisse videantur: ita illi ipsi doctrinæ studiis & sapientiæ dediti, ad hominum utilitatem suam intelligentiam prudentiamque potissimum conferunt. Ob eamque causam eloqui copiosè, modò prudenter, melius est, quàm vel acutissimè sine eloquentia cogitare; quòd cogitatio in se

ipsa vertitur, eloquentia complectitur eos, quibuscum communitate juncti sumus.

157. Atque ut apum examina non fingendorum favorum causâ congregantur, sed, quum congregabilia naturâ sint, fingunt favos; sic homines, ac multò etiam magis, naturâ congregati, adhibent agendi cogitandique solertiam. Itaque nisi ea virtus, quæ constat ex hominibus tuendis, id est, ex societate generis humani, attingat cognitionem rerum, solivaga cognitio, & jejuna videatur: itemque magnitudo animi, remotâ communitate conjunctioneque humanâ, feritas sit quædam & immanitas. Ita fit, ut vincat cognitionis studium consociatio hominum, atque communitas.

158. Nec verum est, quod dicitur a quibusdam, propter necessitatem vitæ, quòd ea, quæ natura desideraret, consequi sine aliis, atque efficere non possemus, idcirco istam esse cum hominibus communitatem & societatem: quòd si omnia nobis, quæ ad victum cultumque pertinent, quasi virgulâ divinâ, ut aiunt, suppediarentur; tum optimo quisque ingenio, negotiis omnibus omissis, totum se in cognitione & scientia collocaret. Non est ita: nam & solitudinem fugeret, & socium studii quæreret: tum docere, tum discere vellet, tum audire, tum dicere. Ergo om-

ne officium, quod ad conjunctionem hominum, & ad societatem tuendam valet, anteponendum est illi officio, quod cognitione & scientiâ continetur.

XLV. Illud forsitan quærendum sit, num hæc communitas, quæ maximè est apta naturæ, sit etiam moderationi modestiæque semper anteponenda. Non placet: sunt enim quædam ita fœda, partim ita flagitiosa, ut ea, ne conservandæ quidem patriæ causâ, sapiens facturus sit: ea Possidonius collegit permulta, sed ita tetra quædam, ita obscœna, ut dictu quoque videantur turpia. Hæc igitur non suscipiet reipublicæ causâ; ne res quidem publica pro se suscipi volet. Sed hoc commodius se res habet, quod non potest accidere tempus, ut intersit reipublicæ quidquam illorum facere sapientem.

160. Quare hoc quidem effectum sit, in officiis deligendis id genus officiorum excellere, quod teneatur hominum societate: etenim cognitionem prudentiamque sequitur considerata actio: ita fit, ut agere consideratè pluris sit, quàm cogitare prudenter. Atque hæc quidem hætenus: patefactus est enim locus ipse, ut non sit difficile in exquirendo officio, quid cuique sit præponendum, videre. In ipsa autem communitate sunt gradus officiorum; ex quibus quid cuique præstet, in-

196 *DE OFFICIIS, LIBER I.*

telligi possit : ut prima diis immortalibus ; secunda patriæ ; tertia parentibus ; deinceps gradatim reliquis debeantur.

161. Quibus ex rebus breviter disputatis intelligi potest, non solum id homines solere dubitare, honestumne, an turpe sit ; sed etiam, duobus propositis honestis, utrum honestius. Hic locus a Panætio est, ut supra dixi, prætermisus. Sed jam ad reliqua pergamus.





DE OFFICIIS;

LIBER SECUNDUS.

Hoc libro de utili agitur, quæ erat altera pars disputationis de officiis. Utile autem est vel opinatum, quod ab honesto discrepat, vel verum, quod cum honesto est conjunctum, & naturâ confusum, & totum in virtute a Cicerone constituitur. Sed quoniam quæcumque ad vitam hominum tuendam & ad utilitatem nostram pertinent, aut sunt hominum opere perfecta, aut sine eorum auxilio comparari non possunt; hominesque hominibus plurimum obesse & prodesse possunt; relictis omnibus, docet, conciliandos esse animos hominum, & ad usus nostros adjungendos: quod quomodo fieri possit, non in singulis modò hominibus, sed etiam in multitudine & populo universo, fusè demonstratur; sed ita, ut omnis amor atque bene-

volentia hominum a virtute & honestate arceffatur, tamquam a justitia, sapientia, liberalitate, fide, humanitate, hospitalitate. Ad utilitatem verò quoniam pertinet etiam valetudo, pecuniæque curatio; quomodo valetudo sustentetur, & pecunia honestè quærat, ostendit. In comparatione autem utilitatum, quum vel externa commoda cum commodis corporis, vel corporis commoda cum externis, aut commoda corporis inter se, aut externa cum externis comparentur, non dubium esse pronuntiat, quin major utilitas minori sit anteponenda, hac tamen lege, ne ab honesto deflectatur. ERNESTUS.

I. **Q**UEMADMODUM officia ducerentur ab honestate, Marce fili, atque ab omni genere virtutis, satis explicatum arbitror libro superiore. Sequitur, ut hæc officiorum genera persequar, quæ pertinent ad vitæ cultum, & ad earum rerum, quibus utuntur homines, facultatem, ad opes, ad copias: in quo tum quæri dixi, quid

utile, quid inutile; tum ex utilibus quid utilius, aut quid maximè utile. De quibus dicere aggrediar, si pauca priùs de instituto, ac de iudicio meo dixerò.

2. Quamquam enim libri nostri complures non modò ad legendi, sed etiam ad scribendi studium excitaverunt; tamen interdum vereor, ne quibusdam bonis viris philosophiæ nomen sit invisum; mirerenturque, in ea tantum me operæ & temporis ponere. Ego autem quamdiu respublica per eos gerebatur, quibus se ipsa commiserat, omnes meas curas cogitationesque in eam conferebam: quum autem dominatu unius omnia tenerentur, neque esset usquam consilio, aut auctoritati locus; socios denique tuendæ reipublicæ, summos viros, amisissem; nec me angoribus dedidi, quibus essem confectus, nisi iis restitissem, nec rursus indignis homine docto voluptatibus.

3. Atque utinam respublica stetisset quo cœperat statu, nec in homines non tam commutandarum rerum, quàm evertendarum cupidos incidisset! primùm enim, ut stante republicâ facere solebamus, in agendo plus, quàm in scribendo, operæ poneremus: deinde ipsis scriptis non ea, quæ nunc, sed actiones nostras manderemus, ut sæpe fecimus. Quum autem respublica, in qua omnis mea cura, co-

gitatio , opera poni solebat , nulla esset omnino , illæ scilicet litteræ conticuerunt , forense , & senatoriæ.

4. Nihil agere autem quum animus non posset , in his studiis ab initio versatus ætatis ; existimavi honestissimè molestias posse deponi , si me ad philosophiam retulissem : cui quum multum adolescens , discendi causâ , temporis tribuissem ; postea quàm honoribus inservire cœpi , meque totum reipublicæ tradidi , tantum erat philosophiæ loci , quantum superfuerat amicorum & reipublicæ temporis. Id autem omne consumebatur in legendo ; scribendi otium non erat.

II. Maximis igitur in malis hoc tamen boni affecuti videmur , ut ea litteris mandaremus , quæ nec satis erant nota nostris , & erant cognitione dignissima. Quid est enim , per deos ! optabilius sapientiâ ? quid præstantius ? quid homini melius ? quid homine dignius ? Hanc igitur qui expetunt , philosophi nominantur ; nec quidquam aliud est philosophia , si interpretari velis , quàm studium sapientiæ. Sapientia autem est (ut a veteribus philosophis definitum est) rerum divinarum & humanarum , causarumque , quibus hæ res continentur , scientia ; cujus studium qui vituperat , haud sanè intelligo , quidnam sit , quod laudandum putet.

LIBER SECUNDUS. 201

6. Nam sive oblectatio quæritur animi, requiesque curarum; quæ conferri cum eorum studiis potest, qui semper aliquid anquirunt, quod spectet & valeat ad bene beatæque vivendum? sive ratio constantiæ virtutisque ducitur; aut hæc ars est, aut nulla omnino, per quam eas assequamur: nullam dicere maximarum rerum artem esse, quum minimarum sine arte nulla sit, hominum est parum consideratè loquentium, atque in maximis rebus errantium: si autem est aliqua disciplina virtutis, ubi ea quæretur, quum ab hoc discendi genere discesseris? Sed hæc, quum ad philosophiam cohortamur, accuratius disputari solent; quod alio quodam libro fecimus. Hoc autem tempore tantum nobis declarandum fuit, cur orbatu reipublicæ muneribus, ad hoc nos studium potissimum contulissemus.

7. Occurritur autem nobis, & quidem a doctis & eruditis, quærentibus, satisne constanter facere videamur, qui, quum percipi nihil posse dicamus, tamen & aliis de rebus disserere soleamus, & hoc ipso tempore præcepta officii persequamur. Quibus vellem satis cognita esset nostra sententia: non enim sumus ii, quorum vagetur animus errore, nec habeat umquam, quid sequatur: quæ enim esset ista mens, vel quæ vita potius, non mo-

dò disputandi, sed etiam vivendi ratione sublatâ? Nos autem, ut ceteri alia certa, alia incerta esse dicunt, sic ab iis dissidentes, alia probabilia, alia non probabilia esse dicimus.

8. Quid est igitur, quod me impediat, ea, quæ mihi probabilia videantur, sequi; quæ contra, improbare; atque affirmandi arrogantiam vitantem, fugere temeritatem, quæ a sapientia dissidet plurimum? contra autem omnia disputatur a nostris, quòd hoc ipsum probabile elucere non posset, nisi ex utraque parte, causarum esset facta contentio. Sed hæc explanata sunt in Academicis nostris satis, ut arbitror, diligenter. Tibi autem, mi Cicero, quamquam in antiquissima nobilissimaque philosophia, Cratippo auctore, versaris, iis simillimo, qui ista præclara pepererunt; tamen hæc nostra, finitima vestris, ignota esse nolui. Sed jam ad instituta pergamus.

III. Quinque igitur rationibus propositis officii persequendi, quarum duæ ad decus honestatemque pertinent; duæ ad comoda vitæ, copias, opes, facultates; quinta ad eligendi iudicium, si quando ea, quæ dixi, pugnare inter se viderentur: honestatis pars confecta est, quam quidem tibi cupio esse notissimam. Hoc autem, de quo nunc agimus, id ipsum

est, quod utile appellatur: in quo lapsa consuetudo deflexit de via, sensimque eò deducta est, ut honestatem ab utilitate secernens, & constitueret honestum esse aliquid, quod utile non esset; & utile, quod non honestum: quâ nulla perniciēs major hominum vitæ potuit afferri.

10. Summâ quidem auctoritate philosophi severè sanè, atque honestè, hæc tria genera confusa, cogitatione distinguunt: quidquid enim justum sit, id etiam utile esse censent; itemque quod honestum, idem justum: ex quo efficitur, ut, quidquid honestum sit, idem sit utile. Quod qui parum perspiciunt, hi sæpe, versutos homines & callidos admirantes, malitiam, sapientiam judicant: quorum error eripiendus est, opinioque omnis ad eam spem traducenda, ut honestis consiliis, justisque factis, non fraude & malitiâ, se intelligant ea, quæ velint, consequi posse.

11. Quæ ergo ad vitam hominum tuendam pertinent, partim sunt inanima, ut aurum, argentum, ut ea quæ gignuntur e terra, ut alia ejusdem generis; partim animalia, quæ habent suos impetus, & rerum appetitus. Eorum autem alia rationis expertia sunt, alia ratione utentia. Expertes rationis, equi, boves, reliquæ pecudes, apes, quarum opere efficitur

aliquid ad hominum usum atque vitam. Ratione autem utentium duo genera ponuntur : unum , deorum ; alterum , hominum. Deos placatos pietas efficiet , & sanctitas : proximè autem , & secundùm deos , homines hominibus maximè utiles esse possunt.

12. Earumque item rerum , quæ noceant & obsint , eadem divisio est. Sed quia deos nocere non putant , his exceptis , homines hominibus obesse plurimùm arbitrantur : ea enim ipsa , quæ inanima diximus , pleraque sunt hominum operis effecta , quæ nec haberemus , nisi manus & ars accessissent ; nec his sine hominum administratione uteremur : neque enim valetudinis curatio , neque navigatio , neque agricultura , neque frugum fructuumque reliquorum perceptio & conservatio sine hominum opera ulla esse potuisset.

13. Jam verò & earum rerum , quibus abundaremus exportatio , & earum , quibus egeremus , invectio , certè nulla esset , nisi his muneribus homines fungerentur : eademque ratione nec lapides e terra exciderentur ad usum nostrum necessarii ; nec *ferrum* , *as* , *aurum* , *argentum* effoderentur penitus *abditæ* , sine hominum labore & manu.

IV. Tectæ verò , quibus & frigorum vis pelleretur , & calorum molestiæ sedaren-

tur, unde aut initio generi humano dari potuissent, aut postea subveniri, si aut vi tempestatis, aut terræ motu, aut vetustate cecidissent, nisi communis vita ab hominibus harum rerum auxilia petere didicisset? At deductus aquarum, derivationes fluminum, agrorum irrigationes, moles oppositas fluctibus, portus manu factos, quæso, unde sine hominum opera habere possemus? ex quibus, multisque aliis perspicuum est, qui fructus, quæque utilitates ex rebus iis, quæ sunt inanimæ, percipiantur, eas nos nullo modo sine hominum manu atque opera capere potuisse. Qui denique ex bestiis fructus, aut quæ commoditas, nisi homines adjuvarent, percipi posset? nam & qui principes inveniendi fuerunt, quem ex quaque bellua usum habere possemus, homines certè fuerunt; nec hoc tempore sine hominum opera aut pascere eas, aut domare, aut tueri, aut tempestivos fructus ex his capere possemus: ab eisdemque & eæ, quæ nocent, interficiuntur; & quæ usui possunt esse, capiuntur.

15. Quid enumerem artium multitudinem, sine quibus vita omnino nulla esse potuisset? quis enim agris subveniret, quæ esset oblectatio valentium, qui victus, aut cultus, nisi tam multæ nobis artes ministrarent? quibus rebus exulta homi-

num vita tantum distat a victu & cultu bestiarum. Urbes verò sine hominum cœtu non potuissent nec ædificari, nec frequentari: ex quo leges, moresque constituti; tum juris æqua descriptio, certa que vivendi disciplina: quas res & mansuetudo animorum consecuta, & verecundia est; effectumque, ut esset vita munitior; atque ut dando & accipiendo, mutandisque facultatibus & commodis nullâ re egeremus.

V. Longiores hoc loco sumus, quàm necesse est. Quis est enim, cui non perspicua sint illa, quæ pluribus verbis a Panætio commemorantur, neminem neque ducem bello, nec principem domi, magnas res & salutares sine hominum studiis gerere potuisse? Commemorantur ab eo Themistocles, Pericles, Cyrus, Agesilaüs, Alexander, quos negat sine adjumentis hominum tantas res efficere potuisse. Utitur in re non dubia testibus non necessariis. Atque ut magnas utilitates adipiscimur conspiratione hominum atque consensu; sic nulla tam detestabilis pestis est, quæ non homini ab homine nascatur. Est Dicæarchi liber de interitu hominum, Peripatetici magni & copiosi; qui, collectis ceteris causis, eluvionis, pestilentiae, vastitatis, belluarum etiam repentinæ multitudinis, quarum impetu docet

quædam hominum genera esse consumpta : deinde comparat , quantò plures delati sint homines hominum impetu , id est , bellis , aut seditionibus , quàm omni reliquâ calamitate.

17. Quum igitur hic locus nihil habeat dubitationis , quin homines plurimùm hominibus & prosint , & obsint ; primum hoc statuo esse virtutis , conciliare animos hominum , & ad usus suos adjungere. Itaque , quæ in rebus inanimis , quæque in usu & tractatione belluarum fiunt utiliter ad hominum vitam , artibus ea tribuuntur operosis ; hominum autem studia ad amplificationem nostrarum rerum prompta ac parata , virorum præstantium sapientiâ & virtute excitantur.

18. Etenim virtus omnis tribus in rebus ferè vertitur ; quarum una est in perspicendo , quid in quaque re verum sincerumque sit , quid consentaneum cuique , quid consequens , ex quo quidque gignatur , quæ cujusque rei causa sit : alterum , cohibere motus animi turbatos , quos Græci *πάθη* nominant , appetitionesque , quas illi *ἱπμας* , obediens efficere rationi : tertium , iis , quibuscum congregamur , uti moderatè , & scienter , quorum studiis ea , quæ natura desiderat , expleta , cumulataque habeamus ; per eos denique , si quid importetur nobis incommodi ,

propulsemus, ulciscamurque eos, qui nocere nobis conati sunt, tantâque poenâ afficiamus, quantam æquitas, humanitasque patitur.

VI. Quibus autem rationibus hanc facultatem assequi possimus, ut hominum studia complectamur, eaque teneamus, dicemus; neque ita multò pòst: sed pauca antè dicenda sunt. Magnam vim esse in fortuna in utramque partem, vel secundas ad res, vel adversas, quis ignorat? nam & quum prospero flatu ejus utimur, ad exitus pervehimur optatos; & quum reflavit, affligimur. Hæc igitur ipsa fortuna ceteros casus rariores habet, primum ab inanimis procellas, tempestates, naufragia, ruinas, incendia; deinde, a bestiis ictus, morsus, impetus. Hæc ergo, ut dixi, rariora.

20. At verò interitus exercituum, ut proximè trium, sæpe multorum; clades imperatorum, ut nuper summi ac singularis viri; invidiæ præterea multitudinis, atque ob eas, bene meritorum sæpe civium expulsioniones, calamitates, fugæ: rursusque secundæ res, honores, imperia, victoriæ, quamquam fortuita sunt, tamen sine hominum opibus & studiis neutram in partem effici possunt. Hoc igitur cognito, dicendum est, quonam modo hominum studia ad utilitates nostras allicere

atque excitare possimus: quæ si longior fuerit oratio, cum magnitudine utilitatis comparetur; ita fortassis etiam brevior videbitur.

21. Quæcumque igitur homines homini tribuunt ad eum augendum atque honestandum, aut benevolentiae gratiâ faciunt, quum aliqua de causa quempiam diligunt; aut honoris, si cujus virtutem suspiciunt, quemque dignum fortunâ quàm amplissimâ putant; aut cui fidem habent, & bene rebus suis consulere arbitrantur; aut cujus opes metuunt; aut contrâ, a quibus aliquid expectant, ut quum reges popularesve homines largitiones aliquas proponunt; aut postremò, pretio ac mercede ducuntur: quæ sordidissima est illa quidem ratio, & inquinatissima, & iis, qui eâ tenentur, & illis, qui ad eam confugere conantur.

22. Malè enim se res habet, quum, quod virtute effici debet, id tentatur pecuniâ. Sed quoniam nonnumquam hoc subsidium necessarium est; quemadmodum sit utendum eo, dicemus, si priùs iis de rebus, quæ virtuti propiores sunt, dixerimus. Atque etiam subjiciunt se homines imperio alterius, & potestati pluribus de causis: ducuntur enim aut benevolentia, aut beneficiorum magnitudine, aut dignitatis præstantiâ, aut spe, sibi id

utile futurum ; aut metu , ne vi parere cogantur ; aut spe largitionis , promissionibusque capti ; aut postremò , ut sæpe in nostra republica videmus , mercede conducti.

VII. Omnium autem rerum nec aptius est quidquam ad opes tuendas ac tenendas , quàm diligere ; nec alienius , quàm timere. Præclare enim Ennius : *Quem metuunt , oderunt : quem quisque odit , perisse expetit.* Multorum autem odiis nullas opes posse obsistere , si antea fuit ignotum , nuper est cognitum. Nec verò huius tyranni solum , quem armis oppressa pertulit civitas , paretque quum maximè mortuo , interitus declarat , quantum odium hominum valeat ad pestem ; sed reliquorum similes exitus tyrannorum , quorum haud ferè quisquam interitum similem effugit. Malus enim custos diuturnitatis metus ; contraque benevolentia fidelis est , vel ad perpetuitatem.

24. Sed iis , qui vi oppressos imperio coercerent , sit sanè adhibenda sævitia , ut heris in famulos , si aliter teneri non possunt : qui verò in libera civitate ita se instruunt , ut metuantur ; his nihil esse potest dementius. Quamvis enim demersæ sint leges alicujus opibus , quamvis timefacta libertas , emergunt tamen hæc aliquando aut iudiciis tacitis , aut occultis de honore

suffragiis. Acriores autem morsus sunt intermissæ libertatis, quàm retentæ. Quod igitur latissimè patet, neque ad incolumitatem solùm, sed etiam ad opes & potentiam valet plurimùm, id amplectamur, ut metus absit, caritas retineatur: ita facillimè, quæ volumus, & privatis in rebus, & in republica consequemur: etenim, qui se metui volent, a quibus metuentur, eosdem metuant ipsi, necesse est.

25. Quid enim censemus superiorem illum Dionysium, quo cruciatu timoris angî solitum? qui cultros metuens tonsorios, candente carbone sibi adurebat capillum? Quid? Alexandrum Pheræum, quo animo vixisse arbitramur? qui (ut scriptum legimus) quum uxorem Theben admodum diligeret, tamen ad eam ex epulis in cubiculum veniens, barbarum, & eum quidem, ut scriptum est, compunctum notis Threiciis, destriçto gladio jubebat anteire; præmittebatque de stipatoribus suis, qui scrutarentur arculas muliebres, & ne quod in vestimentis occultaretur telum, exquirerent. O miserum, qui fidelio rem, & barbarum, & stigmatiam putaret, quàm conjugem! nec eum fefellit; ab ea enim est ipse, propter pellicatûs suspicionem, interfectus.

26. Nec verò ulla vis imperii tanta est,

quæ premente metu, possit esse diuturna. Testis est Phalaris, cujus est præter ceteros nobilitata crudelitas; qui non ex insidiis interiit, ut is, quem modò dixi, Alexander; non a paucis, ut hic noster: sed in quem universa Agrigentinorum multitudo impetum fecit. Quid? Macedones nonne Demetrium reliquerunt, universique se ad Pyrrhum contulerunt? Quid? Lacedæmonios injustè imperantes, nonne repentè omnes ferè socii deseruerunt, spectatoresque se otiosos præbuerunt Leuctricæ calamitatis?

VIII. Externa libentiùs in tali re, quàm domestica, recordor. Verumtamen quamdiu imperium populi Romani beneficiis tenebatur, non injuriis; bella aut pro sociis, aut de imperio gerebantur; exitus erant bellorum aut mites, aut necessarii: regum, populorum, nationum portus erat & refugium senatus.

27. Nostri autem magistratus imperatoresque ex hac una re maximam laudem capere studebant, si provincias, si socios æquitate & fide defendissent: itaque illud patrocinium orbis terræ verius, quàm imperium poterat nominari. Sensim hanc consuetudinem & disciplinam jam antea minuebamur; post verò Sullæ victoriam penitus amisimus: desitum est enim videri quidquam in socios iniquum, quum

existisset in cives tanta crudelitas. Ergo in illo secuta est honestam causam non honesta victoria: est enim ausus dicere, hastâ positâ, quum bona in foro venderet & bonorum virorum, & locupletum, & certè civium, prædam suam se vendere.

28. Secutus est, qui in causa impia, victoria etiam fœdiore, non singulorum civium bona publicaret, sed universas provincias regionesque uno calamitatis jure comprehenderet. Itaque vexatis & perditis exteris nationibus, ad exemplum amissi imperii portari in triumpho Massiliam vidimus, & ex ea urbe triumphari, sine qua numquam nostri imperatores ex Transalpinis bellis triumpharunt: multa præterea commemorarem nefaria in socios, si hoc uno sol quidquam vidisset indignius. Jure igitur plectimur: nisi enim multorum impunita scelera tulissemus, numquam ad unum tanta pervenisset licentia; a quo quidem rei familiaris ad paucos, cupiditatum ad multos improbos venit hereditas.

29. Nec verò umquam bellorum civilium semen & causa deerit, dum homines perditæ hastam illam cruentam & meminerrint, & sperabunt; quam P. Sulla quum vibrasset, dictatore propinquo suo, idem sexto & tricesimo anno post a sce-

leratione hasta non recessit: alter autem, qui in illa dictatura scriba fuerat, in hac fuit quaestor urbanus. Ex quo debet intelligi, talibus praemiis propositis, numquam defutura bella civilia. Itaque parietes urbis modò stant & manent, iique ipsi jam extrema scelera metuentes; rem verò publicam penitus amisimus. Atque in has clades incidimus (redeundum est enim ad propositum) dum metui, quàm cari esse & diligì, maluimus: quæ si populo Romano injustè imperanti accidere potuerunt, quid debent putare singuli? Quod quum perspicuum sit, benevolentiae vim esse magnam, metùs imbecillam; sequitur, ut disseramus, quibus rebus possimus facillimè eam, quam volumus, adipisci cum honore & fide caritatem.

30. Sed eà non pariter omnes egemus. Nam ad cuiusque vitam institutam accommodandum est, a multisne opus sit, an satis a paucis diligì. Certum igitur hoc sit, idque & primum & maximè necessarium, familiaritates habere fidas amantium nos amicorum, & nostra mirantium: hæc enim est una res prorsus, ut non multum differat inter summos & mediocres viros; eaque utrisque est propemodum comparanda. Honore, & gloriâ, & benevolentia civium fortasse non æquè omnes egent; sed tamen, si cui hæc suppetunt,

adjuvant aliquantum, quum ad cetera, tum ad amicitias comparandas.

IX. Sed de amicitia alio libro dictum est, qui inscribitur Lælius. Nunc dicamus de gloria; quamquam ea quoque de re duo sunt nostri libri: sed attingamus, quandoquidem ea in rebus majoribus administrandis adjuvat plurimum. Summa igitur & perfecta gloria constat ex tribus his: si diligit multitudo; si fidem habet; si cum admiratione quadam honore nos dignos putat. Hæc autem (si est simpliciter breviterque dicendum) quibus rebus pariuntur a singulis, eisdem ferè a multitudine. Sed est alius quoque quidam aditus ad multitudinem, ut in univerforum animos tamquam influere possimus.

32. Ac primum de illis tribus, quæ antè dixi benevolentiae præcepta, videamus; quæ quidem beneficiis capitur maximè: secundo autem loco beneficâ voluntate benevolentia movetur, etiam si res fortè non suppetit: vehementer autem amor multitudinis commovetur ipsâ famâ & opinione liberalitatis, beneficentiæ, justitiæ, fidei, omniumque earum virtutum, quæ pertinent ad mansuetudinem morum ac facilitatem. Etenim illud ipsum, quod honestum decorumque dicimus, quia per se nobis placet, animosque omnium naturâ & specie suâ com-

movet, maximèque quasi perlucet ex iis, quas commemoravi, virtutibus; idcirco illos, in quibus eas virtutes esse remur, a natura ipsa diligere cogimur. Atque hæc quidem causæ diligendi gravissimæ: possunt enim præterea nonnullæ esse leviores.

33. Fides autem ut habeatur, duabus rebus effici potest; si existimabimur adepti conjunctam cum justitia prudentiam: nam & iis fidem habemus, quos plus intelligere, quàm nos, arbitramur, quosque & futura prospicere credimus, & quum res agatur, in discrimenque ventum sit, expedire rem, & consilium ex tempore capere posse: hanc enim utilem omnes existimant, veramque prudentiam. Justis autem & fidis hominibus, id est, bonis, ita fides habetur, ut nulla sit in his fraudis injuriæque suspicio. Itaque his salutem nostram, his fortunas, his liberos rectissimè committi arbitramur.

34. Harum igitur duarum ad fidem faciendam justitia plus pollet; quippe quum ea sine prudentia satis habeat auctoritatis, prudentia sine justitia nihil valeat ad faciendam fidem. Quò enim quis versutior & callidior est, hòc invisior & suspicior, detractâ opinionè probitatis. Quamobrem intelligentiæ justitia conjuncta, quantum volet, habebit ad faciendam fidem

dem virium; iustitia sine prudentia multum poterit; sine iustitia nihil valebit prudentia.

X. Sed, ne quis sit admiratus, cur, quum inter omnes philosophos constet, a meque ipso sæpe disputatum sit, qui unam haberet, omnes habere virtutes; nunc ita sejungam, quasi possit quisquam, qui non idem prudens sit, iustus esse: alia est illa, quum veritas ipsa limatur in disputatione, subtilitas; alia, quum ad opinionem communem omnis accommodatur oratio. Quamobrem, ut vulgus, ita nos hoc loco loquimur, ut alios fortes, alios bonos viros, alios prudentes dicamus: popularibus enim verbis est agendum, & usitatis, quum loquamur de opinione populari, idque eodem modo fecit Panætius. Sed ad propositum revertamur.

36. Erat igitur ex tribus, quæ ad gloriam pertinent, hoc tertium, ut cum admiratione hominum, honore ab iis digni judicaremur. Admirantur igitur communiter illi quidem omnia, quæ magna, & præter opinionem suam animadverterunt; separatim autem in singulis, si perspiciunt nec opinata quædam bona. Itaque eos viros suspiciunt, maximisque efferunt laudibus, in quibus existimant se excellentes quasdam & singulares virtutes per-

spicere; despiciunt autem eos, & contemnunt, in quibus nihil virtutis, nihil animi, nihil nervorum putant: non enim omnes eos contemnunt, de quibus malè existimant: nam quos improbos, maledicos, fraudulentos putant, & ad faciendam injuriam instructos, eos contemnunt quidem neutiquam, sed de his malè existimant. Quamobrem (ut antè dixi) contemnuntur ii, qui nec sibi, nec alteri, ut dicitur; in quibus nullus labor, nulla industria, nulla cura est.

37. Admiratione autem afficiuntur ii, qui anteire ceteros virtute putantur, & quum omni carere dedecore, tum verò iis vitiis, quibus alii non facillè possunt obsistere. Nam & voluptates, blandissimæ dominæ, majores partes animi a virtute detorquent; & dolorum quum admoventur faces, præter modum plerique exterrentur: vita, mors, divitiæ, paupertas, omnes homines vehementissimè permovent: quæ qui in utramque partem excelso animo magnoque despiciunt, quumque aliqua his ampla & honesta res obiecta est, totos ad se convertit & rapit, tum quis non admiretur splendorem pulchritudinemque virtutis?

XI. Ergo & hæc animi despicientia admirabilitatem magnam facit; & maximè justitia (ex qua una virtute viri boni ap-

pellantur) mirifica quædam res multitudini videtur ; nec injuriâ. Nemo enim justus esse potest , qui mortem , qui dolorem , qui exsilium , qui egestatem timet , aut qui ea , quæ sunt his contraria , æquitati anteponit. Maximèque admirantur eum , qui pecuniâ non movetur ; quod in quo viro perspectum sit , hunc igni spectatum arbitrantur. Itaque illa tria , quæ proposita sunt ad gloriam , omnia justitia conficit ; & benevolentiam , quod prodesse vult plurimis ; & ob eandem causam , fidem , & admirationem , quod eas res spernit & negligit , ad quas plerique inflammati aviditate rapiuntur.

39. Ac meâ quidem sententiâ omnis ratio atque institutio vitæ adjumenta hominum desiderat ; in primisque , ut habeas , quibuscum possis familiares conferre sermones ; quod est difficile , nisi speciem præ te boni viri feras. Ergo etiam solitario homini , atque in agro vitam agentis , opinio justitiæ necessaria est ; eoque etiam magis , quod si eam non habebunt , injusti habebuntur : nullis præsidiis septi , multis afficientur injuriis.

40. Atque iis etiam , qui vendunt , emunt , conducunt , locant , contrahendisque negotiis implicantur , justitia ad rem gerendam necessaria est ; cujus tanta vis est , ut ne illi quidem , qui maleficio

& scelere pascuntur, possint sine ulla particula justitiæ vivere: nam qui eorum cuiuspiam, qui unâ latrocinantur, furatur aliquid; aut eripit, is sibi ne in latrocinio quidem relinquit locum; ille autem, qui archipirata dicitur, nisi æquabiliter prædam dispertiat, aut occiditur a sociis, aut relinquitur: quin etiam leges latronum esse dicuntur, quibus pareant, quas observent. Itaque propter æquabilem prædæ partitionem, & Bardylis Illyrius latro, de quo est apud Theopompum, magnas opes habuit; & multò majores Viriatus Lusitanus; cui quidem etiam exercitus nostri imperatoresque cesserunt: quem C. Lælius, is, qui sapiens usurpatur, prætor fregit & comminuit, ferocitatemque ejus ita repressit, ut facile bellum reliquis traderet. Quum igitur tanta vis justitiæ sit, ut ea etiam latronum opes firmet atque augeat, quantam ejus vim inter leges & judicia, in constituta republica fore putamus?

XII. Mihi quidem non apud Medos solum, ut ait Herodotus, sed etiam apud majores nostros, justitiæ fruendæ causâ videntur olim bene morati reges constituti. Nam quum premeretur inops multitudo ab iis, qui majores opes habebant, ad unum aliquem confugiebant virtute præstantem; qui quum prohiberet injuriâ

LIBER SECUNDUS. 221

tenuiores, æquitate constituendâ summos cum infimis pari jure retinebat. Eademque constituendarum legum fuit causa, quæ regum. Jus enim semper quæsitum est æquabile; neque enim aliter esset jus.

42. Id si ab uno justo, & bono viro consequerentur, eo erant contenti: quum id minùs contingeret, leges sunt inventæ, quæ cum omnibus semper unâ atque eadem voce loquerentur. Ergo hoc quidem perspicuum est, eos ad imperandum deligi solitos, quorum de justitia magna esset opinio multitudinis. Adjuncto verò, ut iidem etiam prudentes haberentur, nihil erat, quod homines his auctoribus non posse consequi se arbitrarentur. Omni igitur ratione colenda & retinenda justitia est, tum ipsa propter sese; nam aliter justitia non esset; tum propter amplificationem honoris & gloriæ. Sed ut pecuniæ non quærendæ solum ratio est, sed etiam collocandæ, quæ perpetuos sumptus suppeditet, nec solum necessarios, sed etiam liberales; sic gloria & quærenda, & collocanda ratione est.

43. Quamquam præclarè Socrates, hanc viam ad gloriam proximam & quasi compendiarium dicebat esse, si quis id ageret, ut, qualis haberi vellet, talis esset. Quod si qui simulatione, & inani ostentatione, & ficto non modò sermone, sed

etiam vultu, stabilem se gloriam consequi posse rentur, vehementer errant. Vera gloria radices agit atque etiam propagatur; ficta omnia celeriter, tamquam flosculi, decidunt, nec simulatum potest quidquam esse diuturnum. Testes sunt permulti in utramque partem; sed brevitatis causâ, familiâ erimus contenti unâ. Tib. enim Gracchus, P. filius, tamdiu laudabitur, dum memoria rerum Romanarum manebit. At ejus filii, nec vivi probabantur bonis, & mortui numerum obtinent jure cæsorum.

XIII. Qui igitur adipisci veram gloriam volet, justitiæ fungatur officiis: ea quæ essent, dictum est libro superiore. Sed, ut facillimè, quales simus, tales esse videamur, etsi in eo ipso vis maxima est, ut simus ii, qui haberi velimus, tamen quædam præcepta danda sunt. Nam si quis ab ineunte ætate habet causam celebritatis & nominis, aut a patre acceptam (quod tibi, mi Cicero, arbitror contigisse) aut aliquo casu, atque fortunâ; in hunc oculi omnium conjiciuntur, atque in eum, quid agat, quemadmodum vivat, anquiritur; & tamquam in clarissima luce versetur, ita nullum obscurum potest nec dictum ejus esse, nec factum. Quorum autem prima ætas propter humilitatem & obscuritatem in hominum ignora-

tione versatur; hi simul ac juvenes esse coeperunt, magna spectare, & ad ea rectis studiis debent contendere: quod eò firmiore animo facient, quia non modò non invidetur illi ætati, verùm etiam favetur.

45. Prima igitur est adolescenti commendatio ad gloriam, si qua ex bellicis rebus comparari potest; in qua multi apud majores nostros exstiterunt: semper enim ferè bella gerebantur. Tua autem ætas incidit in id bellum, cujus altera pars sceleris nimium habuit; altera felicitatis parum. Quo tamen in bello, quum te Pompeius alæ alteri præfecisset, magnam laudem a summo viro, & ab exercitu consequere equitando, jaculando, omni militari labore tolerando. Atque ea quidem tua laus pariter cum republica cecidit. Mihi autem hæc oratio suscepta non de te est, sed de genere toto: quamobrem ad ea, quæ restant, pergamus.

46. Ut igitur in reliquis rebus multò majora sunt opera animi, quàm corporis; sic hæc res, quas persequimur ingenio ac ratione, gratiores sunt, quàm illæ, quas viribus. Prima igitur commendatio profiscitur a modestia, tum pietate in parentes, tum in suos benevolentia. Facillimè autem, & in optimam partem cognoscuntur adolescentes, qui se ad claros &

sapientes viros, bene consulentes reipublicæ, contulerunt; quibuscum si frequentes sunt, opinionem afferunt populo, eorum fore se similes, quos sibi ipsi delegerunt ad imitandum.

47. P. Rutilii adolescentiam ad opinionem & innocentiam, & juris scientiam, P. Mucii commendavit domus. Nam L. quidem Crassus, quum esset, admodum adolescens, non aliunde mutuatus est, sed sibi ipse peperit maximam laudem ex illa accusatione nobili & gloriosa; &, quâ ætate qui exercentur, laude affici solent (ut de Demosthene accepimus) eâ ætate L. Crassus ostendit, id se in foro optimè jam facere, quod etiam tum poterat domesticum laude meditari.

XIV. Sed quum duplex ratio sit orationis, quarum in altera sermo sit; in altera contentio; non est id quidem dubium, quin contentio orationis majorem vim habeat ad gloriam: ea est enim, quam eloquentiam dicimus. Sed tamen difficile dictu est, quantopere conciliet animos hominum comitas affabilitasque sermonis. Exstant epistolæ, & Philippi ad Alexandrum, & Antipatri ad Cassandrum, & Antigoni ad Philippum filium, trium prudentissimorum (sic enim accepimus) quibus præcipiunt, ut oratione benignâ multitudinis animos ad benevolentiam alli-

ciant, militesque blandè appellando deliniant. Quæ autem in multitudine cum contentione habetur oratio, ea sæpe universam excitat. Magna est enim admiratio copiosè sapienterque dicentis; quem qui audiunt, intelligere etiam, & sapere plus, quàm ceteros, arbitrantur. Si verò inest in oratione mista modestiæ gravitas, nil admirabilius fieri potest; eoque magis, si ea sunt in adolescente.

49. Sed, quum sint plurima causarum genera, quæ eloquentiam desiderant, multique in nostra republica adolescentes & apud iudices, & apud senatum dicendo laudem affecuti sint, maxima est admiratio in judiciis; quorum ratio duplex est: nam ex accusatione & defensione constat; quarum etsi laudabilior est defensio, tamen etiam accusatio probata persæpe est. Dixi paulò antè de Crasso: idem fecit adolescens M. Antonius. Etiam P. Sulpicii eloquentiam accusatio illustravit, quum seditiosum & inutilem civem, C. Norbanum, in iudicium vocavit.

50. Sed hoc quidem non est sæpe faciendum, nec umquam nisi aut reipublicæ causâ, ut ii, quos antè dixi; aut ulciscendi, ut duo Luculli; aut patrocinio, ut nos pro Siculis; pro Sardis, Julius: in accusando etiam M. Aquilio L. Fufii cognita industria est. Semel igitur, aut non

sæpe certè : sin erit , cui faciendum sit
 sapius , reipublicæ tribuat hoc muneris ,
 cujus inimicos ulcisci sapius , non est re-
 prehendum ; modus tamen adsit : durè
 enim hominis , vel potius vix hominis
 videtur , periculum capitis inferre multis :
 id quum periculosum ipsi est , tum etiam
 sordidum ad famam , committere , ut ac-
 cusator nominetur ; quod contigit M. Bru-
 to , summo genere nato , illius filio , qui
 juris civilis in primis peritus fuit .

§ 1. Atque etiam hoc præceptum officii
 diligenter tenendum est , ne quem um-
 quam innocentem judicio capitis arcessas ;
 id enim sine scelere fieri nullo pacto po-
 test . Nam quid est tam inhumanum , quàm
 eloquentiam , a natura ad salutem homi-
 num , & ad conservationem datam , ad
 bonorum pestem perniciemque converte-
 re ? Nec tamen , ut hoc fugiendum est ,
 ita habendum est religioni , nocentem ali-
 quando , modò ne nefarium impiumque ,
 defendere : vult hoc multitudo , patitur
 consuetudo , fert etiam humanitas . Judicis
 est , semper in causis verum sequi ; patro-
 ni , nonnumquam verisimile , etiam si mi-
 nus sit verum , defendere : quod scribere
 (præsertim quum de philosophia scribe-
 rem) non auderem , nisi idem placeret
 gravissimo Stoicorum Panætio . Maximè
 autem & gloria paritur & gratia defen-

sionibus; eoque major, si quando accidit, ut ei subveniatur, qui potentis alicujus opibus circumveniri urgerique videatur: ut nos & sæpe aliàs, & adolescentes, contra L. Sullæ dominantis opes pro S. Roscio Amerino fecimus; quæ, ut scis, exstat oratio.

XV. Sed expositis adolescentium officiis, quæ valeant ad gloriam adipiscendam, deinceps de beneficentia ac liberalitate dicendum est; cujus est ratio duplex: nam aut operâ benignè fit indigentibus, aut pecuniâ: facilior est hæc posterior, locupletis præsertim; sed illa lautior ac splendidior, & viro forti clarioque dignior: quamquam enim in utroque inest gratificandi liberalis voluntas, tamen altera ex arca, altera ex virtute depromitur; largitioque, quæ fit ex re familiari, fontem ipsum benignitatis exhaurit: ita benignitate benignitas tollitur; quâ quò in plures usus sis, eò minùs in multos uti possis.

§ 3. At qui operâ, id est, virtute & industriâ beneficii & liberales erunt, primum quò pluribus profuerint, eò plures ad benignè faciendum adjutores habebunt: deinde consuetudine beneficentiæ paratiores erunt, & tamquam exercitiores ad bene de multis promerendum. Præclare epistolâ quadam Alexandrum filium Philippus accusat, quòd largitione

benevolentiam Macedonum confectetur. Quæ te, malum, inquit, ratio in istam spem induxit, ut eos tibi fideles putares fore, quos pecuniâ corrupisses? An tu id agis, ut Macedones non te regem suum, sed ministrum & præbitorem sperent fore? Bene ministrum & præbitorem, quia sordidum regi; melius etiam, quod largitionem, corruptelam esse dixit: fit enim deterior, qui accipit, atque ad idem semper expectandum paratior. Hoc ille filio: sed præceptum putemus omnibus. Quamobrem id quidem non dubium est, quin illa benignitas, quæ constat ex opera & industria, & honestior sit, & latius pateat, & possit prodesse pluribus.

54. Nonnumquam tamen est largiendum, nec hoc benignitatis genus omnino repudiandum est; & sæpe idoneis hominibus indigentibus de re familiari imperiendum, sed diligenter, atque moderatè: multi enim patrimonia effuderunt, inconsultè largiendo. Quid autem est stultius, quàm quod libenter facias, curare, ut id diutius facere non possis? Atque etiam sequuntur largitionem rapinæ: quum enim dando egere cœperint, alienis bonis manus afferre coguntur: ita, quum benevolentiae comparandæ causâ benefici esse velint; non tanta studia assequuntur eorum, quibus dederunt, quanta odia eorum, quibus ademerunt.

LIBER SECUNDUS. 229

§5. Quamobrem nec ita claudenda est res familiaris, ut eam benignitas aperire non possit; nec ita referenda, ut pateat omnibus: modus adhibeatur, isque referatur ad facultates. Omnino meminisse debemus id, quod a nostris hominibus sæpissime usurpatum, jam in proverbii consuetudinem venit, largitionem fundum non habere: etenim quis potest modus esse, quum & idem qui consuerunt, & idem illud alii desiderent.

XVI. Omnino duo sunt genera largorum, quorum alteri prodigi; alteri liberales. Prodigii, qui epulis, & viscerationibus, & gladiatoriiis muneribus, ludorum venationumque apparatu, pecunias profundunt in eas res, quarum memoriam aut brevem, aut nullam omnino sint relicturi: liberales autem; qui suis facultatibus aut captos a prædonibus redimunt, aut æs alienum suscipiunt amicorum, aut in filiarum collocationem adjuvant, aut opitulantur in re vel quærenda, vel augenda.

§6. Itaque miror, quid in mentem venerit Theophrasto, in eo libro, quem de divitiis scripsit, in quo multa præclare; illud absurdè. Est enim multus in laudanda magnificentia & apparatione popularium munerum; taliumque sumptuum facultatem, fructum divitiarum putat. Mihi

autem ille fructus liberalitatis, cujus exempla pauca posui, multò etiam & major videtur & certior. Quantò Aristoteles graviùs & veriùs nos reprehendit, qui has pecuniarum effusiones non admiremur, quæ fiunt ad multitudinem delinendam: at ii, qui ab hoste obsidentur, si emere aquæ sextarium minâ cogantur, hoc primò incredibile nobis videri, omnesque mirari; sed, quum attenderint, veniam necessitati dare: in his immanibus jacturis, infinitisque sumptibus, nihil nos magnopere mirari; quum præsertim nec necessitati subveniat, nec dignitas augeatur; ipsaque illa delectatio multitudinis sit ad breve exiguumque tempus; eaque a levissimo quoque in quo tamen ipso unâ cum satietate, memoria quoque moriatur voluptatis. Bene etiam colligit, hæc pueris, & mulierculis, & servis, & servorum simillimis liberis, esse grata; gravi verò homini, & ea quæ fiunt, judicio certo ponderanti, probari posse nullo modo.

57. Quamquam intelligo, in nostra civitate inveterasse jam a bonis temporibus, ut splendor ædilitatum ab optimis viris postuletur. Itaque & P. Crassus quum cognomine dives, tum copiis, functus est ædilitio maximo munere; & paulò post L. Crassus cum omnium hominum mode-

ratissimo, Q. Mucio, magnificentissimâ ædilitate functus est: deinde C. Claudius, C. filius; multi pòst, Luculli, Hortensius, Silanus: omnes autem P. Lentulus, me consule, vicit superiores: hunc est Scaurus imitatus. Magnificentissima verò nostri Pompeii munera secundo consulatū; in quibus omnibus quid mihi placeat, vides.

XVII. Vitanda tamen est suspicio avaritiæ. Nam Mamerco, homini divitissimo, præmissio ædilitatis consulatū repulsam attulit. Quare &, si postulatur a populo, bonis viris si non desiderantibus, attamen approbantibus, faciendum est, modò pro facultatibus, nos ipsi ut fecimus; &, si quando aliqua res major atque utilior populari largitione acquiritur; ut Orestis nuper prandia in semitis decumæ nomine magno honori fuerunt. Ne Marco quidem Sejo vitio datum est, quòd in caritate asse modium populo dedit: magnâ enim se & inveteratâ invidiâ, nec turpi jacturâ, quando erat ædilis, nec maximâ liberavit. Sed honori summo nuper nostro Miloni fuit, quòd gladiatoribus emptis reipublicæ causâ, quæ salute nostrâ continebatur, omnes P. Clodii conatus furoresque compressit. Causa igitur largitionis est, si aut necesse est, aut utile.

59. In his autem ipsis mediocritatis regula optima est. L. quidem Philippus, Q. filius, magno vir ingenio, in primisque clarus, gloriari solebat, se sine ullo munere adeptum esse omnia, quæ haberentur amplissima: dicebat idem C. Curius. Nobis quoque licet in hoc quodam modo gloriari: nam pro amplitudine honorum, quos cunctis suffragiis adepti sumus nostro quidem anno, quod contigit eorum nemini, quos modò nominavi, fanè exiguus sumptus ædilitatis fuit.

60. Atque etiam illæ impensæ meliores sunt, muri, navalia, portus, aquarum ductus, omniaque, quæ ad usum reipublicæ pertinent: quamquam quod præsens tamquam in manum datur, jucundius est; tamen hæc in posterum gratiora. Theatra, porticus, nova templa verecundiùs reprehendo, propter Pompeium: sed doctissimi non probant, ut & hic ipse Panætius, quem multum in his libris secutus sum, non interpretatus; & Phalereus Demetrius, qui Periclem, principem Græciæ, vituperabat, quòd tantam pecuniam in præclara illa propylæa conjecerit. Sed de hoc genere toto, in iis libris, quos de republica scripsi, diligenter est disputatum. Tota igitur ratio talium largitionum, genere, vitiosa est; temporibus, necessaria; & tum ipsa & ad facultates

accommodanda, & mediocritate moderanda est.

XVIII. In illo autem altero genere largiendi, quod a liberalitate profiscitur, non uno modo in disparibus causis affecti esse debemus.

62. Alia causa est ejus, qui calamitate premitur, & ejus, qui res meliores quaerit, nullis suis rebus adversis. Propensior benignitas esse debet in calamitosos, nisi fortè erunt digni calamitate. In iis tamen, qui se adjuvari volent, non ut ne affligantur, sed ut altiore gradum adscendant, restricti omnino esse nullo modo debemus; sed in deligendis idoneis judicium & diligentiam adhibere: nam præclare Ennius:

Benefacta malè locata, malefacta arbitror.

63. Quod autem tributum est bono viro & grato, in eo quum ex ipso fructus est, tum etiam ex ceteris: temeritate enim remotâ, gratissima est liberalitas; eoque eam studiosius plerique laudant, quòd summi cujusque bonitas commune perfugium est omnium. Danda igitur opera est, ut his beneficiis quàm plurimos afficiamus, quorum memoria liberis posterisque prodatur, ut iis ingratis esse non liceat: omnes enim immemorem beneficii oderunt; eamque injuriam in deter-

renda liberalitate sibi etiam fieri ; eumque , qui faciat , communem hostem tenuiorum putant. Atque hæc benignitas etiam reipublicæ utilis est , redimi e servitute captos , locupletari tenuiores ; quod quidem vulgò solitum fieri ab ordine nostro in oratione Crassi scriptum copiosè videmus. Hanc ergo consuetudinem benignitatis largitioni munerum longè antepono : hæc est gravium hominum , atque magnorum ; illa quasi assentatorum populi , multitudinis levitatem voluptate quasi tirillantium.

64. Conveniet autem quum in dando munificum esse , tum in exigendo non acerbum ; in omni re contrahenda , vendendo , emendo , conducendo , locando , vicinitatibus & confiniis , æquum & facilem ; multa multis de jure suo cedentem ; a litibus verò , quantum liceat , & nescio an paulò plus etiam , quàm liceat , abhorrentem. Est enim non modò liberale , paulum nonnumquam de suo jure decedere , sed interdum etiam fructuosum. Habenda autem est ratio rei familiaris , quam quidem dilabi sinere , flagitiosum est ; sed ita , ut illiberalitatis avaritiæque absit suspicio. Posse enim liberalitate uti , non spoliantem se patrimonio , nimirum is est pecuniæ fructus maximus. Rectè etiam a Theophrasto est laudata hospita-

LIBER SECUNDUS. 235

litas : est enim (ut mihi quidem videtur) valde decorum , patere domos hominum illustrium illustribus hospitibus ; idque etiam reipublicæ est ornamento , homines externos hoc liberalitatis genere in urbe nostra non egere. Est autem etiam vehementer utile iis , qui honestè posse multum volunt , per hospites apud externos populos valere opibus & gratiâ. Theophrastus quidem scribit , Cimonem Athenis etiam in suos curiales Laciadas hospitalem fuisse ; ita enim instituisse , & villis imperavisse , ut omnia præberentur , quicumque Laciades in villam suam divertisset.

XIX. Quæ autem operâ , non largitione , beneficia dantur , hæc tum in universam rempublicam , tum in singulos cives conferuntur : nam in jure cavere , consilio juvare , atque hoc scientiæ genere prodesse quàm plurimis , vehementer & ad opes augendas pertinet , & ad gratiam. Itaque quum multa præclara majorum , tum quòd optimè constituti juris civilis summo semper in honore fuit cognitio atque interpretatio ; quam quidem antehanc confusionem temporum in possessione sua principes retinuerunt ; nunc ut honores , ut omnes dignitatis gradus , sic hujus scientiæ splendor deletus est ; id-

que eò indignius, quòd eo tempore hoc contigit, quum is esset; qui omnes superiores, quibus honore par esset, scientià facillè vicisset. Hæc igitur opera, grata multis, & ad beneficiis obstringendos homines accommodata.

66. Atque huic arti finitima est dicendi gravior facultas, & gratior, & ornatio. Quid enim eloquentiâ præstabilius, vel admiratione audientium, vel spe indigentium, vel eorum, qui defensi sunt, gratiâ? huic quoque ergo a majoribus nostris est in toga dignitatis principatus datus. Diserti igitur hominis, & facillè laborantis, quodque in patriis est moribus, multorum causas, & non gravatè, & gratuitò defendentis, beneficia & patrocinia latè patent.

67. Admonebat me res, ut hoc quoque loco intermissionem eloquentiæ, ne dicam interitum, deplorarem; ni verer, ne de me ipso aliquid viderer queri. Sed tamen videmus, quibus extinctis oratoribus, quàm in paucis spes, quantò in paucioribus facultas, quàm in multis sit audacia. Quum autem omnes non possint, ne multi quidem, aut jurisperiti esse, aut disertis, licet tamen operâ prodesse multis, beneficia petentem, commendantem iudicibus & magistratibus,

vigilantem pro re alterius, eos ipsos, qui aut consuluntur, aut defendunt, rogantem; quod qui faciunt, plurimum gratiæ consequuntur, latissimæque eorum meretur industria.

68. Jam illud non sunt admonendi (est enim in promptu) ut animum advertant, quum juvare alios velint, ne quos offendant: sæpe enim aut eos lædunt, quos non debent; aut eos, quos non expedit: si imprudentes, negligentia est; si scientes, temeritatis. Utendum etiam excusatione adversus eos, quos invitus offendas, quacumque possis, quare id, quod feceris, necesse fuerit, nec aliter facere potueris: ceterisque operis & officiis erit, quod violatum est, compensandum.

XX. Sed quum in hominibus juvandis aut mores spectari, aut fortuna soleat; dictum quidem est proclive, itaque vulgò loquuntur, se in beneficiis collocandis mores hominum, non fortunam sequi: honesta oratio est: sed quis est tandem, qui inopis & optimi viri causæ non anteponat, in opera danda, gratiam fortunati & potentis? a quo enim expeditior & celerior remuneratio fore videtur, in eum ferè est voluntas nostra propensior. Sed animadvertendum est diligentius, quæ natura rerum sit: nimirum enim inops ille

si bonus est vir, etiam si referre gratiam non potest, habere certè potest. Commodè autem, quicumque dixit, *pecuniam qui habeat, non reddidisse; qui reddiderit, non habere: gratiam autem & qui retulerit, habere; & qui habeat, retulisse.*

70. At, qui se locupletes, honoratos, beatos putant, hi ne obligari quidem beneficio volunt: quin etiam beneficium se dedisse arbitrantur, quum ipsi quamvis magnum aliquod acceperint; atque etiam a se aut postulari, aut expectari aliquid suspicantur: patrocínio verò se usos, & clientes appellari, mortis instar putant. At verò ille tenuis, quum, quidquid factum sit, se spectatum, non fortunam putet, non modò illi, qui est meritis, sed etiam illis, a quibus expectat (eget enim multis) gratum se videri studet: neque verò verbis auget suum munus, si quo fortè fungitur, sed etiam extenuat. Videntumque illud est, quòd si opulentum fortunatumque defenderis, in illo uno, aut fortè in liberis ejus, manet gratia: sin autem inopem, probum tamen & modestum; omnes non improbi humiles (quæ magna in populo multitudo est) præsidium sibi paratum vident. Quamobrem meliùs apud bonos, quàm apud fortunatos, beneficium collocari puto.

71. Danda omnino opera est, ut omni generi satisfacere possimus: sed si res in contentionem veniet, nimirum Themistocles est auctor adhibendus; qui quum consuleretur, utrùm bono viro pauperi, an minùs probato diviti filiam collocaret: *Ego verò*, inquit, *malo virum, qui pecuniâ egeat, quàm pecuniam, quæ viro.* Sed corrupti mores depravatique sunt admiratione divitiarum; quarum magnitudo quid ad unumquemque nostrum pertinet? Illum fortasse adjuvat, qui habet; ne id quidem semper: sed fac juvare: utentior sanè sit: honestior verò quomodo? Quod si etiam bonus erit vir, ne impediunt divitiæ quò minùs juvetur, modò ne adjuvent; sitque omne iudicium, non quàm locuples, sed qualis quisque sit. Extremum autem præceptum in beneficiis, operaque danda est, ne quid contra æquitatem contendas, ne quid per injuriam: fundamentum enim perpetuæ commendationis, & famæ, est justitia, sine qua nihil potest esse laudabile.

XXI. Sed quoniam de eo genere beneficiorum dictum est, quæ ad singulos spectant; deinceps de iis, quæ ad universos, quæque ad rempublicam pertinent, disputandum est. Eorum autem ipsorum partim ejusmodi sunt, ut ad uni-

versos cives pertineant, partim singulos ut attingant, quæ sunt etiam gratiora. Danda est opera omnino; si possit, utrisque, nec minùs, ut etiam singulis consulatur; sed ita, ut ea res aut prosit, aut certè non obsit reipublicæ. C. Gracchi frumentaria magna largitio; exhauriebat igitur ærarium: modicam M. Octavii, & reipublicæ tolerabilis, & plebi necessaria; ergo & civibus, & reipublicæ salutaris.

73. In primis autem videndum erit ei, qui rempublicam administrabit, ut suum quisque teneat, neque de bonis privatorum publicè deminutio fiat: perniciosè enim Philippus in tribunatu, quum legem agrariam ferret, quam tamen antiquari facillè passus est, & in eo vehementer se moderatum præbuit; sed quum in agendo multa populariter, tum illud malè, *non esse in civitate duo millia hominum, qui rem haberent*. Capitalis oratio, & ad æquationem bonorum pertinens; quâ peste quæ potest esse major? Hanc enim ob causam maximè, ut sua tenerent, reipublicæ civitatesque constitutæ sunt. Nam etsi duce naturâ congregabantur homines, tamen spe custodiæ rerum suarum, urbium præsidia quærebant.

74. Danda etiam opera est, ne (quod apud

LIBER SECUNDUS. 241

apud majores nostros sæpe fiebat , propter ærarii tenuitatem , assiduitatemque bel-
lorum) tributum sit conferendum ; idque
ne eveniat , multò antè erit providendum :
sin qua necessitas hujus muneris alicui rei-
publicæ obvenierit (malo enim , quàm
nostræ ominari ; neque tamen de nostra ,
sed de omni republica disputo) danda
erit opera , ut omnes intelligant (si salvi
esse velint) necessitati esse parendum :
atque etiam omnes , qui rempublicam
gubernabunt , consulere debebunt , ut
earum rerum copia sit , quæ sunt neces-
sariæ : quarum qualis comparatio fieri so-
leat & debeat , non est necesse disputare ;
est enim in promptu : tantum locus attingendus fuit.

75. Caput autem est in omni procura-
tione negotii & muneris publici , ut avaritiæ pellatur etiam minima suspicio. Uti-
nam , inquit , C. Pontius Samnis , ad illa
tempora me fortuna reservasset , & tum
essem natus , si quando Romani dona ac-
cipere cœpissent ! non essem passus diu-
tius eos imperare. Næ illi multa secula
exspectanda fuerunt : modò enim hoc ma-
lum in hanc rempublicam invasit : itaque
facile patior tunc potius Pontium fuisse ,
siquidem in illo tantum fuit roboris. Non-
dum centum & decem anni sunt , quum

de pecuniis repetundis a L. Pisone lata est lex, nulla antea quum fuisset. At verò postea tot leges, & proximæ quæque duriores: tot rei, tot damnati, tantum Italicum bellum propter judiciorum metum excitatum: tanta, sublatiis legibus & judiciis, expilatio direptioque sociorum, ut imbecillitate aliorum, non nostrâ virtute valeamus.

XXII. Laudat Africanum Panætius, quòd fuerit abstinens. Quidni laudet? sed in illo alia majora. Laus enim abstinentiæ, non hominis est solùm, sed etiam temporum illorum. Omni Macedonum gazâ, quæ fuit maxima, potitus est Paulus: tantum in ærarium pecuniæ invexit, ut unius imperatoris præda finem attulerit tributorum: at hic nihil in domum suam præter memoriam nominis sempiternam detulit. Imitatus patrem Africanus, nihilò locupletior Carthagine eversâ. Quid? qui ejus collega in censura fuit L. Mummius, numquid copiosior, quum copiosissimam urbem funditus sustulisset? Italiam ornare, quam domum suam, maluit: quamquam Italiâ ornatâ, domus ipsa mihi videtur ornatio.

77. Nullum igitur vitium tetrius (ut eò, unde digressa est, referat se ora-

LIBER SECUNDUS. 243

tio) quàm avaritia , præsertim in principibus rempublicam gubernantibus : habere enim quæstui rempublicam non modò turpe est , sed sceleratum etiam & nefarium. Itaque quod Apollo Pythius oraculum edidit , Spartam nullâ re aliâ , nisi avaritiâ perituram , id videtur non solùm Lacedæmoniis , sed & omnibus opulentis populis prædixisse. Nullâ autem re conciliare faciliùs benevolentiam multitudinis possunt ii , qui reipublicæ præsunt , quàm abstinentiâ & continentiâ.

78. Qui verò se populares volunt , ob eamque causam aut agrariam rem tentant , ut possessores suis sedibus pellantur , aut pecunias creditas debitoribus condonandas putant ; ii labefactant fundamenta reipublicæ ; concordiam primùm , quæ esse non potest , quum aliis adimuntur , aliis condonantur pecuniæ ; deinde æquitatem , quæ tollitur omnis , si habere suum cuique non licet : id enim est proprium (ut suprâ dixi) civitatis atque urbis , ut sit libera & non sollicita suæ rei cuiusque custodia.

79. Atque in hac pernicië reipublicæ ne illam quidem consequuntur , quam putant , gratiam : nam cui res erepta est , est inimicus ; cui data , etiam dissimulat

se accipere voluisse ; & maximè in pecuniis creditis occultat suum gaudium , ne videatur non fuisse solvendo. At verò ille , qui accipit injuriam , & meminit , & præ se fert dolorem suum ; nec , si plures sunt ii , quibus improbè datum est , quàm illi , quibus injustè ademptum est , idcirco plus etiam valent. Non enim numero hæc judicantur , sed pondere. Quam autem habet æquitatem , ut agrum multis annis , aut etiam seculis antè possessum , qui nullum habuit , habeat ; qui autem habuit , amittat ?

XXIII. Ac propter hoc injuriæ genus Lacedæmonii Lyfandrum ephorum expulerunt : Agin regem (quod numquam antea apud eos acciderat) necaverunt : ex eoque tempore tantæ discordiæ secutæ sunt , ut & tyranni exsisterent , & optimates exterminarentur , & præclarissimè constituta respublica dilaberetur. Nec verò solùm ipsa cecidit , sed etiam reliquam Græciam evertit contagionibus malorum , quæ a Lacedæmoniis profectæ , manarunt latius. Quid ? nostros Gracchos , Tib. Gracchi , summi viri , filios , Africanus nepotes , nonne agrariæ contentiones perdiderunt ?

81. At verò Aratus Sicyonius jure laudatur , qui , quum ejus civitas quinquæ-

ginta annos a tyrannis teneretur , profectus Argis Sicyonem , clandestino introitu urbe est potitus. Quumque tyrannum Nicoclem improvise oppressisset , sexcentos exsules , qui fuerant ejus civitatis locupletissimi , restituit , remque publicam adventu suo liberavit. Sed quum magnam animadverteret in bonis & possessionibus difficultatem , quod & eos , quos ipse restituerat , quorum bona alii possederant , egere iniquissimum arbitrabatur , & quinquaginta annorum possessiones moveri non nimis æquum putabat , propterea quod tam longo spatio multa hereditatibus , multa emptionibus , multa dotibus tenebantur sine injuria ; judicavit , neque illis adimi , neque his non satisfieri , quorum illa fuerant , oportere.

82. Quum igitur statuisset , opus esse ad eam rem constituendam pecuniâ , Alexandriam se proficisci velle dixit , remque integram ad reditum suum jussit esse ; isque celeriter ad Ptolemæum , suum hospitem , venit , qui tum regnabat alter post Alexandriam conditam : cui quum exposuisset , patriam se liberare velle , causamque docuisset ; a rege opulento vir summus facile impetravit , ut grandi pecuniâ adjuvaretur. Quam quum Sicyo-

nem attulisset, adhibuit sibi in consilium quindecim principes, cum quibus causas cognovit & eorum, qui aliena tenebant, & eorum, qui sua amiserant: perfecitque æstimandis possessionibus, ut persuaderet aliis, ut pecuniam accipere mallent, possessionibus cederent; aliis, ut commodius putarent, numerari sibi quod tanti esset, quàm suum recuperare. Ita perfectum est, ut omnes concordia constitutâ sine querela discederent.

83. O virum magnum, dignumque; qui in nostra republica natus esset! Sic par est agere cum civibus, non (ut bis jam vidimus) hastam in foro ponere, & bona civium voci subicere præconis. At ille Græcus (id quod fuit sapientis & præstantis viri) omnibus consulendum putavit; eaque est summa ratio & sapientia boni civis, commoda civium non divellere, atque omnes æquitate eadem continere. Habitent gratis in alieno? Quid ita? Ut, quum ego emerim, ædificarim, tuear, impendam, tu, me invito, fruire meo? Quid est aliud, aliis sua eripere, aliis dare aliena? Tabulæ verò novæ quid habent argumenti, nisi ut emas meâ pecuniâ fundum; eum tu habeas, ego non habeam pecuniam?

XXIV. Quamobrem ne sit æs alienum;

quod reipublicæ noceat , providendum est ; quod multis rationibus caveri potest ; non , si fuerit , ut locupletes suum perdant , debitores lucrentur alienum. Nec enim ulla res vehementius rempublicam continet , quàm fides ; quæ esse nulla potest , nisi erit necessaria solutio rerum creditarum. Numquam vehementius actum est , quàm me consule , ne solveretur. Armis & castris tentata res est ab omni genere hominum , & ordine ; quibus sic restiti , ut hoc tantum malum de republica tolleretur : numquam nec majus æs alienum fuit ; nec melius , nec facilius dissolutum est : fraudandi enim spe sublatâ , solvendi necessitas consecuta est. At verò hic noster victor , tunc quidem victus , quæ cogitarat , tum ea perfecit , quum ejus jam nihil interesset : tanta in eo peccandi libido fuit , ut hoc ipsum eum delectaret , peccare , etiam si causa non esset.

85. Ab hoc igitur genere largitionis , ut aliis detur , aliis auferatur , aberunt ii , qui rempublicam tuebuntur ; in primisque operam dabunt , ut juris & judiciorum æquitate suum quisque teneat ; & neque tenuiores propter humilitatem circumveniantur , neque locupletibus ad sua vel tenenda , vel recuperanda obsit invi-

dia : præterea quibuscumque rebus vel bello , vel domi poterunt , rempublicam augeant imperio , agris , vectigalibus. Hæc magnorum hominum sunt : hæc apud majores nostros factitata : hæc genera officiorum qui persequuntur , cum summa utilitate reipublicæ magnam ipsi adipiscuntur & gratiam , & gloriam.

86. In his autem utilitatum præceptis Antipater Tyrius , Stoicus , qui Athenis nuper est mortuus , duo præterita censet esse a Panætio , valetudinis curationem , & pecuniæ : quas res a summo philosopho præteritas arbitror , quòd essent faciles : sunt certè utiles. Sed valetudo sustentatur notitiâ sui corporis ; & observatione , quæ res aut prodesse soleant , aut obesse ; & continentiam in victu omni atque cultu , corporis tuendi causâ ; & prætermittendis voluptatibus ; postremò arte eorum , quorum ad scientiam hæc pertinent.

87. Res autem familiaris quæri debet iis rebus , a quibus abest turpitudine ; conservari autem diligentiam & parcimoniam ; iisdem etiam rebus augeri : has res commodissimè Xenophon Socraticus persecutus est in eo libro , qui *Æconomicus* inscribitur ; quem nos istâ ferè ætate quum essemus , quâ es tu nunc , e Græco in Latinum convertimus.

XXV. Sed utilitatum comparatio , quoniam hic locus erat quartus a Pannatio prætermisus , sæpe est necessaria. Nam & corporis commoda cum externis , & externa cum corporis , & ipsa inter se corporis , & externa cum externis comparari solent. Cum externis , corporis , hoc modo comparantur : Valere ut malis , quàm dives esse. Cum corporis , externa , hoc modo : Dives esse potius quàm maximis corporis viribus. Ipsa inter se corporis sic : ut Bona valetudo voluptati anteponatur , vires celeritati. Externorum autem , ut gloria divitiis , vectigalia urbana rusticis.


89. Ex quo genere comparisonis illud est Catonis senis ; a quo quum quæreretur , quid maximè in re familiari expediret , respondit , Bene pascere. Quid secundum ? Satis bene pascere. Quid tertium ? Malè pascere. Quid quartum ? Arare. Et , quum ille , qui quæsierat , dixisset , Quid fœnerari ? Tum Cato , Quid hominem , inquit , occidere ? Ex quo , & multis aliis , intelligi debet , utilitatum comparationes fieri solere , rectèque hoc adjunctum esse quartum exquirendorum officiorum genus.

Sed toto hoc de genere , de quæ-

250 *DE OFFICIIS, LIBER II.*

renda, de collocanda pecunia, etiam de utenda, commodius a quibusdam optimis viris ad medium Janum sedentibus, quàm ab ullis philosophis ulla in schola disputatur. Sunt tamen ea cognoscenda: pertinent enim ad utilitatem, de qua hoc libro disputatum est. Reliqua deinceps persequemur.





DE OFFICIIS,

LIBER TERTIUS.

Hic liber de comparatione honestatis & utilitatis agit, quæ erat tertia propositæ disputationis pars. Negat Cicero aut dubitandum esse, aut umquam dubitari, utrùm id, quod utile videatur, honesto sit anteponendum; sed tempora incidere, quibus quod turpe haberi soleat, honestum videatur: tamquam, quum turpe sit occidere aliquem, si tyrannus occidatur, non modò non turpe, sed etiam gloriosum videri; in quo non anteponatur utile honesto, sed honestas utilitatem sequatur. Itaque, ut sine ullo errore dijudicari possit, si quando cum illo, quod honestum intelligitur, pugnare id videbitur, quod appellamus utile, formulam quamdam constituit, e Stoicorum disciplina, quam si quis in comparatione rerum sequatur,

numquam ab officio recedat. Ea hæc est : Detrahære aliquid alteri , & alterius incommodo suum augere , est contra naturam : pro multorum autem incolumitate & salute labores & molestias suscipere , secundum naturam est. Hanc legem qui servaverit , numquam aberrabit , neque aut temporibus perturbabitur , aut Jure Civili , quo quæ conceduntur , turpia quidem plerisque non videntur , sed sunt tamen sæpissime , quum formulæ constitutæ , hoc est , legi naturæ repugnant. Ex hac formula deinde multas quæstiones propositas , quibus officium ex temporibus exquiritur , explicat. ERNESTUS.

PUBLIUM Scipionem , Marce filium , qui primus Africanus appellatus est , dicere solitum scripsit Cato , qui fuit ferè ejus æqualis , *Numquam se minùs otiosum esse , quam quum otiosus ; nec minùs solum , quàm quum solus esset.* Magnifica verò vox , & magno viro , ac sapiente digna , quæ declarat , illum & in otio de

negotiis cogitare , & in solitudine secum loqui solitum ; ut neque cessaret umquam , & interdum colloquio alterius non egeret. Itaque duæ res , quæ languorem afferunt ceteris , illum acuebant , otium & solitudo. Vellem nobis hoc idem verè dicere liceret : sed si minùs imitatione tantam ingenii præstantiam consequi possumus , voluntate certè proximè accedimus : nam & a republica , forensibusque negotiis , armis impiis , vique prohibiti , otium persequimur ; & ob eam causam , urbe relictâ , rura peragrantes , sæpe soli sumus.

2. Sed nec otium hoc cum Africani otio , nec hæc solitudo cum illa comparanda est. Ille enim requiescens a reipublicæ pulcherrimis muneribus otium sibi sumebat aliquando , & a cœtu hominum , frequentiaque interdum , tamquam in portum se in solitudinem recipiebat : nostrum autem otium negotii inopiâ , non requiescendi studio , constitutum est : extincto enim senatu , deletisque judiciis , quid est , quod dignum nobis aut in curia , aut in foro agere possimus ?

3. Ita qui in maxima celebritate , atque in oculis civium quondam viximus , nunc fugientes conspectum sceleratorum , quibus omnia redundant , abdimus nos , quantum licet , & sæpe soli sumus. Sed,

quia sic ab hominibus doctis accepimus , non solum ex malis eligere minima oportere , sed etiam excerpere ex his ipsis , si quid inesset boni ; propterea & otio fruor non illo quidem , quo debeat is , qui quondam peperisset otium civitati ; nec eam solitudinem languere patior , quam mihi affert necessitas , non voluntas.

4. Quamquam Africanus majorem laudem vel meo judicio assequebatur : nulla enim ejus ingenii monumenta mandata litteris , nullum opus otii , nullum solitudinis munus exstat : ex quo intelligi debet , illum mentis agitatione , investigationeque earum rerum , quas cogitando consequebatur , nec otiosum , nec solum umquam fuisse. Nos autem , qui non tantum roboris habemus , ut cogitatione tacitâ a solitudine abstrahamur , ad hanc scribendi operam omne studium curamque convertimus. Itaque plura brevi tempore , eversâ , quàm multis annis stante republicâ , scripsimus.

II. Sed quum tota philosophia , mi Cicero , frugifera & fructuosa , nec ulla pars ejus inculta ac deserta sit ; tum nullus feracior in ea locus est , nec uberior , quàm de officiis , a quibus constanter honesteque vivendi præcepta ducuntur. Quare quamquam a Cratippo nostro , princi-

pe hujus memoriæ philosophorum , hæc te assiduè audire atque accipere confido ; tamen conducere arbitror , talibus aures tuas vocibus undique circumsonare ; nec eas , si fieri possit , quidquam aliud audire.

6. Quod quum omnibus est faciendum , qui vitam honestam ingredi cogitant , tum haud scio , an nemini potius , quàm tibi : sustines enim non parvam expectationem imitandæ industriæ nostræ , magnam honorum , nonnullam fortasse nominis. Suscepisti onus præterea grave & Athenarum , & Cratippi ; ad quos quum tamquam ad mercaturam bonarum artium sis profectus , inanem redire turpissimum est , dedecorantem & urbis auctoritatem , & magistri. Quare , quantum conniti animo potes , quantum labore contendere (si discendi labor est potius , quàm voluptas) tantum fac ut efficias ; neve committas , ut , quum omnia suppeditata sint a nobis , tute tibi defuisse videare. Sed hæc hæctenus : multa enim sæpe ad te cohortandi gratiâ scripsimus : nunc ad reliquam partem propositæ divisionis revertamur.

7. Panætius igitur , qui sine controversia de officiis accuratissimè disputavit , quemque nos , correctione quadam adhibita , potissimum secuti sumus , tribus

generibus propositis, in quibus deliberare homines, & consultare de officio solerent; uno, quum dubitarent, honestumne id esset, de quo ageretur, an turpe: altero, utilene, an inutile: tertio, si id, quod speciem haberet honesti, pugnaret cum eo, quod utile videretur, quomodo ea discerni oporteret: de duobus generibus primis, libris tribus explicavit: de tertio autem genere deinceps se scripsit dicturum, nec id exsolvit, quod promiserat.

8. Quod eò magis miror, quia scriptum a discipulo ejus Possidonio est, triginta annis vixisse Panætium, posteaquam illos libros edidisset: quem locum miror a Possidonio breviter esse tactum in quibusdam commentariis; præsertim quum scribat, nullum esse locum in tota philosophia tam necessarium.

9. Minimè verò assentior iis, qui negant, eum locum a Panætio prætermisum, sed consultò relictum, nec omnino scribendum fuisse, quia numquam posset utilitas cum honestate pugnare: de quo alterum potest habere dubitationem, adhibendumne fuerit hoc genus, quod in divisione Panætii tertium est, an planè omittendum; alterum dubitari non potest, quin a Panætio susceptum sit, sed relictum: nam qui e divisione tripartita

duas partes absolverit, huic necesse est restare tertiam. Præterea in extremo libro tertio de hac parte pollicetur, se deinceps esse dicturum.

10. Accedit eódem testis locuples, Possidonius, qui etiam scribit in quadam epistola, P. Rutilium Rufum dicere solere, qui Panætium audierat, ut nemo pictor esset inventus, qui Coæ Veneris eam partem, quam Apelles inchoatam reliquisset, absolveret (oris enim pulchritudo reliqui corporis imitandi spem auferebat) sic ea, quæ Panætius prætermisisset, & non perfecisset, propter eorum, quæ perfecisset, præstantiam, neminem esse persecutum.

III. Quamobrem de iudicio Panæti dubitari non potest: rectene autem hanc tertiam partem ad exquirendum officium adjunxerit, an secus, de eo fortasse disputari potest. Nam sive honestum, solum bonum est, ut Stoicis placet; sive quod honestum est, id ita summum bonum est, quemadmodum Peripateticis vestris videtur, ut omnia ex altera parte collocata, vix minimi momenti instar habeant; dubitandum non est, quin numquam possit utilitas cum honestate contendere. Itaque accepimus, Socratem exsecrari solitum eos, qui primùm hæc naturâ cohærentia, opinione distraxissent: cui quidem ita sunt

Stoici assensi, ut, quidquid honestum esset, id utile esse censerent; nec utile quidquam, quod non honestum.

12. Quòd si is esset Panætius, qui virtutem propterea colendam diceret, quòd ea efficiens utilitatis esset, ut ii, qui res expetendas vel voluptate, vel indolentiâ metiuntur; liceret ei dicere, utilitatem aliquando cum honestate pugnare. Sed, quum sit is, qui id solum bonum judicet, quod honestum sit; quæ autem huic repugnent specie quadam utilitatis, eorum neque accessione meliorem vitam fieri, nec decessione pejorem; non videtur ejusmodi debuisse deliberationem introducere, in qua, quod utile videretur, cum eo, quod honestum est, compararetur.

13. Etenim quod summum bonum a Stoicis dicitur, *Convenienter naturæ vivere*, id habet hanc, ut opinor, sententiam, cum virtute congruere semper; cetera autem, quæ secundum naturam essent, ita legere, si ea virtuti non repugnarent: quod quum ita sit, putant quidam, hanc comparisonem non rectè introductam, nec omnino de eo genere quidquam præcipiendum fuisse. Atque illud quidem honestum, quod propriè verèque dicitur, id in sapientibus est solis, neque a virtute divelli umquam potest; in iis autem, in quibus sapientia perfecta non

est, ipsum illud quidem perfectum honestum, nullo modo; similitudines honesti esse possunt.

14. Hæc enim omnia officia, de quibus his libris disputamus, media Stoici appellant: ea communia sunt, & latè patent; quæ & ingenii bonitate multi assequuntur, & progressionem discendi. Illud autem officium, quod rectum iidem appellant, perfectum atque absolutum est; &, ut iidem dicunt, omnes numeros habet; nec, præter sapientem, cadere in quemquam potest.

15. Quum autem aliquid actum est, in quo media officia compareant, id cumulè videtur esse perfectum; propterea quòd vulgus, quid absit a perfecto, non ferè intelligit; quatenus autem intelligit, nihil putat prætermisum. Quod item in poematibus, & picturis usu evenit, in aliisque compluribus, ut delectentur imperiti, laudentque ea, quæ laudanda non sint, ob eam, credo, causam, quòd insit in his aliquid probi, quod capiat ignaros, qui iidem, quid in unaquaque re vitii sit, nequeant judicare: itaque quum sunt docti a peritis, facilè desistunt a sententia.

IV. Hæc igitur officia, de quibus his libris differimus, quasi secunda quædam honesta esse dicunt, non sapientum mo-

dò propria, sed cum omni hominum genere communia. Itaque his omnes, in quibus est virtutis indoles, commoven-
tur. Nec verò quum duo Decii, aut duo Scipiones, fortes viri commemorantur, aut quum Fabricius Aristidesve iusti nominantur; aut ab illis fortitudinis, aut ab his iustitiæ, tamquam a sapientibus, petitur exemplum: nemo enim horum sic sapiens, ut sapientem volumus intelligi. Nec ii, qui sapientes habiti sunt, & nominati, M. Cato, & C. Lælius, sapientes fuerunt; ne illi quidem septem; sed ex mediorum officiorum frequentia similitudinem quamdam gerebant, speciemque sapientum.

17. Quocirca nec id, quod verè honestum est, fas est cum utilitatis repugnantia comparari; nec id quidem, quod communiter appellamus honestum, quod colitur ab iis, qui bonos se viros haberi volunt, cum emolumentis umquam est comparandum: tamque id honestum, quod in nostram intelligentiam cadit, tuendum conservandumque est nobis, quàm id, quod propriè dicitur, verèque est honestum, sapientibus. Aliter enim teneri non potest, si qua est ad virtutem facta progressio. Sed hæc quidem de iis, qui conservatione officiorum existimantur boni.

18. Qui autem omnia metiuntur emolumentis & commodis, neque ea volunt præponderari honestate, hi solent in deliberando honestum cum eo, quod utile putant, comparare; boni viri non solent. Itaque existimo, Panætium, quum dixerit, homines solere in hac comparatione dubitare, hoc ipsum sensitse, quod dixerit, solere modò; non etiam oportere: etenim non modò pluris putare quod utile videatur, quàm quod honestum, sed hæc etiam inter se comparare, & in his addubitare, turpissimum est. Quid est ergo, quod nonnumquam dubitationem afferre soleat, considerandumque videatur? credo, si quando dubitatio accidit, quale sit id, de quo consideretur.

19. Sæpe enim tempore fit, ut, quod plerumque turpe haberi soleat, inveniat non esse turpe. Exempli causâ, ponatur aliquid, quod pateat latiùs. Quod potest majus esse scelus, quàm non modò hominem, sed etiam familiarem hominem occidere? Num igitur se obstrinxit scelere, si quis tyrannum occidit, quamvis familiarem? Populo quidem Romano non videtur, qui ex omnibus præclaris factis illud pulcherrimum existimat. Vicit igitur utilitas honestatem? immo verò honestatem utilitas consecuta est. Itaque, ut sine ullo errore dijudicare pos-

simus, si quando cum illo, quod *honestum* intelligimus, pugnare id videbitur, quod appellamus *utile*, formula quædam constituenda est; quam si sequemur in comparatione rerum, ab officio numquam recedemus.

20. Erit autem hæc formula, Stoicorum rationi disciplinæque maximè consentanea; quam quidem in his libris propterea sequimur, quòd quamquam a veteribus Academicis, & a Peripateticis vestris, qui quondam iidem erant, qui Academici, quæ honesta sunt, anteponuntur iis, quæ videntur utilia; tamen splendidiùs hæc ab eis differuntur, quibus quidquid honestum est, idem utile videtur, nec utile quidquam, quod non honestum; quàm ab iis, quibus aut honestum aliquid non utile, aut utile non honestum. Nobis autem nostra Academia magnam licentiam dat, ut, quodcumque maximè probabile occurrat, id nostro jure liceat defendere. Sed redeo ad formulam.

V. Detrahare igitur aliquid alteri, & hominem hominis incommodo suum augere commodum, magis est contra naturam, quàm mors, quàm paupertas, quàm dolor, quàm cetera, quæ possunt aut corpori accidere, aut rebus externis: nam principio tollit convictum humanum,

& societatem: si enim sic erimus affecti, ut propter suum quisque emolumentum spoliet, aut violet alterum, disrumpi necesse est eam, quæ maximè est secundum naturam, humani generis societatem.

22. Ut, si unumquodque membrum sensum hunc haberet, ut posse putaret se valere, si proximi membri valetudinem ad se traduxisset, debilitari & interire totum corpus necesse est; sic si unusquisque nostrum rapiat ad se commoda aliorum, detrahatque quod cuique possit, emolumenti sui gratiâ, societas hominum & communitas evertatur necesse est. Nam, sibi ut quisque malit, quod ad usum vitæ pertineat, quàm alteri, acquirere, concessum est, non repugnante naturâ: illud natura non patitur, ut aliorum spoliis nostras facultates, copias, opes augeamus.

23. Neque verò hoc solùm naturâ, id est, jure gentium, sed etiam legibus populorum, quibus in singulis civitatibus respUBLICÆ continentur, eodem modo constitutum est, ut non liceat sui commodi causâ nocere alteri: hoc enim spectant leges, hoc volunt, incolumem esse civium conjunctionem; quam qui dirimunt, eos morte, exsilio, vinculis, damno coërcent. Atque hoc multò magis efficit

ipsa naturæ ratio , quæ est lex divina ; & humana ; cui parere qui velit (omnes autem parebunt , qui secundum naturam volent vivere) numquam committet , ut alienum appetat , & id , quod alteri detraxerit , sibi assumat.

24. Etenim multò magis est secundum naturam excelsitas animi , & magnitudo ; itemque comitas , justitia , liberalitas , quàm voluptas , quàm vita , quàm divitiæ ; quæ quidem contemnere , & pro nihilo ducere , comparantem cum utilitate communi , magni animi & excelsi est. Detrahere autem de altero sui commodi causâ , magis est contra naturam , quàm mors , quàm dolor , quàm cetera generis ejusdem.

25. Itemque , magis est secundum naturam , pro omnibus gentibus , si fieri possit , conservandis , aut juvandis maximos labores molestiasque suscipere , imitantem Herculem illum , quem hominum fama , beneficiorum memor , in concilio cœlestium collocavit , quàm vivere in solitudine , non modò sine ullis molestiis , sed etiam in maximis voluptatibus , abundantem omnibus copiis ; ut excellas etiam pulchritudine , & viribus. Quocirca optimo quisquæ & splendidissimo ingenio longè illam vitam huic anteponebat. Ex quo efficitur , hominem , naturæ obedientem , homini nocere non posse.

26. Deinde ,

26. Deinde, qui alterum violat, ut ipse aliquid commodi consequatur; aut nihil se existimat contra naturam facere; aut magis fugiendam censet mortem, paupertatem, dolorem, amissionem etiam liberorum, propinquorum, amicorum, quàm facere cuiuspiam injuriam. Si nihil existimat contra naturam fieri hominibus violandis; quid cum eo differas, qui omnino hominem ex homine tollat? sin fugiendum id quidem censet, sed & multò illa pejora, mortem, paupertatem, dolorem; errat in eo, quòd ullum aut corporis, aut fortunæ vitium, animi vitiis gravius existimat.

VI. Ergo unum debet esse omnibus propositum, ut eadem sit utilitas uniuscujusque, & universorum; quam si ad se quisque rapiet, dissolvetur omnis humana consortio. Atque etiam, si hoc natura præscribit, ut homo homini, quicumque sit, ob eam ipsam causam, quòd is homo sit, consultum velit; necesse est secundum eandem naturam omnium utilitatem esse communem: quod si ita est, unâ continemur omnes, & eadem lege naturæ; idque ipsum si ita est, certè violare alterum lege naturæ prohibemur. Verum autem primum: verum igitur & extremum.

28. Nam illud quidem absurdum est;
Tomus X. M

quod quidam dicunt, parenti se, aut fratri nihil detracturos, commodi sui causâ; aliam rationem esse civium reliquorum: hi sibi nihil juris, & nullam societatem, communis utilitatis causâ, statuunt esse cum civibus; quæ sententia omnem societatem distrahit civitatis. Qui autem civium rationem dicunt habendam, externorum negant; hi dirimunt communem humani generis societatem; quâ sublatâ, beneficentia, liberalitas, bonitas, justitia funditus tollitur: quæ qui tollunt, etiam adversus deos immortales impii judicandi sunt: ab iis enim constitutam inter homines societatem evertunt; cujus societatis arctissimum vinculum est, magis arbitrari esse contra naturam, hominem homini detrahere, sui commodi causâ, quàm omnia incommoda subire vel externa, vel corporis, vel etiam ipsius animi, quæ vacent justitiâ: hæc enim una virtus, omnium est domina & regina virtutum.

29. Forsitan quispiam dixerit: Nonne igitur sapiens, si fame ipse conficiatur, abstulerit cibum alteri, homini ad nullam partem utili? Minimè verò: non enim mihi est vita mea utilior, quàm animi talis affectio, neminem ut violem commodi mei gratiâ. Quid? si Phalarim, crudelem tyrannum, & immanem, vir bonus, ne ipse frigore conficiatur, vestitu spoliare possit, nonne faciat?

30. Hæc ad judicandum sunt facillima : nam , si quid ab homine ad nullam partem utili , tuæ utilitatis causâ detraxeris ; inhumanè feceris , contraque naturæ legem : sin autem is tu sis , qui multam utilitatem reipublicæ atque hominum societati , si in vita remaneas , afferre possis ; si quid ob eam causam alteri detraxeris , non sit reprehendendum : sin autem id non sit ejusmodi ; suum cuique incommodum ferendum est potius , quàm de alterius commodis detrahendum. Non igitur magis est contra naturam morbus , aut egestas , aut quid hujusmodi , quàm detractio , aut appetitio alieni.

31. Sed communis utilitatis derelictio contra naturam est ; est enim injusta : itaque lex ipsa naturæ , quæ utilitatem hominum conservat & continet , decernit profectò , ut ab homine inerti atque inutili , ad sapientem , bonum , fortemque virum transferantur res ad vivendum necessariae ; qui si occiderit , multum de communi utilitate detraxerit : modò hoc ita faciat , ut ne ipse de se bene existimans , seseque diligens , hanc causam habeat ad injuriam : ita semper officio fungetur , utilitati consulens hominum , & ei , quam sæpe commemoro , humanæ societati.

32. Nam , quod ad Phalarim attinet,
M ij

perfacile judicium est: nulla enim nobis societas cum tyrannis, sed potius summa distractio est; neque est contra naturam, spoliare eum, si possis, quem honestum est necare; atque hoc omne genus pestiferum atque impium, ex hominum communitate exterminandum est. Etenim, ut membra quædam amputantur, si & ipsa sanguine, & tamquam spiritu carere cœperunt, & nocent reliquis partibus corporis; sic ista in figura hominis feritas, & immanitas belluæ, a communi tamquam humanitate corporis segreganda est. Hujus generis sunt quæstiones omnes eæ, in quibus ex tempore officium exquiritur.

VII. Ejusmodi igitur credo res Panætium persecuturum fuisse, nisi aliqui casus, aut occupatio consilium ejus peremisset: ad quas ipsas consultationes ex superioribus libris satis multa præcepta sunt, quibus perspicui possit, quid sit propter turpitudinem fugiendum; quid sit id, quod idcirco fugiendum non sit, quia omnino turpe non est. Sed quoniam operi inchoato, propè tamen absoluto, tamquam fastigium imponimus; ut geometræ solent non omnia docere, sed postulare, ut quædam sibi concedantur, quò facilius, quæ volunt, explicent; sic ego a te postulo, mi Cicero, ut mihi concedas,

si potes, nihil, præter id, quod honestum sit, propter se esse expetendum: sin hoc non licet per Cratippum; at illud certè dabis, quod honestum sit, id esse maximè propter se expetendum. Mihi utrumvis satis est; & quum hoc, tum illud probabilius videtur, nec præterea quidquam probabile.

34. Ac primùm Panætius in hoc defendendus est, quòd non utilia cum honestis pugnare aliquando posse dixerit (neque enim ei fas erat) sed ea, quæ viderentur utilia. Nihil verò utile, quod non idem honestum; nihil honestum, quod non idem utile sit, sæpe testatur: negatque ullam pestem majorem in vitam hominum invasisse, quàm eorum opinionem, qui ista distraxerint. Itaque non ut aliquando anteponeremus utilia honestis, sed ut ea sine errore dijudicaremus, si quando incidissent, induxit eam, quæ videretur esse, non quæ esset, repugnantiam. Hanc igitur partem relictam explebimus, nullius adminiculis, sed (ut dicitur) Marte nostro: neque enim quidquam de hac parte post Panætium explicatum est, quod quidem mihi probaretur, de iis, quæ in manus meas venerunt.

VIII. Quum igitur aliqua species utilitatis objecta est, commoveri necesse est: sed si, quum animum attenderis, turpi-

tudinem videas adjunctam ei rei, quæ speciem utilitatis attulerit; tunc non utilitas relinquenda est, sed intelligendum, ubi turpitudine sit, ibi utilitatem esse non posse. Quòd si nihil est tam contra naturam, quàm turpitudine (recta enim, & convenientia, & constantia natura desiderat, aspernaturque contraria) nihilque tam secundum naturam, quàm utilitas; certè in eadem re utilitas & turpitudine esse non potest. Itemque si ad honestatem nati sumus, eaque aut sola expetenda est, ut Zenoni visum est; aut certè omni pondere gravior habenda, quàm reliqua omnia, quod Aristoteli placet; necesse est, quod honestum sit, id esse aut solum, aut summum bonum: quod autem bonum, id certè utile: ita quidquid honestum, id utile.

36. Quare error hominum non proborum, quum aliquid, quod utile visum est, arripuit, id continuò secernit ab honesto. Hinc sicæ, hinc venena, hinc falsa testamenta nascuntur: hinc furta, peculatus, expilationes, direptionesque sociorum & civium: hinc opum nimiarum potentia non ferendæ: postremò etiam in liberis civitatibus regnandi exsistunt cupiditates, quibus nihil nec tetrius, nec fœdius excogitari potest: emolumenta enim rerum fallacibus judiciis vident; pœnam non

dico legum, quas sæpe perrumpunt, sed ipsius turpitudinis, quæ acerbissima est, non vident.

37. Quamobrem hoc quidem deliberantium genus pellatur e medio (est enim totum sceleratum & impium) qui deliberant, utrùm id sequantur, quod honestum esse videant, an se scientes scelere contaminent: in ipsa enim dubitatione facinus inest, etiamsi ad id non pervenerint. Ergo ea deliberanda omnino non sunt, in quibus est turpis ipsa deliberatio: atque etiam ex omni deliberatione celandi & occultandi spes opinioque removenda est: satis enim nobis (si modò in philosophia aliquid profecimus) persuasum esse debet, si omnes deos hominesque celare possimus, nihil tamen avarè, nihil injustè, nihil libidinosè, nihil incontinenter esse faciendum.

IX. Hinc ille Gyges inducitur a Platone: qui, quum terra discessisset magnis quibusdam imbribus, in illum hiatum descendit, æneumque equum (ut ferunt fabulæ) animadvertit, cujus in lateribus fores essent; quibus apertis, hominis mortui vidit corpus magnitudine invisitatâ, annulumque aureum in digito: quem ut detraxit, ipse induit (erat autem regius pastor) tum in concilium pastorum se recepit: ibi quum palam ejus annuli

ad palmam converterat, a nullo videbatur; ipse autem omnia videbat: idem rursus videbatur, quum in locum anulum inverterat. Itaque hac opportunitate annuli usus, reginæ stuprum intulit; eâque adjutrice regem dominum interemit, sustulit quos ob stare arbitrabatur; nec in his eum quisquam facinoribus potuit videre: sic repentè annuli beneficio rex exortus est Lydiæ. Hunc igitur ipsum anulum si habeat sapiens, nihilò plus sibi licere putet peccare, quàm si non haberet. Honesti enim bonis viris, non occulta quærentur.

39. Atque hoc loco philosophi quidam, minimè mali illi quidem, sed non satis acuti, fictam & commentitiam fabulam dicunt prolatam a Platone: quasi verò ille, aut factum id esse, aut fieri potuisse defendat. Hæc est vis hujus annuli & hujus exempli: si nemo sciturus, nemo ne suspicaturus quidem sit, quum aliquid, divitiarum, potentiæ, dominationis, libidinis causâ, feceris; si id diis hominibusque futurum sit semper ignotum; sisne facturus? Negant id fieri posse: quamquam potest id quidem. Sed quæro, quod negant posse, id si posset, quidnam facerent? Urgent rusticè sanè: negant enim posse, & in eo perstant: hoc verbum quid valeat, non vident. Quum enim quæri-

mus, si possint celare, quid facturi sint; non quærimus, possintne celare; sed tamquam tormenta quædam adhibemus, ut, si responderint, se, impunitate propositâ, facturos quod expediat, facinorosos se esse fateantur: si negent, omnia turpia per seipsa fugienda esse concedant. Sed jam ad propositum revertamur.

X. Incidunt sæpe multæ causæ, quæ conturbent animos utilitatis specie; non, quum hoc deliberetur, relinquendane sit honestas propter utilitatis magnitudinem (nam id quidem improbum est) sed illud, possitne id, quod utile videatur, fieri non turpiter. Quum Collatino collegæ Brutus imperium abrogabat, poterat videri facere id injustè: fuerat enim in regibus expellendis socius Bruti, consiliorum etiam adjutor: quum autem consilium hoc principes cepissent, cognationem Superbi, nomenque Tarquiniorum, & memoriam regni esse tollendam; quod erat utile, patriæ consulere, id erat ita honestum, ut etiam ipsi Collatino placere deberet. Itaque utilitas valuit propter honestatem, sine qua ne utilitas quidem esse potuisset.

41. At in eo rege, qui urbem condidit, non ita: species eaim utilitatis animum pepulit ejus: cui quum vilum esset utilius, solum, quàm cum altero regnare,

fratrem interemit. Omisit hic & pietatem, & humanitatem, ut id, quod utile videbatur, neque erat, assequi posset; & tamen muri causam opposuit, speciem honestatis neque probabilem, neque satis idoneam. Peccavit igitur, pace vel Quirini, vel Romuli dixerim.

42. Nec tamen nostræ nobis utilitates omittendæ sunt, aliisque tradendæ, quum his ipsi egeamus: sed suæ cuique utilitati, quod sine alterius injuria fiat, serviendum est. Scitè Chrysippus, ut multa: Qui stadium, inquit, currit, eniti & contendere debet, quàm maximè possit, ut vincat; supplantare eum, quicum certet, aut manu depellere, nullo modo debet: sic in vita sibi quemque petere, quod pertineat ad usum, non iniquum est; alteri deripere, jus non est.

43. Maximè autem perturbantur officia in amicitiiis; quibus & non tribuere, quod rectè possis, & tribuere quod non sit æquum, contra officium est. Sed hujus generis totius, breve & non difficile præceptum est. Quæ enim videntur utilia, honores, divitiæ, voluptates, cetera generis ejusdem, hæc amicitiaë numquam anteponenda sunt. At neque contra rempublicam, neque contra jusjurandum ac fidem, amici causâ, vir bonus faciet; ne si judex quidem erit de ipso amico: po-

nit enim personam amici, quum induit judicis. Tantum dabit amicitiae, ut veram amici causam esse malit; & ut orandae liti tempus, quoad per leges liceat, accommodet.

44. Quum verò jurato sententia dicenda sit; meminerit, deum se adhibere testem, id est (ut ego arbitror) mentem suam, quâ nihil homini dedit deus ipse divinius. Itaque præclarum a majoribus accepimus morem rogandi judicis, si eum teneremus, *Quæ salvâ fide facere possit.* Hæc rogatio ad ea pertinet, quæ paulò antè dici, honestè amico a judice posse concedi: nam, si omnia facienda sint, quæ amici velint; non amicitiae tales, sed conjurationes putandæ sunt.

45. Loquor autem de communibus amicitiiis: nam in sapientibus viris perfectisque, nihil potest esse tale. Damonem & Phintiam, Pythagoreos, ferunt hoc animo inter se fuisse, ut, quum eorum alteri Dionysius tyrannus diem necis destinavisset; & is, qui morti addictus esset, paucos sibi dies commendandorum suorum causâ postulavisset; vas factus est alter ejus sistendi; ut, si ille non revertisset, moriendum esset ipi: qui quum ad diem se recepisset, admiratus eorum fidem tyrannus, petivit, ut se ad amicitiam tertium adscriberent.

XI. Quum igitur id, quod utile videtur in amicitia, cum eo, quod honestum est, comparatur; jaceat utilitatis species, valeat honestas: quum autem in amicitia, quæ honesta non sunt, postulabuntur, religio & fides anteponantur amicitiae: sic habebitur is, quem exquirimus, delectus officii. Sed utilitatis specie in republica sæpissime peccatur, ut in Corinthi disturbance nostræ: durius etiam Athenienses, qui sciverunt ut Æginetis, qui classe valebant, pollices præciderentur: hoc visum est utile; nimis enim imminebat, propter propinquitatem, Ægina Piræeo: sed nihil, quod crudele, utile: est enim hominum naturæ, quam sequi debemus, maximè inimica crudelitas.

47. Malè etiam, qui peregrinos urbibus uti prohibent, eosque exterminant, ut Pennus apud patres nostros, Papius nuper. Nam esse pro cive, qui civis non sit, rectum est non licere; quam tulerunt legem sapientissimi consules, Crassus & Scævola: usu verò urbis prohibere peregrinos, sanè inhumanum est. Illa præclara, in quibus publicæ utilitatis species præ honestate contemnitur. Plena exemplorum est nostra respublica, quum sæpe, tum maximè bello Punico secundo: quæ, Cannensi calamitate acceptâ, majores animos habuit, quàm umquam rebus se-

LIBER TERTIUS. 277

cundis : nulla timoris significatio , nulla mentio pacis : tanta vis est honesti , ut speciem utilitatis obscuraret.

48. Athenienses quum Persarum impetum nullo modo possent sustinere , statuerentque , ut , urbe relictâ , conjugibus & liberis Trœzene depositis , naves conscenderent , libertatemque Græciæ classe defenderent ; Cyrsilum quemdam , suadentem , ut in urbe manerent , Xerxemque reciperent , lapidibus obruerunt. Atque ille utilitatem sequi videbatur : sed ea nulla erat repugnante honestate.

49. Themistocles post victoriam ejus belli , quod cum Persis fuit , dixit in concione , se habere consilium reipublicæ salutare ; sed id sciri opus non esse : postulavit , ut aliquem populus daret , quicum communicaret : datus est Aristides. Huic ille classem Lacedæmoniorum , quæ subducta esset ad Gytheum , clam incendi posse ; quo facto frangi Lacedæmoniorum opes necesse esset. Quod Aristides quum audisset , in concionem magnâ expectatione venit ; dixitque , perutile esse consilium , quod Themistocles afferret ; sed minimè honestum. Itaque Athenienses , quod honestum non esset , id ne utile quidem putaverunt ; totamque eam rem , quam ne audierant quidem , auctore Aristide repudiaverunt. Melius hi , quàm nos ,

qui piratas, immunes; socios, vectigales habemus.

XII. Maneat ergo, quod turpe sit, id numquam esse utile; ne tum quidem, quum id, quod esse utile putes, adipiscare: hoc enim ipsum utile putare, quod turpe sit, calamitosum est. Sed incidunt (ut suprà dixi) sæpe causæ, quum repugnare utilitas honestati videatur, ut animadvertendum sit, repugnetque planè, an possit cum honestate conjungi. Ejus generis hæ sunt quæstiones: Si (exempli gratiâ) vir bonus Alexandriâ Rhodum magnum frumenti numerum advenxit in Rhodiorum inopia & fame, summaque annonæ caritate; si idem sciat, complures mercatores Alexandriâ solvisse, navesque in cursu, frumento onustas, petentes Rhodum, viderit; dicturusne sit id Rhodiis, an silentio suum quàm plurimo venditurus? Sapientem & bonum virum fingimus: de ejus deliberatione & consultatione quærimus, qui celaturus Rhodios non sit, si id turpe judicet; sed dubitet, an turpe non sit.

§ 1. In hujusmodi causis aliud Diogeni Babylonio videri solet, magno & gravi Stoico; aliud Antipatro, discipulo ejus, homini acutissimo. Antipatro, omnia patefacienda, ut ne quid omnino, quod venditor norit, emptor ignoret: Dioge-

ni, venditorem, quatenus jure civili constitutum sit, dicere vitia oportere; cetera sine insidiis agere; & quoniam vendat, velle quàm optimè vendere. Adveni, exposui, vendo meum non pluris, quàm ceteri; fortasse etiam minoris, quum major est copia: cui fit injuria?

52. Exoritur Antipatri ratio ex altera parte: Quid ais? tu quum hominibus consulere debeas, & servire humanæ societati, eâque lege natus sis, & ea habeas principia naturæ, quibus parere, & quæ sequi debeas, ut utilitas tua, communis sit utilitas, vicissimque communis utilitas, tua sit; celabis homines, quid iis adsit commoditatis & copię? Respondebit Diogenes fortasse sic, Aliud est celare, aliud tacere: neque ego nunc te celo, si tibi non dico, quæ natura deorum sit, qui sit finis bonorum; quæ tibi plus prodesse cognita, quàm tritici utilitas: sed non quidquid tibi audire uile est, id mihi dicere necesse est. Immo verò (inquiet ille) necesse est, si quidem meministi, esse inter homines naturâ conjunctam societatem. Memini, inquiet ille, sed num ista societas talis est, ut nihil suum cujusque sit? quod si ita est, ne vendendum quidem quidquam est, sed donandum.

XIII. Vides in hac tota disceptatione

non illud dici, Quamvis hoc turpe sit; tamen, quoniam expedit, faciam; sed ita expedire, ut turpe non sit: ex altera autem parte; eâ re, quia turpe sit, non esse faciendum.

54. Vendat ædes vir bonus propter aliqua vitia, quæ ipse norit, ceteri ignorant: pestilentes sint, & habeantur salubres: ignoretur, in omnibus cubiculis apparere serpentes: malè materiatae, ruinosae; sed hoc præter dominum, nemo sciat: quæro, si hoc emptoribus venditor non dixerit, ædesque vendiderit pluris multò, quàm se venditurum putarit, num id injustè, & improbè fecerit?

55. Ille verò, inquit Antipater. Quid enim est aliud erranti viam non monstrare (quod Athenis execrationibus publicis sancitum est) si hoc non est, emptorem pati ruere, & per errorem in maximam fraudem incurrere? plus etiam est, quàm viam non monstrare: nam est scientem in errorem alterum inducere. Diogenes contrà: Num te emere coëgit, qui ne hortatus quidem est? ille, quod non placebat, proscripsit; tu, quod placebat, emisti. Quòd si qui proscribunt, *villam bonam, beneque ædificatam*, non existimantur fefellisse, etiam si illa nec bona est, nec ædificata ratione; multò minùs, qui domum non laudarunt: ubi enim ju-

dicium emptoris est, ibi fraus venditoris quæ potest esse? Sin autem dictum non omne præstandum est; quod dictum non est, id præstandum putas? Quid verò est stultius, quàm venditorem, ejus rei, quam vendat, vitia narrare? quid autem tam absurdum, quàm si domini jussu ita præco prædicet, *Domum pestilentem vendo?*

56. Sic ergo in quibusdam causis dubiis ex altera parte defenditur honestas, ex altera ita de utilitate dicitur, ut id, quod utile videatur, non modò facere honestum sit; sed etiam, non facere, turpe. Hæc est illa, quæ videtur utilium fieri cum honestis sæpe dissensio. Quæ dijudicanda sunt: non enim, ut quæremus, exposuimus, sed ut explicaremus.

57. Non igitur videtur nec frumentarius ille Rhodios, nec hic ædium venditor celare emptores debuisse. Neque enim id est celare, quum quid reticeas; sed quum, quod tu scias, id ignorare emolumentum tui causâ velis eos, quorum intersit id scire. Hoc autem celandi genus quale sit, & cujus hominis, quis non videt? certè non aperti, non simplicis, non ingenui, non justis, non viri boni; versuti potius, obscuro, astuti, fallacis, malitiosi, callidi, veteratoris, vafri: hæc tot,

& alia plura, nonne inutile est vitiorum subire nomina?

XIV. Quòd si vituperandi, qui reticuerunt: quid de iis existimandum est, qui orationis vanitatem adhibuerunt? C. Canius, eques Romanus, nec infacetus, & satis litteratus, quum se Syracusas otianti (ut ipse dicere solebat) non negotiandi causâ contulisset, dictitabat, se hortulos aliquos velle emere, quò invitare amicos, & ubi se oblectare sine interpellatoribus posset. Quod quum percrebuisse, Pythius ei quidam, qui argentariam faceret Syracusis, venales quidem se hortos non habere, sed licere uti Canio, si vellet, ut suis; & simul ad cœnam hominem in hortos invitavit in posterum diem. Quum ille promisisset, tum Pythius, qui esset, ut argentarius, apud omnes ordines graciosus, piscatores ad se convocavit, & ab his petivit, ut ante suos hortulos postridie piscarentur; dixitque, quid eos facere vellet. Ad cœnam tempore venit Canius: opipare à Pythio apparatus convivium: cymbarum ante oculos multitudo: pro se quisque quod ceperat, afferebat: ante pedes Pythii pisces abjiciebantur.

59. Tum Canius, Quæso, inquit, quid est hoc, Pythi? tantumne piscium? tantumne cymbarum? Et ille, Quid mirum?

inquit: hoc loco est, Syracusis quidquid est piscium: hæc aquatio: hac villâ isti carere non possunt. Incensus Canius cupiditate, contendit a Pythio, ut venderet. Gravate ille primò. Quid multa? impetrat: emit homo cupidus & locuples, tanti, quanti Pythius voluit, & emit instructos: nomina facit: negotium conficit. Invitat Canius postridie familiares suos: venit ipse mature: scalmum nullum videt: quærit ex proximo vicino, num feriæ quædam piscatorum essent, quòd eos nullos videret. Nullæ (quod sciam) inquit ille: sed hîc piscari nulli solent; itaque heri mirabar, quid accidisset.

60. Stomachari Canius: sed quid faceret? nondum enim Aquilius, collega & familiaris meus, protulerat de dolo malo formulas; in quibus ipsis quum ex eo quæreretur, quid esset *dolus malus*, respondabat, *Quum esset aliud simulatum, aliud actum*. Hoc quidem sanè luculenter, ut ab homine perito definiendi. Ergo & Pythius, & omnes aliud agentes, aliud simulantes, perfidi, improbi, malitiosi sunt. Nullum igitur factum eorum potest utile esse, quum sit tot vitiis inquinatum.

XV. Quòd si Aquiliana definitio vera est; ex omni vita simulatio, dissimulatioque tollenda est. Ita nec ut emat melius, nec ut vendat, quidquam simulabit,

aut dissimulabit vir bonus. Atque iste dolus malus etiam legibus erat vindicatus, ut tutela XII tabulis, & circumscriptio adolescentium lege Lætorîâ; & sine lege judiciis, in quibus additur, *EX FIDE BONA*. Reliquorum autem judiciorum hæc verba maximè excellent; in arbitrio rei uxoriæ, *MELIUS, ÆQUIUS*: in fiducia, *UT INTER BONOS BENE AGIER*. Quid ergo? aut in eo, quod *MELIUS, ÆQUIUS*, potest ulla pars inesse fraudis? aut, quum dicitur, *INTER BONOS BENE AGIER*, quidquam agi dolosè aut malitiosè potest? Dolus autem malus simulatione & dissimulatione, ut ait Aquilius, continetur: tollendum est igitur ex rebus contrahendis omne mendacium: non licitorem venditor, nec qui contrà asse liceatur, emptor apponet. Uterque, si ad eloquendum venerit, non plus, quàm semel, eloquetur.

62. Quintus quidem Scævola, Publii filius, quum postulasset, ut sibi fundus, cuius emptor erat, semel indicaretur, idque venditor ita fecisset, dixit, se pluris æstimare: addidit centum millia. Nemo est, qui hoc viri boni fuisse neget; sapientis, negant, ut si minoris quàm potuisset, emisset. Hæc igitur est illa perniciēs, quòd alios bonos, alios sapientes existimant: ex quo Ennius, *nequidquam*

LIBER TERTIUS. 285

sapere sapientem , qui sibi ipse prodesse non quiret. Verè id quidem , si , quid esset prodesse , mihi cum Ennio conveniret.

63. Hecatonem quidem Rhodium , discipulum Panætii , video in iis libris , quos de Officiis scripsit Q. Tuberoni , dicere , Sapientis esse , nihil contra mores , leges , instituta facientem , habere rationem rei familiaris : neque enim solum nobis divites esse volumus , sed liberis , propinquis , amicis , maximèque reipublicæ : singulorum enim facultates & copiæ , divitiæ sunt civitatis. Huic Scævolæ factum (de quo paulò antè dixi) placere nullo modo potest : etenim omnino tantum se negat facturum compendii sui causâ , quod non liceat. Huic nec laus magna tribuenda , nec gratia est.

64. Sed sive & simulatio & dissimulatio , dolus malus est ; perpaucae res sunt , in quibus non dolus iste malus versetur : sive vir bonus est is , qui prodest , quibus potest , nocet nemini , certè istum virum bonum non faciliè reperiamus. Numquam igitur est utile peccare , quia semper est turpe ; & , quia semper est honestum , virum bonum esse , semper est utile.

XVI. Ac de jure quidem prædiorum sancitum est apud nos jure civili , ut in his vendendis vitia dicerentur , quæ nota

essent venditori. Nam, quum ex XII tabulis fatis esset ea præstari, quæ essent linguâ nuncupata, quæ qui inficiatus esset, dupli pœnam subiret; a jureconsultis etiam reticentiæ pœna est constituta. Quidquid enim esset in prædio vitii, id statuerunt, si venditor sciret, nisi nominatim dictum esset, præstari oportere.

66. Ut, quum in arce augurium augures acturi essent, jussissentque Titum Claudium Centumalum, qui ædes in Cœlio monte habebat, demoliri ea, quorum altitudo officeret auspiciis; Claudius proscripsit insulam, vendidit: emit P. Calpurnius Lanarius. Huic ab auguribus illud idem denuntiatum est. Itaque Calpurnius quum demolitus esset, cognossetque, Claudium ædes postea proscripsisse, quàm esset ab auguribus demoliri jussus, arbitrum illum adegit, quidquid sibi dare, facere oporteret *ex fide bona*. M. Cato sententiam dixit, hujus nostri Catonis pater: ut enim ceteri ex patribus, sic, qui lumen illud progenuit, ex filio est nominandus. Is igitur judex ita pronuntiavit: quum in vendundo rem eam scisset, & non pronuntiasset, emptori damnum præstari oportere. Igitur ad fidem bonam statuit pertinere, notum esse emptori vitium, quod nosset venditor.

67. Quod si rectè judicavit, non rectè

frumentarius ille , non rectè ædium pestilentium venditor tacuit : sed hujusmodi reticentiæ jure civili omnes comprehendi non possunt ; quæ autem possunt , diligenter tenentur. M. Marius Gratidianus , propinquus noster , C. Sergio Oratæ vendiderat ædes eas , quas ab eodem ipse paucis antè annis emerat : hæ Sergio serviebant ; sed hoc in mancipio Marius non dixerat. Adducta res in judicium est. Oratam Crassus , Gratidianum defendebat Antonius : jus Crassus urgebat ; quod vitii venditor non dixisset sciens , id oportere præstari : æquitatem Antonius ; quoniam id vitium ignotum Sergio non fuisset , qui illas ædes vendidisset , nihil fuisse necesse dici ; nec eum esse deceptum , qui id quod emerat , quo jure esset , teneret. Quorsum hæc ? ut illud intelligas , non placuisse majoribus nostris astutos.

XVII. Sed aliter leges , aliter philosophi tollunt astutias : leges , quatenus manu tenere possunt ; philosophi , quatenus ratione & intelligentiâ. Ratio igitur hoc postulat , ne quid insidiosè , ne quid simulatè , ne quid fallaciter. Suntne igitur insidiæ , tendere plagas , etiam si excitatus non sis , nec agitatursus ? ipsæ enim feræ nullo insequente sæpe incidunt. Sic tu ædes proscribas , tabulam tamquam plagam ponas , domum propter vitia

vendas ; in eam aliquis incurrat imprudens.

69. Hoc quamquam video propter depravationem consuetudinis , neque more turpe haberi , neque aut lege sanciri , aut jure civili ; tamen naturæ lege sancitum est : societas enim est (quod etsi sæpe dictum est , dicendum tamen est sæpius) latissimè quidem quæ patéat , hominum inter homines ; interior eorum , qui ejusdem gentis sunt ; propior eorum , qui ejusdem civitatis. Itaque majores aliud jus gentium , aliud jus civile esse voluerunt : quod civile , non idem continuò gentium ; quod autem gentium , idem civile esse debet. Sed nos veri juris , germanæque justitiæ solidam & expressam effigiem nullam tenemus ; umbrâ & imaginibus utimur : eas ipsas utinam sequeremur ! feruntur enim ex optimis naturæ & veritatis exemplis. Nam quanti verba illa , *Uti ne propter te , fidemve tuam captus , fraudatusve siem ?* Quàm illa aurea , *Ut inter bonos bene agier oportet , & sine fraudatione !*

70. Sed qui sint *boni* , & quid sit *bene agi* , magna quæstio est. Q. quidem Scævola , pontifex maximus , summam vim dicebat esse in omnibus iis arbitriis , in quibus adderetur , EX FIDE BONA ; fideique bonæ nomen existimabat manare latissimè , idque versari in tutelis , societatibus ,

tibus, fiduciis, mandatis, rebus emptis, venditis, conductis, locatis, quibus vitæ societas continetur: in his magni esse judicis, statuere (præsertim quum in plerisque essent judicia contraria) quid quemque cuique præstare oporteret.

71. Quocirca astutiæ tollendæ sunt, eaque malitia, quæ vult illa quidem videri se esse prudentiam; sed abest ab ea, distatque plurimum. Prudentia est enim locata in delectu bonorum & malorum; malitia (si omnia, quæ turpia sunt, mala sunt) mala bonis anteponit. Nec verò in prædiis solum jus civile, ductum a natura, malitiam fraudemque vindicat; sed etiam in mancipiorum venditione venditoris fraus omnis excluditur: qui enim scire debuit de sanitate, de fuga, de furtis, præstat edicto ædilium: heredum alia causa est.

72. Ex quo intelligitur, quoniam juris natura fons sit, hoc secundum naturam esse, neminem id agere, ut ex alterius præderetur inscientia: nec ulla pernicies vitæ major inveniri potest, quàm in malitia simulatio intelligentiæ; ex quo ista innumera-bilia nascuntur, ut utilia cum honestis pugnare videantur. Quotus enim quisque reperietur, qui impunitate & ignorantione omnium propositâ, abstinere possit injuriâ?

XVIII. Periclitemur, si placet, in iis quidem exemplis, in quibus peccari vulgus hominum fortasse non putat. Neque enim de sicariis, veneficis, testamentariis, furibus, peculatoribus hoc loco disserendum est; qui non verbis sunt & disputatione philosophorum, sed vinculis & carcere fatigandi: sed hæc consideremus, quæ faciunt ii, qui habentur boni. L. Minucii Basili, locupletis hominis, falsum testamentum quidam e Græcia Romam attulerunt: quod quò facilius obtinerent, scripserunt heredes secum M. Crasum & Q. Hortensium, homines ejusdem ætatis potentissimos: qui, quum illud falsum esse suspicarentur, sibi autem nullius essent conscii culpæ, alieni facinoris munusculum non repudiaverunt. Quid ergo? fatin' hoc est, ut non deliquisse videantur? mihi quidem non videtur; quamquam alterum amavi vivum, alterum non odi mortuum.

74. Sed quum Basilus M. Satrium, sororis filium, nomen suum ferre voluisset, eumque fecisset heredem: *Hunc dico patronum agri Piceni & Sabini* (ô turpem notam temporum illorum!) num erat æquum, principes cives rem habere, ad Satrium nihil præter nomen pervenire? Etenim, si is, qui non defendit injuriam, neque propulsat a suis, quum potest, in-

justè facit, ut in primo libro disserui; qualis habendus est is, qui non modò non repellit, sed etiam adjuvat injuriam? Mihi quidem etiam veræ hereditates, non honestæ videntur, si sint malitiosis blanditiis officiorum, non veritate, sed simulatione quæsitæ. Atqui in talibus rebus aliud utile interdum, aliud honestum videri solet. Falsò: nam eadem utilitatis, quæ honestatis est regula. Qui hoc non perviderit, ab hoc nulla fraus aberit, nullum facinus: sic enim cogitans, *Est istud quidem honestum, verum hoc expedit*, res a natura copulatas audebit errore divellere; qui fons est fraudium, maleficiorum, scelerum omnium.

XIX. Itaque si vir bonus habeat hanc vim, ut, si digitis concrepuerit, possit in locupletium testamenta nomen ejus irrepere; hac vi non utatur; ne si exploratum quidem habeat, id omnino neminem umquam suspicaturum. At dares hanc vim M. Crasso, ut digitorum percussione heres posset scriptus esse, qui re verà non esset heres; in foro, crede mihi, saltaret. Homo autem justus, isque, quem sentimus virum bonum, nihil cuiquam, quod in se transferat, detrahet: hoc qui admiratur, is se, quid sit vir bonus, nescire fateatur.

76. At verò si quis voluerit animi sui

N ij

complicatam notionem evolvere, jam se ipse doceat, eum virum bonum esse, qui prosit quibus possit; noceat nemini, nisi lacesitus injuriâ. Quid ergo? hic non noceat, qui quodam quasi veneno perficiat, ut veros heredes moveat, in eorum locum ipse succedat? Non igitur faciat (dixerit quis) quod utile sit, quod expediat? Immo intelligat, nihil nec expedire, nec utile esse, quod sit injustum: hoc qui non didicerit, bonus vir esse non poterit.

77. Fimbriam consularem, audiebam de patre nostro puer, judicem M. Lutatio Pinthiæ fuisse, equiti Romano sanè honesto, quum is sponsionem fecisset, *ni bonus vir esset*: itaque ei dixisse Fimbriam, se illam rem numquam judicaturum, ne aut spoliaret famâ probatum hominem, si contrâ judicasset; aut statuisse videretur, virum bonum aliquem esse, quum ea res innumerabilibus officiis & laudibus contineretur. Huic igitur viro bono, quem Fimbria etiam, non modò Socrates noverat, nullo modo videri potest quidquam esse utile, quod non honestum sit. Itaque talis vir non modò facere, sed ne cogitare quidem quidquam audebit, quod non audeat prædicare. Hæc nonne est turpe dubitare philosophos, quæ ne rustici quidem dubitent? a quibus natum est id,

quod jam contritum est verustate proverbium; quum enim fidem alicujus bonitatemque laudant, dignum esse dicunt, quicum in tenebris mices. Hoc quam habet vim, nisi illam, nihil expedire quod non deceat, etiam si id possis nullo refellente obtinere?

78. Videsne igitur, hoc proverbio, neque Gygi illi posse veniam dari, neque huic, quem paulò antè fingebam, digitorum percussione hereditates omnium posse convertere? Ut enim, quod turpe est, id quamvis occultetur, tamen honestum fieri nullo modo potest; sic, quod honestum non est, id utile ut sit, effici non potest, adversante & repugnante naturâ.

XX. At enim, quum permagna præmia sunt, est causa peccandi. C. Marius quum a spe consulatus longè abesset, & jam septimum annum post præturam jaceret, neque petiturus umquam consulatum videretur; Q. Metellum, cujus legatus erat, summum virum, & civem, quum ab eo, imperatore suo, Romam missus esset, apud populum Romanum criminatus est, bellum ducere: si se consulem fecissent, brevi tempore, aut vivum, aut mortuum Jugurtham se in potestatem populi Romani redacturum. Itaque factus est ille quidem consul, sed a

fide iustitiaque discessit, qui optimum & gravissimum civem, cujus legatus, & a quo missus esset, in invidiam falso crimine adduxerit.

80. Ne noster quidem Gratidianus officio boni viri functus est tum, quum prætor esset, collegiumque prætorum tribuni plebis adhibuissent, ut res nummaria de communi sententia constitueretur. Jactabatur enim temporibus illis nummus, sic ut nemo posset scire, quid haberet. Conscripserunt communiter edictum cum pœna atque iudicio; constitueruntque, ut omnes simul in Rostra post meridiem escenderent: & ceteri quidem alius aliò; Marius a subselliis in Rostra rectà, idque quod communiter compositum fuerat, solus edixit: & ea res (si quæris) ei magno honori fuit: omnibus vicis statuæ: ad eas thus & cerei: quid multa, nemo umquam multitudini fuit carior.

81. Hæc sunt, quæ conturbant homines in deliberatione nonnumquam, quum id, in quo violatur æquitas, non ita magnum; illud autem, quod ex eo paritur, permagnum videtur: ut Mario, præripere collegis & tribunis plebis popularem gratiam, non ita turpe; consulem ob eam rem fieri, quod sibi tunc proposuerat, valdè utile videbatur. Sed omnium una regula est, quam tibi cupio esse notissi-

mam: aut illud, quod utile videtur, turpe ne sit; aut si turpe est, ne videatur esse utile. Quid igitur? possumusne aut illum Marium, virum bonum judicare, aut hunc? Explica atque excute intelligentiam tuam, ut videas, quæ sit in ea species, forma, & notio viri boni.

82. Cadit ergo in virum bonum mentiri emolumenti sui causâ, criminari, præripere, fallere? nihil profectò minùs. Est ergo ulla res tanti, aut commodum ulum tam expetendum, ut viri boni & splendorem, & nomen amittas? Quid est, quod afferre tantum utilitas ista, quæ dicitur, possit, quantum auferre, si boni viri nomen eripuerit, fidem justitiamque detraxerit? Quid enim interest, utrùm ex homine se quis convertat in belluam, an in hominis figura immanitatem gerat belluæ?

XXI. Quid? qui omnia recta & honesta negligunt, dummodo potentiam consequantur, nonne idem faciunt, quod is, qui etiam focerum habere voluit eum, cujus ipse audaciâ potens esset? Utile ei videbatur plurimum posse alterius invidiâ: id quàm injustum in patriam, quàm inutile, quàm turpe esset, non videbat. Ipse autem focer in ore semper Græcos versus de Phœnissis habebat, quos dicam ut potero, in-

conditè fortasse, sed tamen ut res possit intelligi. 8

Nam si violandum est jus, regnandi gratiâ

Violandum est: aliis rebus pietatem colas.

Capitalis Eteocles, vel potius Euripides, qui id unum, quod omnium sceleratissimum fuerat, exceperit.

83. Quid igitur minuta colligimus, hereditates, mercaturas, venditiones fraudulentas? Ecce tibi, qui rex populi Romani dominusque omnium gentium esse concupierit, idque perfecit. Hanc cupiditatem si honestam quis esse dicit, amens est: probat enim legum & libertatis interitum, earumque oppressionem tetram & detestabilem, gloriosam putat. Qui autem fatetur, honestum non esse in ea civitate, quæ libera fuit, quæque esse debeat, regnare, sed ei, qui id facere possit, esse utile; quâ hunc objurgatione, aut quo potius convicio a tanto errore coner avellere? Potest enim, dii immortales! cuiquam esse utile fœdissimum & teterrimum parricidium patriæ; quamvis is, qui se eo obstrinxerit, ab oppressis civibus Parens nominetur? Honestate igitur dirigenda utilitas est, & quidem sic, ut hæc duo, verbo inter se discrepare, re tamen unum sonare videantur.

84. Non habeo, ad vulgi opinionem, quæ major utilitas, quàm regnandi, esse possit; nihil contrà inutilius ei, qui id injustè consecutus sit, invenio, quum ad veritatem coepi revocare rationem: possunt enim cuiquam esse utiles, angores, sollicitudines, diurni & nocturni metus, vita insidiarum periculorumque plenissima?

Multi iniqui atque infideles regno, pauci sunt boni,

inquit Accius. At cui regno? quod a Tantalo & Pelope proditum jure obtinebatur. Nam quantò plures ei regi putas, qui exercitu populi Romani populum ipsum Romanum oppressisset, civitatemque non modò liberam, sed etiam gentibus imperantem, servire sibi coëgisset?

85. Hunc tu quas conscientiae labe in animo censes habuisse? quæ vulnera? Cujus autem vita ipsi potest utilis esse, quum ejus vitæ ea conditio sit, ut, qui illam eripuerit, in maxima & gratia futurus sit, & gloria? Quòd si hæc utilia non sunt, quæ maximè videntur, quia plena sunt dedecoris ac turpitudinis; satis persuasum esse debet, nihil esse utile, quod non honestum sit.

XXII. Quamquam id quidem, quum sæpe aliàs, tum Pyrrhi bello a C. Fabri-

cio, consule iterum, & a senatu nostro judicatum est. Quum enim rex Pyrrhus populo Romano bellum ultro intulisset, quumque de imperio certamen esset cum rege generoso ac potente; perfuga ab eo venit in castra Fabricii, eique est pollicitus, si præmium sibi proposuisset, se, ut clam venisset, sic clam in Pyrrhi castra rediturum, & eum veneno necaturum. Hunc Fabricius reducendum curavit ad Pyrrhum; idque factum ejus a senatu laudatum est. Atqui si speciem utilitatis, opinionemque quærimus, magnum illud bellum perfuga unus, & gravem adversarium imperii sustulisset; sed magnum dedecus & flagitium, quicum laudis certamen fuisset, eum non virtute, sed scelere superatum.

87. Utrum igitur utilius vel Fabricio, qui talis in hac urbe, qualis Aristides Athenis fuit, vel senatui nostro, qui numquam utilitatem a dignitate sejunxit, armis cum hoste certare, an venenis? Si gloriæ causâ imperium expetendum est, scelus absit, in quo non potest esse gloria: sin ipsæ opes expetuntur quoquo modo, non poterunt utiles esse cum infamia. Non igitur utilis illa L. Philippi, Q. filii sententia, quas civitates L. Sulla, pecuniâ acceptâ, ex senatusconsulto liberavisset, ut hæc rursus vectigales essent;

neque his pecuniam, quam pro libertate dederant, redderemus. Est ei senatus assensus: turpe imperio: piratarum enim melior fides, quam senatus. At aucta vectigalia: utile igitur. Quousque audebunt dicere quidquam utile, quod non honestum?

88. Potest autem ulli imperio, quod gloriâ fultum esse debet, & benevolentiam sociorum, utile esse odium & infamia? Ego etiam cum Catone meo sæpe dissensi: nimis mihi præfractè videbatur ærarium vectigaliaque defendere, omnia publicanis negare, multa sociis; quum in hos benefici esse deberemus, cum illis sic agere, ut cum colonis nostris soleremus; eoque magis, quò illa ordinum conjunctio ad salutem reipublicæ pertinebat. Malè etiam Curio, quum causam Transpadanorum æquam esse dicebat; semper autem addebat, *Vincat utilitas*. Potiùs diceret, non esse æquam, quia non esset utilis reipublicæ, quàm, quum utilem esse diceret, non esse æquam fateatur.

XXIII. Plenus est sextus liber de officiis Hecatonis talium quæstionum: Sitne boni viri, in maxima caritate annonæ, familiam non alere: in utramque partem disputat: sed tamen ad extremum utilitate, ut putat, officium dirigit magis, quàm

humanitate. Quærit, si in mari jactura facienda sit, equine pretiosi potius jacturam faciat, an servuli vilis: hîc aliò res familiaris, aliò ducit humanitas. Si tabulam de naufragio stultus arripuerit, exorquebitne eam sapiens, si potuerit? negat, quia sit injurium. Quid? dominus navis, eripietne suum? minimè: non plus, quàm si navigantem in alto ejicere de navi velit, quia sua sit: quoad enim perventum sit eò, quò sumpta navis est, non domini est navis, sed navigantium.

90. Quid, si una tabula sit, duo naufragi, hique sapientes, sibine utervis rapiat, an alter cedat alteri? cedat verò, sed ei, cujus magis intersit vel suâ, vel reipublicæ causâ, vivere. Quid, si hæc paria in utroque? nullum erit certamen, sed quasi forte aut micando victus, alteri cedat alter. Quid si pater fana expilet, cuniculos agat ad ærarium; indicetne id magistratibus filius? nefas id quidem est: quin etiam defendat patrem, si arguatur. Non igitur patria præstat omnibus officiis? immo verò; sed ipsi patriæ conducit, pios cives habere in parentes. Quid, si tyrannidem occupare, si patriam prodere conabitur pater? silebitne filius? immo verò obsecrabit patrem, ne id faciat: si nihil proficiet, accusabit, minabitur etiam: ad extremum si ad perniciem

patriæ res spectabit, patriæ salutem anteponet salutis patris.

91. Quærit etiam, si sapiens adulterinos nummos acceperit imprudens pro bonis; quum id rescierit, soluturusne sit eos, si cui debeat, pro bonis. Diogenes ait: Antipater negat; cui potius assentior. Qui vinum fugiens vendat sciens, debeatne dicere? Non necesse putat Diogenes: Antipater viri boni existimat. Hæc sunt quasi controversa jura Stoicorum. In mancipio vendendo, dicendane vitia, non ea, quæ nisi dixeris, redhibeatur mancipium jure civili; sed hæc, mendacem esse, aleatorem, furacem, ebriosum. Alteri dicenda videntur, alteri non videntur. Si quis aurum vendens, orichalcum se putet vendere, indicetne ei vir bonus aurum illud esse? an emat denario, quod sit mille denarium? Perspicuum jam est, & quid mihi videatur, & quæ sit inter eos philosophos, quos nominavi, controversia.

XXIV. Pacta & promissa semperne servanda sint, quæ nec vi, nec dolo malo (ut prætores solent) facta sint? Si quis medicamentum cuiquam dederit ad aquam intercutem, pepigeritque, ne illo medicamento umquam postea uteretur: si eo medicamento sanus factus fuerit; & annis aliquot post inciderit in eundem mor-

bum; nec ab eo, quicum pepigerat, impetret, ut item eo liceat uti, quid faciendum sit? Quum sit is inhumanus, qui non concedat uti, nec ei quidquam fiat injuriæ, vitæ & salutis consulendum est.

93. Quid? si quis sapiens rogatus sit ab eo, qui eum heredem faciat, quum ei testamento festeriûm millies relinquatur, ut antequam hereditatem adeat, luce palam in foro saltet, idque se facturum promiserit, quòd aliter eum heredem scripturus ille non esset; faciat, quod promiserit; necne? Promisisse nollem, & id arbitror fuisse gravitatis: sed quoniam promisit, si saltare in foro turpe ducet, honestius mentietur, si ex hereditate nihil ceperit, quàm si ceperit: nisi fortè eam pecuniam in reipublicæ magnam aliquod tempus contulerit; ut vel saltare eum, quum patriæ consulturus sit, turpe non sit.

XXV. Ac ne illa quidem promissa servanda sunt, quæ non sunt iis ipsis utilia, quibus illa promiseris. Sol Phaethonti filio (ut redeamus ad fabulas) facturum se esse dixit, quidquid optasset: optavit, ut in currum patris tolleretur: sublatus est: atque infans, antequam constitit, ictu fulminis deflagavit. Quantò melius fuerat, in hoc, promissum patris non esse servatum? Quid, quod Theseus exe-

git promissum a Neptuno ? cui quum tres optationes Neptunus dedisset, optavit interitum Hippolyti, filii sui, quum is patri suspectus esset de noverca: quo optato impetrato, Theseus in maximis fuit luctibus.

95. Quid? Agamemnon quum devovisset Dianæ, quod in suo regno pulcherrimum natum esset illo anno, immolavit Iphigeniam, quâ nihil erat eo quidem anno natum pulchrius: promissum potius non faciendum, quàm tam tetrum facinus admittendum fuit. Ergo & promissa non facienda nonnumquam: neque semper deposita reddenda. Si gladium quis apud te sanâ mente deposuerit, repetat infaniens; reddere, peccatum sit; non reddere, officium. Quid? si is, qui apud te pecuniam deposuerit, bellum inferat patriæ, reddasne depositum? non, credo: facias enim contra rempublicam, quæ debet esse carissima. Sic multa, quæ honesta naturâ videntur esse, temporibus fiunt non honesta: facere promissa, stare conventis, reddere deposita, commutatâ utilitate, fiunt non honesta. Ac de iis quidem, quæ videntur esse utilitates contra justitiam simulatione prudentiæ, satis arbitror dictum.

96. Sed quoniam a quatuor fontibus honestatis primo libro officia duximus,

in eisdem versabimur, quam docebimus, ea, quæ videntur esse utilia, neque sunt, quàm sint virtutis inimica. Ac de prudentia quidem, quam vult imitari malitia; itemque de iustitia, quæ semper est utilis, disputatum est. Reliquæ sunt duæ partes honestatis, quarum altera in animi excellentis magnitudine & præstantiâ cernitur; altera in conformatione & moderatione continentiæ & temperantiæ.

XXVI. Utile videbatur Ulyssi, ut quidem poëtæ tragici prodiderunt: nam apud Homerum, optimum auctorem, talis de Ulysse nulla suspicio est: sed insimulant eum tragœdiæ, simulatione insanix militiam subterfugere voluisse: non honestum consilium: at utile (ut aliquis fortasse dixerit) regnare, & Ithacæ vivere otiose cum parentibus, cum uxore, cum filio. Ullum tu decus in quotidianis periculis & laboribus cum hac tranquillitate conferendum putas? Ego verò istam contemnendam & abjiciendam; quoniam, quæ honesta non sit, ne utilem quidem esse arbitror.

98. Quid enim auditurum putas fuisse Ulysses, si in illa simulatione perseverasset? qui quum maximas res gesserit in bello, tamen hæc audiat ab Ajace:

Cuju' ipse princeps jurisjurandi fuit,

Quod omnes scitis, solus neglexit fidem.

Furere assimilavit ; ne coiret , institit.

Quòd ni Palamedis perspicax prudentia

Istius percepset malitiosam audaciam ,

Fide sacratum jus perpetuò falleret.

Illi verò non modò cum hostibus , verum etiam cum fluctibus , id quod fecit , dimicare melius fuit , quàm deserere consentientem Græciam ad bellum barbaris inferendum.

99. Sed dimittamus & fabulas , & externa : ad rem factam , nostramque veniamus. M. Atilius Regulus , quum consul iterum in Africa ex insidiis captus esset , duce Xantippo Lacedæmonio , imperatore autem patre Annibalis Hamilcare , juratus missus est ad senatum , ut , nisi redditi essent Pœnis captivi nobiles quidam , rediret ipse Carthaginem : is quum Romam venisset , utilitatis speciem videbat ; sed eam , ut res declarat , falsam judicavit ; quæ erat talis : manere in patria , esse domi suæ cum uxore , cum liberis ; quam calamitatem accepisset in bello , communem fortunæ bellicæ judicantem ; tenere consularis dignitatis gradum : quis hæc neget esse utilia ? quem censes ? magnitudo animi & fortitudo negat.

XXVII. Num locupletiores quæris auctores ? harum epim est virtutum pro-

prium, nil extimescere, omnia humana despiciere; nihil, quod homini accidere possit, intolerandum putare: itaque quid fecit? In senatum venit: mandata exposuit: sententiam ne diceret, recusavit: quamdiu jurejurando hostium teneretur, non esse se senatorem. Atque illud etiam (ô stultum hominem, dixerit quispiam, & repugnantem utilitati suæ!) reddi captivos, negavit esse utile: illos enim adulescentes esse, & bonos duces, se jam confectum senectute: cujus quum valuisset auctoritas, captivi retenti sunt: ipse Carthaginem rediit; neque eum caritas patriæ retinuit, nec suorum. Neque verò tum ignorabat, se ad crudelissimum hostem, & ad exquisita supplicia proficisci; sed jusjurandum conservandum putabat. Itaque tum, quum vigilando necabatur, erat in meliore causa, quàm si domi senex captivus, perjurus consularis remansisset. At stultè, qui non modò non censuerit captivos remittendos, verùm etiam dissuaserit. Quomodo stultè? etiamne si reipublicæ conducebat? potest autem, quod inutile reipublicæ sit, id cuiquam civi utile esse?

XXVIII. Pervertunt homines ea, quæ sunt fundamenta naturæ, quum utilitatem ab honestate sejungunt: omnes enim expetimus utilitatem, ad eamque rapi-

LIBER TERTIUS. 307

mur, nec facere aliter ullo modo possumus: nam quis est, qui utilia fugiat? aut quis potius, qui ea non studiosissime persequatur? Sed quia nusquam possumus, nisi in laude, decore, honestate utilia reperire, propterea illa prima & summa habemus: utilitatis nomen non tam splendidum, quàm necessarium ducimus.

102 Quid est igitur, dixerit quis, in jurejurando? num iratum timemus Jovem? At hoc quidem commune est omnium philosophorum, non eorum modò, qui deum nihil habere ipsum negotii dicunt, & nihil exhibere alteri, sed eorum etiam, qui deum semper agere aliquid, & moliri volunt, numquam nec irasci deum, nec nocere. Quid autem iratus Jupiter plus nocere potuisset, quàm nocuit sibi ipse Regulus? Nulla igitur vis fuit religionis, quæ tantam utilitatem præverteret. An ne turpiter faceret? Primum, minima de malis. Num igitur tantum mali turpitudine ista habebat, quantum ille cruciatus? Deinde illud etiam apud Accium,

Fregisti fidem. Neque dedi, neque do infideli cuiquam:

quamquam ab impio rege dicitur, luculentè tamen dicitur.

103. Addunt etiam, quemadmodum nos dicamus, videri quædam utilia, quæ non sint; sic se dicere, videri quædam honesta, quæ non sint: ut hoc ipsum videtur honestum, conservandi jurisjurandi causâ ad cruciatum revertisse; sed fit non honestum, quia, quod per vim hostium esset actum, ratum esse non debuit. Addunt etiam, quidquid valde utile sit, id fieri honestum, etiam si antea non videretur. Hæc ferè contra Regulum. Sed prima videamus.

XXIX. Non fuit Jupiter metuendus, ne iratus noceret; qui neque irasci solet, neque nocere. Hæc quidem ratio non magis contra Regulum, quàm contra omne jusjurandum valet. Sed in jurejurando, non qui metus, sed quæ vis sit, debet intelligi: est enim jusjurandum, affirmatio religiosa: quod autem affirmatè, quasi deo teste, promiseris; id tenendum est: jam enim non ad iram deorum, quæ nulla est; sed ad justitiam, & ad fidem pertinet. Nam præclare Ennius:

O fides alma, apta pinnis, & jusjurandum Jovis!

Qui igitur jusjurandum violat, is fidem violat, quam in Capitolio vicinam Jovis Optimi Maximi (ut in Catonis oratione est) majores nostri esse voluerunt.

105. At enim ne iratus quidem Jupiter plus Regulo nocuisset, quam sibi nocuit ipse Regulus. Certè, si nihil malum esset, nisi dolere. Id autem non modò summum malum, sed ne malum quidem esse, maximâ auctoritate philosophi affirmant; quorum quidem testem non mediocrem, sed haud scio an gravissimum, Regulum, nolite, quæso, vituperare: quem enim locupletiores quærimus, quam principem populi Romani, qui retinendi officii causâ cruciatum subierit voluntarium? Nam quod aiunt, minima de malis, id est, ut turpiter potius, quam calamitosè: an est ullum majus malum turpitudine? quæ si in deformitate corporis habet aliquid offensionis, quanta illa depravatio & fœditas turpificati animi debet videri?

106. Itaque, nervosius qui ista differunt, solum audent malum dicere id, quod turpe sit; qui autem remissiùs, hi tamen non dubitant summum malum dicere. Nam illud quidem,

Neque dedi, neque do fidem infideli cuiquam:

idcirco rectè a poëta, quia, quum tractaretur Atreus, personæ serviendum fuit. Sed si hoc sibi sumunt, nullam esse fidem, quæ infideli data sit; videant, ne quærat latebra perjurio.

107. Est autem jus etiam bellicum, fi-

desque jurisjurandi sæpe cum hoste servanda. Quod enim ita juratum est, ut mens conciperet fieri oportere, id servandum est: quod aliter; id si non feceris, nullum est perjurium: ut, si prædonibus pactum pro capite pretium non attuleris, nulla fraus est, ne si juratus quidem id non feceris: nam pirata non est perduellium numero definitus, sed communis hostis omnium: cum hoc nec fides debet, nec jusjurandum esse commune.

108. Non enim falsum jurare, perjurare est; sed, quod ex animi tui sententia juraris, sicut verbis concipitur more nostro, id non facere, perjurium est. Scitè enim Euripides:

Juravi linguâ, mentem injuratam gero.

Regulus verò non debuit conditiones pactionesque bellicas & hostiles perturbare perjurio: cum justo enim & legitimo hoste res gerebatur; adversus quem & totum jus fetiale, & multa sunt jura communia: quod ni ita esset, numquam claros viros senatus vinctos hostibus dedidisset.

XXX. At verò T. Veturius & Sp. Postumius, quum iterum consules essent, quia, quum malè pugnatum apud Caudium esset, legionibus nostris sub jugum missis, pacem cum Samnitibus fecerant, dediti sunt his; injussu enim populi senatûsque

LIBER TERTIUS. 311

fecerant. Eodemque tempore Tib. Numicius, Q. Mælius, qui tum tribuni plebis erant, quòd eorum auctoritate pax erat facta, dediti sunt, ut pax Samnitium repudiaretur. Atque hujus deditionis ipse Postumius, qui dedebatur, suator & auctor fuit: quod idem multis annis post C. Mancinus; qui, ut Numantinis, quibuscum sine senatûs auctoritate fœdus fecerat, dederetur, rogationem suasit eam, quam L. Furius, & Sex. Atilius ex senatusconsulto ferebant: quâ acceptâ, est hostibus deditus. Honestiùs hic, quàm Q. Pompeius, quo, quum in eadem causa esset, deprecante, accepta lex non est. Hic ea, quæ videbatur utilitas, plus valuit, quàm honestas: apud superiores, utilitatis species falsa, ab honestatis auctoritatè superata est.

110. At non debuit ratum esse, quod erat actum per vim. Quasi verò forti viro vis possit adhiberi. Cur igitur ad senatum proficiscebatur, quum præsertim de captivis dissuasurus esset? Quod maximum in eo est, id reprehenditis: non enim suo iudicio stetit, sed suscepit causam, ut esset iudicium senatûs; cui nisi ipse auctor fuisset, captivi profectò Pœnis redditi essent: ita incolumis in patria Regulus restitisset: quod quia patriæ non utile putavit, idcirco sibi honestum & sentire illa,

& pati credidit. Nam quod aiunt, quod valdè utile sit, id fieri honestum; immo verò esse, non fieri: est enim nihil utile, quod idem non honestum sit; nec quia utile, honestum, sed quia honestum, utile.

XXXI. Quare ex multis mirabilibus exemplis, haud facillè quis dixerit hoc exemplo aut laudabilius, aut præstantius. Sed ex tota hac laude Reguli, unum illud est admiratione dignum, quòd captivos retinendos censuerit: nam quòd rediit, nobis nunc mirabile videtur; illis quidem temporibus aliter facere non potuit: itaque ista laus non est hominis, sed temporum: nullum enim vinculum ad adstringendam fidem jurejurando majores arctius esse voluerunt: id indicant leges in XII tabulis, indicant sacratæ, indicant fœdera, quibus etiam cum hoste devincitur fides: indicant notiones animadversionesque censorum; qui nulla de re diligentius, quàm de jurejurando, judicabant.

112. L. Manlio, A. filio, quum dictator fuisset, M. Pomponius, tribunus plebis, diem dixit, quòd is paucos sibi dies ad dictaturam gerendam addidisset: criminabatur etiam, quòd Titum filium, qui postea est Torquatus appellatus, ab hominibus relegasset, & ruri habitare jussisset: quod quum audivisset adolescens filius, negotium exhiberi patri; accurrisse Romam,

nam, & cum prima luce Pomponii domum venisse dicitur: cui quum esset nuntiatum; quòd illum iratum allaturum ad se aliquid contra patrem arbitraretur, surrexit e lectulo, remotisque arbitris, ad se adolescentem jussit venire. At ille, ut ingressus est, confestim gladium destrinxit, juravitque, se illum statim interfectorum, nisi jusjurandum sibi dedisset, se patrem missum esse facturum: juravit, hoc coactus terrore Pomponius: rem ad populum detulit: docuit, cur sibi causâ desistere necesse esset: Manlium missum fecit: tantum temporibus illis jusjurandum valebat. Atque hic T. Manlius is est, qui ad Anienem Galli, quem ab eo provocatus occiderat, torque detracto, cognomen invenit: cujus tertio consulatu Latini ad Vesperim fusi, & fugati: magnus vir in primis, & qui perindulgens in patrem, idem acerbè severus in filium.

XXXII. Sed, ut laudandus Regulus in conservando jurejurando, sic decem illi, quos post Cannensem pugnam juratos ad senatum misit Annibal, se in castra redituros ea, quorum potiti erant Poëni; nisi de redimendis captivis impetravissent, si non redierunt, vituperandi. De quibus non omnes uno modo: nam Polybius, bonus auctor in primis, scribit, ex decem nobilissimis, qui tum erant missi, novem

revertisse , a senatu re non impetratâ ; unum ex decem , qui paulò pòst , quàm egressus erat e castris , redisset , quasi aliquid esset oblitus , Romæ remansisse. Reditu enim in castra , liberatum se esse jurejurando interpretabatur : non rectè : fraus enim adstringit , non dissolvit perjurium. Fuit igitur stulta calliditas , perversè imitata prudentiam. Itaque decrevit senatus , ut ille veterator & callidus , vinctus ad Annibalem duceretur.

114. Sed illud maximum : octo hominum millia tenebat Annibal , non quos in acie cepisset , aut qui periculo mortis dif fugissent , sed qui relictî in castris fuissent a Paulo , & Varrone consulibus : eos senatus non censuit redimendos , quum id parvâ pecuniâ fieri posset ; ut esset insitum militibus nostris aut vincere , aut emori. Quâ quidem re auditâ , fractum animum Annibalis scripsit idem , quòd senatus populusque Romanus rebus afflictis tam excelso animo fuisset. Sic honestatis compa ratione , ea , quæ videntur utilia , vincuntur. Acilius autem , qui Græcè scripsit historiam , plures ait fuisse , qui in castra revertissent , eadem fraude , ut jurejurando liberarentur , eosque a censoribus , omnibus ignominiis notatos.

115. Sit jam hujus loci finis. Perspicuum est enim , quæ timido animo , humili , de-

misso, fractoque fiant (quale fuisset Reguli factum, si aut de captivis, quod ipsi opus esse videretur, non quod reipublicæ, censuisset, aut domi remanere voluisset) non esse utilia, quia sint flagitiosa, foeda, turpia.

XXXIII. Restat quarta pars, quæ decore, moderatione, modestiâ, continentiâ, temperantiâ continetur. Potest igitur quidquam esse utile, quod sit huic talium virtutum choro contrarium? Atqui ab Aristippo Cyrenaici, atque Annicerii philosophi nominati, omne bonum in voluptate posuerunt; virtutemque censuerunt ob eam rem esse laudandam, quòd efficiens esset voluptatis: quibus obsoletis floret Epicurus, ejusdem ferè adjutor auctorque sententiæ. Cum his viris equisque, ut dicitur, si honestatem tueri ac retinere sententia est, decertandum est.

117. Nam si non modò utilitas, sed vita omnis beata, corporis firmâ constitutione, ejusque constitutionis spe exploratâ, ut a Metrodoro scriptum est, continetur; certè hæc utilitas, & quidem summa (sic enim censent) cum honestate pugnabit. Nam ubi primùm prudentiæ locus dabitur? an, ut conquirat undique suavitates? quàm miser virtutis famulatus, servientis voluptati! Quod autem munus prudentiæ? an legere intelligenter voluptates?

fac nihil isto esse jucundius: quid cogitari potest turpius? Jam, qui dolorem summum malum dicat, apud eum quem habet locum fortitudo, quæ est dolorum laborumque contemptio? quamvis enim multis in locis dicat Epicurus (sicut hîc dicit) satis fortiter de dolore; tamen non id spectandum est, quid dicat, sed quid consentaneum sit ei dicere, qui bona, voluptate terminaverit; mala, dolore: ut, si illum audiam de continentia & temperantia; dicit ille quidem multa multis locis; sed aqua hæret, ut aiunt. Nam qui potest temperantiam laudare is, qui ponat summum bonum in voluptate? est enim temperantia libidinum inimica; libidines autem, consecratrices voluptatis.

118. Atque in his tamen tribus generibus quoquo modo possunt, non incallidè tergiversantur. Prudentiam introducunt, scientiam suppeditantem voluptates, depellentem dolores: fortitudinem quoque aliquo modo expediunt, quum tradunt rationem negligendæ mortis, perpetiendique doloris: etiam temperantiam inducunt, non facillimè illi quidem, sed tamen quoquo modo possunt: dicunt enim, voluptatis magnitudinem doloris detractatione finiri. Justitia vacillat, vel jacet potius, omnesque eæ virtutes, quæ in communitate cernuntur, & in societ-

tate generis humani: neque enim bonitas, nec liberalitas, nec comitas esse potest, non plus quàm amicitia, si hæc non per se expetantur, sed ad voluptatem utilitatemve referantur.

XXXIV. Conferamus igitur in pauca: nam ut utilitatem nullam esse docuimus, quæ honestati esset contraria; sic omnem voluptatem dicimus honestati esse contrariam: quò magis reprehendendos Calliphonem, & Dinomachum judico, qui se dirempturos controversiam putaverunt, si cum honestate voluptatem, tamquam cum homine pecudem, copulavissent. Non recipit istam conjunctionem honestas, aspernatur, repellit: nec verò finis bonorum & malorum, qui simplex esse debet, ex dissimilibus rebus misceri & temperari potest. Sed de hoc (magna enim res est) alio loco pluribus: nunc ad propositum.

120. Quemadmodum igitur, si quando ea quæ videretur utilitas, honestati repugnat, dijudicanda res sit, satis est suprà disputatum: sin autem speciem utilitatis etiam voluptas habere dicetur, nulla potest esse ei cum honestate conjunctio: nam, ut tribuamus aliquid voluptati, condimenti fortasse nonnihil, utilitatis certè nihil habebit.

121. Habes a patre munus, Marce fili, meà quidem sententià magnum; sed per-

318 *DE OFFICIIS, LIB. III.*

inde erit , ut acceperis : quamquam tibi hi tres libri , inter Cratippi commentarios , tamquam hospites , erunt recipiendi. Sed , ut , si ipse venissem Athenas (quod quidem esset factum , nisi me e medio cursu clarâ voce patria revocasset) aliquando me quoque audires ; sic , quoniam his voluminibus ad te profecta vox mea est , tribues his temporis quantum poteris ; poteris autem , quantum voles : quum verò intellexero , te hoc scientiæ genere gaudere , tum & præsens tecum propediem (ut spero) & , dum aberis , absens loquar. Vale igitur , mi Cicero , tibiue persuade , esse te quidem mihi carissimum ; sed multò fore cariorem , si talibus monumentis , præceptisque lætabere.





CATO MAJOR,

S E U

DE SENECTUTE.

D I A L O G U S.

AD TITUM POMPONIUM ATTICUM.

I. **O** *TITE, si quid ego adiuro, curamve levasso,
Quæ nunc te coquit, & versat in pectore fixa,
Ecquid erit pretii?*

*Licet enim versibus iisdem mihi affari te;
Attice, quibus affatur Flamininum,*

Ille vir, haud magna cum re, sed plen' fidei.

*Quamquam certò scio, non, ut Flami-
ninum,*

Sollicitari te, Tite, sic noctesque diesque.

*Novi enim moderationem animi tui, &
æquitatem; teque non cognomen solum*

O iv

Athenis deportasse, sed humanitatem & prudentiam intelligo: & tamen suspicor, iisdem rebus te, quibus me ipsum interdum gravius commoveri; quarum consolatio & major est, & in aliud tempus differenda. Nunc autem mihi visum est de Senectute aliquid ad te scribere.

2. Hoc enim onere, quod mihi tecum commune est, aut jam urgentis, aut certe adventantis senectutis, & te, & me ipsum levare volo: etsi te quidem id modicè ac sapienter (sicut omnia) & ferre, & laturum esse certò scio. Sed mihi, quum de senectute aliquid vellem scribere, tu occurrebas dignus eo munere, quo uterque nostrum communiter uteretur. Mihi quidem ita jucunda hujus libri confectio fuit, ut non modò omnes absterferit senectutis molestias, sed effecerit molem etiam & jucundam senectutem.

3. Numquam igitur satis laudari dignè poterit philosophia, cui qui pareat, omne tempus ætatis sine molestia possit degere. Sed de ceteris & diximus multa, & sæpe dicemus: hunc librum de senectute ad te misimus. Omnem autem sermonem tribuimus, non Tithono, ut Aristo Chius, ne parum esset auctoritatis in fabula; sed M. Catoni seni, quò majorem auctoritatem haberet oratio: apud quem, Lælium & Scipionem facimus admirantes,

quòd is tam facillè senectutem ferat, his-
que eum respondentem: qui si eruditius
videbitur disputare, quàm consuevit ipse
in suis libris, attribuito Græcis litteris,
quarum constat eum perstudiosum fuisse
in senectute. Sed quid opus est plura?
jam enim ipsius Catonis sermo explicabit
nostram omnem de senectute sententiam.

II. SCIPIO. Sæpenumero admirari soleo
cum hoc C. Lælio, tum ceterarum rerum
tuam excellentem, M. Cato, perfectam-
que sapientiam, tum vel maximè, quòd
numquam senectutem tibi gravem esse
senferim; quæ plerisque senibus sic odiosa
est, ut onus se Ætnâ gravius dicant sus-
tinere. CATO. Rem haud sanè difficilem,
Scipio & Læli, admirari videmini: quibus
enim nihil opis est in ipsis ad bene bea-
tèque vivendum, iis omnis gravis est æ-
tas; qui autem omnia bona a se ipsi pe-
tunt, iis nihil potest malum videri, quod
naturæ necessitas afferat: quo in genere
in primis est senectus; quam ut adipiscan-
tur, omnes optant, eandem accusant adep-
ti: tanta inest stultitiæ inconstantia atque
perversitas. Obrepere aiunt eam citiùs
quàm putassent. Primùm, quis coëgit eos
falsum putare? quî enim citiùs adolescen-
tiæ senectus, quàm pueritiæ adolescentia
obrepit? deinde, quî minùs gravis esset iis
senectus, si octingentesimum annum age-

rent, quàm octogesimum? præterita enim ætas, quamvis longa, quum effluxisset, nullâ consolatione permulcere posset stultam senectutem.

5. Quocirca si sapientiam meam admirari soletis (quæ utinam digna esset opinione vestrà, nostroque cognomine !) in hoc sumus sapientes, quòd naturam optimam ducem, tamquam deum, sequimur, eique paremus; a qua non verisimile est, quum ceteræ partes ætatis bene descriptæ sint, extremum actum, tamquam ab inerti poëta, esse neglectum. Sed tamen necesse fuit esse aliquid extremum, &, tamquam in arborum baccis terræque frugibus, maturitate tempestivâ quasi vietum & caducum; quod ferendum est molliter sapienti: quid enim est aliud, gigantum modo bellare cum diis, nisi naturæ repugnare?

6. *LÆLIUS.* Atqui, Cato, gratissimum nobis, ut etiam pro Scipione pollicear, feceris, si, quoniam speramus (volumus quidem certè) senes fieri, antè multò a te didicerimus, quibus facillimè rationibus ingravescentem ætatem ferre possimus. *CATO.* Faciam verò, Læli; præsertim si utrique vestrûm gratum, ut dicis, futurum est. *SCIPIO.* Volumus sanè, nisi molestum est, Cato, tamquam aliquam viam longam confeceris, quam nobis quoque ingrediendum sit, istuc, quò pervenisti, videre, quale sit.

III. CATO. Faciam, ut potero, Læli: sæpe enim interfui querelis meorum æqualium (pares autem cum paribus, veteri proverbio, facillimè congregantur) quæ C. Salinator, quæ Sp. Albinus, homines consulares, nostri ferè æquales, deplorare solebant; tum quòd voluptatibus carerent, sine quibus vitam nullam putarent; tum quòd spernerentur ab iis, a quibus essent coli soliti: qui mihi non id videbantur accusare, quòd esset accusandum. Nam si id culpâ senectutis accideret, eadem mihi usu evenirent, reliquisque omnibus, majoribus natu; quorum ego multorum cognovi senectutem sine querela, qui se & libidinum vinculis laxatos esse non molestè ferrent, nec a suis despicerentur. Sed omnium istiusmodi querelarum in moribus est culpa, non in ætate: moderati enim, & nec difficiles, nec inhumani senes, tolerabilem agunt senectutem; importunitas autem & inhumanitas omni ætati molesta est.

8. LÆLIUS. Est, ut dicis, Cato: sed fortasse dixerit quispiam, tibi propter opes, & copias, & dignitatem tuam, tolerabiliorem senectutem videri; id autem non posse multis contingere. CATO. Est istuc quidem, Læli, aliquid; sed nequaquam in isto sunt omnia: ut Themistocles fertur Seriphio cuidam in jurgio res-

pondisse , quum ille dixisset , non eum suâ , sed patriæ gloriâ splendorem assecutum : Nec hercule , inquit , si ego Seriphus essem , ignobilis ; nec tu , si Atheniensis esses , clarus umquam fuisses : quod eodem modo de senectute potest dici : neque enim in summa inopia non levis esse senectus potest , sapienti quidem ; nec insipienti etiam in summa copia non gravis.

9. Aptissima omnino sunt , Scipio & Læli , arma senectutis , artes , exercitationesque virtutum , quæ in omni ætate cultæ , quum diu multumque vixeris , mirificos efferunt fructus , non solum quia numquam deserunt , ne in extremo quidem tempore ætatis (quamquam id maximum est) verum etiam quia conscientia bene actæ vitæ , multorumque benefactorum recordatio , jucundissima est.

IV. Ego Q. Maximum , eum , qui Tarentum recepit , adolescens ita dilexi senem , ut æqualem : erat enim in illo viro comitate condita gravitas ; nec senectus mores mutaverat : quamquam eum colere cœpi non admodum grandem natu , sed tamen jam ætate provectum : anno enim post , consul primum fuerat , quàm ego natus sum ; cumque eo quartum consule adolescentulus miles profectus sum ad Capuam , quintoque anno post ad Tarentum : quæstor deinde quadriennio post

factus sum, quem magistratum gessi consulibus Tuditano, & Cethego, quum quidem ille admodum senex, suasor legis Cinciæ de donis & muneribus fuit. Hic & bella gerebat, ut adolescens, quum planè grandis esset; & Annibalem juveniliter exultantem patientiâ suâ mollebat: de quo præclarè familiaris noster Ennius:

Unus qui nobis cunctando restituit rem;

Non ponebat enim rumores ante salutem:

Ergo magisque magisque viri nunc gloria claret.

11. Tarentum verò quâ vigilantia, quo consilio recepit? quum quidem, me audiente, Salinatori, qui, amisso oppido, fugerat in arcem, glorianti atque ita dicenti: Meâ operâ, Q. Fabi, Tarentum recepisti: *Certè*, inquit ridens: *nam nisi tu amisisses, numquam recepissem.* Nec verò in armis præstantior, quàm in toga: qui consul iterum, Sp. Carvilio collegâ quiescente, C. Carvilio & C. Flaminio tribunis plebis, quoad potuit, restitit, agrum Picentem & Gallicum viritim contra senatûs auctoritatem dividentibus: augurque quum esset, dicere ausus est, optimis auspiciis ea geri, quæ pro reipublicæ salute gererentur; quæ contra rempublicam fierent, contra auspicia fieri.

12. Multa in eo viro præclara cogno-

vi: sed nihil est admirabilius, quàm quomodo ille mortem filii tulit, clari viri & consularis: est in manibus laudatio; quam quum legimus, quem philosophum non contemnimus? Nec verò ille in luce modò, atque in oculis civium magnus; sed intus, domique præstantior: qui sermo? quæ præcepta? quanta notitia antiquitatis? quæ scientia juris augurii? multæ etiam, ut in homine Romano, litteræ: omnia memoriâ tenebat, non domestica solùm, sed etiam externa bella: cujus sermone ita tum cupidè fruebar, quasi jam divinarem, id, quod evenit, illo extincto, fore unde discerem neminem.

V. Quorsum igitur hæc tam multa de Maximo? quia profectò videtis, nefas esse dictu, miseram fuisse talem senectutem. Nec tamen omnes possunt esse Scipiones, aut Maximi, ut urbium expugnationes, ut pedestres navalesve pugnas, ut bella a se gesta, ut triumphos recordentur: est etiam quietè, & purè, & eleganter actæ ætatis placida ac lenis senectus, qualem accepimus Platonis, qui uno & octogesimo anno scribens mortuus est: qualem Isocratis, qui eum librum, qui Panathenæicus inscribitur, quarto & nonagesimo anno scripsisse dicitur, vixitque quinquennium postea: cujus magister Leontinus Gorgias, centum & septem comple-

vit annos ; neque umquam in suo studio atque opere cessavit : qui, quum ex eo quæreretur, cur tam diu vellet esse in vita: *Nihil habeo*, inquit, *quod accusem senectutem*. Præclarum responsum, & docto homine dignum.

14. Sua enim vitia insipientes, & suam culpam in senectutem conferunt ; quod non faciebat is, cujus modò mentionem feci, Ennius,

*Sicut fortis equus, spatio qui sæpe supremo
Vicit Olympia, nunc senio confectu' quiescit.*

Equi fortis & victoris senectuti comparat suam; quem quidem probè meminisse potestis. Anno enim undevicesimo post ejus mortem, hi consules, T. Flamininus, & M'. Acilius facti sunt: ille autem Cæpio ne, & Philippo iterum consule, mortuus est: quum ego quidem v. & lx. annos natus, legem Voconiam voce magnâ, & bonis lateribus suasissem. Annos lxx. natus (tot enim vixit Ennius) ita ferebat duo, quæ maxima putantur onera, paupertatem & senectutem, ut eis pene delectari videretur.

15. Etenim, quum contemplor animo, reperio quatuor causas, cur senectus misera videatur: unam, quòd avocet a rebus gerendis; alteram, quòd corpus faciat infirmius; tertiam, quòd privet om-

nibus ferè voluptatibus ; quartam , quòd haud procul absit a morte. Earum , si placeat , causarum quanta , quàmque sit iusta unaquæque , videamus.

VI. A rebus gerendis senectus abstrahit ? Quibus ? an iis , quæ in juventutè geruntur & viribus ? Nullæne igitur res sunt seniles , quæ vel infirmis corporibus , animo tamen administrentur ? Nihil ergo agebat Q. Maximus ? nihil L. Paulus , pater tuus , Scipio , focer optimi viri , filii mei ? ceteri senes , Fabricii , Curii , Coruncanii , quum rempublicam consilio & auctoritate defendebant , nihil agebant ?

16. Ad App. Claudii senectutem accedebat etiam , ut cæcus esset : tamen is , quum sententia senatûs inclinaret ad pacem , & fœdus faciendum cum Pyrrho , non dubitavit dicere illa , quæ versibus persecutus est Ennius :

*Quò vobis mentes , recta quæ stare solebant
Antehac , dementes sese flexere viai ?*

ceteraque gravissimè ; notum enim vobis carmen est ; & tamen ipsius Appii exstat oratio. Atque hanc ille egit septem & decem annos post alterum consulatum , quum inter duos consulatus anni decem interfluxissent , censorque ante consulatum superiorem fuisset. Ex quo intelligitur , Pyrrhi bello grandem sanè fuisse ; & tamen sic a patribus accepimus.

17. Nihil igitur afferunt, qui in re gerenda versari senectutem negant, similesque sunt, ut, si qui gubernatorem in navigando agere nihil dicant, quum alii malos scandant, alii per foros cursent, alii sentinam exhauriant; ille autem clavum tenens fideat in puppi quietus. Non faciat ea, quæ juvenes: at verò multò majora & meliora facit. Non viribus, aut velocitatibus, aut celeritate corporum res magnæ geruntur, sed consilio, & auctoritate, & sententiâ, quibus non modò non orbari, sed etiam augeri senectus solet.

18. Nisi fortè ego vobis, qui & miles, & tribunus, & legatus, & consul versatus sum in vario genere bellorum, cessare nunc videor, quum bella non gero. At senatui, quæ sunt gerenda, præscribo, & quomodo: Carthagini malè jam diu cogitanti, bellum mulò antè denuntio, de qua vereri non antè desinam, quàm illam excisam esse cognovero.

19. Quam palmam utinam dii immortales tibi, Scipio, reservent, ut avi reliquias persequare! cujus a morte quintus hic & tricesimus est annus: sed memoriam illius viri excipient omnes anni consequentes. Anno ante me censorem mortuus est, decem annis post meum consulatum, quum consul iterum, me consule,

creatus esset. Num igitur, si ad centesimum annum vixisset, senectutis eum suæ poeniteret? nec enim excursione, nec saltu, nec eminus hastis, aut cominus gladiis uteretur; sed ratione & consilio, & sententiâ: quæ nisi essent in senibus, non summum consilium maiores nostri appellassent *senatum*.

20. Apud Lacedæmonios quidem ii, qui amplissimum magistratum gerunt, ut sunt, sic etiam nominantur senes. Quod si legere, aut audire voveris externa, maximas respublicas ab adolescentibus labefactas, a senibus sustentatas & restitutas reperietis.

Cedo, qui vestram rempublicam tantam amisistis tam citò?

Sic enim percunctanti, ut est in Nævii poëtæ ludo, respondentur & alia, & hæc in primis.

Proveniebant oratores novi, stulti, adolescentuli.

Temeritas est videlicet florentis ætatis; prudentia, senescentis.

VII. At memoria minuitur: credo; nisi eam exerceas, aut si sis naturâ tardior. Themistocles omnium civium nomina perceperat: num igitur censetis eum, quum ætate processisset, qui Aristides esset, Lysimachum salutare solitum? Equi-

dem non modò eos novi, qui sunt; sed eorum patres etiam, & avos: nec sepulcra legens vereor (quod aiunt) ne memoriam perdam: his enim ipsis legendis redeo in memoriam mortuorum: nec verò quemquam senum audivi oblitum, quo loco thesaurum obruisset: omnia, quæ curant, meminerunt; vadimonia constituta; qui sibi, quibus ipsi debeant.

22. Quid jurisconsulti? quid pontifices? quid augures? quid philosophi senes? quàm multa meminerunt? manent ingenia senibus, modò permaneat studium & industria; nec ea solùm in claris & honoratis viris, sed in vita etiam privata & quieta. Sophocles ad summam senectutem tragœdias fecit: quod propter studium, quum rem familiarem negligere videretur, a filiis in iudicium vocatus est; ut, quemadmodum nostro more malè rem gerentibus patribus bonis interdici solet; sic illum, quasi desipientem, a re familiari removerent iudices. Tum senex dicitur eam fabulam, quam in manibus habebat, & proximè scripserat, *Œdipum Coloneum* recitasse iudicibus, quæsisseque, num illud carmen desipientis videretur: quo recitato, sententiis iudicum est liberatus.

23. Num igitur hunc, num *Homerum*, num *Hesiodum*, num *Simonidem*, num

Stesichorum, num, quos antè dixi, Iſocratem, Gorgiam, num philoſophorum principes, Pythagoram, Democritum, num Platonem, num Xenocratem, num poſtea Zenonem, Cleanthem, aut eum, quem vos etiam Romæ vidiftis, Diogenem Stoicum, coëgit in ſuis ſtudiis obmutefcere ſenectus? an non in omnibus iis ſtudiorum agitarior vitæ æqualis fuit?

24. Age, ut iſta divina ſtudia omittamus, poſſum nominare ex agro Sabino ruſticos Romanos, vicinos & familiares meos, quibus abſentibus, numquam ferè ulla in agro majora opera fiunt, non ferendis, non percipiendis, non condenſis fructibus: quamquam in aliis minùs hoc mirum: nemo enim eſt tam ſenex, qui ſe annum non putet poſſe vivere: ſed iidem elaborant in eis, quæ ſciunt nihil omnino ad ſe pertinere.

Serit arbores, quæ alteri ſeculo proſint,

ut ait Statius noſter in Synephebis. Nec verò dubitet agricola, quamvis ſenex, quærenti, cui ſerat, reſpondere: Diis immortalibus, qui me non accipere modò hæc a maioribus voluerunt, ſed etiam poſteris prodere.

VIII. Meliùs Cæcilius de ſene alteri ſeculo proſpiciente, quàm illud:

Ædepol, Senectus, ſi nihil quidquam aliud vitæ

*Apportes tecum , quum advenis ; unum id sat est ,
Quòd diu vivendo , multa , quæ non vult , videt.*

Et multa fortasse , quæ vult : atque in ea quidem , quæ non vult , sæpe etiam adolescentia incurrit. Illud verò idem Cæcilius vitiosius :

*Tum equidem in senectâ hoc deputo miserrimum ,
Sentire eâ atate esse se odiosum alteri.*

26. Jucundum potiùs , quàm odiosum : ut enim adolescentibus , bonâ indole præditis , sapientes senes delectantur , leviorque fit eorum senectus , qui a juventute coluntur & diliguntur ; sic adolescentes senum præceptis gaudent , quibus ad virtutum studia ducuntur : nec minùs intelligo me vobis , quàm vos mihi esse jucundos. Sed videtis , ut senectus non modò languida atque iners non sit , verùm etiam sit operosa & semper agens aliquid , & moliens ; tale scilicet , quale cujusque studium in superiore vita fuit. Quid , quòd etiam addiscunt aliquid ? ut Solonem versibus gloriantem videmus ; qui se quotidie aliquid addiscentem , senem fieri dicit ; ut ego feci , qui Græcas litteras senex didici : quas quidem sic avidè arripui , quasi diuturnam sitim explere cupiens , ut ea ipsa mihi nota essent , quibus me nunc exemplis uti videtis :

quod quum fecisse Socratem in fidibus audirem, vellem equidem & illud (dicebant enim fidibus antiqui) sed in litteris certè elaboravi.

IX. Nec nunc quidem vires desidero adolescentis (is enim erat locus alter de vitiis senectutis) non plus, quàm adolescens tauri, aut elephantì desiderabam: quod est, eo decet uti; & quidquid agas, agere pro viribus. Quæ enim vox potest esse contemptior, quàm Milonis Crotoniatæ? qui, quum jam senex esset, athletasque se in curriculo exercentes videret; adspexisse lacertos suos dicitur, illacrymansque dixisse, *At hi quidem jam mortui sunt.* Non verò tam isti; quàm tu ipse, nugator: neque enim ex te umquam es nobilitatus, sed ex lateribus & lacertis tuis. Nihil Sex. Ælius tale, nihil multis annis antè T. Coruncanius, nihil modò P. Crassus; a quibus jura civibus præscribebantur: quorum usque ad extremum spiritum est provecta prudentia.

28. Orator, metuo, ne langue scat senectute: est enim munus ejus non ingenii solùm, sed laterum etiam, & virium. Omnino canorum illud in voce splendet etiam nescio quo pacto in senectute; quod equidem adhuc non amisi; & videtis annos: sed tamen est decorus sermo senis, quietus & remissus; facitque

persæpe ipsa sibi audientiam disertis senis compta & mitis oratio : quod si ipse exsequi nequeas , possis tamen Scipioni præcipere , & Lælio. Quid enim est jucundius senectute , stipatâ studiis juventutis ?

29. An ne eas quidem vires senectutis relinquemus , ut adolescentulos doceat , instituat , ad omne officii munus instruat ? quo quidem opere quid potest esse præclarius ? Mihi verò Cn. & P. Scipiones , & avi tui duo , L. Æmilius , & P. Africanus , comitatu nobilium juvenum fortunati videbantur : nec ulli bonarum artium magistri non beati putandi , quamvis consenuerint vires , atque defecerint : etsi ista ipsa defectio virium , adolescentiæ vitiis efficitur sæpius , quàm senectutis ; libidinosa etenim , & intemperans adolescentia effœtum corpus tradit senectuti.

30. Cyrus quidem apud Xenophontem eo sermone , quem moriens habuit , quum admodum senex esset , negat se umquam sensisse , senectutem suam imbecilliolem factam , quàm adolescentia fuisset. Ego L. Metellum memini puer (qui quum quadriennio post alterum consulatum pontifex maximus factus esset , viginti & duos annos ei sacerdotio præfuit) ita bonis esse viribus extremo tem-

pore ætatis , ut adolescentiam non requireret. Nihil necesse est mihi de me ipso dicere ; quamquam est id quidem senile , ætatique nostræ conceditur.

X. Videtisne , ut apud Homerum sæpissime Nestor de virtutibus suis prædicet ? tertiam enim jam ætatem hominum vivebat ; nec erat ei verendum , ne vera de se prædicans , nimis videretur aut insolens , aut loquax : etenim (ut ait Homerus) ex ejus lingua melle dulcior fluebat oratio ; quam ad suavitatem nullis egebat corporis viribus : & tamen dux ille Græciæ nusquam optat , ut Ajacis similes habeat decem , at ut Nestoris ; quod si acciderit , non dubitat , quin brevi Troja sit peritura.

32. Sed redeo ad me. Quartum annum ago & octogesimum : equidem posse vellem idem gloriari , quod Cyrus ; sed tamen hoc queo dicere , non me quidem iis esse viribus , quibus aut miles bello Punico , aut quæstor eodem bello , aut consul in Hispania fuerim , aut quadriennio post , quum tribunus militaris depugnavi apud Thermopylas , M'. Acilio Glabrione consule : sed tamen (ut vos videris) non planè me enervavit , nec afflixit senectus : non curia vires meas desiderat , non Rostra , non amici , non clientes , non hospites : nec enim umquam

quam sum assensus veteri illi laudatoque proverbio, quod monet, maturè fieri senem, si diu velis esse senex. Ego verò me minùs diu senem esse malletm, quàm esse senem antè, quàm essem. Itaque nemo adhuc convenire me voluit, cui fuerim occupatus.

33. At minùs habeo virium, quàm vestrùm utervis. Nec vos quidem T. Pontii centurionis vires habetis: num idcirco est ille præstantior? moderatio modò virium adsit, & tantum, quantum potest quisque, nitatur: næ ille non magno desiderio tenebitur virium. Olympiæ per stadium ingressus esse Milo dicitur, quum humeris sustineret bovem vivum. Utrùm igitur has corporis, an Pythagoræ tibi malis vires ingenii dari? Denique isto bono utare, dum adsit; quum absit, ne requiras: nisi fortè adolescentes pueritiam, paulùm ætate progressi adolescentiam debeant requirere. Cursus est certus ætatis, & una via naturæ, eaque simplex; suaque cuique parti ætatis tempestivitas est data; ut & infirmitas puerorum, & ferocitas juvenum, & gravitas jam constantis ætatis, & senectutis maturitas naturale quiddam habeat, quod suo tempore percipi debeat.

34. Arbitror te audire, Scipio, hospes tuus avitus Masinissa quæ faciat hodie;

Tomus X.

P

nonaginta annos natus : quum ingressus iter pedibus sit, in equum omnino non adscendere ; quum equo , ex equo non descendere : nullo imbre , nullo frigore adduci , ut capite operto sit : summam in eo esse corporis siccitatem : itaque exsequi omnia regis officia & munera. Potest igitur exercitatio , & temperantia etiam senectuti conservare aliquid pristini roboris.

XI. Non sunt in senectute vires ? ne postulantur quidem vires a senectute. Ergo & legibus & institutis vacat ætas nostra muneribus iis , quæ non possunt sine viribus sustineri : itaque non modò , quod non possumus , sed ne quantum possumus quidem , cogimur.

35. At ita multi sunt imbecilli fenes , ut nullum officii , aut omnino vitæ munus exsequi possint. At id quidem non proprium senectutis est vitium , sed commune valetudinis. Quàm fuit imbecillus P. Africani filius is , qui te adoptavit ? quàm tenui , aut nullâ potiùs valetudine ? quod ni ita fuisset , alterum ille exstitisset lumen civitatis : ad paternam enim magnitudinem animi doctrina uberior accesserat. Quid mirum igitur in senibus , si infirmi sunt aliquando , quum ne id quidem adolescentes effugere possint ? Resistendum , Læli & Scipio , senectuti est ,

ejusque vitia diligentia compensanda sunt. Pugnandum, tamquam contra morbum, sic contra senectutem.

36. Habenda ratio valetudinis: utendum exercitationibus modicis: tantum cibi & potionis adhibendum, ut reficiantur vires, non opprimantur. Nec verò corpori soli subveniendum est, sed menti atque animo multò magis: nam hæc quoque, nisi tamquam lumini oleum instilles, extinguuntur senectute. Et corpora quidem defatigatione & exercitatione ingravescent; animi autem exercitando levantur. Nam quos ait Cæcilius, *comicos stultos senes*; hos significat credulos, obliviosos, dissolutos: quæ vitia sunt non senectutis, sed inertis, ignavæ, somniculosæ senectutis: ut petulantia, ut libido, magis est adolescentium, quàm senum; nec tamen omnium adolescentium, sed non proborum; sic ista senilis stultitia (quæ deliratio appellari solet) senum levium est, non omnium.

37. Quatuor robustos filios, quinque filias, tantam domum, tantas clientelas Appius regebat & senex, & cæcus: intentum enim animum, tamquam arcum, habebat, nec languescens succumbebat senectuti: tenebat non modò auctoritatem, sed etiam imperium in suos: metuebant servi, verebantur liberi, carum

340 *DE SENECTUTE.*

omnes habebant : vigebat in illa domo patrius mos & disciplina.

38. Ita enim senectus honesta est, si se ipsa defendit, si jus suum retinet, si nemini emancipata est, si usque ad extremum spiritum dominatur in suos : ut enim adolescentem, in quo senile aliquid ; sic senem, in quo est adolescentis aliquid, probō : quod qui sequitur, corpore senex esse poterit, animo numquam erit. Septimus mihi Originum liber est in manibus : omnia antiquitatis monumenta colligo : causarum illustrium, quas cumque defendi, nunc quum maximè conficio orationes : jus augurum, pontificum, civile tracto : multum etiam Græcis litteris utor : Pythagoreorumque more exercendæ memoriæ gratiâ, quid quoque die dixerim, audierim, egerim, commemoro vesperi. Hæ sunt exercitationes ingenii, hæc curricula mentis : in his desudans atque elaborans, corporis vires non magno pere desidero : adsum amicis : venio in senatum frequens, ultroque afferō res multum & diu cogitatas ; easque tueor animi, non corporis viribus : quæ si exsequi nequirem, tamen me lectulus oblectaret meus, ea ipsa cogitantem, quæ jam agere non possem ; sed ut possim, facit acta vita. Semper enim in his studiis laboribusque viventi non intelligitur, quan-

do obrepat senectus. Ita sensim sine sensu ætas fenescit; nec subito frangitur, sed diuturnitate exstinguitur.

XII. Sequitur tertia vituperatio senectutis, quòd eam carere dicunt voluptatibus. O præclarum munus ætatis, si quidem id aufert nobis, quod est in adolescentia viciosissimum! Accipite enim, optimi adolescentes, veterem orationem Archytæ Tarentini, magni in primis, & præclari viri; quæ mihi tradita est, quum essem adolescens Tarenti cum Q. Maximo. Nullam capitaliorem pestem, quàm corporis voluptatem, hominibus dicebat a natura datam; cujus voluptatis avidæ libidines temerè & effrenatè ad potiundum incitantur.

40. Hinc patriæ proditiones, hinc rerumpublicarum eversiones, hinc cum hostibus clandestina colloquia nasci: nullum denique scelus, nullum malum facinus esse, ad quod suscipiendum non libido voluptatis impelleret: stupra verò, & adulteria, & omne tale flagitium, nullis aliis illecebris excitari, nisi voluptatis: quumque homini sive natura, sive quis deus nihil mente præstabilius dedisset; huic divino muneri ac dono nihil esse tam inimicum, quàm voluptatem.

41. Nec enim libidine dominante temperantiæ locum esse; neque omnino in

voluptatis regno virtutem posse consistere: quod quò magis intelligi posset, fingere animo aliquem jubebat, tantâ incitatum voluptate corporis, quanta percipi posset maxima: nemini censebat fore dubium, quin tamdiu, dum ita gauderet, nihil agitare mente, nihil ratione, nihil cogitatione consequi posset: quocirca nihil esse tam detestabile, tamque pestiferum, quàm voluptatem; si quidem ea, quum major esset atque longior, omne animi lumen exstingeret. Hæc cum C. Pontio Samnite, patre ejus, a quo, Caudino prælio, Sp. Postumius & T. Veturius consules superati sunt, locutum Archytam; Nearchus Tarentinus, hospes noster, qui in amicitia populi Romani permanerat, se à majoribus natu accepisse dicebat, quum quidem ei sermoni interfuisset Plato Atheniensis; quem Tarentum venisse, L. Camillo, Appio Claudio consulibus, reperio.

42. Quorsum hæc? ut intelligatis, si voluptatem aspernari ratione & sapientiâ non possemus, magnam habendam senectuti gratiam, quæ efficeret, ut id non liberet, quod non oporteret. Impedit enim consilium voluptas, rationi inimica est, ac mentis (ut ita dicam) præstringit oculos, nec habet ullum cum virtute commercium. Invitus quidem feci, ut fortis-

simi viri T. Flaminini fratrem L. Flamininum e senatu ejicerem, septem annis postquam consul fuisset: sed notandam putavi libidinem. Ille enim quum esset consul, in Gallia exoratus in convivio a scorto est, ut securi feriret aliquem eorum, qui in vinculis essent damnati rei capitalis: hic Tito fratre suo censore (qui proximus ante me fuerat) elapsus est; mihi verò & Flacco neutiquam probari potuit tam flagitiosa & tam perditā libido, quæ cum probro privato conjungeret imperii dedecus.

XIII. Sæpe audiivi a majoribus natu, qui se porro pueros a senibus audisse dicebant, mirari solitum C. Fabricium, quod, quum apud regem Pyrrhum legatus esset, audisset a Thessalo Cineæ, esse quemdam Athenis, qui se sapientem profiteretur; eumque dicere, omnia, quæ faceremus, ad voluptatem esse referenda: quod ex eo audientes M'. Curium & T. Coruncanium optare solitos, ut id Samnitibus, ipsique Pyrrho persuaderetur; quod facilius vinci possent, quam se voluptatibus dedissent. Vixerat M'. Curius cum P. Decio, qui, quinquennio ante eum consulem, se pro republica quarto consulatu devoverat. Norat eundem Fabricius, norat Coruncanius; qui quum ex sua vita, tum ex ejus, quem dico, P. De-

344 DE SENECTUTE.

cii facto, judicabant esse profectò aliquid naturâ pulchrum atque præclarum, quod suâ sponte peteretur, quodque spretâ & contemptâ voluptate optimus quisque sequeretur.

44. Quorsum igitur tam multa de voluptate? quia non modò vituperatio nulla, sed etiam summa laus senectutis est, quòd ea voluptates nullas magnopere desiderat: caret epulis, exstructisque mensis, & frequentibus poculis? caret ergo etiam vinolentiâ, & cruditate, & insomniis. Sed si aliquid dandum est voluptati, quoniam ejus blanditiis non facilè obsistimus (divinè enim Plato *escam malorum* voluptatem appellat, quòd eâ videlicet homines capiantur, ut hamo pisces) quamquam immoderatis epulis careat senectus, modicis tamen conviviiis delectari potest. C. Duillium, M. filium, qui Pœnos classe primus devicerat, redeuntem a cœna fenem sæpe videbam puer: delectabatur crebro funali & tibicine, quæ sibi nullo exemplo privatus sumpserat: tantum licentiæ dabat gloria.

45. Sed quid ego alios? ad me ipsum jam revertar. Primùm habui semper sodales: sodalitates autem me quæstore constitutæ sunt, sacris Idæis Magnæ Matris acceptis: epulabar igitur cum sodalibus omnino modicè; sed erat quidam fervor æta-

sis ; quâ progrediente , omnia fient in dies mitiora : neque enim ipsorum conviviorum delectationem voluptatibus corporis magis , quàm cœtu amicorum & sermonibus metiebar : bene enim majores nostri accubitionem epularem amicorum , quia vitæ conjunctionem haberet , *convivium* nominarunt ; melius , quàm Græci , qui hoc idem tum *computationem* , tum *concoenationem* vocant : ut , quod in eo genere minimum est , id maximè probare videantur.

XIV. Ego verò propter sermonis delectationem tempestivis quoque conviviiis delector , nec cum æqualibus solum , qui pauci admodum restant , sed cum vestra etiam ætate , atque vobiscum ; habeoque senectuti magnam gratiam , quæ mihi sermonis aviditatem auxit , potionis & cibi sustulit. Quodd si quem etiam ista delectant (ne omnino bellum indixisse videar voluptati , cujus est etiam fortasse quidam naturalis modus.) non intelligo , ne in istis quidem voluptatibus ipsis , carere sensu senectutem. Me verò & magisteria delectant a majoribus instituta ; & is sermo , qui more majorum a summo adhibetur in poculis ; & pocula , sicut in symposio Xenophontis , minuta atque rorantia ; & refrigeratio æstate ; & vicissim aut sol , aut ignis hibernus. Quæ quidem in Sabi-

nis etiam persequi soleo , conviviumque vicinorum quotidie compleo ; quod ad multam noctem , quàm maximè possumus , vario sermone producimus.

47. At non est voluptatum tanta quasi titillatio in senibus. Credo : sed ne desideratio quidem : nihil autem molestum , quod non desideres. Bene Sophocles , quum ex eo quidam jam affecto ætate quæreret , utereturne rebus venereis : Dii meliora , inquit ; libenter verò istinc , tamquam a domino agresti ac furioso profugi : cupidus enim rerum talium , odiosum & molestum est fortasse carere ; fatiatis verò , & expletis , jucundius est carere , quàm frui : quamquam non caret is , qui non desiderat. Hoc ego non desiderare , dico esse jucundius.

48. Quòd si istis ipsis voluptatibus bona ætas fruitur libentiùs ; primum parvulis fruitur rebus , ut diximus ; deinde iis , quibus senectus , si non abundè potitur , non omnino caret. Ut Turpione Ambivio magis delectatur , qui in prima cavea spectat , delectatur tamen etiam qui in ultima ; sic adolescentia , voluptates propè intuens , magis fortasse lætatur : sed delectatur etiam senectus , procul eas spectans , tantum , quantum sat est.

49. At illa quanti sunt , animum tamquam emeritis stipendiùs libidinis , ambi-

tionis ; contentionis ; inimicitiarum , cupiditatum omnium , secum esse , secumque (ut dicitur) vivere ? si verò habet aliquod tamquam pabulum studii atque doctrinæ , nihil est otiosâ senectute jucundius. Mori videbamus in studio dimetienti pene cœli atque terræ C. Gallum , familiarem patris tui , Scipio : quoties illum lux noctu aliquid describere ingressum , quoties nox oppressit , quum mane cœpisset ? quàm delectabat eum defectiones solis & lunæ multò nobis antè prædicere ?

50. Quid in levioribus studiis , sed tamen acutis ? quàm gaudebat bello suo Punico Nævius ! quàm Truculento Plautus ! quàm Pseudolo ! Vidi etiam senem Livium ; qui quum sex annos antè quàm ego natus sum , fabulam docuisset , Centone Tuditanoque consulibus , usque ad adolescentiam meam processit ætate. Quid de P. Licinii Crassi & pontificii , & civilis juris studio loquar ? aut de hujus P. Scipionis , qui his paucis diebus pontifex maximus factus est ? Atqui eos omnes , quos commemoravi , his studiis flagrant senes vidimus. M. verò Cethegum , quem rectè *Suadæ medullam* dixit Ennius , quanto studio exerceri in dicendo videbamus , etiam senem ? Quæ sunt igitur epularum , aut ludorum , aut scortorum voluptates cum his voluptatibus comparandæ ? At-

quæ hæc quidem studia doctrinæ ; quæ quidem prudentibus & bene institutis pariter cum ætate crescunt : ut honestum illud Solonis sit , quod ait versiculo quodam , ut antè dixi , senescere se multa in dies addiscentem : quâ voluptate animi nulla certè potest esse major.

XV. Venio nunc ad voluptates agriculturalium , quibus ego incredibiliter delector ; quæ nec ullâ impediuntur senectute , & mihi ad sapientis vitam proximè videntur accedere : habent enim rationem cum terra , quæ numquam recusat imperium , nec umquam sine usura reddit , quod accepit ; sed aliàs minore , plerumque majore cum fœnore. Quamquam me quidem non fructus modò , sed etiam ipsius terræ vis ac natura delectat : quæ quum gremio mollito ac subacto semen sparsum excepit , primùm id occæcatum cohibet ; ex quo occatio , quæ hoc efficit , nominata est : deinde tepefactum vapore & compressu suo diffundit , & elicit herbescentem ex eo viriditatem : quæ nixa fibris stirpium , sensim adolescit ; culmoque erecta geniculato , vaginis jam quasi pubescens includitur ; e quibus quum emerferit , fundit frugem spici , ordine structam , & contra avium minorum morsus , munitur vallo aristarum.

52. Quid ego vitium satus , ortus , in-

crementa commemorem? fatiari delectatione non possum, ut meae senectutis requietem oblectamentumque pernoscat. Omitto enim vim ipsam omnium, quae generantur e terra: quae ex fici tantulo grano, aut ex acino vinaceo, aut ex ceterarum frugum ac stirpium minutissimis seminibus tantos truncos ramosque procreat. Malleoli, plantae, sarmenta, viviradices, propagines, nonne ea efficiunt, ut quemvis cum admiratione delectent? Vitis quidem quae naturâ caduca est, & nisi fulta sit, ad terram fertur; eadem, ut se erigat, claviculis suis, quasi manibus, quidquid est nacta, complectitur: quam serpentem multiplici lapsu & erratico, ferro amputans coërcet ars agricolarum, ne silvescat sarmentis, & in omnes partes nimia fundatur.

53. Itaque ineunte vere in iis, quae relicta sunt, exsistit tamquam ad articulos sarmentorum ea, quae gemma dicitur, a qua oriens uva sese ostendit: quae & succo terrae, & calore solis augescens, primò est peracerba gustatu, deinde maturata dulcescit; vestitaque pampinis, nec modico tepore caret, & nimios solis defendit ardores: quâ quid potest esse tum fructu lætius, tum adspectu pulchrius? cuius quidem non utilitas me solum, ut antè dixi, sed etiam cultura, & ipsa natura de-

lectat; adminiculorum ordines, capitum jugatio, religatio, & propagatio vitium; sarmentorumque, ea, quam dixi, aliorum amputatio, aliorum immissio.

§4. Quid ego irrigationes? quid fossiones agri, repastinationesque proferam, quibus fit multò terra foecundior? Quid de utilitate loquar stercorendi? dixi in eo libro, quem de rebus rusticis scripsi; de qua doctus Hesiodus ne verbum quidem fecit, quum de cultura agri scribe-
ret. At Homerus, qui multis, ut mihi videtur, antè seculis fuit, Laërtem lenientem desiderium, quod capiebat e filio, colentem agrum, & eum stercorentem facit. Nec verò segetibus solùm, & pratis, & vineis, & arbusiis res rusticæ lætæ sunt; sed etiam hortis & pomariis: tum pecudum pastu, apium examinibus, florum omnium varietate. Nec consitiones modò delectant, sed etiam insitiones; quibus nihil invenit agricultura solertius.

XVI. Possum persequi multa oblectamenta rerum rusticarum; sed ea ipsa, quæ dixi, fuisse sentio longiora. Ignoscetis autem: nam & studio rerum rusticarum provectus sum, & senectus est naturâ loquacior; ne ab omnibus eam vitiis videar vindicare. Ergo in hac vita M'. Curius, quum de Samnitibus, de

Sabinis , de Pyrrho triumphasset , consumpsit extremum tempus ætatis ; cuius quidem villam ego contemplans (abest enim non longè a me) admirari satis non possum vel hominis ipsius continentiam , vel temporum disciplinam. Curio , ad focum sedenti , magnum auri pondus Samnites quum attulissent , repudiati ab eo sunt : non enim aurum habere , præclarum sibi videri dixit ; sed iis , qui haberent aurum , imperare. Poteratne tantus animus non jucundam efficere senectutem ?

56. Sed venio ad agricolas , ne a me ipso recedam. In agris erant tum senatores , & iidem senes : siquidem aranti L. Quintio Cincinnato nuntiatum est , eum dictatorem esse factum ; cujus dictatoris jussu magister equitum C. Servilius Ahala Sp. Mælium regnum appetentem , occupatum interemit. A villa in senatum arcessebantur & Curius , & ceteri senes , ex quo , qui eos arcessebant , *viatores* nominati sunt. Num igitur eorum senectus miserabilis fuit , qui se agri cultione oblectabant ? meâ quidem sententiâ haud scio , an ulla beatior esse possit ; neque solum officio , quod hominum generi universo cultura agrorum est salutaris , sed & delectatione , quam dixi , & saturitate copiâque omnium rerum , quæ ad victum hominum , ad cultum etiam deorum perti-

nent; ut, quoniam hæc quidam desiderant, in gratiam jam cum voluptate redeamus. Semper enim boni assidue domini referta cella vinaria, olearia, etiam penaria est, villaque tota locuples est: abundat porco, hædo, agno, gallinâ, lacte, caseo, melle. Jam hortum ipsi agricolæ succidiam alteram appellant. Conditiora facit hæc, supervacanei etiam operis, aucupium atque venatio.

57. Quid de pratorum viriditate, aut arborum ordinibus, aut vinearum, olivetorumve specie dicam? Brevi præcudam. Agro bene culto nil potest esse, nec usu uberius, nec specie ornatius: ad quem fruendum non modò non retardat, verùm etiam invitat atque allecat senectus. Ubi enim potest illa ætas, aut calefcere vel apricatione melius, vel igni; aut vicissim umbris aquisve refrigerari salubrius?

58. Sibi igitur habeant arma, sibi equos, sibi hastas, sibi clavam; sibi pilam, sibi natationes & cursus: nobis senibus ex lusionibus multis talos relinquant, & tesseras: id ipsum tamen ut lubebit; quoniam sine his beata esse senectus potest.

XVII. Multas ad res, perutiles Xenophontis libri sunt; quos legite, quæso, studiosè, ut facitis: quàm copiosè ab

eo agricultura laudatur in eo libro, qui est de tuenda re familiari, qui *Œconomicus* inscribitur? Atque ut intelligatis, nihil ei tam regale videri, quàm studium agri colendi, Socrates in eo libro loquitur cum Critobulo, Cyrum minorem, regem Persarum, præstantem ingenio atque imperii gloriâ, quum Lyfander Lacedæmonius, vir summæ virtutis, venisset ad eum Sardis, eique dona a sociis attulisset; & ceteris in rebus comem erga Lyfandrum, atque humanum fuisse, & ei quemdam conseptum agrum, diligenter consitum ostendisse: quum autem admirâretur Lyfander & proceritates arborum, & directos in quincuncem ordines, & humum subactam atque puram, & suavitatem odorum, qui afflarentur e floribus; tum eum dixisse, mirari se non modò diligentiam, sed etiam solertiam ejus, a quo essent illa dimensa atque descripta; & ei Cyrum respondisse: Atqui ego omnia ista sum dimensus; mei sunt ordines, mea descriptio; multæ etiam istarum arborum meâ manu sunt factæ: tum Lyfandrum intuentem ejus purpuram, & nitorem corporis, ornatumque Persicum multo auro, multisque gemmis, dixisse: Rectè verò te, Cyre, beatum ferunt, quoniam virtuti tuæ fortuna conjuncta est.

354 DE SENECTUTE.

60. Hac igitur fortunâ frui licet senibus ; nec ætas impedit , quò minùs & ceterarum rerum , & in primis agri colendi studia teneamus usque ad ultimum tempus senectutis. M. quidem Valerium Corvum accepimus ad centesimum annum perduxisse , quum esset actâ jam ætate in agris , eosque coleret ; cujus inter primum & sextum consulatum sex & quadraginta anni interfuerunt : itaque quantum spatium ætatis majores nostri ad senectutis initium esse voluerunt , tantus illi cursus honorum fuit. Atque ejus extrema ætas hòc beatior , quàm media , quòd auctoritatis plus habebat , laboris verò minùs. Apex autem senectutis est auctoritas.

61. Quanta fuit in L. Cæcilio Metello ? quanta in Atilio Calatino ? in quem illud elogium unicum : **PLURIMÆ CONSENTIUNT GENTES , POPULI PRIMARIUM FUISSE VIRUM.** Notum est totum carmen , incisum in sepulcro. Jure igitur gravis , cujus de laudibus omnium esset fama consentiens. Quem virum P. Crassum , nuper pontificem maximum ? quem postea M. Lepidum eodem sacerdotio præditum vidimus ? Quid de Paulo , aut Africano loquar ? aut , ut jam antè , de Maximo ? quorum non in sententia solum , sed etiam in nutu residebat aucto-

ritas. Habet senectus, honorata præsertim, tantam auctoritatem, ut ea pluris sit, quàm omnes adolescentiæ voluptates.

XVIII. Sed in omni oratione memento, eam me laudare senectutem, quæ fundamentis adolescentiæ constituta sit; ex quo id efficitur, quod ego magno quondam cum assensu omnium dixi: Miseram esse senectutem, quæ se oratione defenderet. Non cani, non rugæ repente auctoritatem arripere possunt; sed honestè acta superior ætas fructus capit auctoritatis extremos.

63. Hæc enim ipsa sunt honorabilia, quæ videntur levia atque communia, saluari, appeti, decedi, assurgere, deduci, reduci, consuli; quæ & apud nos, & in aliis civitatibus, ut quæque optimè morata, ita diligentissimè observantur. Lyfandrum Lacedæmonium, cujus modò mentionem feci, dicere aiunt solitum, Lacedæmonem esse honestissimum domicilium senectutis; nusquam enim tantum tribuitur ætati, nusquam est senectus honoratior: quin etiam memoriæ proditum est, quum Athenis, ludis, quidam in theatrum grandis natu venisset, in magno consessu locum ei a suis civibus nusquam datum: quum autem ad Lacedæmonios accessisset, qui legati quum essent,

in loco certo confederant, confurrexiffe omnes, & senem illum fessum recepisse.

64. Quibus quum a cuncto confessu plausus esset multiplex datus, dixisse ex iis quemdam, Athenienses scire, quæ recta essent, sed facere nolle. Multa in nostro collegio præclara; sed hoc, de quo agimus, in primis, quodd, ut quisque ætate antecedit, ita sententiæ principatum tenet: neque solum honore antecedentibus, sed iis etiam, qui cum imperio sunt, majores natu augures anteponuntur. Quæ sunt igitur voluptates corporis cum auctoritatis præmiis comparandæ? quibus qui splendide usi sunt, ii mihi videntur fabulam ætatis peregisse, nec, tamquam inexercitati histriones, in extremo actu corruisse.

65. At sunt morosi, & anxii, & iracundi, & difficiles senes; si quærimus, etiam avari: sed hæc, morum vitia sunt, non senectutis. Ac morositas tamen, & ea vitia, quæ dixi, habent aliquid excusationis, non illius quidem justæ, sed quæ probari posse videatur: contemni se putant, despici, illudi: præterea in fragili corpore odiosa omnis offensio est: quæ tamen omnia dulciora fiunt & moribus bonis, & artibus; idque tum in vita, tum in scena intelligi potest ex iis fratribus, qui in Adelphis sunt: quanta in

altero duritas, in altero comitas ! Sic se res habet : ut enim non omne vinum , sic non omnis ætas vetustate coacescit : severitatem in senectute probo , sed eam (sicut alia) modicam ; acerbitatem nullo modo : avaritia verò senilis quid sibi velit , non intelligo. Potest enim quidquam esse absurdius , quàm , quò minùs viæ restat , eò plus viatici quærere ?

XIX. Quarta restat causa , quæ maxime angere atque sollicitam habere nostram ætatem videtur , appropinquatio mortis ; quæ certè a senectute non potest longè abesse. O miserum senem , qui mortem contemnendam esse in tam longa ætate non viderit ! quæ aut planè negligenda est , si omnino exstinguit animum , aut etiam optanda , si aliquò eum deducit , ubi sit futurus æternus. Atqui tertium certè nihil inveniri potest. Quid igitur timeam , si aut non miser post mortem , aut beatus etiam futurus sum ?

67. Quamquam quis est tam stultus , quamvis sit adolescens , cui sit exploratum , se ad vesperum esse victurum ? quin etiam ætas illa multò plures , quàm nostra , mortis casus habet : faciliùs in morbos incidunt adolescentes ; graviùs ægrotant ; tristiùs curantur : itaque pauci veniunt ad senectutem : quod ni ita accideret , meliùs & prudentiùs viveretur.

Mens enim, & ratio, & consilium, in senibus est; qui si nulli fuissent, nullæ omnino civitates fuissent. Sed redeo ad mortem impendentem: quod illud est crimen senectutis, quum illud videatis cum adolescentia esse commune? Sensi ego tum in optimo filio meo, tum in expectatis ad amplissimam dignitatem fratribus tuis, Scipio, omni ætati mortem esse communem.

68. At sperat adolescens, diu se victurum, quod sperare idem senex non potest. Insipienter sperat: quid enim stultius, quàm incerta pro certis habere, falsa pro veris? Senex ne quod speret quidem habet. At est eò meliore conditione, quàm adolescens, quum id, quod ille sperat, hic jam consecutus est. Ille vult diu vivere; hic diu vixit. Quamquam, ô dii boni! quid est in hominis vita diu? Da enim supremum tempus: expectemus Tartessiorum regis ætatem: fuit enim (ut scriptum video) Arganthonius quidam Gadibus, qui octoginta regnavit annos, centum & viginti vixit.

69. Sed mihi ne diuturnum quidem quidquam videtur, in quo est aliquid extremum: quum enim id advenit, tunc illud, quod præteriit, effluxit: tantum remanet, quod virtute & rectè factis consecutus sis: horæ quidem cedunt, &

dies, & menses, & anni; nec præteritum tempus umquam revertitur; nec, quid sequatur, sciri potest. Quod cuique temporis ad vivendum datur, eo debet esse contentus. Neque enim histrioni, ut placeat, peragenda est fabula, modò, in quocumque fuerit actu, probetur; neque sapienti usque ad *Plaudite* vivendum.

70. Breve enim tempus ætatis, satis est longum ad bene honestèque vivendum: sin processeris longius, non magis dolendum est, quàm agricolæ dolent, præteritâ verni temporis suavitate, æstatem autumnumque venisse: ver enim, tamquam adolescentiam significat, ostenditque fructus futuros: reliqua tempora demetendis fructibus, & percipiendis accommodata sunt.

71. Fructus autem senectutis est (ut sæpe dixi) antè partorum bonorum memoria & copia. Omnia verò, quæ secundum naturam fiunt, sunt habenda in bonis: quid est autem tam secundum naturam, quàm senibus emori? quod idem contingit adolescentibus, adversante & repugnante naturâ. Itaque adolescentes mori sic mihi videntur, ut quum aquæ multitudine vis flammæ opprimitur; senes autem, sicut suâ sponte, nullâ adhibitâ vi, consumptus ignis exstinguitur. Et quasi poma ex arboribus, si cruda

funt, vi avelluntur, si matura & cocta, decidunt; sic vitam adolescentibus vis aufert, senibus maturitas: quæ mihi quidem tam jucunda est, ut quò propius ad mortem accedam, quasi terram videre videar, aliquandoque in portum ex longa navigatione esse venturus.

XX. Omnium ætatum certus est terminus; senectutis autem nullus: rectèque in ea vivitur, quoad munus officii exsequi & tueri possis; & tamen mortem contemnere: ex quo fit, ut animosior etiam senectus sit, quàm adolescentia, & fortior. Hoc illud est; quod Pisistrato tyranno a Solone responsum est; quum illi quærenti, Quâ tandem spe fretus, sibi tam audaciter obsisteret, respondisse dicitur, Senectute. Sed vivendi finis est optimus, quum integrâ mente, ceterisque sensibus, opus ipsa suum eadem, quæ coagmentavit, natura dissolvit.

73. Ut navem, ut ædificium idem destruit facillimè, qui construxit; sic hominem eadem optimè, quæ conglutinavit, natura dissolvit. Jam omnis conglutinatio recens, ægrè; inveterata, facile divellitur: ita fit, ut illud breve vitæ reliquum nec avidè appetendum senibus, nec sine causa deferendum sit; vetatque Pythagoras injussu imperatoris, id est, dei, de præsidio & statione vitæ decedere.

dere. Solonis quidem sapientis elogium est, quo se negat velle suam mortem dolore amicorum & lamentis vacare : vult, credo, se esse carum suis. Sed haud scio, an melius Ennius :

*Nemo me lacrymis decoret, neque Funera lessum
Faxit.*

Non censet lugendam esse mortem, quam immortalitas consequatur.

74. Jam sensus moriendi aliquis esse potest, isque ad exiguum tempus, praesertim seni : post mortem quidem sensus aut optandus, aut nullus est. Sed hoc meditatum ab adolescentia debet esse, mortem ut negligamus ; sine qua meditatione, tranquillo esse animo nemo potest : moriendum enim certè est ; & id incertum, an eo ipso die.

75. Mortem igitur omnibus horis impendentem timens, qui poterit animo consistere ? de qua non ita longâ disputatione opus esse videtur, quum recorder, non solum L. Brutum, qui in liberanda patria est interfectus ; non duo Decios, qui ad voluntariam mortem cursum equorum incitaverunt ; non M. Atilium, qui ad supplicium est profectus, ut fidem hosti datam conservaret ; non duo Scipiones, qui iter Poenis vel corporibus suis obstruere voluerunt ; non avum tuum

L. Paulum , qui morte laet collega in Cannensi ignominia temeritatem ; non M. Marcellum , cuius interitum ne crudelissimus quidem hostis honore sepulturae carere passus est : sed legiones nostras (quod scripsi in Originibus) in eum saepe locum profectas alacri animo & erecto , unde se numquam redituras arbitrarentur. Quod igitur adolescentes , & ii quidem non solum indocti , sed etiam rustici contemnunt , id docti senes extimescent ?

76. Omnino (ut mihi quidem videtur) studiorum omnium satietas , vitae facit satietatem. Sunt pueritiae certa studia : num igitur ea desiderant adolescentes ? sunt & ineuntis adolescentiae : num ea iam constans requirit aetas , quae media dicitur ? sunt etiam huius aetatis ; ne ea quidem quaeruntur a senectute : sunt extrema quaedam studia senectutis ; ergo , ut superiorum aetatum studia occidunt , sic occidunt etiam senectutis : quod quum evenit , satietas vitae tempus maturum mortis affert.

XXI. Equidem non video , cur , quid ipse sentiam de morte , non audeam vobis dicere ; quod eò melius mihi cernere videor , quò ab ea propius absum. Ego vestros patres , P. Scipio , tuque , C. Laeli , viros clarissimos , mihi que amicissimos

mos, vivere arbitror; & eam quidem vitam, quæ est sola vita nominanda. Nam, dum fumus in his inclusi compagibus corporis, munere quodam necessitatis, & gravi opere perfungimur: est enim animus cœlestis ex altissimo domicilio depressus, & quasi demersus in terram, locum divinæ naturæ, æternitati-
que contrarium. Sed credo, deos immortales sparsisse animos in corpora humana, ut essent, qui terras tuerentur, quique cœlestium ordinem contemplantes, imitarentur eum vitæ modo atque constantiâ: nec me solum ratio ac disputatio impulit, ut ita crederem; sed nobilitas etiam summorum philosophorum, & auctoritas.

78. Audiebam Pythagoram, Pythagoreosque, incolas pene nostros, qui essent Italici philosophi quondam nominati, numquam dubitasse, quin ex universa mente divina delibatos animos haberemus: demonstrabantur mihi præterea, quæ Socrates supremo vitæ die de immortalitate animorum differuisset, is, qui esset omnium sapientissimus oraculo Apollinis judicatus. Quid multa? sic mihi persuasi, sic sentio, quoniam tanta celeritas animorum sit, tanta memoria præteritorum, futurorumque prudentia, tot artes, tantæ scientiæ, tot inventa, non posse eam naturam, quæ res eas contineat,

364 DE SENECTUTE:

esse mortalem : quumque semper agitetur animus , nec principium motûs habeat ; quia se ipse moveat ; ne finem quidem habiturum esse motûs , quia numquam se ipse sit relicturus : & , quum simplex animi natura esset , neque haberet in se quidquam admistum dispar sui , atque dissimile , non posse eum dividi : quod si non possit , non posse interire : magnoque esse argumento , homines scire pleraque antè quàm nati sint , quod jam pueri , quum artes difficiles discant , ita celeriter res innumerabiles arripiant , ut eas non tum primùm accipere videantur , sed reminisci & recordari. Hæc Platonis ferè.

XXII. Apud Xenophontem autem motiens Cyrus major , hæc dicit. » Nolite » arbitrari , ô mihi carissimi filii , me , » quum a vobis discessero , nusquam , » aut nullum fore : nec enim , dum eram » vobiscum , animum meum videbatis ; » sed eum esse in hoc corpore , ex iis » rebus , quas gerebam , intelligebatis : » eundem igitur esse creditote , etiam si » nullum videbitis.

80. » Nec verò clarorum virorum post » mortem honores permanerent , si nihil » eorum ipforum animi efficerent , quo » diutius memoriam sui tuerentur. Mihi » quidem numquam persuaderi potuit ,

» animos , dum in corporibus essent mor-
 » talibus , vivere ; quum exissent ex iis ,
 » emori : nec verò tum animum esse in-
 » sapientem , quum ex insipienti corpore
 » evasisset ; sed quum omni admixtione
 » corporis liberatus , purus & integer esse
 » cœpisset , tum esse sapientem. Atque
 » etiam , quum hominis natura morte
 » dissolvitur , ceterarum rerum perspi-
 » cum est , quò quæque discedant ;
 » abeunt enim illuc omnia , unde orta
 » sunt : animus autem solus , nec quum
 » adest , nec quum discedit , apparet. Jam
 » verò videtis , nihil esse morti tam si-
 » mile , quàm somnum. Atqui dormien-
 » tium animi maximè declarant divinita-
 » tem suam.

» 81. Multa enim , quum remissi &
 » liberi sunt , futura prospiciunt : ex quo
 » intelligitur , quales futuri sint , quum
 » se planè corporis vinculis relaxaverint.
 » Quare , si hæc ita sunt , sic me colitote
 » ut deum : sin unà est interiturus ani-
 » mus cum corpore , vos tamen deos ve-
 » rentes , qui hanc omnem pulchritudi-
 » nem tuentur & regunt , memoriam
 » nostri piè inviolatèque servabitis. Cyrus
 » quidem hæc moriens. Nos , si placet ,
 » nostra videamus.

XXIII. Nemo umquam mihi , Scipio ,
 persuadebit , aut patrem tuum Paulum ,

aut duos avos , Paulum & Africanum ,
aut Africani patrem , aut patruum , aut
multos præstantes viros , quos enumerare
non est necesse , tanta esse conatos , quæ
ad posteritatis memoriam pertinerent ,
nisi animo cernerent , posteritatem ad se
pertinere. An censes (ut de me ipso ali-
quid more senum glorier) me tantos la-
bores diurnos nocturnosque domi mili-
tizæque suscepturum fuisse , si iisdem fini-
bus gloriam meam , quibus vitam , essem
terminaturus ? nonne melius multò fuisset ,
otiosam ætatem , & quietam , sine ullo
labore aut contentione traducere ? Sed
nescio quomodo animus erigens se , pos-
teritatem semper ita prospiciebat , quasi ,
quum excessisset e vita , tum denique
victurus esset : quod quidem ni ita se ha-
beret , ut animi immortales essent , haud
optimi cujusque animus maximè ad im-
mortalem gloriam niteretur.

83. Quid , quòd sapientissimus quisque
æquissimo animo moritur , stultissimus
iniquissimo ? nonne vobis videtur ani-
mus is , qui plus cernat & longiùs , vi-
dere , se ad meliora proficisci ; ille au-
tem , cujus obtusior sit acies , non vi-
dere ? Equidem efferor studio patres ves-
tros , quos colui & dilexi , videndi ; ne-
que verò eos solum convenire aveo , quos
ipse cognovi ; sed illos etiam , de quibus

audivi, & legi, & ipse conscripsi. Quò quidem me proficiscentem haud sanè quis facile retraxerit, neque tamquam Peliam recoxerit; & si quis deus mihi largiatur, ut ex hac ætate repuerascam, & in cunis yagiam, valde recusem; nec verò velim, quasi decurso spatio, ad carceres a talis revocari.

84. Quid enim habet vita commodi? quid non potius laboris? sed habeat sanè: habet certè tamen, aut fatietatem, aut modum; non lubet enim mihi deplorare vitam, quod multi, & ii docti, sæpe fecerunt: neque me vixisse poenitet; quoniam ita vixi, ut non frustra me natum existimem: & ex hac vita ita discedo, tamquam ex hospitio, non tamquam ex domo: commorandi enim natura deversorium nobis, non habitandi dedit.

85. O præclarum diem, quum ad illud diuinum animorum concilium coetumque proficiscar, quumque ex hac turba & colluvione discedam! proficiscar enim non ad eos solum viros, de quibus antè dixi; sed etiam ad Catonem meum, quo nemo vir melior natus est, nemo pietate præstantior; cuius a me corpus crematum est; quod contrà decuit ab illo meum: animus verò non me deserens, sed respectans, in ea profectò loca discessit, quò mihi ipsi cernebat esse ve-

368 *DE SENECTUTE.*

niendum : quem ego meum casum fortiter ferre visus sum ; non quòd æquo animo ferrem : sed me ipse consolabar , existimans , non longinquum inter nos digressum & discessum fore.

86. His mihi rebus , Scipio (id enim te cum Lælio admirari solere dixisti) levis est senectus , nec solum non molesta , sed etiam jucunda. Quòd si in hoc erro , quòd animos hominum immortales esse credam , libenter erro ; nec mihi hunc errorem , quo delector , dum vivo , extorqueri volo : sin mortuus (ut quidam minuti philosophi censent) nihil sentiam ; non vereor , ne hunc errorem meum mortui philosophi irrideant. Quòd si non sumus immortales futuri , tamen extinguì homini suo tempore optabile est : nam habet natura , ut aliarum omnium rerum , sic vivendi modum : senectus autem , peractio ætatis est , tamquam fabulæ ; cujus defatigationem fugere debemus , præsertim adjunctâ satietate.

Habui hæc , de senectute quæ dicerem ; ad quam utinam perveniat , ut ea , quæ ex me audistis , re experti probare possitis.





LÆLIUS,
SIVE
DE AMICITIA
DIALOGUS.

AD TITUM POMPONIUM ATTICUM.

I. **Q**UINTUS Mucius augur multa narrare de C. Lælio, socero suo memoriter & jucundè solebat, nec dubitare, illum in omni sermone appellare sapientem. Ego autem a patre ita eram deductus ad Scævola, sumptâ virili togâ, ut, quoad possem, & liceret, a senis latere nunquam discederem. Itaque multa ab eo prudenter disputata, multa etiam breviter & commodè dicta, memoriæ mandabam; fierique studebam ejus prudentiâ doctior. Quo mortuo, me ad pontificem Scævola contuli; quem unum nostræ civitatis & ingenio, & justitiâ præstant-

Q v

tissimum audeo dicere. Sed de hoc aliàs; nunc redeo ad augurem.

2. Quum sæpe multa, tum memini domi in hemicyclo sedentem, ut solebat, quum & ego essem unà & pauci admodum familiares, in eum sermonem illum incidere, qui tum ferè omnibus erat in ore. Meministi enim, Attice, & eò magis, quòd P. Sulpicio utebare multum, quum is tribunus plebis capitali odio a Q. Pompeio, qui tum erat consul dissideret, quocum conjunctissimè & amantissimè vixerat, quanta hominum esset vel admiratio, vel querela.

3. Itaque tum Scævola, quum in eam ipsam mentionem incidisset, exposuit nobis sermonem Lælii de amicitia, habitum ab illo secum, & cum altero genere C. Fannio, M. filio, paucis diebus post mortem Africani. Ejus disputationis sententias memoriæ mandavi; quas in hoc libro exposui meo arbitratu: quasi enim ipsos induxi loquentes, ne, *inquam*, &, *inquit*, sæpius interponeretur; atque ut, tamquam a præsentibus, coràm haberi sermo videretur.

4. Quum enim sæpe mecum ageres, ut de amicitia scriberem aliquid, digna mihi res quum omnium cognitione, tum nostrâ familiaritate, visa est: itaque feci non invitus, ut prodessem multis tuo ro-

gatu. Sed, ut in Catone Majore, qui est scriptus ad te de senectute, Catonem induxi senem disputantem, quia nulla videbatur aptior persona, quæ de illa ætate loqueretur, quàm ejus, qui & diutissime senex fuisset, & in ipsa senectute præ ceteris floruisse; sic, quum accepissemus a patribus maximè memorabilem C. Lælii, & P. Scipionis familiaritatem fuisse, idonea mihi Lælii persona visa est, quæ de amicitia ea ipsa differeret, quæ disputata ab eo meminisset Scævola.

5. Genus autem hoc sermonum, positum in hominum veterum auctoritate, & eorum illustrium, plus, nescio quo pacto, videtur habere gravitatis. Itaque ipse mea legens, sic afficior interdum, ut Catonem, non me loqui existimem. Sed ut tum ad senem senex de senectute, sic hoc libro ad amicum amicissimus de amicitia scripsi. Tum est Cato locutus, quo erat nemo ferè senior temporibus illis, nemo prudentior; nunc Lælius & sapiens (sic enim est habitus) & amicitiae gloriâ excellens, de amicitia loquitur. Tu velim animum a me parumper avertas, Lælium loqui ipsum putes. C. Farnius, & Q. Mucius ad socerum veniunt post mortem Africani: ab his sermo oritur: respondet Lælius; cujus tota disputatio est de amicitia, quam legens tu te ipse cognosces.

II. FANNIUS. Sunt ista, Læli: nec enim melior vir fuit Africano quisquam, nec clarior. Sed existimare debes, omnium oculos in te esse coniectos: unum te sapientem & appellant & existimant. Tribuebatur hoc modò M. Catoni: scimus L. Atilium apud patres nostros appellatum esse sapientem; sed uterque alio quodam modo: Atilius, quia prudens esse in jure civili putabatur; Cato, quia multarum rerum usum habebat, multaque ejus & in senatu, & in foro vel provisâ prudenter, vel acta constanter, vel responsa acutè ferebantur, propterea quasi cognomen jam habebat in senectute sapientis: te autem alio quodam modo, non solùm naturâ & moribus, verùm etiam studio & doctrinâ esse sapientem; nec sicut vulgus, sed ut eruditi solent appellare sapientem, qualem in tota Græcia neminem: nam qui septem appellantur, eos, qui ista subtilius quærunt, in numero sapientium non habent. Athenis unum accepimus, & eum quidem etiam Apollinis oraculo sapientissimum judicatum.

7. Hanc esse in te sapientiam existimant, ut omnia tua in te posita esse ducas, humanosque casus virtute inferiores putes. Itaque ex me quærunt, credo item ex te, Scævola, quonam pacto mortem Africani feras; eoque magis, quodd his.

proximis Nonis, quum in hortos D. Bruti auguris, commentandi causâ, ut assolet, venissemus, tu non affuisti, qui diligentissimè semper illum diem, & illud munus solitus esses obire.

8. SCÆVOLA. Quærunt quidem, C. Læli, multi, ut est a Fannio dictum: sed ego id respondeo, quod animadverti, te dolorem, quem acceperis quum summi viri, tum amicissimi morte, ferre moderatè; nec potuisse non commoveri, nec fuisse id humanitatis tuæ: quòd autem his Nonis in nostro collegio non affuisses, in valetudinem causæ, non mœstitiam fuisse.

9. LÆLIUS. Rectè tu quidem, Scævola, & verè: nec enim ab isto officio, quod semper usurpavi, quum valerem, abduci incommodo meo debui; nec ullo casu arbitror hoc constanti homini posse contingere, ut ulla intermissio fiat officii. Tu autem, Fanni, qui mihi tantum tribui dicis, quantum ego nec agnosco, nec postulo, facis amicè; sed, ut mihi videaris, non rectè judicas de Catone: aut enim nemo, quod quidem magis credo, aut, si quisquam, ille sapiens fuit. Quomodo enim (ut alia omittam) mortem filii tulit? memineram Paulum, videram Gallum: sed hi in pueris; Cato in perfecto & spectato viro. Quamobrem cave Catoni anteponas, ne istum quidem ip-

374 DE AMICITIA.

sum, quem Apollo, ut ais, sapientissimum judicavit: hujus enim facta, illius dicta laudantur. De me autem (ut jam cum utroque loquar) sic habetote.

III. Ego, si Scipionis desiderio me moveri negem, quàm id rectè faciam, viderint sapientes; sed certè mentiar. Moveor enim tali amico orbatus, qualis, ut arbitror, nemo unquam erit; &, ut confirmare possum, nemo certè fuit: sed non egeo medicinà: me ipse consolor; & maximè illo solatio, quodd eo errore careo, quo amicorum decessu plerique angī solent: nihil enim mali accidisse Scipioni puto; mihi accidit, si quid accidit: suis autem incommodis graviter angī, non amicum, sed se ipsum amantis est.

II. Cum illo verò quis neget actum esse præclare? nisi enim, quod ille minimè putabat, immortalitatem optare vellet, quid non est adeptus, quod homini fas esset optare? qui summam spem civium, quam de eo jam puero habuerant, continuò adolescens incredibili virtute superavit: qui consulatum petivit nunquam, factus est consul bis; primùm antequam; iterum sibi, suo tempore, rei publicæ, pene serò: qui, duabus urbibus eversis, inimicissimis huic imperio, non modò præsentia, verùm etiam futura bel-

la delevit. Quid dicam de moribus facilissimis? de pietate in matrem? liberalitate in sorores? bonitate in suos? justitiâ in omnes? hæc nota sunt vobis: quàm autem civitati carus fuerit, mœrore fune-
ris, indicatum est. Quid igitur hunc pau-
corum annorum accessio juvare potuis-
set? senectus enim, quamvis non sit gra-
vis, ut memini Catonem anno antè quàm
mortuus est, mecum & cum Scipione dis-
ferere, tamen aufert eam viriditatem, in
qua etiam tunc erat Scipio.

12. Quamobrem vita quidem talis fuit,
vel fortuna, vel gloria, ut nihil posset
accedere; moriendi autem sensum cele-
ritas abstulit: quo de genere mortis diffi-
cile dictu est; quid homines suspicentur,
videtis. Hoc tamen verè licet dicere,
P. Scipioni, ex multis diebus, quos in
vita celeberrimos lætissimosque viderit,
illum diem clarissimum fuisse, quum,
senatu dimisso, domum reductus ad ves-
perum est a patribus conscriptis, a po-
pulo Romano, a sociis, & Latinis, pri-
die quàm excessit e vita; ut ex tam
alto dignitatis gradu, ad superos videat-
ur deos potius, quàm ad inferos per-
venisse. Neque enim assentior iis, qui
hæc nuper differere cœperunt, cum cor-
poribus simul animos interire, atque om-
nia morte deleri.

IV. Plus apud me antiquorum auctoritas valet, vel nostrorum majorum, qui mortuis tam religiosa jura tribuerunt, quod non fecissent profectò, si nihil ad eos pertinere arbitrarentur; vel eorum, qui in hac terra fuerunt, magnamque Græciam (quæ nunc quidem deleta est, tum florebat) institutis & præceptis suis erudierunt; vel ejus, qui Apollinis oraculo sapientissimus est judicatus, qui non tum hoc, tum illud, ut in plerisque, sed idem dicebat semper, animos hominum esse divinos; iisque, quum e corpore excessissent, reditum in cælum patere, optimoque & justissimo cuique expeditissimum.

14. Quod idem Scipioni videbatur; qui quidem quasi præfagiret, perpaucis ante mortem diebus, quum & Philus, & Manilius adessent, & alii plures, tuque etiam, Scævola, mecum venisses, triduum differuit de republica; cujus disputationis fuit extremum ferè de immortalitate animorum; quæ se in quiete per visum ex Africano audisse dicebat. Id si ita est, ut optimi cujusque animus in morte facillimè evolet, tamquam e custodia vinculisque corporis; cui censemus cursum ad deos faciliorem fuisse, quàm Scipioni? quocirca mœrere hoc ejus eventu, vereor, ne invidi magis, quam

amici sit. Sin autem illa veriora, ut idem interitus sit animorum, & corporum, nec ullus sensus maneat; ut nihil boni est in morte, sic certè nihil mali: sensu enim amisso, fit idem, quasi natus non esset omnino: quem tamen esse natum & nos gaudemus, & hæc civitas, dum erit, lætabitur.

15. Quamobrem cum illo quidem (ut supra dixi) actum optimè est; mecum incommodius; quem fuerat æquius, ut prius introieram, sic prius exire de vita. Sed tamen recordatione nostræ amicitiae sic fruor, ut beatè vixisse videar, quia cum Scipione vixerim; quocum mihi conjuncta cura de re publica, & de privata fuit; quocum & domus, & militia communis; & id, in quo est omnis vis amicitiae, voluntatum, studiorum, sententiarum summa consensio. Itaque non tam ista me sapientiae, quam modò Fannius commemoravit, fama delectat, falsa præfertim, quàm quòd amicitiae nostræ memoriam spero sempiternam fore: idque mihi eò magis est cordi, quòd ex omnibus seculis vix tria, aut quatuor nominantur paria amicorum: quo in genere sperare videor Scipionis & Lælii amicitiam, notam posteritati fore.

16. FANNIUS. Istud quidem, Læli, ita necesse est: sed, quoniam amicitiae men-

tionem fecisti, & sumus otiosi, pergratum mihi feceris (spero item Scævola) si, quemadmodum soles, de ceteris rebus, quum ex te quærantur; sic de amicitia disputaris, quid sentias, qualem existimes, quæ præcepta des. *SCÆVOLA.* Mihi verò pergratum erit; atque, id ipsum quum tecum agere conarer, Fannius antevertit: quamobrem utrique nostrum gratum admodum feceris.

V. LÆLIUS. Ego verò non gravarer, si mihi ipse considerem: nam & præclara res est, & sumus, ut dixit Fannius, otiosi: sed quis ego sum? aut quæ in me est facultas? doctorum est ista consuetudo, eaque Græcorum, ut iis ponatur, de quo disputent, quamvis subito. Magnum opus est, egetque exercitatione non parvâ. Quamobrem quæ disputari de amicitia possunt, ab eis censeo petatis, qui ista profitentur: ego vos hortari tantum possum, ut amicitiam omnibus rebus humanis anteponatis: nihil est enim tam naturæ aptum, tam conveniens ad res vel secundas, vel adversas.

18. Sed hoc primum sentio, nisi in bonis amicitiam esse non posse: neque id ad vivum refeco, ut illi, qui hæc subtilius disserunt; fortasse verè, sed ad communem utilitatem parum: negant enim, quemquam virum bonum esse, nisi sapien-

tem. Sit ita sanè: sed eam sapientiam interpretantur, quam adhuc mortalis nemo est consecutus: nos autem ea, quæ sunt in usu, vitæque communi, non ea, quæ finguntur, aut optantur, spectare debemus. Numquam ego dicam, C. Fabricium, M. Curium, T. Coruncanium, quos sapientes nostri majores judicabant, ad istorum normam fuisse sapientes. Quare sibi habeant sapientiæ nomen & invidiosum, & obscurum; concedantque, ut hi boni viri fuerint. Ne id quidem facient: negabunt, id, nisi sapienti, posse concedi.

19. Agamus igitur pingui Minervâ, ut aiunt. Qui ita se gerunt, ita vivunt, ut eorum probetur fides, integritas, æqualitas, liberalitas; nec sit in illis ulla cupiditas, libido, audacia; sintque magnâ constantiâ, ut ii fuerunt, modò quos nominavi: hos viros bonos, ut habiti sunt, sic etiam appellandos putemus; quia sequantur (quantum homines possunt) naturam, optimam bene vivendi ducem. Sic enim mihi perspicere videor, ita natos esse nos, ut inter omnes esset societas quædam; major autem, ut quisque proximè accederet: itaque cives, potiores, quàm peregrini; & propinqui, quàm alieni: cum his enim amicitiam natura ipsa peperit; sed ea non satis habet fir-

mitatis: namque hoc præstat amicitia propinquitati, quòd ex propinquitate benevolentia tolli potest, ex amicitia non potest: sublatâ enim benevolentia amicitia nomen tollitur, propinquitatis manet. Quanta autem vis amicitia sit, ex hoc intelligi maximè potest, quòd ex infinita societate generis humani, quam conciliavit ipsa natura, ita contracta res est, & adducta in angustum, ut omnis caritas aut inter duos, aut inter paucos jungeretur.

VI. Est autem amicitia nihil aliud, nisi omnium divinarum humanarumque rerum cum benevolentia, & caritate summa consensio: quâ quidem haud scio, an, exceptâ sapientiâ, quidquam melius homini sit a diis immortalibus datum. Divitias alii præponunt, bonam alii valetudinem, alii potentiam, alii honores, multi etiam voluptates: belluarum hoc quidem extremum est; illa autem superiora, caduca & incerta, posita non tam in nostris consiliis, quàm in fortunæ temeritate. Qui autem in virtute summum bonum ponunt, præclare illi quidem; sed hæc ipsa virtus amicitiam & gignit, & continet; nec sine virtute amicitia esse ullo pacto potest.

21. Jam virtutem ex consuetudine vitæ sermonisque nostri interpretemur; nec eam, ut quidam docti, verborum magni-

ficentiâ metiamur; virosque bonos eos; qui habentur, numeremus, Paulos, Catores, Gallos, Scipiones, Philos: his communis vita contenta est: eos autem omittamus, qui omnino nusquam reperiuntur. Tales igitur inter viros, amicitia tantas opportunitates habet, quantas vixqueo dicere.

22. Principiò, cui potest esse *vita vitalis*, ut ait Ennius, qui non in amici mutua benevolentia conquiescat? quid dulcius, quàm habere, quicum omnia audeas sic loqui, ut tecum? quis esset tantus fructus in prosperis rebus, nisi haberes, qui illis æquè, ac tu ipse, gauderet? adversas verò ferre difficile esset sine eo, qui illas gravius etiam, quàm tu, ferret. Denique ceteræ res, quæ expetuntur, opportunæ sunt singulæ rebus ferè singulis: divitiæ, ut utare; opes, ut colare; honores, ut laudare; voluptates, ut gaudeas; valetudo, ut dolore careas, & muneribus fungare corporis: amicitia res plurimas continet: quoquò te verteris, præstò est, nullo loco excluditur: numquam intermissiva, numquam molesta est. Itaque non aquâ, non igni, ut aiunt, pluribus locis utimur, quàm amicitia: neque ego nunc de vulgari, aut de mediocri (quæ tamen ipsa & delectat, & prodest) sed de vera & perfecta loquor, qualis eo-

rum, qui pauci nominantur, fuit: nam & secundas res, splendidiore facit amicitia, & adversas partiens communicantque, leviores.

VII. Quumque plurimas & maximas commoditates amicitia contineat, tum illa nimirum præstat omnibus, quod bonâ spe præluceat in posterum; nec debilitari animos, aut cadere patitur. Verum etenim amicum qui intuetur, tamquam exemplar aliquod intuetur sui: quocirca & absentes adsunt, & egentes abundant, & imbecilles valent, &, quod difficilius dictum est, mortui vivunt; tantus eos honos, memoria, desiderium prosequitur amicorum: ex quo illorum beata mors videtur; horum vita laudabilis. Quod si exemplaris ex natura rerum benevolentia conjunctionem; nec domus ulla, nec urbs stare poterit; ne agri quidem cultus permanebit: id si minus intelligitur, quanta vis amicitia concordiaque sit; ex dissensionibus atque ex discordiis percipi potest: quæ enim domus tam stabilis, quæ tam firma civitas est, quæ non odiis atque dissidiis funditus possit everti? ex quo, quantum boni sit in amicitia, judicari potest.

24. Agrigentinum quidem, doctum quemdam virum, carminibus Græcis vaticinatum ferunt, quæ in rerum natura

totoque mundo constarent, quæque moverentur, ea contrahere amicitiam, dissipare discordiam: atque hoc quidem omnes mortales & intelligunt, & reprobant. Itaque, si quando aliquod officium existit amici in periculis aut adeundis, aut communicandis, quis est, qui id non maximis efferat laudibus? qui clamores totâ caveâ super in-hospitiis & amici mei M. Pacuvii nova fabula; quum ignorante rege utrum eorum esset Orestes, Pylades Orestem se esse diceret, ut pro illo necaretur; Orestes autem, ita ut erat, Orestem se esse perseveraret? stantes plaudebant in re ficta; quid arbitramur in vera fuisse facturos? facile indicabat ipsa natura vim suam; quam homines, quod facere ipsi non possent, id recte fieri in altero judicarent. Hactenus mihi videor, de amicitia quod sentirem, potuisse dicere: si qua præterea sunt (credo autem esse multa) ab iis, si videbitur, qui ista disputant, quæritote.

25. FANNIUS. Nos autem a te potius; quamquam etiam ab istis sæpe quæsiui & audiui, non invitus equidem: sed aliud quoddam expetimus filium orationis tuæ. SCÆVOLA. Tum magis id diceret, Fanni, si nuper in hortis Scipionis, quum est de Republica disputatum, affuisses: qualis tum patronus iustitiæ fuit, contra

384 *DE AMICITIA.*

accuratam orationem Philo! FANNIUS. Facile id quidem fuit, justitiam justissimo viro defendere. SCÆVOLA. Quid amicitiam? nonne facile ei, qui ob eam summâ fide, constantiâ, justitiâque servatam, maximam gloriam ceperit?

VIII. LÆLIUS. Vim hoc quidem est afferre: quid enim refert, quâ me ratione cogatis? cogitis certè: studiis enim generorum, præsertim in re bona, quum difficile est, tum ne æquum quidem, obistere. Sæpissime igitur mihi de amicitia cogitanti, maximè illud considerandum videri solet, num propter imbecillitatem atque inopiam desiderata sit amicitia; ut dandis recipiendisque meritis, quod quisque minùs per se ipse posset, id acciperet ab alio, vicissimque redderet: an esset hoc quidem proprium amicitiae; sed antiquior, & pulchrior, & magis a natura ipsa profecta alia causa: amor enim (ex quo amicitia nominata) princeps est ad benevolentiam conjungendam: nam utilitates quidem etiam ab iis percipiuntur sæpe, qui simulatione amicitiae coluntur & observantur causâ temporis. In amicitia autem nihil fictum, nihil simulatum; &, quidquid in ea est, id est verum & voluntarium.

27. Quapropter a natura mihi videtur potius, quàm ab indigentia, orta amicitia,

ria, & applicatione magis animi cum quodam sensu amandi, quàm cogitatione; quantum illa res utilitatis esset habitura. Quod quidem quale sit, etiam in bestiis quibusdam animadverti potest; quæ ex se natos ita amant ad quoddam tempus, & ab eis ita amantur, ut facillè earum sensus appareat: quod in homine multò est evidentius. Primum ex ea caritate, quæ est inter natos & parentes; quæ dirimi, nisi detestabili scelere, non potest. Deinde, quum similis sensus existit amoris, si aliquem nacti sumus, cujus cum moribus & natura congruamus, quòd in eo quasi lumen aliquod probitatis & virtutis perspicere videamur.

28. Nihil est enim amabilius virtute; nihil, quod magis alliciat homines ad diligendum; quippe quum propter virtutem & probitatem eos etiam, quos numquam vidimus, quodam modo diligamus. Quis est, qui C. Fabricii, M'. Curii non cum caritate aliqua & benevolentia memoriam usurpet, quos numquam viderit? quis autem est, qui Tàrquinius Superbum, qui Sp. Cassium, Sp. Mælium non oderit? Cum duobus ducibus de imperio in Italia decertatum est, Pyrrho & Annibale: ab altero, propter probitatem ejus, non nimis alienos animos habemus; alterum propter crudelitatem semper hæc civitas oderit.

IX. Quòd si tanta vis probitatis est, ut eam vel in eis, quos numquam vidimus, vel, quod majus est, in hoste etiam diligamus; quid mirum, si animi hominum moveantur, quum eorum, quibuscum usu conjuncti esse possunt, virtutem & bonitatem perspicere videantur? Quamquam confirmatur amor & beneficio accepto, & studio perspecto, & consuetudine adjunctâ; quibus rebus ad illum primum motum animi & amoris adhibitis, admirabilis quædam exardescit benevolentiae magnitudo: quam si qui putant ab imbecillitate proficisci, ut sit per quem quisque assequatur, quod desideret; humilem sanè relinquunt, & minimè generosum, ut ita dicam, ortum amicitiae, quam ex inopia atque indigentia natam volunt.

30. Quod si ita esset, ut quisque minimum in se esse arbitraretur, ita ad amicitiam esset aptissimus; quod longè secus est. Ut enim quisque sibi plurimum confidit, & ut quisque maximè virtute & sapientiâ sic munitus est, ut nullo egeat, suaeque omnia in se ipso posita judicet; ita in amicitiiis expetendis colendisque maximè excellit. Quid enim Africanus indigens mei? minimè herclè: ac ne ego quidem illius: sed ego admiratione quâdam virtutis ejus; ille vicissim opinione

fortasse nonnullâ, quam de meis moribus habebat, me dilexit: auxit benevolentiam consuetudo. Sed quamquam utilitates multæ & magnæ consecutæ sunt, non sunt tamen ab earum spe causæ diligendi profectæ.

31. Ut enim benefici liberalesque sumus, non ut exigamus gratiam (neque enim beneficium tœneramur) sed naturâ propensi ad liberalitatem sumus; sic amicitiam, non spe mercedis adducti, sed quòd omnis ejus fructus in ipso amore inest, expetendam putamus.

32. At ii, qui pecudum ritu ad voluptatem omnia referunt, longè dissentiunt; nec mirum: nihil enim altum, nihil magnificum ac divinum suspicere possunt, qui suas omnes cogitationes abjecerunt in rem tam humilem, tamque contemptam: quamobrem hos quidem ab hoc sermone removeamus; ipsi autem intelligamus, naturâ gigni sensum diligendi, & benevolentiae caritatem, factâ significatione probitatis: quam qui appetiverunt, applicant sese & propiùs admovent, ut & usu ejus, quem diligere cœperunt, fruantur, & moribus; sintque pares in amore, & æquales; propensioresque ad bene merendum, quàm ad reposcendum; atque hæc inter eos sit honesta certatio. Sic & utilitates ex amicitia maximæ capientur;

R ij

& erit ejus ortus a natura, quàm ab imbecillitate, & gravior, & verior. Nam si utilitas amicitias conglutinet, eadem commutata dissolveret: sed quia natura mutari non potest, idcirco veræ amicitiae sempiternæ sunt. Ortum quidem amicitiae videtis, nisi quid ad hæc fortè vultis. FANNIUS. Tu verò perge, Læli: pro hoc enim, qui minor est natu, meo jure respondeo. SCÆVOLA. Rectè tu quidem: quamobrem audiamus.

X. LÆLIUS. Audite ergo, optimi viri, ea quæ sæpissime inter me & Scipionem de amicitia differebantur: quamquam ille quidem nihil difficilius esse dicebat, quàm amicitiam usque ad extremum vitæ permanere: nam, vel ut non idem expediret utrique, incidere sæpe; vel ut de republica non idem sentirent: mutari etiam mores hominum sæpe dicebat, aliàs adversis rebus, aliàs ætate ingravescente: atque earum rerum exemplum ex similitudine capiebat ineuntis ætatis, quòd summi puerorum amores sæpe unà cum prætexta ponerentur.

34. Sin autem ad adolescentiam perduxissent; dirimi tamen interdum contentione, vel uxoriæ conditionis, vel commodi alicujus, quod idem adipisci utrique non posset. Quòd si qui longius in amicitia provecti essent, tamen sæpe la-

befactari, si in honoris contentionem incidissent: pestem enim majorem esse nullam in amicitiiis, quàm in plerisque pecuniæ cupiditatem; in optimis quibusque honoris certamen, & gloriæ; ex quo inimicitias maximas sæpe inter amicissimos exstitisse.

35. Magna etiam dissidia, & plerumque justa nasci, quum aliquid ab amicis, quod rectum non esset, postularetur; ut aut libidinis ministri, aut adjutores essent ad injuriam: quod qui recusarent, quamvis honestè id facerent, jus tamen amicitiae deserere arguerentur ab iis, quibus obsequi nollent: illos autem, qui quidvis ab amico auderent postulare, postulacione ipsâ profiteri, omnia se amici causâ esse facturos: eorum querelâ inveteratas non modò familiaritates exstingui solere, sed etiam odia gigni sempiterna. Hæc ita multa, quasi fata, impendere amicitiiis, ut omnia subterfugere non modò sapientiae, sed etiam felicitatis diceret sibi videri.

XI. Quamobrem id primùm videamus, si placet, quatenus amor in amicitia progredi debeat. Num, si Coriolanus habuit amicos, ferre contra patriam arma illi cum Coriolano debuere? num Viscellinum amici regnum appetentem, num Sp. Mælium debuerunt juvare?

R. iij

37. Tib. quidem Gracchum rempublicam vexantem, a Q. Tuberone, æqualibusque amicis derelictum videbamus. At C. Blossius, Cumanus, hospes familiæ vestræ, Scævola, quum ad me, qui aderam Lænati & Rupilio consulibus in consilio, deprecatum venisset, hanc, ut sibi ignoscerem, causam afferebat, quòd tanti Tib. Gracchum fecisset, ut, quidquid ille vellet, sibi faciendum putaret. Tum ego, Etiamne, si te in Capitolium faces ferre vellet? *Numquam*, inquit, *voluisset id quidem*. Sed, si voluisset? *Paruisssem*. Videntis, quàm nefaria vox: & hercle ita fecit, vel plus etiam, quàm dixit: non enim paruit ille Tib. Gracchi temeritati, sed præfuit; nec se comitem illius furoris, sed ducem præbuit: itaque hac amentia, quæstione novâ perterritus, in Asiam profugit, ad hostes se contulit, pœnas reipublicæ graves justasque persolvit. Nulla est igitur excusatio peccati, si amici causâ peccaveris: nam, quum conciliatrix amicitiae virtutis opinio fuerit, difficile est amicitiam manere, si a virtute defeceris.

38. Quòd si rectum statuerimus, vel concedere amicis, quidquid velint, vel impetrare ab iis, quidquid velimus, perfectâ quidem sapientiâ sumus, si nihil habeat res vitii; sed loquimur de iis amicis, qui ante oculos sunt, quos videmus, aut

de quibus memoriam accepimus, aut quos novit vita communis : ex hoc numero nobis exempla sumenda sunt ; & eorum quidem maximè, qui ad sapientiam proximè accedunt.

39. Videmus Papum Æmilium C. Lucino familiarem fuisse (sic a patribus accepimus) bis unà consules , & collegas in censura : tum & cum iis , & inter se conjunctissimos fuisse , M. Curium , & T. Coruncanium , memoriæ proditum est. Igitur ne suspicari quidem possumus , quemquam horum ab amico quippiam contendisse , quod contra fidem , contra jusjurandum , contra rempublicam esset : nam hoc quidem in talibus viris quid attinet dicere , si contendisset , impetratum non fuisse ? quum illi sanctissimi viri fuerint ; æquè autem nefas sit , tale aliquid & facere rogatum , & rogare. At verò Tib. Gracchum sequebantur C. Carbo , C. Cato , & minimè tunc quidem Caius frater , nunc idem acerrimus.

XII. Hæc igitur lex in amicitia fanciatur , ut neque rogemus res turpes , nec faciamus rogati : turpis enim excusatio est , & minimè accipienda , quum in ceteris peccatis , tum si quis contra rempublicam se amici causâ fecisse fateatur. Etenim eo loco , Fanni & Scævola , locati sumus , ut nos longè prospicere oporteat futuros ca-

fus reipublicæ. Deflexit enim jam aliquantulum de spatio curriculoque consuetudo majorum. Tib. Gracchus regnum occupare conatus est, vel regnavit is quidem paucos menses. Num quid simile populus Romanus audierat, aut viderat.

41. Hunc etiam post mortem secuti amici & propinqui, quid in P. Scipionem effecerint, sine lacrymis non queo dicere: nam Carbonem quoquo modo potuimus, propter recentem pœnam Tib. Gracchi, sustinuimus. De C. Gracchi autem tribunatu, quid exspectem, non libet augurari: serpit enim deinde res, quæ proclivius ad perniciem, quum semel cœpit, labitur. Videtis in tabella jam antè quanta sit facta labe, primò Gabiniâ lege, biennio autem post, Cassiâ. Videre jam videor populum a senatu disjunctum, multitudinisque arbitrio res maximas agi. Plures enim discent, quemadmodum hæc fiant, quàm quemadmodum his resistatur.

42. Quorsum hæc? quia sine sociis nemo quidquam tale conatur. Præcipiendum est igitur bonis, ut, si in ejusmodi amicitias ignari casu aliquo inciderint, ne existiment, ita se alligatos, ut ab amicis, magnâ aliquâ re in rempublicam peccantibus, non discedant: improbis autem pœna statuenda est; nec verò minor iis, qui secuti erunt alterum, quàm iis, qui ipsi

fuerint impietatis duces. Quis clarius in Græcia Themistocle ? quis potentior ? qui quum imperator bello Persico servitute Græciam liberasset, propterque invidiam in exilium pulsus esset, ingratae patriæ injuriam non tulit, quam ferre debuit. Fecit idem, quod xx annis antè apud nos fecerat Coriolanus. His adjutor contra patriam inventus est nemo : itaque mortem sibi uterque conscivit.

43. Quare talis improborum consensio non modò excusatione amicitiae tegenda non est, sed potius omni supplicio vindicanda ; ut ne quis sibi concessum putet, amicum, vel bellum patriæ inferentem, sequi : quod quidem, ut res cœpit ire, haud scio, an aliquando futurum sit. Mihi autem non minori curæ est, qualis respublica post mortem meam futura sit, quam qualis hodie sit.

XIII. Hæc igitur prima lex amicitiae sancitur, ut ab amicis honesta petamus, amicorum causâ honesta faciamus ; ne expectemus quidem, dum rogemur : studium semper adsit, cunctatio absit : consilium verò dare gaudeamus liberè : plurimùm in amicitia amicorum bene suadentium valeat auctoritas : eaque adhibeatur ad monendum non modò apertè, sed etiam acriter, si res postulabit ; & adhibita pareatur.

45. Nam quibusdam, quos audio sapientes habitos in Græcia, placuisse opinor mirabilia quædam; sed nihil est, quod illi non persequantur suis argutiis: partim fugiendas esse nimias amicitias, ne necesse sit unum sollicitum esse pro pluribus: fatis superque esse sibi suarum cuique rerum: alienis nimis implicari molestum esse: commodissimum esse, quàm laxissimas habenas habere amicitiae; quas vel adducas, quum velis, vel remittas: caput enim esse ad beatè vivendum, securitatem; quâ frui non possit animus, si tamquam parturiant unus pro pluribus.

46. Alios autem dicere aiunt multò etiam inhumanius (quem locum breviter perstrinxi paulò antè) præsidiij adjumenti-que causâ, non benevolentiae, neque caritatis, amicitias esse expetendas: itaque ut quisque minimùm firmitatis habeat, minimùmque virium, ita amicitias appetere maximè: ex eo fieri, ut mulierculæ magis amicitiarum præsidia quærant, quàm viri; & inopes, quàm opulenti; & calamitosi, quàm ii, qui putentur beati.

47. O præclaram sapientiam! Solem enim e mundo tollere videntur, qui amicitiam e vita tollunt; quâ a diis immortalibus nihil melius habemus, nihil jucundius: quæ est enim ista securitas? specie quidem, blanda, sed reapse multis locis

repudianda. Neque enim est consentaneum, ullam honestam rem actionemve, ne sollicitus sis, aut non suscipere, aut susceptam deponere. Quòd si curam fugimus, virtus fugienda est; quæ necesse est, cum aliqua cura res sibi contrarias aspernetur atque oderit; ut bonitas malitiam, temperantia libidinem, ignaviam fortitudo. Itaque videas rebus injustis justos maximè dolere, imbecilibus fortes, flagitiosis modestos. Ergo hoc proprium est animi bene constituti, & lætari bonis rebus, & dolere contrariis.

48. Quamobrem si cadit in sapientem animi dolor (qui profectò cadit, nisi ex ejus animo extirpatam humanitatem arbitremur) quæ causa est, cur amicitiam funditus tollamus e vita, ne aliquas propter eam suscipiamus molestias? Quid enim interest, motu animi sublato, non dico inter hominem & pecudem, sed inter hominem & saxum, aut truncum, aut quidvis generis ejusdem? Neque enim sunt isti audiendi, qui virtutem duram, & quasi ferream esse quamdam volunt; quæ quidem est quum multis in rebus, tum in amicitia, tenera atque tractabilis; ut & bonis amici quasi diffundantur, & incommodis contrahantur. Quamobrem angor iste, qui pro amico sæpe capiendus est, non tantum valet, ut tollat e

vita amicitiam ; non plus , quàm ut virtutes , quia nonnullas curas & molestias afferunt , repudientur.

XIV. Quum autem contrahat amicitiam (ut suprà dixi) si qua significatio virtutis eluceat , ad quam se similis animus applicet & adjungat ; id quum contingit , amor exoritur necesse est. Quid enim tam absurdum , quàm delectari multis inanibus rebus , ut honore , ut gloriâ , ut ædificio , ut vestitu cultuque corporis ; animo autem virtute prædito , eo , qui vel amare , vel (ut ita dicam) redamare possit , non admodum delectari ? Nihil est enim remuneratione benevolentiae , nihil vicissitudine studiorum officiorumque jucundius.

50. Quòd si etiam illud addimus , quod rectè addi potest , nihil esse , quod ad se rem ullam tam alliciat , tam attrahat , quàm ad amicitiam similitudo ; concedetur profectò verum esse , ut bonos boni diligant , adsciscantque sibi quasi propinquitate conjunctos , atque naturâ. Nihil est enim appetentius similium sui , nihil rapacius , quàm natura. Quamobrem hoc quidem , Fanni & Scævola , constat (ut opinor) bonis inter bonos quasi necessariam benevolentiam esse ; qui est amicitiae fons a natura constitutus : sed eadem bonitas etiam ad multitudinem per-

tinet. Non est enim inhumana virtus ; neque immunis , neque superba ; quæ etiam populos universos tueri , eisquæ optimè consulere soleat : quod non faceret profectò , si a caritate vulgi abhorreret.

51. Atque etiam mihi quidem videntur , qui utilitatis causâ fingunt amicitias , amabilissimum nodum amicitiaë tollere : non enim tam utilitas parta per amicum , quàm amici amor ipse delectat , tumque illud fit , quod ab amico est profectum , jucundum , si cum studio est profectum : tantumque abest , ut amicitiaë propter indigentiam colantur , ut ii , qui opibus & copiis , maximèque virtute præditi , in qua plurimum est præsidii , minimè alterius indigeant , liberalissimi sint , & beneficentissimi. Atque haud scio , an ne opus sit quidem , nihil umquam omnino deesse amicis : ubi enim studia nostra viguissent , si numquam consilio , numquam operâ nostrâ , nec domi nec militia Scipio eguisset ? Non igitur utilitatem amicitia , sed utilitas amicitiam consecuta est.

XV. Non ergo erunt homines deliciis diffuentes audiendi , si quando de amicitia , quam nec usu , nec ratione habent cognitam , disputabunt. Nam quis est , proh deûm fidem , atque hominum ! qui velit , ut neque diligat quemquam , nec

ipse ab ullo diligatur, circumfluere omnibus copiis, atque in omnium rerum abundantia vivere? hæc enim est tyrannorum vita; in qua nimirum nulla fides, nulla caritas, nulla stabilis benevolentiae potest esse fiducia: omnia semper suspecta, atque sollicita: nullus locus amicitiae.

53. Quis enim aut eum diligit, quem meruit; aut eum, a quo se metui putat? Coluntur tamen simulatione duntaxat ad tempus. Quod si fortè (ut fit plerumque) ceciderint; tum intelligitur, quàm fuerint inopes amicorum: quod Tarquinius dixisse ferunt tum exsulantem se intellexisse, quos fidos amicos habuisset, quos infidos, quum jam neutris gratiam referre posset: quamquam miror, illâ superbiâ & importunitate si quemquam habere potuit.

54. Atque ut hujus, quem dixi, mores, veros amicos parare non potuere; sic multorum opes præpotentium excludunt amicitias fideles. Non enim solum ipsa fortuna cæca est, sed eos etiam plerumque efficit cæcos, quos complexa est. Itaque efferuntur illi ferè fastidio & contumaciâ; neque quidquam insipiente fortunato intolerabilius fieri potest. Atque hoc quidem videre licet, eos, qui antea commodis fuerunt moribus, imperio,

potestate, prosperis rebus immutari, sper-
nique ab iis veteres amicitias, indulgeri
novis.

55. Quid autem stultius, quàm, quum
plurimùm copiis, facultatibus, opibus
possint, cetera parare, quæ parantur
pecuniâ, equos, famulos, vestem egre-
giam, vasa pretiosa; amicos non parare;
optimam & pulcherrimam vitæ, ut ita
dicam, supellectilem? Etenim. cetera
quum parant, cui parent, nesciunt, nec
eius causâ laborent: ejus enim est isto-
rum quidque, qui vincit viribus: ami-
citiarum sua cuique permanet stabilis &
certa possessio; ut, etiam si illa ma-
neant, quæ sunt quasi donæ fortunæ,
tamen vita inculta & deserta ab amicis
non possit esse jucunda. Sed hæc hætenus.

XVI. Constituendi autem sunt, qui
sint in amicitia fines, & quasi termini
diligendi; de quibus tres video senten-
tias ferri, quarum nullam probo: unam,
ut eodem modo erga amicum affecti-
simus, quo erga nosmet ipsos: alteram,
ut nostra in amicos benevolentia, illorum
erga nos benevolentia pariter æqualiter-
que respondeat: tertiam, ut, quanti quis-
que se ipse facit, tanti fiat ab amicis.

57. Harum trium sententiarum nulli
prorsus assentior: nec enim illa prima
vera est, ut, quemadmodum in se. quis-

que, sic in amicum sit animatus. Quàm multa enim, quæ nostrâ causâ numquam faceremus, facimus causâ amicorum? precari ab indigno, supplicare; tum acerbius in aliquem invehi, insectarique vehementius; quæ in nostris rebus non satis honestè, in amicorum fiunt honestissimè: multæ quoque res sunt, in quibus de suis commodis viri boni multa detrahunt, detrahique patiuntur, ut iis amici potius, quàm ipsi, fruantur.

§ 8. Altera sententia est, quæ definit amicitiam paribus officiis ac voluntatibus; hoc quidem est nimis exiguè & exiliter ad calculos vocare amicitiam, ut par sit ratio acceptorum & datorum. Divitior mihi, & affluentior videtur esse vera amicitia; nec observare restrictè, ne plus reddat, quàm acceperit: neque enim verendum est, ne quid excidat, aut ne quid in terram defluat, aut ne plus æquo quid in amicitiam congeratur.

§ 9. Tertius verò ille finis deterrimus; ut, quanti quisque se ipse faciat, tanti fiat ab amicis: sæpe enim in quibusdam aut animus abjectior est, aut spes amplificandæ fortunæ fractior: non est igitur amici, talem esse in eum, qualis ille in se est; sed potius eniti & efficere, ut amici jacentem animum excitet, inducatque in spem cogitationemque meliorem.

Alius igitur finis veræ amicitiae constituendus est, si prius, quid maximè reprehendere Scipio solitus sit, edixero. Negabat ullam vocem inimiciorem amicitiae potuisse reperiri, quàm ejus, qui dixisset, ita amare oportere, ut si aliquando esset osurus: nec verò se adduci posse, ut hoc, quemadmodum putaretur, a Biante esse dictum crederet; qui sapiens habitus esset unus e septem; sed impuri cujusdam, aut ambitiosi, aut omnia ad suam potentiam revocantis esse sententiam. Quonam enim modo quisquam amicus esse poterit, cui se putabit inimicum esse posse? quin etiam necesse erit cupere & optare, ut quàm sæpissimè peccet amicus, quò plures det sibi tamquam ansas ad reprehendendum: rursus autem rectè factis commodisque amicorum necesse erit angere, dolere, invidere.

60. Quare hoc quidem præceptum, cujuscumque est, ad tollendam amicitiam valet. Illud potius præcipiendum fuit, ut eam diligentiam adhiberemus in amicitiis comparandis, ut ne quando amare inciperemus eum, quem aliquando odisse possemus: quin etiam si minùs felices in deligendo fuisset, ferendum id Scipio potius, quàm inimiciarum tempus cogitandum, putabat.

XVII. His igitur finibus utendum ar-

bitror, ut quum emendati mores amicorum sint, tum sit inter eos omnium rerum, consiliorum, voluntatum, sine ulla exceptione communitas: ut etiam si qua fortuna acciderit, ut minùs justæ amicorum voluntates adjuvandæ sint, in quibus eorum aut caput agatur, aut fama, declinandum sit de via, modò ne summa turpitudine sequatur: est enim quatenus amicitia dari venia possit: nec verò negligenda est fama; nec mediocrè telum ad res gerendas existimare oportet benevolentiam civium; quàm blanditiis & assentando colligere turpe est: virtus, quam sequitur caritas, minimè repudianda est.

62. Sed sæpe (redeo enim ad Scipionem, cujus omnis sermo erat de amicitia) querebatur, quòd omnibus in rebus homines diligentiores essent; ut capras & oves quot quisque haberet, dicere posset: amicos quot haberet, non posset dicere: & in illis quidem parandis adhibere curam, in amicis eligendis negligentes esse: nec habere quasi signa quædam, & notas, quibus eos, qui ad amicitiam essent idonei, judicarent. Sunt igitur firmi, & stabiles, & constantes eligendi; cujus generis est magna penuria; & judicare difficile est sanè, nisi expertum: experiendum autem est in ipsa amicitia:

ita præcurrit amicitia iudicium, tollitque experiendi potestatem.

63. Est igitur prudentis, sustinere, ut currum, sic impetum benevolentiae; quod utamur quasi equis tentatis, sic amicitiiis, aliquâ parte periclitatis moribus amicorum. Quidam sæpe in parva pecunia perspiciuntur, quàm sint leves: quidam, quos parva movere non potuit, cognoscuntur in magna. Sin verò erunt aliqui reperti, qui pecuniam præferre amicitiae, fordidum existiment; ubi eos inveniemus, qui honores, magistratus, imperia, potestates, opes amicitiae non anteponent? ut, quum ex altera parte proposita hæc sint, ex altera jus amicitiae, non multò illa malint? imbecilla enim natura est ad contemnendam potentiam; quam etiam si neglectâ amicitia consecuti sunt, obscuratum iri arbitrantur, quia non sine magna causa sit neglecta amicitia.

64. Itaque veræ amicitiae difficillimè reperiuntur in iis, qui in honoribus reque publica versantur. Ubi enim istum invenias, qui honorem amici anteponat suo? Quid? hæc ut omittam, quàm graves, quàm difficiles plerisque videntur calamitatum societates? ad quas non est facile inventu, qui descendat. Quamquam Ennius rectè:

Amicus certus in re incerta cernitur:

404 *DE AMICITIA.*

tamen hæc duo levitatis & infirmitatis plerofque convincunt ; aut si in bonis rebus contemnunt , aut si in malis deferunt.

XVIII. Qui igitur utraque in re gravem , constantem , stabilem se in amicitia præstiterit , hunc ex maximè raro hominum genere judicare debemus , & pene divino. Firmamentum autem stabilitatis constantiæque ejus , quam in amicitia quærimus , fides est : nihil enim stabile est , quod infidum est. Simplicem præterea , & communem , & consentientem , qui rebus iisdem moveatur , eligi par est ; quæ omnia pertinent ad fidelitatem : neque enim fidum potest esse multiplex ingenium , & tortuosum. Neque verò , qui non iisdem rebus movetur , & naturâ consentit , aut fidus , aut stabilis potest esse. Addendum eodem est , ut ne criminibus aut inferendis delectetur , aut credat oblati ; quæ omnia pertinent ad eam , quam jamdudum tracto , constantiam. Ita fit verum illud , quod initio dixi , amicitiam , nisi inter bonos , esse non posse : est enim boni viri (quem eundem sapientem licet dicere) hæc duo tenere in amicitia ; primum , ne quid fictum sit , neve simulatum : apertè enim vel odisse , magis ingenui est , quàm fronte occultare sententiam : deinde non

solum ab aliquo allatas criminationes repellere, sed ne ipsum quidem esse suspiciosum, semper aliquid existimantem ab amico esse violatum.

66. Accedat huc suavitas quædam oportet sermonum atque morum, haudquam mediocre condimentum amicitiae. Tristitia autem, & in omni re severitas, habet illa quidem gravitatem; sed amicitia remissior esse debet, & liberior, & dulcior, & ad omnem comitatem facilitatemque proclivior.

XIX. Existit autem hoc loco quædam quæstio subdifficilis, num quando amici novi, digni amicitia, veteribus sint antepponendi, ut equis vetulis teneros antepondere solemus. Indigna homine dubitatio: non enim amicitiarum esse debent, sicut aliarum rerum, satietates. Veterissima quæque (ut ea vina, quæ vetustatem ferunt) esse debent suavissima; verumque illud est, quod dicitur, multos modios salis simul edendos esse, ut amicitiae munus expletum sit.

68. Novitates autem, si spem afferunt, ut, tamquam in herbis non fallacibus, fructus appareat, non sunt illæ quidem repudiandæ; vetustas tamen suo loco conservanda est: maxima est enim vis vetustatis & consuetudinis, ut in ipso equo, cujus modo mentionem feci, si

nulla res impediat, nemo est, qui non eo, quo consuevit, libentius utatur, quàm intractato & novo: nec modò in hoc, quod est animal, sed in iis etiam, quæ sunt inanimata, consuetudo valet; quum locis etiam ipsis montuosis delectemur, & silvestribus, in quibus diutius commorati sumus.

69. Sed maximum est in amicitia, superiorem parem esse inferiori: sæpe enim excellentiæ quædam sunt; qualis erat Scipionis in nostro, ut ita dicam, grege. Numquam se ille Philo, numquam Rupilio, numquam Mummio anteposuit, numquam inferioris ordinis amicis. Q. verò Maximum fratrem, egregium virum, omnino sibi nequaquam parem, quòd is anteibat ætate, tamquam superiorem colebat; suosque omnes per se esse ampliores volebat.

70. Quod faciendum imitandumque est omnibus: ut, si quam præstantiam virtutis, ingenii, fortunæ consecuti sunt, impertiant eam suis, communicentque cum proximis: ut, si parentibus nati sint humilibus, si propinquos habeant imbecilliores vel animo, vel fortunâ, eorum augeant opes, eisque honori sint & dignitati; ut in fabulis, qui aliquamdiu propter ignorationem stirpis & generis in famulatu fuerint, quum cogniti

sunt, & aut deorum, aut regum filii inventi, retinent tamen caritatem in pastores, quos patres multos annos esse duxerunt. Quod quidem est multò perfectò magis in veris patribus certisque faciendum. Fructus enim ingenii & virtutis, omnisque præstantiæ, tum maximus capitur, quum in proximum quemque confertur.

XX. Ut igitur ii, qui sunt in amicitia conjunctionisque necessitudine superiores, exæquare se cum inferioribus debent; sic inferiores non dolere, se a suis amicis aut ingenio, aut fortunâ, aut dignitate superari: quorum plerique aut queruntur semper aliquid, aut etiam exprobrant; eoque magis, si aliquid habere se putant, quod officiosè, & amicè, & cum labore aliquo suo factum queant dicere. Odiosum sanè genus hominum, officia exprobrantium; quæ meminisse debet is, in quem collata sunt, non commemorare, qui contulit.

72. Quamobrem ut ii, qui superiores sunt, summittere se debent in amicitia; sic quodam modo inferiores extollere: sunt enim quidam, qui molestas amicitias faciunt, quum ipsi se contemni putant; quod non ferè contingit, nisi iis, qui etiam contemnendos se arbitrantur, qui hac opinione non modò verbis, sed etiam opere levandi sunt.

73. Tantum autem cuique tribuendum est, primum, quantum ipse efficere possis; deinde etiam, quantum ille, quem diligas atque adjuves, sustinere: non enim tu possis, quantumvis licet excellas, omnes tuos ad honores amplissimos producere; ut Scipio P. Rutilium potuit consulem efficere, fratrem ejus Lucium non potuit. Quod si etiam possis, quidvis deferre ad alterum, videndum est tamen, quid ille possit sustinere.

74. Omnino amicitiae, corroboratis jam, confirmatisque & ingeniis, & aetatibus, judicandae sunt; nec, si qui ineunte aetate venandi, aut pilae studiosi fuerint, eos habere necessarios oportet, quos tum eodem studio praeditos dilexerunt: isto enim modo nutrices & paedagogi jure vetustatis plurimum benevolentiae postulabunt; qui negligendi quidem non sunt, sed alio quodam modo colendi: aliter amicitiae stabiles permanere non possunt. Disparēs enim mores disparia studia sequuntur, quorum dissimilitudo dissociat amicitias: nec ob aliam causam ullam boni, improbi; improbi, bonis amici esse non possunt, nisi quod tanta est inter eos, quanta maxima potest esse, morum studiorumque distantia.

75. Rectè etiam praecipì potest in amicitiiis, ne intemperata quaedam benevolentia

lentia (quod sæpe fit) impediat magnas utilitates amicorum : nec enim (ut ad fabulas redeam) Trojam Neoptolemus capere potuisset , si Lycomedem , apud quem erat educatus , multis cum lacrymis iter suum impredientem , audire voluisset : & sæpe incidunt magnæ res , ut discedendum sit ab amicis ; quas qui impedire vult , quòd desiderium non facile ferat , is & infirmus est mollisque naturâ , & ob eam ipsam causam in amicitia parum justus. Atque in omni re considerandum est , & , quid postules ab amico , & quid patiare a te impetrari.

XXI. Est etiam quasi quædam calamitas in amicitiiis dimittendis nonnumquam necessaria : jam enim a sapientium familiaritatibus ad vulgares amicitias oratio nostra delabitur. Erumpunt sæpe vitia amicorum quum in ipsos amicos , tum in alienos ; quorum tamen ad amicos redundet infamia. Tales igitur amicitiae sunt remissione usûs eluendæ , & (ut Catonem dicere audivi) disfluendæ magis , quàm discindendæ : nisi quædam admodum intolerabilis injuria exarserit , ut neque rectum , neque honestum sit , neque fieri possit , ut non statim alienatio disjunctioque facienda sit.

77. Sin autem morum , aut studiorum commutatio quædam (ut fieri solet)

410 *DE AMICITIA.*

facta erit, aut in reipublicæ partibus defensio intercefferit (loquor enim, ut paulò antè dixi, non de sapientium, sed de communibus amicitiiis) cavendum erit, ne non solùm amicitiae depositae, sed inimicitiae etiam susceptae videantur: nihil enim turpius, quàm cum eo bellum gerere, quicum familiariter vixeris. Ab amicitia Q. Pompeii meo nomine se removerat (ut scitis) Scipio; propter dissensionem autem, quæ erat in republica, alienatus est a collega nostro Metello: utrumque egit graviter, auctoritate, & offensione animi non acerbâ.

78. Quamobrem primùm danda opera est, ne qua amicorum dissidia fiant: sin tale aliquid evenerit; ut extinctæ potius amicitiae, quàm oppressæ esse videantur. Cavendum verò est, ne etiam in graves inimicitias convertant se amicitiae; e quibus jurgia, maledicta, contumeliae generentur: quæ tamen si tolerabiles erunt, ferendæ sunt; & hic honos veteri amicitiae tribuendus est, ut is in culpa sit, qui faciat, non qui patiatur injuriam. Omnino omnium horum vitiorum atque incommodorum una cautio est, atque una provisio, ut ne nimis citò diligere incipiamus, neve indignos.

79. Digni autem sunt amicitia, quibus in ipsis inest causa, cur diligantur.

Rarum genus (& quidem omnia præclara rara) nec quidquam difficilius , quàm reperire , quod sit omni ex parte in suo genere perfectum : sed plerique neque in rebus humanis quidquam bonum norunt , nisi quod fructuosum sit ; & amicos , tamquam pecudes , eos potissimum diligunt , ex quibus sperant se maximum fructum esse capturos.

80. Ita pulcherrimâ illâ & maximè naturali carent amicitia , per se & propter se expetendâ ; nec ipsi sibi exemplo sunt , hæc vis amicitiae qualis & quanta sit. Ipse enim se quisque diligit , non ut aliquam a se ipso mercedem exigat caritatis suæ , sed quod per se sibi quisque carus est : quod nisi idem in amicitiam transferatur , verus amicus numquam reperietur : est enim is quidem tamquam alter idem.

81. Quod si hoc apparet in bestiis , volucris , nantibus , agrestibus , cicuribus , feris , primum ut se ipse diligant (id enim pariter cum omni animante nascitur) deinde ut requirant , atque appetant , ad quas se applicent , ejusdem generis animantes ; idque faciunt cum desiderio , & cum quadam similitudine amoris humani : quanto id magis in homine fit naturâ , qui & se ipse diligit , & alterum anquirat , cujus animum ita cum suo commisceat , ut efficiat pene unum ex duobus ?

XXII. Sed plerique perversè , ne dicam impudenter , amicum habere talem volunt , quales ipsi esse non possunt ; quæque ipsi non tribuunt amicis , hæc ab iis desiderant. Par est autem , primùm ipsum esse virum bonum , tum alterum similem sui quærere : in talibus ea , quam jamdudum tractamus , stabilitas amicitiae confirmari potest ; quum homines benevolentia conjuncti , primùm cupiditatibus iis , quibus ceteri serviunt , imperabunt ; deinde æquitatē justitiæque gaudebunt , omniaque alter pro altero suscipiet : neque quidquam umquam nisi honestum & rectum , alter ab altero postulabit ; neque solum colent inter se , ac diligunt , sed etiam verebuntur : nam maximum ornamentum amicitiae tollit , qui ex ea tollit verecundiam.

83. Itaque in iis perniciosus est error , qui existimant , libidinum peccatorumque omnium patere in amicitia licentiam. Virtutum amicitia adiutrix a natura data est , non vitiorum comes ; ut , quoniam solitaria non posset virtus ad ea , quæ summa sunt , pervenire , conjuncta & consociata cum altera perveniret ; quæ si quos inter societas aut est , aut fuit , aut futura est , eorum est habendus ad summum naturæ bonum optimus beatissimisque comitatus.

84. Hæc est, inquam, societas, in qua omnia insunt, quæ putant homines expetenda, honestas, gloria, tranquillitas animi, atque jucunditas; ut, quum hæc adsint, beata vita sit, & sine his esse non possit. Quod quum optimum maximumque sit, si id volumus adipisci, virtutis opera danda est; sine qua neque amicitiam, neque ullam rem expetendam consequi possumus: eâ verò neglectâ, qui se amicos habere arbitrantur, tum se denique errasse sentiunt, quum eos gravis aliquis casus experiri cogit.

85. Quocirca (dicendum est enim sæpius) quum judicaveris, diligere oportet; non quum dilexeris, judicare. Sed quum multis in rebus negligentiam plectimur; tum maximè in amicis & diligendis & colendis: præposteris enim utimur consiliis, & acta agimus, quod vetamur veteri proverbio. Nam implicati ultro & citro, vel usu diuturno, vel etiam officiis, repente in medio cursu amicitias, exortâ aliquâ offensione, dirumpimus.

XXIII. Quò etiam magis vituperanda est rei maximè necessariæ tanta incuria. Una est enim amicitia in rebus humanis, de cuius utilitate omnes uno ore consentiunt. Quamquam a multis ipsa virtus contemnitur, & venditatio quædam atque ostentatio esse dicitur: multi divitias de-

spiciunt, quos parvo contentos tenuis victus cultusque delectat: honores verò, quorum cupiditate quidam inflammantur, quàm multi ita contemnunt, ut nihil inanius, nihil levius esse existiment? itemque cetera, quæ quibusdam admirabilia videntur, permulti sunt, qui pro nihilo putent: de amicitia omnes ad unum idem sentiunt; & ii qui ad rempublicam se contulerunt; & ii, qui rerum cognitione doctrinæque delectantur; & ii, qui suum negotium gerunt otiosi; postremò ii, qui se totos tradiderunt voluptatibus, sine amicitia vitam esse nullam sentiunt, si modò velint aliqua ex parte liberaliter vivere. Serpit enim nescio quomodo per omnium vitam amicitia; nec ullam ætatis, degendæ rationem patitur esse expertem sui.

87. Quin etiam si quis eâ asperitate est, & immanitate naturæ, congressus ut hominum fugiat atque oderit, qualem fuisse Athenis Timonem nescio quem accepimus; tamen is pati non possit, ut non anquirat aliquem, apud quem evomat virus acerbitalis suæ. Atque hoc maximè judicaretur, si quid tale posset contingere, ut aliquis nos deus ex hac hominum frequentia tolleretur, & in solitudine uspiam collocaret, atque ibi supeditans omnium rerum, quas natura

desiderat , abundantiam & copiam , hominis omnino adspiciendi potestatem eriperet : quis tam esset ferreus , qui eam vitam ferre posset , cuique non auferret fructum voluptatum omnium solitudo ?

88. Verum ergo illud est , quod a Tarentino Archyta , ut opinor , dici solitum , nostros senes commemorare audiui , ab aliis senibus auditum : » Si quis » in cœlum adscendisset , naturamque » mundi , & pulchritudinem siderum per- » spexisset , insuavem illam admirationem ei fore , quæ jucundissima fuisset , » si aliquem , cui narraret , habuisset. » Sic natura solitarium nihil amat , semperque ad aliquod tamquam adminiculum annititur ; quod in amicissimo quoque dulcissimum est.

XXIV. Sed quum tot signis eadem natura declaret , quid velit , anquirat , ac desideret ; obsurdescimus tamen nescio quomodo , nec ea , quæ ab ea monemur , audimus. Est enim varius & multiplex usus amicitiae , multæque causæ suspicionum offensionumque dantur ; quas tum evitare , tum elevare , tum ferre , sapientis est. Una illa subeunda offensio est , ut & veritas in amicitia , & fides retineatur : nam & monendi amici sæpe sunt , & objurgandi ; & hæc accipienda amicè , quum benevolè fiunt.

89. Sed nescio quomodo verum est ,
quod in Andria familiaris meus dicit :

Obsequium amicos , veritas odium parit.

Molesta veritas est , si quidem ex ea nascitur odium (quod est venenum amicitiae) sed obsequium multò molestius , quod peccatis indulgens , præcipitem amicum ferri sinit : maxima autem culpa in eo est , qui & veritatem aspernatur , & in fraudem obsequio impellitur. Omni igitur hac in re habenda ratio & diligentia est ; primùm , ut monitio acerbitate , deinde objurgatio contumeliâ careat : in obsequio autem (quoniam Terentiano verbo lubenter utimur) comitas adsit ; assentatio , vitiorum adjutrix , procul amoveatur ; quæ non modò amico , sed ne libero quidem digna est : aliter enim cum tyranno , aliter cum amico vivitur.

90. Cujus autem aures veritati clausæ sunt , ut ab amico verum audire nequeant , hujus salus desperanda est : scitum est enim illud Catonis , ut multa :
» Meliùs de quibusdam acerbos inimicos
» mereri , quàm eos amicos , qui dulces
» videantur : illos verum sæpe dicere ,
» hos numquam. » Atque illud absurdum est , quòd ii , qui monentur , eam molestiam , quam debent capere , non ca-

piunt; eam capiunt, quâ debent vacare: peccasse enim se non anguntur, objurgari molestè ferunt; quod contra oportebat, delicto dolere, correctione gaudere.

XXV. Ut igitur & monere, & mone-
ri, proprium est veræ amicitiae; & alte-
rum liberè facere, non asperè; alte-
rum patienter accipere, non repugnan-
ter: sic habendum est, nullam in amici-
tiis pestem esse majorem, quàm adula-
tionem, blanditiam, assentationem: quam-
vis enim multis nominibus est hoc vitium
notandum, levium hominum atque fallacium, ad voluntatem loquentium omnia, nihil ad veritatem.

92. Quum autem omnium rerum simulatio est vitiosa (tollit enim judicium veri, idque adulterat) tum amicitiae repugnat maximè: delet enim veritatem, sine qua nomen amicitiae valere non potest: nam quum amicitiae vis sit in eo, ut unus quasi animus fiat ex pluribus; qui id fieri poterit, si ne in uno quidem quoque unus animus erit, idemque semper; sed varius, commutabilis, multiplex?

93. Quid enim potest esse tam flexibile, tam devium, quàm animus ejus, qui ad alterius non modò sensum ac voluntatem, sed etiam vultum atque nutum convertitur?

*Negat quis? nego. Ait? aio. Postremò imperavi
egomet mihi,
Omnia assentari,*

ut ait idem Terentius: sed ille sub Gnathonis persona; quod amici genus adhibere, omnino levitatis est.

94. Multi autem Gnathonum similes, quum sint loco, fortunâ, famâ superiores: horum est assentatio molesta, quum ad vanitatem accessit auctoritas.

95. Secerni autem blandus amicus a vero, & internosci tam potest, adhibitâ diligentîâ, quàm omnia fucata, & simulata a sinceris atque veris. Concio, quæ ex imperitissimis constat, tamen judicare solet, quid intersit inter popularem, id est, assentatorem & levem civem, & inter constantem, severum & gravem. Quibus blanditiis C. Papirius nuper influebat in aures concionis, quum ferret legem de tribunis plebis rescindiendis? Dissuasimus nos: sed nihil de me; de Scipione dicam libentiùs.

96. Quanta illa, dii immortales! fuit gravitas? quanta in oratione majestas? ut facile ducem populi Romani diceret. Sed affuistis; & est in manibus oratio: itaque lex popularis suffragiis populi repudiata est. Atque, ut ad me redeam: meministis.

tis, Q. Maximo, fratre Scipionis, & L. Mancino consulibus, quàm popularis lex de sacerdotiis C. Licinii Crassi videbatur: cooptatio enim collegiorum ad populi beneficium transferebatur. Atque is primùm instituit in forum versus agere cum populo. Tamen illius vendibilem orationem religio deorum immortalium, nobis defendentibus, facilè vincebat: atque id actum est prætoris me, quinquennio antè quàm consul sum factus. Itaque rei veritate magis, quàm summâ auctoritate causa illa defensa est.

XXVI. Quòd si in scena, in qua rebus fictis & adumbratis loci plurimum est, tamen verum valet (si modò id patefactum & illustratum est) quid in amicitia fieri oportet, quæ tota veritate perpenditur? in qua nisi (ut dicitur) apertum pectus videas, tuumque ostendas, nihil fidum, nihil exploratum habeas; ne amare quidem, aut amari possis, quum id, quàm verè fiat, ignores. Quamquam ista assentatio quamvis perniciofa sit, nocere tamen nemini potest, nisi ei, qui eam recipit, atque eâ delectatur: ita fit, ut is assentatoribus patefaciat aures suas maxime, qui ipse sibi assentetur, & se maxime ipse delectet.

98. Omnino est amans sui virtus: opti-

mè enim se ipsa novit, quàmque amabilis sit, intelligit: ego autem non de virtute nunc loquor, sed de virtutis opinione: virtute enim ipsâ non tam multi præditi esse, quàm videri volunt. Hos delectat assentatio: his fictus ad ipsorum voluptatem sermo quum adhibetur, orationem illam vanam, testimonium esse laudum suarum putant: nulla est igitur hæc amicitia, quum alter verum audire non vult, alter ad mentiendum paratus est. Nec parasitorum in comoediis assentatio nobis faceta videretur, nisi essent milites gloriosi.

Magnas verò agere gratias Thais mihi?

Satis erat respondere, *magnas: ingentes*, inquit: semper auget assentator id, quod is, cujus ad voluntatem dicitur, vult esse magnum.

99. Quamobrem, quamvis blanda ista vanitas apud eos valeat, qui ipsi illam allectant & invitant; tamen etiam graviores constantioresque admonendi sunt, ut animum advertant, ne callidâ assentatione capiantur: apertè enim adulantem nemo non videt, nisi qui admodum est excors. Callidus ille & occultus ne se insinuet, studiosè cavendum est: nec enim facillimè agnoscitur, quippe qui etiam adve-

fando sæpe assentetur ; & litigare se simulans , blandiatur , atque ad extremum det manus , vinctique se patiatur ; ut is , qui illusus sit , plus vidisse videatur. Quid autem turpius , quàm illudi ? quod ne accidat , magis cavendum est , ut in Epiclero.

*Hodie me ante omnes comicos stultos senes
Versâris , atque luseris lautissimè.*

100. Hæc enim etiam in fabulis stultissima persona est improvidorum & credulorum senum. Sed nescio quo pacto ab amicitiiis perfectorum hominum , id est , sapientium (de hac dico sapientia , quæ videtur in hominem cadere posse) ad leves amicitias deflexit oratio. Quamobrem ad illa prima redeamus , eaque ipsa concludamus aliquando.

XXVII. Virtus , virtus , inquam , C. Fanni , & tu , Q. Muci , & conciliat amicitias , & conservat : in ea est enim convenientia rerum , in ea stabilitas , in ea constantia : quæ quum se extulit , & ostendit lumen suum , & idem adspexit agnovitque in alio ; ad id se admovet , vicissimque accipit illud , quod in altero est ; ex quo eorum exardescit sive amor , sive amicitia : utrumque enim dictum est ab amando : amare autem nihil aliud est ,

nisi eum ipsum diligere , quem ames , nullâ indigentia , nullâ utilitate quaesita ; quæ tamen ipsa efflorescit ex amicitia , etiam si tu eam minùs secutus sis.

101. Hac nos adolescentes benevolentia senes illos L. Paulum , M. Catonem , C. Gallum , P. Nasicam , Tib. Gracchum , Scipionis nostri socerum , dileximus : hæc etiam magis elucet inter æquales , ut inter me & Scipionem , L. Furium , P. Rupilium , Sp. Mummius : vicissim autem senes in adolescentium caritate acquiescimus ; ut ego in vestra , ut in Q. Tuberonis. Equidem etiam admodum adolescentis , P. Rutilii Virginii familiaritate delector. Quoniamque ita ratio comparata est vitæ , naturæque nostræ , ut alia ætas oriatur ; maximè quidem optandum est , ut cum æqualibus possis , quibuscum tamquam e carceribus emissus sis , cum iisdem ad calcem , ut dicitur , pervenire.

102. Sed quoniam res humanæ fragiles caducæque sunt , semper aliqui anquirendi sunt , quos diligamus , & a quibus diligamur : caritate enim , benevolentiaque sublatâ , omnis est e vita sublata jucunditas. Mihi quidem Scipio , quamquam est subito ereptus , vivit tamen , semperque vivet : virtutem enim amavi :

illius viri , quæ extincta non est : nec mihi soli versatur ante oculos , qui illam semper in manibus habui , sed etiam posteris erit clara & insignis : nemo umquam animo , aut spe majora suscipiet , qui sibi non illius memoriam atque imaginem proponendam putet.

103. Equidem ex omnibus rebus , quas mihi aut fortuna , aut natura tribuit , nihil habeo , quod cum amicitia Scipionis possum comparare. In hac mihi de republica consensus , in hac rerum privatarum consilium ; in eadem requies plena oblectationis fuit : numquam illum ne minimam quidem re offendi , quod quidem senserim ; nihil audivi ex eo ipse , quod nollem : una domus erat , idem victus , isque communis : neque solum militia ; sed etiam peregrinationes , rusticationesque communes.

104. Nam quid ego de studiis dicam cognoscendi semper aliquid , atque discendi , in quibus , remoti ab oculis populi , omne otiosum tempus contrivimus ? Quorum rerum recordatio & memoria , si unà cum illo occidisset , desiderium conjunctissimi atque amantissimi viri ferre nullo modo possem : sed nec illa extincta sunt , alunturque potius & augentur cogitatione & memoriâ : & , si illis planè

424 DE AMICITIA.

orbatus essem , magnum tamen affèreret mihi ætas ipsa solatium : diutius enim jam in hoc desiderio esse non possum : omnia autem brevia , tolerabilia esse debent , etiam si magna sint. Hæc habui , de amicitia quæ dicerem. Vos autem hortor , ut ita virtutem locetis , sine qua amicitia esse non potest , ut , eâ exceptâ , nihil amicitia præstabilius putetis.





PARADOXA,

AD M. BRUTUM.

I. ^AANIMADVERTI, Brute, sæpe Catonem, avunculum tuum, quum in senatu sententiam diceret, locos graves ex philosophia tractare, abhorrentes ab hoc usu forensi & publico; sed dicendo consequi tamen, ut illa etiam populo probabilia viderentur: quod eo majus est illi, quàm aut tibi, aut nobis; quia nos eâ philosophiâ plus utimur, quæ peperit dicendi copiam, & in qua dicuntur ea, quæ non multum discrepant ab opinione populari. Cato autem perfectus (meâ sententiâ) Stoicus, & ea sentit, quæ non sanè probantur in vulgus; & in ea est hæresi, quæ nullum sequitur florem orationis, neque dilatat argumentum: minutis interrogatiunculis, quasi punctis, quod proposuit, efficit. Sed nihil est tam incredibile, quod non dicendo fiat probabile; nihil tam horridum, tam in-

cultum , quod non splendescat oratione , & tamquam excolatur : quod quum ita putarem , feci etiam audaciùs , quàm ille ipse , de quo loquor. Cato enim duntaxat de magnitudine animi , de continetia , de morte , de omni laude virtutis , de diis immortalibus , de caritate patriæ , Stoicè solet , oratoriis ornamentis adhibitis , dicere. Ego autem illa ipsa ; quæ vix in gymnasiis , & in otio Stoici probant , ludens conjeci in communes locos ; quæ quia sunt admirabilia , contraque opinionem omnium , ab ipsis etiam *παράδοξα* appellantur. Tentare volui , possentne proferri in lucem , id est , in forum , & ita dici , ut probarentur ; an alia quædam esset erudita , alia popularis oratio : eoque scripsi libentiùs , quòd mihi ista *παράδοξα* quæ appellant , maximè videntur esse Socratica , longèque verissima. Accipies igitur hoc parvum opusculum , lucubratum his jam contractioribus noctibus , quoniam illud majorum vigiliarum munus in tuo nomine apparuit ; & degustabis genus hoc exercitationum earum , quibus uti consuevi , quum ea , quæ dicuntur in scholis *θεωρητὰ* , ad nostrum hoc oratorium transfero dicendi genus. Hoc tamen opus in acceptum ut referas , nihil postulo : non est enim tale , ut in arce poni possit , quasi illa Minerva Phidiæ ; sed tamen , ut ex eadem officina exisse appareat.

PARADOXON I.

Ὅτι μόνον τὰ καλὸν ἀγαθόν.

Quod honestum sit, id solum bonum esse.

I. **V**EREOR, ne cui vestrūm ex Stoicorum hominum disputationibus, non ex meo sensu deprompta hæc videatur oratio: dicam tamen quod sentio; & dicam brevius, quàm res tanta dici poscit. Numquam mehercule ego neque pecunias istorum, neque testa magnifica, neque opes, neque imperia, neque eas, quibus maximè adstricti sunt, voluptates in bonis rebus aut expetendis esse duxi; quippe quum viderem, rebus his circumfluentibus, ea tamen desiderare maximè, quibus abundarent: neque enim expletur umquam, nec satiatur cupiditatis sitis; neque solum ea quæ habent libidine augendi cruciantur, sed etiam amittendi metu. In quo equidem continentissimorum hominum, majorum nostrorum, sæpe requiro prudentiam, qui hæc imbecilla & commutabilia pecuniæ membra, verbo BONA putaverunt appellanda, quum re ac factis longè aliter judicavissent. Potestne bonum cuiquam malo esse? aut

potest quisquam in abundantia bonorum ipse esse non bonus? Atqui ista omnia talia videmus, ut etiam improbi habeant, & obsint probis. Quamobrem licet irrideat, si quis vult; plus apud me tamen vera ratio valebit, quàm vulgi opinio: neque ego umquam bona perdidisse dicam, si quis pecus aut supellectilem amiserit; neque non sæpe laudabo sapientem illum, Biantem, ut opinor, qui numeratur in septem; cujus quum patriam Prienen cepisset hostis, ceterique ita fugerent, ut multa de suis rebus secum asportarent; quum esset admonitus a quodam, ut idem ipse faceret: *Ego verò, inquit, facio: nam omnia mea porto mecum.* Ille hæc ludibria fortunæ ne sua quidem putavit, quæ nos appellamus etiam bona. Quid est igitur, quæret aliquis, bonum? si quid rectè fit, & honestè, & cum virtute, id bene fieri, verè dicitur; &, quod rectum, & honestum, & cum virtute est, id solum opinor Bonum.

II. Sed hæc videri possunt obscuriora, quum lentiùs disputantur. Vitâ aque factis illustranda sunt summorum virorum hæc, quæ verbis subtiliùs, quàm satis est, disputari videntur. Quæro enim a vobis, num ullam cogitationem habuisse videantur ii, qui hanc rempublicam tam præclarè fundatam nobis reliquerunt, aut

argenti ad avaritiam, aut amœnitatum ad delectationem, aut supellectilis ad delicias, aut epularum ad voluptates? Ponite ante oculos unumquemque regum. Vultis a Romulo? vultis post liberam civitatem, ab iis ipsis, qui liberaverunt eam? Quibus tandem gradibus Romulus ascendit in cœlum? iisne, quæ isti bona appellant? an rebus gestis atque virtutibus? Quid? a Numa Pompilio? minúsne gratas diis immortalibus capedines ac fictiles urnulas fuisse, quàm filicatas aliorum pateras arbitramur? Omitto reliquos; sunt enim omnes pares inter se, præter Superbum. Brutum si quis roget, quid egerit in patria liberanda; si quis item reliquos ejusdem consilii socios, quid spectaverint, quid secuti sint; num quis exsistet, cui voluptas, cui divitiæ, cui denique præter officium fortis & magni viri, quidquam aliud propositum fuisse videatur? Quæ res ad necem Porſennæ C. Mucium impulit, sine ulla spe salutis suæ? quæ vis Coclitem contra omnes hostium copias tenuit in ponte solum? quæ patrem Decium, quæ filium devotavit, atque immisit in armatas hostium copias? Quid continentia C. Fabricii, quid tenuitas victûs M. Curii sequebatur? Quid duo propugnacula belli Punici, Cn. & P. Scipiones, qui Carthaginien-

sium adventum corporibus suis intercludendum putaverunt? Quid Africanus major? quid minor? quid inter horum ætates interjectus Cato? quid innumerabiles alii? nam domesticis exemplis abundamus: cogitasse quidquam putamus in vita sibi expetendum, nisi quod laudabile esse, & præclarum videretur?

III. Veniant igitur isti irrisores hujus orationis ac sententiæ; & jam vel ipsi judicent, utrùm se horum alicujus, qui marmoreis testis, ebore & auro fulgentibus, qui signis, qui tabulis, qui cælato auro & argento, qui Corinthiis operibus abundant, an C. Fabricii, qui nihil eorum habuit, nihil habere voluit, similes esse malint? Atque hæc quidem, quæ modò huc, modò illuc transferuntur, facilè adduci solent, ut in rebus bonis esse negent; illud tamen arctè tenent, accuratèque defendunt, voluptatem esse summum bonum: quæ quidem mihi vox pecudum videtur esse, non hominum. Tu, quum tibi sive deus, sive mater (ut ita dicam) rerum omnium, natura, dederit animum, quo nihil est præstantius, neque divinius; sic te ipse abjicies atque prosterne, ut nihil inter te atque inter quadrupedem aliquam putes interesse? Quidquam bonum est, quod non eum, qui id possidet, meliorem facit? Ut enim quis-

que est maximè boni particeps, ita & laudabilis maximè; neque est ullum bonum, de quo non is, qui id habeat, honestè possit gloriari: quid autem est horum in voluptate? melioremne efficit, aut laudabiliorem virum? an quisquam in potiundis voluptatibus gloriando sese, & prædicatione effert? Atqui si voluptas, quæ plurimorum patrociniis defenditur, in rebus bonis habenda non est; eaque, quò est major, eò magis mentem e sua sede & statu dimovet; profectò nihil est aliud bene & beatè vivere, nisi honestè & rectè vivere.

PARADOXON II.

Ὅτι αὐτάρκης ἡ ἀρετὴ πρὸς εὐδαιμονίαν.

In quo virtus sit, ei nihil deesse ad beatè vivendum.

I. **N**EC verò ego M. Regulum ærumnosum, nec infelicem, nec miserum umquam putavi: non enim magnitudo animi ejus excruciabatur a Pœnis, non gravitas, non fides, non constantia, non ulla virtus, non denique animus ipse; qui tot virtutum præsidio, tantoque comitatu, quum corpus ejus caperetur, capi certè

ipse non potuit. Caium verò Marium vidimus , qui mihi secundis in rebus unus ex fortunatis hominibus ; in adversis , unus ex summis viris videbatur ; quo beattius esse mortali nihil potest. Nescis , infane , nescis , quantas vires virtus habeat : nomen tantum virtutis usurpas ; quid ipsa valeat , ignoras. Nemo potest non beatissimus esse , qui est totus aptus ex sese , quique in se uno sua ponit omnia. Cui spes omnis , & ratio & cogitatio pender ex fortuna , huic nihil potest esse certi ; nihil quod exploratum habeat permanfurum sibi unum diem. Eum tu hominem terreto , si quem eris nactus , istis mortis , aut exsilii minis : mihi verò quidquid acciderit in tam ingrata civitate , ne recusanti quidem evenerit , non modò repugnanti. Quid enim ego laboravi , aut quid egi , aut in quo evigilaverunt curæ & cogitationes meæ , si quidem nihil peperit tale , nihil consecutus sum , ut eo statu essem , quem neque fortunæ temeritas , neque inimicorum labefactaret injuria ? Mortemne mihi minitaris , ut omnino ab hominibus , an exsilium , ut ab improbis demigrandum sit ? mors terribilis est iis , quorum cum vita omnia extinguuntur ; non iis , quorum laus emori non potest : exsilium autem illis , quibus quasi circumscriptus est habitandi locus ; non iis ,
qui

qui omnem orbem terrarum, unam urbem esse ducunt. Te miseriæ, te ærumnæ premunt, qui te beatum, qui te florentem putas: tuæ libidines te torquent: tu dies noctesque cruciaris; cui nec sat est, quod est, & id ipsum, ne non sit diuturnum, times: te conscientiæ stimulant maleficiorum tuorum: te metus examinant judiciorum atque legum: quocumque adspexisti, ut furia, sic tuæ tibi occurrunt injuriæ, quæ te respirare non sinunt. Quamobrem ut improbo, & stulto, & inertī nemini bene esse potest; sic bonus vir, & fortis, & sapiens, miser esse nemo potest. Nec verò, cujus virtus moresque laudandi sunt, ejus non laudanda vita est; neque porro fugienda vita, quæ laudanda est: esset autem fugienda, si esset misera. Quamobrem quidquid est laudabile, idem & beatum, & florens, & expetendum videri debet.

PARADOXON III.

Ὅτι ἴσα τὰ ἀμαρτήματα, καὶ τὰ καλορθώματα.
Æqualia esse peccata, & rectè facta.

PARVA, inquis, res est: at magna culpa: nec enim peccata, rerum eventu,
Tomus X. **T**

sed vitiis hominum metienda sunt. In quo peccatur, id potest aliud alio majus esse, aut minùs; ipsum quidem illud peccare, quoquò te verteris, unum est. Auri navem evertat gubernator, an paleæ, in re aliquantulum, in gubernatoris inscientia nihil interest. Lapsa est libido in muliere ignota: dolor ad pauciores pertinet, quàm si petulans fuisset in aliqua generosa ac nobili virgine: peccavit verò nihilò minùs, si quidem est peccare, tamquam transilire lineas; quod quum feceris, culpa commissa est: quàm longè progrediare, quum semel transieris, ad augendam transeundi culpam nihil pertinet. Peccare certè licet nemini: quod autem non licet, id hoc uno tenetur, si arguitur non licere. Id si nec majus, nec minus umquam fieri potest (quoniam in eo est peccatum, si non licuit; quod semper unum, & idem est) quæ ex eo peccata nascuntur, æqualia sint oportet. Quòd si virtutes pares sunt inter se, paria esse etiam vitia necesse est. Atqui pares esse virtutes, nec bono viro meliorem, nec temperante temperantiozem, nec forti fortiozem, nec sapiente sapientiozem posse fieri, facillimè potest perspicui. An virum bonum dices, qui depositum nullo teste, quum lucrari impunè posset, auri pondo decem, reddiderit,

si idem in decem millibus pondo non idem fecerit? aut temperantem eum, qui se in aliqua libidine continuerit, in aliqua effuderit? Una virtus est, consentiens cum ratione & perpetua constantia: nihil huic addi potest, quò magis virtus sit; nihil demi, ut virtutis nomen relinquatur. Etenim si benefacta, rectè facta sunt, & nihil recto rectius; certè ne bono quidem melius quidquam inveniri potest. Sequitur igitur, ut etiam vitia sint paria; siquidem pravitates animi rectè vitia dicuntur. Atqui quoniam pares virtutes sunt, rectè facta, quando a virtutibus proficiuntur, paria esse debent; itemque peccata, quoniam ex vitiis manant, sint æqualia necesse est.

II. A philosophis, inquit, ista sumis. Metuebam, ne a lenonibus diceres. Socrates disputabat isto modo. Bene hercle narras: nam istum doctum & sapientem virum fuisse, memoriæ traditum est. Sed tamen quæro ex te (quando verbis inter nos contendimus, non pugnis) utrùm nobis est quærendum, quid bajuli atque operarii, an quid homines doctissimi senserint? præsertim quum hac sententiâ non modò verior, sed ne utilior quidem hominum vitæ reperiri ulla possit. Quæ vis enim est, quæ magis arceat homines ab improbitate omni, quàm si

senferint, nullum in delictis esse discrimen? æquè peccare se, si privatis, ac si magistratibus manus afferant? quamcumque in domum stuprum intulerint, eandem esse labem libidinis? Nihilne igitur interest (nam hoc dicet aliquis) patrem quis enecet, an servum? Nuda ista si penas, judicari, qualia sint, non facile possunt. Patrem vitâ privare, si per se scelus est; Saguntini, qui parentes suos, liberos emori, quàm servos vivere maluerunt, parricidæ fuerunt. Ergo & parenti nonnumquam adimi vita sine scelere potest; & servo sæpe sine injuria non potest. Causa igitur hæc, non natura distinguit: quæ quando utro accessit, id fit propensius; si utroque adjuncta sit, paria fiant necesse est. Illud tamen interest, quòd in servo necando, si adsit injuria, semel peccatur; in patris vita violanda, multa peccantur. Violatur is, qui procreavit; is, qui aluit; is, qui erudit; is, qui in sede ac domo, atque in republica collocavit: multitudo peccatorum præstat, eoque pœnâ majore dignus est. Sed nos in vita, non quæ cuique peccato pœna sit, sed quantum cuique liceat, spectare debemus: quidquid non oportet, scelus esse; quidquid non licet, nefas putare debemus. Etiamne in minimis rebus? Etiam; si quidem rerum

modum fingere non possumus; animorum modum tenere possumus. Histrion si paulum se movit extra numerum, aut si versus pronuntiatus est syllabâ unâ brevior, aut longior, exhibetur & exploditur: in vita tu, quæ omni gestu moderatior, omni versu aptior esse debet, in syllaba te peccare dices? poetam non audio in nugis; in vitæ societate audiam civem, digitis peccata dimetientem sua? Si visa sunt breviora, leviora videantur. Quî possint videri, quum quidquid peccatur, perturbatione peccetur rationis atque ordinis? perturbatâ autem semel ratione & ordine, nihil possit addi, quo magis peccari posse videatur.

PARADOXON IV.

Ὅτι πᾶς ἄφρων μαίνεται.

Omnem stultum insanire.

I. **E**GO verò te non stultum, ut sæpe; non improbum, ut semper; sed dementem & insanum rebus advincam necessariis. Sapientis animus magnitudine consilii, tolerantia rerum humanarum, contemptione fortunæ, virtutibus denique omnibus, ut mœnibus, septus, vincetur

& expugnabitur, qui ne civitate quidem pelli potest? Quæ est enim civitas? omnine conventus etiam ferorum & immanium? omnine etiam fugitivorum ac latronum congregata unum in locum multitudo? certè negabis. Non igitur erat illa tum civitas, quum leges in ea nihil valebant; quum judicia jacebant; quum mos patrius occiderat; quum ferro pulsus magistratibus, senatus nomen in republica non erat. Prædonum ille concursus, & te duce latrocinium in foro constitutum, & reliquæ conjurationis a Catilinæ furiis ad tuum scelus furoremque conversæ, non civitas erat. Itaque pulsus ego civitate non sum, quæ nulla erat; arcessitus in civitatem sum, quum esset in republica consul, qui tum nullus fuerat; esset senatus, qui tum occiderat; esset consensus populi liber; esset juris & æquitatis (quæ vincula sunt civitatis) repetita memoria. Ac vide, quàm ista tui latrocinii tela contempserim. Jactam & immissam a te nefariam in me injuriam semper duxi; pervenisse ad me nunquam putavi: nisi fortè, quum parietes disturbabas, aut quum tectis sceleratas faces inferebas, aut quum meorum aliquid ruere, aut deflagrare arbitrabare. Nihil neque meum est neque cujusquam, quod auferri, quod eripi, quod amitti potest. Si

mihi eripuisses divinam animi mei constantiam, meas curas, vigilias, consilia, quibus respublica te invitissimo stat: si hujus æterni beneficii immortalem memoriam delevisse: multò etiam magis si illam mentem, unde hæc consilia manarunt, mihi eripuisses; tum ego accepisse me confiterer injuriam. Sed si hæc nec fecisti, nec facere potuisti; reditum mihi gloriosum injuria tua dedit, non exitum calamitosum. Ergo ego semper civis; & tum maximè, quum meam salutem senatus exteris nationibus, ut civis optimi, commendabat; tu, ne nunc quidem; nisi fortè idem esse hostis, & civis potest. An tu civem ab hoste naturâ ac loco, non animo factisque distinguis? Cædem in foro fecisti: armatis latronibus templa tenuisti: privatorum domos, ædes sacras incendiisti. Cur hostis Spartacus, si tu civis? potes autem esse tu civis, propter quem aliquando civitas non fuit? Et me exfulem tuo nomine appellas, quum omnes meo discessu exfulasse rempublicam putent? Numquamne, homo amentissime, te circumspicies? numquamne, quid facias; considerabis, nec quid loquare? nescis exilium scelerum esse pœnam? meum illud iter ob præclarissimas res a me gestas esse susceptum? Omnes scelerati atque impii, quo-

rum tu te ducem esse profiteris ; quos leges exsilio affici volunt , exsules sunt , etiam si solum non mutarunt. An quum omnes leges te exsulem esse jubeant , non eris tu exsul ? Num appellatur inimicus , qui cum telo fuerit ? ante senatum tua sica deprehensa est. Qui hominem occiderit ? tu plurimos occidisti. Qui incendium fecerit ? ædes nympharum manu tuâ deflagrarunt. Qui templa deorum occupaverit ? in foro etiam castra posuisti. Sed quid ego communes leges profero , quibus omnibus es exsul ? Familiarissimus tuus de te privilegium tulit , ut , si in opertum Bonæ Deæ accessisses , exsulares. At te id fecisse , etiam gloriari soles. Quomodo igitur tot legibus in exsiliū ejectus , nomen exsulis nō perhorrescis ? Romæ sum , inquis. Et quidem in operto fuisti. Non igitur ubi quisque erit , ejus loci jus tenebit , si ibi eum legibus esse non oportebit.



PARADOXON V.

Ὅτι μόνος ὁ σοφὸς ἐλεύθερος, καὶ πᾶς ἄφρων δούλος.
*Solum sapientem esse liberum, & omnem stultum
 servum.*

I. **L**AUDETUR verò hic imperator, aut etiam appelletur, aut hoc nomine dignus putetur? quo modo? aut cui tandem hic libero imperabit, qui non potest cupiditatibus suis imperare? Refrenet primum libidines, spernat voluptates, iracundiam teneat, coërceat avaritiam, ceteras animi labeſ repellat: tum incipiat aliis imperare; quum ipſe improbiſſimis dominis, dedecori ac turpitudini parere deſierit: dum quidem hiſ obediet, non modò imperator, ſed liber habendus omnino non erit. Præclarè enim eſt hoc uſurpatum a doctiſſimis, quorum auctoritate non uterem, ſi mihi apud aliquos agreſtes hæc habenda eſſet oratio: quum verò apud prudentiſſimos loquar, quibus hæc inaudita non ſunt; cur ego ſimulem, me, ſi quid in hiſ ſtudiis operæ poſuerim, perdiditſe? Dictum eſt igitur ab erudiſſimis viris, niſi ſapientem, liberum eſſe neminem. Quid eſt enim

T v

libertas? potestas vivendi, ut velis. Quis igitur vivit, ut vult? nisi qui recta sequitur, qui gaudet officio, cui vivendi via considerata atque provisa est; qui legibus quidem non propter metum paret; sed eas sequitur atque colit; quia id salutare maximè esse judicat; qui nihil dicit, nihil facit, nihil cogitat denique, nisi libenter ac liberè; cujus omnia consilia, resque omnes, quas gerit, ab ipso proficiscuntur, eòdemque feruntur; nec est ulla res, quæ plus apud eum polleat, quàm ipsius voluntas atque iudicium; cui quidem etiam (quæ vim habere maximam dicitur) fortuna ipsa cedit, sicut sapiens poëta dixit, *Suis ea cuique fingitur moribus*. Soli igitur hoc contingit sapienti, ut nihil faciat invitus, nihil dolens, nihil coactus: quod etsi ita esse, pluribus verbis differendum est; illud tamen & breve & confitendum est, nisi qui ita sit affectus, esse liberum neminem. Servi igitur, omnes improbi; nec hoc tam re est, quàm dictu inopinatum atque mirabile: non enim ita dicunt, eos esse servos, ut mancipia, quæ sunt dominorum facta nexu, aut aliquo jure civili; sed, si servitus sit, sicut est, obedientia fracti animi, & abjecti, & arbitrio carentis suo, quis neget, omnes leves, omnes cupidos, omnes denique improbos, esse servos?

II. An ille mihi liber, cui mulier imperat? cui leges imponit, præscribit, jubet, vetat quod videtur? qui nihil imperanti negare potest, nihil recusare audet? Poscit? dandum est: vocat? veniendum? ejicit? abeundum: minatur? extimescendum. Ego verò istum non modò servum, sed nequissimum servum, etiam si in amplissima familia natus sit, appellandum puto. Atque ut in magna familia sunt alii lautiores (ut sibi videntur) servi, sed tamen servi, atrienses ac topiarii; pari stultitiâ sunt, quos signa, quos tabulæ, quos cælatum argentum, quos Corinthia opera, quos ædificia magnifica nimio opere delectant. At sumus, inquiunt, civitatis principes. Vos verò ne conservorum quidem vestrorum principes estis. Sed ut in familia, qui tractant ista, qui tergunt, qui ungunt, qui verrunt, qui spargunt, non honestissimum locum servitutis tenent; sic in civitate, qui se istarum rerum cupiditatibus dediderunt, ipsius servitutis locum pene infimum obtinent. Magna, inquis, bella gessi; magnis imperiis & provinciis præfui. Gere igitur animum laude dignum. Echionis tabula te stupidum detinet, aut signum aliquod Polycleti. Omitto, unde sustuleris, & quomodo habeas: intuentem te, admirantem, cla-

mores tollentem quum video , servum te esse ineptiarum omnium judico. Nonne igitur sunt illa festiva ? Sunt : nam nos quicque oculos eruditos habemus : sed obsecro te , ita venusta habeantur ista , non ut vincula virorum sint , sed ut oblectamenta puerorum. Quid enim censes ? si L. Mummius aliquem istorum videret matellionem Corinthium cupidissimè tractantem , quum ipse totam Corinthum contempsisset ; utrùm illum civem excellentem , an atriensem diligentem putaret ? Reviviscat M'. Curius , aut eorum aliquis , quorum in villa ac domo nihil splendidum , nihil ornatum fuit , præter ipsos ; & videat aliquem summis populi beneficiis usum , barbatulos mullos exceptantem de piscina , & pertractantem , & murænarum copiâ gloriantem ; nonne hunc hominem ita servum judicet , ut ne in familia quidem dignum majore aliquo negotio putet ? An eorum servitus dubia est , qui cupiditate peculii nullam conditionem recusant durissimæ servitutis ? hereditatis spes quid iniquitatis in serviendo non suscipit ? quem nutum locupletis orbi senis non observat ? loquitur ad voluntatem ; quidquid denuntiatur sit , facit ; affectatur , assidet , muneratur : quid horum est liberi ? quid denique non servi inertis ?


III. Quid ? jam illa cupiditas (quæ videtur esse liberalior) honoris , imperii , provinciarum , quàm dura est domina ! quàm imperiosa ! quàm vehemens ! Cethego homini non probatissimo servire coëgit eos , qui sibi esse amplissimi videbantur ; munera mittere , noctu venire domum ad eum , precari , denique supplicare : quæ servitus est , si hæc libertas existimari potest ? Quid ? quum cupiditatum dominatus excessit , & alius est dominus exortus ex conscientia peccatorum , timor ? quàm est illa misera , quàm dura servitus ! adolescentibus paulò loquacioribus est serviendum : omnes , qui aliquid scire videntur , tamquam domini , timeantur. Judex verò quantum habet dominatum ? quo timore nocentes afficit ? an non est omnis metus , servitus ? Quid valet igitur illa eloquentissimi viri , L. Crassi , copiosa magis , quàm sapiens oratio ? *Eripite nos ex servitute.* Quæ est ista servitus , tam claro homini , tamque nobili ? Omnis animi debilitati , & humilis , & fracti timiditas , servitus est. *Nolite sinere nos cuiquam servire.* In libertatem vindicari vult ? minimè : quid enim adjungit ? *nisi vobis universis* (dominum mutare , non liber esse vult) *quibus & possumus & debemus.* Nos verò , si quidem animo excelso , & alto , & virtutibus exag-

gerato sumus, nec debemus, nec possumus. Tu posse te dicito, quoniam quidem potes: debere ne dixeris; quoniam nihil quisquam debet, nisi quod est turpe non reddere. Sed hæc hæc hactenus. Ille videat, quomodo imperator esse possit: quum eum ne liberum quidem esse ratio & veritas ipsa convincat.

PARADOXON VI.

Ὅτι μόνος ὁ σοφὸς πλούσιος.

Solum sapientem esse divitem.

I. UÆ est ista in commemoranda pecunia tua tam insolens ostentatio? solusne tu dives? Proh dii immortales! egone me audivisse aliquid, & didicisse, non gaudeam? Solusne tu dives? Quid si ne dives quidem? quid si pauper etiam? Quem enim intelligimus divitem? aut, hoc verbum, in quo homine ponimus? opinor in eo, cui tanta possessio est, ut ad liberaliter vivendum facile contentus sit; qui nihil quærat, nihil appetat, nihil optet amplius. Animus oportet tuus te judicet divitem, non hominum sermo, neque possessiones tuæ: nihil sibi deesse putet, nihil curet amplius. Satiatus est,

aut contentus etiam pecuniâ? concedo; dives es: sin autem propter aviditatem pecuniæ nullum quæstum turpem putas, quum isti ordini ne honestus quidem possit esse ullus: si quotidie fraudas, decipis, poscis, pacisceris, auferis, eripis: si socios spolias, ærarium expilas: si testamenta amicorum exspectas, aut ne exspectas quidem, at ipse supponis; hæc utrùm abundantis, an egentis signa sunt? Animus hominis; dives, non arca appellari solet: quamvis illa sit plena, dum te inanem videbo, divitem non putabo: etenim ex eo, quantum cuique satis est, metiuntur homines divitiarum modum. Filiam quis habet? pecuniâ est opus. Duas? majore. Plures? majore etiam. Et si, ut aiunt Danaï, quinquaginta sint filiæ; tot dotes magnam quærunt pecuniam: quantum enim cuique opus est, ad id accommodatur, ut antè dixi, divitiarum modus. Qui igitur non filias plures, sed innumerabiles cupiditates habet, quæ brevi tempore maximas copias exhaurire possint; hunc quomodo ego appellabo divitem, quum ipse etiam egere se sentiat? Multi ex te audierunt, quum diceres, neminem esse divitem, nisi qui exercitum alere posset suis fructibus; quod populus Romanus tantis vectigalibus jampridem vix potest. Ergo hoc proposito,

numquam eris dives antè, quàm tibi ex tuis possessionibus tantum reficiatur, ut eo tueri sex legiones, & magna equitum ac peditum auxilia possis. Jam fateris igitur non esse te divitem, cui tantum desit, ut expleas id, quod exoptas. Itaque istam paupertatem, vel potius egestatem ac mendicitatem tuam numquam obscure tulisti.


II. Nam ut iis, qui honestè rem quærunt mercaturis faciendis, operis dandis, publicis sumendis, intelligimus opus esse quærito; sic, qui videt domi tuæ pariter accusatorum atque judicum consociatos greges, qui nocentes & pecuniosos reos eodem te auctore corruptelam judicii molientes, qui tuas mercedum pactiones in patrociniis, intercessionibus pecuniarum in coitionibus candidatorum, dimissiones libertorum ad defœnerandas diripiendasque provincias; qui expulsionem vicinorum, qui latrocinia in agris, qui cum servis, cum libertis, cum clientibus societates, qui possessiones vacuas, qui proscriptiones locupletium, qui cædes municipiorum, qui illam Sullani temporis messem recordetur, qui testamenta subiecta, qui sublatos tot homines, qui denique omnia venalia, delectum, decretum, alienam, suam sententiam, forum, domum, vocem, silentium; quis hunc non putet

confiteri, sibi quæsito opus esse? cui autem quæsito opus sit, quis umquam hunc verè dixerit divitem? Est enim divitiarum fructus in copia: copiam autem declarat satietas rerum, atque abundantia; quam tu quoniam numquam assequere, numquam omnino es futurus dives. Meam autem quoniam pecuniam contemnis, & rectè (est enim ad vulgi opinionem mediocris; ad tuam, nulla; ad meam, modica) de me silebo: de re loquar. Si censenda nobis, atque æstimanda res sit, utrùm tandem pluris æstimemus pecuniam Pyrrhi, quam Fabricio dabat, an continentiam Fabricii, qui illam pecuniam repudiabat? utrùm aurum Samnitum, an responsum M'. Curii? hereditatem L. Pauli, an liberalitatem Africani, qui ejus hereditatis Q. Maximo fratri partem suam concessit? Hæc profectò, quæ sunt summarum virtutum, pluris æstimanda sunt, quàm illa quæ sunt pecuniæ. Quis igitur (si quidem, ut quisque, quod plurimi sit, possideat, ita divitissimus habendus sit) dubitet, quin in virtute divitiæ sint? quoniam nulla possessio, nulla vis auri & argenti pluris, quàm virtus, æstimanda est.

III. O dii immortales! non intelligunt homines, quàm magnum vectigal sit parcimonia: venio enim jam ad sumptuosos;

relinquo istum quæstuosum. Capit ille ex suis prædiis sexcenta sestertia, ego centena ex meis: illi aurata tecta in villis, & sola marmorea facienti, & signa, tabulas, supellectilem, & vestem infinitè concupiscenti, non modò ad fructum ille est sumptus, sed etiam ad fœnus, exiguus. Ex meo tenui vectigali, detractis sumptibus cupiditatis, aliquid etiam redundabit. Uter igitur est divitior, cui deest, an cui superat? qui eget, an qui abundat? cujus possessio quò est major, eò plus requirit ad se tuendam; an quæ suis se viribus sustinet? Sed quid ego de me loquor, qui morum ac temporum vicio aliquantùm etiam ipse fortasse in hujus seculi errore verfer? M'. Manilius patrum nostrorum memoriâ (ne semper Curios & Luscinos loquamur) pauper tandem fuit: habuit enim ædiculas in Carinis, & fundum in Labicano. Nos igitur divitiores, qui plura habemus? Utinam quidem! sed non æstimatione censûs, verùm victu atque cultu terminatur pecuniæ modus. Non esse cupidum, pecunia est: non esse emacem, vectigal est: contentum verò suis rebus esse, maximæ sunt certissimæque divitiæ. Etenim si callidi rerum æstimatores, prata & areas quasdam magno æstimant, quòd ei generi possessionum minimè quasi noceri potest;

quanti est æstimanda virtus, quæ nec eripi, nec furripi potest; neque naufragio, neque incendio amittitur; nec tempestatum, nec temporum permutatione mutatur? quâ præditi qui sunt, soli sunt divites: soli enim possident res & fructuosas, & sempiternas; solique (quod est proprium divitiarum) contenti sunt rebus suis. Satis esse putant, quod est; nihil appetunt, nullâ re egent, nihil sibi deesse sentiunt, nihil requirunt. Improbi autem, & avari, quoniam incertas, atque in casu positas possessiones habent, & plus semper appetunt, nec eorum quisquam adhuc inventus est, cui, quod haberet, esset satis, non modò non copiosi ac divites, sed etiam inopes ac pauperes existimandi sunt.



INDEX LIBRORUM,

ad quos pertinent, quæ sequuntur, FRAGMENTA.

Æconomicorum Libri	De Auguriis Liber.
III.	Hortensius, vel, de
Protagoras, ex Platone.	Philosophia.
De Republica Libri VI.	M. Cato, seu, Laus
in quorum ultimo in-	M. Catonis.
est SOMNIUM SCI-	De Gloria Libri II.
PIONIS,	De Consolatione.
De Jure civili Liber.	De suis Consiliis.

452 PHILOSOPHICORUM

De Virtutibus.

De Divinatione.

Chorographia.

De Legibus.

Academicorum Libri IV.

De Fato.

De Natura Deorum.

Timæus, ex Platone.



PHILOSOPHICORUM

FRAGMENTA.

ÆCONOMICORUM LIB. I.

Æconomicum Xenophontis Cicero adolescens admodum convertit (Vide de Officiis 2, 87.) quem librum de tuenda re familiari unicum pro suo arbitratu in tres divisit : quorum primus præcepta habuit , quemadmodum mater familiâs domi agere deberet ; secundus quemadmodum foris pater familiâs ; tertius agri colendi rationem est complexus. PATRICIUS.

PRISC. lib. VIII.] Homo ex eo numero hominum , qui apud nos hoc nomine dignantur.

COLUM. lib. XII. cap. I.] Maritale conjugium sic comparatum est naturâ , ut non solum jucundissima , verum etiam utilissima vitæ societas iniretur , & ne

genus humanum temporis longinquitate occideret: propter hoc mas cum femina est conjunctus: deinde ut ex hac eadem societate mortalibus adjutoria senectutis, nec minùs propugnacula præparentur: tum etiam, quum victus & cultus humanus non, uti feris, in propatulo, ac silvestribus locis, sed domi sub tecto accurandus esset, necessarium fuit, alterutrum foris sub dio esse, qui labore & industriâ compararet; intus, qui tectis reconderet atque custodiret: siquidem vel rusticari, vel navigare, vel etiam alio genere negotiari necesse erat, ut aliquas facultates acquireremus. Quum verò paratæ res sub tectum essent congestæ, alium esse oportuit, qui & illatas custodiret, & cetera conficeret opera, quæ domi deberent administrari. Nam & fruges, & cetera alimenta terrestria indigebant tecto; & ovium ceterarumque pecudum foetus atque fructus clauso custodienda erant; nec minùs reliqua utensilia, quibus aut alitùr hominum genus, aut etiam excolitur. Quare quum & operam, & diligentiam ea, quæ proposuimus, desiderarent, nec exiguâ curâ foris acquirerentur, quæ domi custodiri deberet; jure, ut dixi, a natura comparata est opera mulieris ad domesticam diligentiam, viri autem ad exercitationem

454 *PHILOSOPHICORUM*

forensem & extraneam. Itaque viro calores & frigora perpetienda, tum etiam itinera & labores pacis ac belli, id est, rusticationis & militarium stipendiorum, distribuit; mulieri deinceps, quod omnibus his rebus fecerat inhabilem, domestica negotia curanda tradidit. Et quoniam hunc sexum custodiæ & diligentiae assignaverat, idcirco timidiores reddidit, quam virilem: nam metus plurimum confert ad diligentiam custodiendi. Quod autem necesse erat foris & in aperto victum quærentibus nonnumquam injuriam propulsare, idcirco virum, quam mulierem, fecit audaciorem. Quia verò partis opibus æquè fuit opus memoriâ, & diligentiam; non minorem feminæ, quam viro, earum rerum tribuit possessionem. Tum etiam, quod simplex natura non omnes res commodas amplecti volebat, idcirco alterum alterius indigere voluit; quoniam, quod alteri deest, præstò plerumque est alteri.

COLUM. *lib. XII. cap. 2.*] Nam vetus est proverbium, *paupertatem certissimam esse, quum alicujus indigeas, uti eo non posse*, quia ignoretur, ubi projectum jaceat quod desideretur. Itaque in re familiari laboriosior est negligentia, quam diligentia. Quis enim dubitet, nihil esse pulchrius in omni ratione vitæ, disposi-

tione atque ordine? quod etiam ludicris spectaculis licet sæpe cognoscere. Nam ubi chorus canentium, non certis modis, neque numeris præeuntis magistri consensit, dissonum quiddam ac tumultuosum audientibus canere videtur: at ubi certis numeris ac pedibus, velut factâ conspiratione consensit, atque concinuit; ex ejusmodi vocum concordia non solum ipsis canentibus amicum quiddam & dulce resonat, verum etiam spectantes audientesque lætissimâ voluptate permulcentur.

DONAT. *in Ter.*] Quid igitur, proindeum immortalium! primum eam docebas? quæso.

COLUM.] Præparatis idoneis locis, instrumentum & supellectilem distribuere cœpimus, ac primum ea secrevimus, quibus ad res divinas uti solemus; postea mundum muliebrem, qui ad dies festos comparatur; deinde virilem: item dierum solennium ornatum, nec minùs calceamenta utrique sexui convenientia: tum jam seorsum arma ac tela seponebantur, & in altera parte instrumenta, quibus ad lanificia utuntur: post, quæ ad cibum conficiendum vasa (ut assolent) constituebantur; inde, quæ ad lavationem, quæ ad exornationem, quæ ad mensam quotidianam, atque epulationem, pertinerent, exponebantur: postea ex iis,

456 *PHILOSOPHICORUM*

quibus quotidie utimur, quod menstruum esset, seposuimus; quod annum quoque, in duas partes divisimus: nam sic minùs fallit, qui exitus futurus sit. Hæc postquam omnia secrevimus, tum suo quæque loco disposuimus: deinde quibus quotidie servuli utuntur, quæ ad lanificia, quæ ad cibaria coquenda & conficienda pertinent, hæc ipsa iis, qui uti solent, tradidimus, & ubi ea ponerent, demonstravimus, & ut salva essent, præcepimus. Quibus autem ad dies festos, & ad hospitum adventum utimur, hæc promæ tradidimus, & loca singula demonstravimus, & cuique sua annumeravimus, atque annumerata ipsi exscripsimus, eamque admonuimus, ut quodcumque opus esset, sciret unde daret; & meminisset, atque adnotaret, quid, & quando, & cui dedisset, & quum recepisset, ut quidque suo loco reponeret.

ÆCONOMICORUM LIB. II.

COLUM. lib. II. cap. I.] Utrúmne, Ischomache, inquam, si res familiaris desiderasset, mercari villicum tamquam fabrum, an ipse instituere consuevisti? Ego verò ipse instituo. Etenim qui me absente in meum locum substituitur, & vicarius meæ diligentiae succedit, is ea, quæ ego, scire debet.

ÆCONOMICORUM

ECONOMICORUM LIB. III.

NONIUS. *Interfici.*] Nullo modo facilius arbitror posse neque herbas arefcere, & interfici; neque terram ab sole percoqui.

QUINCT. *lib. XII. cap. 5.* NON. *Profligare.*] Quum verò affectâ jam propè æstate, uvas a sole mitescere tempus est.

MACR. *lib. III. cap. 10.*] Qui neque ferit vitem, neque quæ fata est, diligenter colit; oleum, ficus, poma non habet.

CARIS. *lib. I.*] Apes in alvearium concesserunt.

SERVIUS *in 2. Georg.*] Scrobes,

PROTAGORAS, EX PLATONE.

Hunc Platonis dialogum a Cicerone conversum fuisse Hieronymi, Prisciani, & Donati testimoniis tantum scimus; idque extremo tempore ætatis ab eo factum videtur.

PRISC. *lib. VI.*] Quid tu? unde tandem appares, ô Socrate? an id quidem dubium non est, quin ab Alcibiade?

PRISC. *lib. VIII.*] Nunc a vobis, Protagora & Socrate, postulo, ut de
Tomus X V

458 PHILOSOPHICORUM

isto concedatis alter alteri, & inter vos de hujuscemodi rebus controversemini, non concertetis.

PRISC. lib. VI.] Quæ igitur potest esse indignitas voluptatis ad molestiam, nisi in magnitudine, aut longitudine alterius utrius posita?

DONATUS in PHORMION. [Confirmandi genera compluria.

DE REPUBLICA LIB. I.

Sex libros de republica scripsit Cicero Anno Urbis 699. ætatis 53. Hanc autem disputationem de optimo statu civitatis & de optimo cive in Africani minoris personam, & Philii, & Lælii, & Manilii contulit. Adjunxit adolescentes Q. Tiberonem, P. Rutilium, & duo Lælii generos, Scævolam & Fannium. Suorum de republica librorum multis locis mentionem facit Tullius. Vide de Divinatione 2, 3. Libros de Legibus, & Epist. ad Atticum Libb. 3. 4. 7. &c.

FRONTO.] Nuntiatum est, venire Lælium, domoque jam exisse.

NON. Propter.] Eum quoque ut salutavit, propter Tiberonem jussit assidere.

FRONTO.] Negotii publici expers.

NON. *Citumã.*] Quare si placet ,
deduc orationem tuam de cœlo ad hæc
citumã.

DIOMED.] Quasi alius assimilare rem-
publicam aut melius non possit , aut om-
nino non possit.

NON. *Accommodatum.*] expositamque
ad exemplum nostræ reipublicæ accom-
modabo ad eam , si potero , omnem illam
orationem , quæ est mihi habenda de opti-
mo civitatis statu.

NON. *Urbs a civitate.*] Quam quum
locis manumque sepsissent , ejusmodi con-
junctionem tectorum , oppidum , vel ur-
bem appellarunt , delubris distinctam , spa-
tiisque communibus. Omnis ergo popu-
lus , qui est talis cœtus multitudinis , qua-
lem exposui , civitas est : omnis civitas ,
quæ est constitutio populi , respublica.

FRONTO.] Ut ad eam urbem , quam
incolas , possis adnare.

S. AUGUST. *epist.* 5.] brevi multitudo
diversa atque vaga , concordia civitas
facta erat.

NON. *Cognoscere.*] Cognoscere meher-
cule , inquit , consuetudinem istam , & stu-
dium , sermonemque.

SENECA. *lib.* XIX. *epist.*] duos Romã-
nos reges esse , quorum alter patrem non
habet , alter matrem. Nam de Servii ma-
tre dubitatur. Anti Marci pater quoque

ignoratur. Tantùm hic Marcius , Numæ nepos dicitur.

NON. *Dimittere.*] Tum annui consules, tum demissi populo fasces.

SENECA *lib. XIX. epist.*] provocationem ad populum etiam a regibus fuisse.

NON. *Horrendum ab horrido.*] Horum enim severitatem dicitur inhorruisse primum civitas.

SENECA. *lib. XIX. epist.*] Quem nos dictatorem dicimus , & in historia ita nominari legimus , apud antiquos magister populi vocatus est , quòd , qui ab illo nominatur , magister equitum est.

CIC. VI. *ad Atticum 9.*] Cn. Flavius fastos protulit.

FRONTO.] Ipsa cognitio nos delectavit.

NON. *Æmulus.*] Quomodo enim iudicatur iste optimas , aut optimatium æmulus doctrinâ , artibus , studiis. Audio , quando ?

NON.] Sed audisse te credo , tum verò Platonem , Socrate mortuo , primum in Ægyptum discendi causâ , post in Italiam contendisse.

NON. *Anima.*] Tum virtute , labore , industriâ quæreretur summi viri indolem , nisi nimis animosè ferax natura illum nescio quo pacto.

NON. *Consitura.*] Quæ videlicet ille

non ex agri consitura; quam cernebat, sed ex doctrinæ indiciiis interpretabatur.

NON. *Antiquus, Antiquior.*] Sed quoniam plurima beneficia continet patria, & est antiquior parens, quàm is, qui ut aiunt, creaverit, major ei profectò, quàm parenti, debetur gratia.

NON. *Pignerari.*] Sed ut plurimas & maximas nostri animi, ingenii, consilii prima ipsa sibi ad utilitatem pigneraretur.

NON. *Conducere.*] Facillimam autem in ea republica esse posse concordiam, in qua idem conducat omnibus.

NON. *Firmitudo.*] Habent æquabilitatem quamdam, quâ carere diutius vix possunt liberi, deinde firmitudinem.

NON. *lib. de dott. indagine.*] Nec tantum Carthago habuisset opum sexcentos ferè annos sine consiliis & disciplina.

NON. *Dominatus.*] Quid? tunc quum es iratus, permittis illi iracundiæ dominatum animi tui?

NON. *Anima.*] Ergo non probares consilio pulsas libidines, quæ sunt innumerabiles, iracundias, quæ tenerent omnia? Ego verò nihil isto animo, nihil ita animato homine miserius ducerem.

NON. *Invitare.*] Denique ipsa natura non invitaret solum, sed etiam cogeret.

FRONTO.] Populo gratificans & aliena, & sua.

FRONTO.] Nec verò jam meo nomine abstinet.

NON. *Horrendum ab horrido.*] Sed ut ille , qui navigat , quum subito mare cœpit horrescere.

MACR. *lib. de different. & societatibus Græci Latinique verbi.* Libenter tibi , Læli , uti eum desideras , equidem concessero.

DE REPUBLICA LIBER. II.

NON. *Exsultare.*] Est igitur quiddam turbulentum in hominibus singulis , quod vel exsultat voluptate , vel molestiâ frangitur.

NON. *Volutabundus.*] Cupido autem , & expetenti , & libidinoso , & volutabundo in voluptatibus.

NON. *Anxietudo.*] Qantaque anxietudo prona ad luctum , & mœrens , semperque ipsa se sollicitans.

NON. *Timor & timiditas.*] Esse autem angore & miseriâ afflicta , atque abjecta timiditate & ignaviâ.

NON. *Elidere.*] Ut auriga indoctus e curru trahitur , operitur , eliditur , laniatur.

NON. *Offendere.*] Sed imitor Archytam Tarentinum , qui quum ad villam venisset , & omnia aliter offendisset.

NON. *urbs a civitate.*] quo auctore & principē vocitatur civitas.

NON. *Modicum.*] Statuo esse optimè constitutam rempublicam, quæ ex tribus generibus illis, regali, optimo, & populari confusa modicè, nec puniendo irritet animum immanem ac ferum, nec omnia prætermittendo, licentiâ cives deteriores reddat.

S. AUG. *lib. II. cap. 21. Civit.*] Ut in fidibus, ac tibiis atque cantu ipso, ac vocibus concentus est quidam tenendus ex distinctis sonis, quem immutatum ac discrepantem aures eruditæ ferre non possunt, isque concentus ex dissimillimarum vocum moderatione concors tamen efficitur & congruens; sic ex summis, & infimis, & mediis interjectis ordinibus, ut sonis, moderata ratione civitas consensu dissimillimorum concinit; & quæ harmonia a musicis dicitur in cantu, ea est in civitate concordia, artissimum atque optimum omni in republica vinculum incommutatis, quæ sine iustitia nullo pacto esse potest.

NON. *Projectum.*] Iustitia foras spectat, & projecta tota est, atque eminet.

NON. *Explicare.*] Quæ virtus præter ceteras totam se ad alienas utilitates porrigit, atque explicat.

NON. *Exsultare.* quæ sanguine alitur, atque in omni crudelitate sic exultat, ut vix hominum acerbis funeribus satiatur.

464 *PHILOSOPHICORUM*

NON. lib. de doct. indagine.] Itaque præclara illa institutio Romuli quum ducentos annos & triginta ferè firma mansisset.

NON. Viritim.] Ac primus agros, quos bello Romulus ceperat, divisit viritim civibus.

FRONTO.] Quum aliud nihil domum suam deportavisset.

NON. Pecuniosus.] Multaque ditione ovium & boum, quòd tunc erat res in pecore, & in locorum possessionibus, ex quo pecuniosi & locupletes vocabantur.

GELLIUS lib. 1. cap. 22.] Non gravarer, Læli, nisi & hos velle putarem, & ipse cuperem, te quoque aliquam partem hujus nostri sermonis attingere; præsertim quum heri ipse dixeris, te nobis etiam superfuturum. Verùm, si id quidem fieri non potest, ne desis, omnes te rogamus.

NON. Calumnia.] ut Carneadi respondeatis, qui sæpe optimas causas ingenii calumniâ ludificari solebat.

FRONTO.] Neque enim ad mare admovit, quod ei fuit facillimum.

S. AUG. lib. II. cap. 21. Civit.] Nihil est quod adhuc de republica putem dictum, & quò possim longiùs progredi, nisi sit confirmatum, non modò falsum esse illud, sine injuria non posse, sed hoc

verissimum , sine summa justitia rempublicam regi non posse.

DE REPUBLICA LIBER III.

S. AUG. *lib. IV. contra Pelagium.*] Homo non ut a matre , sed ut a novercâ naturâ editus est in vitam corpore nudo , & fragili , & infirmo ; animo autem anxio ad molestias , humili ad timores , molli ad labores , prono ad libidines : in quo tamen inest tamquam obrutus quidam divinus ignis ingenii & mentis.

SENECA *lib. XIX. epist.*] Quoniam fumus ab ipsa calce ejus interpellatione revocatur.

LACT. *Epitome cap. 1.*] Nullum est jus naturale. Itaque omnes animantes ipsâ ducente naturâ commoda sua defendunt : & ideo justitia , si alienis utilitatibus consulat , suas negligat , stultitia est dicenda. Quòd si omnes populi , penes quos sit imperium , ipsique Romani , qui orbem totum possedere , justitiam sequi velint , ac suum cuique restituere , quod vi & armis occupaverunt , ad casus & egestatem revertentur. Quod si fecerint , justos dicemus quidem , sed tamen stultos judicare necesse est , qui , ut aliis prosint , sibi nocere contendunt.

LACT. *lib. V. cap. 16. Epit. cap. 1.*] Bonus vir si habeat servum fugitivum ,

vel domum insalubrem ac pestilentem, quæ vitia solus sciat, & ideo proscribat, ut vendat; utrūne profitebitur, fugitivum servum, ac pestilentem domum se vendere, an celabit emptorem? Si profitebitur; bonus quidem, quia non fallet, sed tamen stultus iudicabitur, quia vel parvo vendet, vel omnino non vendet. Si celaverit, erit quidem sapiens, quia rei consulit; sed idem malus, quia fallet. Deinde, si reperiat hominem, qui aut aurum pro orichalco, aut argentum pro plumbo vendat per errorem, atque id emere necessitas cogat; utrū dissimulabit, & emet parvo, an potius indicabit? Justus utique dicetur, quia non fefellit, sed idem stultus, qui alteri fecerit lucrum, sibi damnum. Sed facile de damno est. Quid? si vita ejus in periculum veniet, ut eum aliquando necesse sit, aut occupare, aut mori, quid faciet? Potest hoc evenire, ut naufragio facto inveniat aliquem imbecillum, tabulæ inhaerentem; aut victo exercitu, fugiens reperiat aliquem vulneratum, equo insidentem; utrūne aut illum tabulâ, aut hunc equo deturbabit, ut ipse possit evadere? Si volet justus esse, non faciet; sed idem stultus iudicabitur, qui dum alterius vitæ parcat, suam perdet. Si faciet, sapiens quidem videbitur, quia

sibi consulit ; sed & idem malus , quia nocebit.

LACT. *lib. v. cap. 12.*] Quæro , si duo sint , quorum alter optimus vir , æquissimus , summâ justitiâ , singulari fide ; alter insigni scelere & audaciâ existimetur : & si in eo sit errore civitas , ut bonum illum virum , sceleratum , facinorosum , nefarium putet ; contrâ autem , qui sit improbissimus , summâ esse probitate ac fide existimet : proque hac opinione omnium civium , bonus ille vir vexetur , rapiatur , manus ei denique afferantur , effodiantur oculi , damnetur , vinciatur , uratur , exterminetur , egeat ; postremò jure etiam optimo omnibus miserrimus esse videatur ; contrâ autem ille improbus laudetur , colatur , ab omnibus diligatur , omnes ad eum honores , omnia imperia , omnes opes , omnes copiae conferantur ; vir denique optimus omnium existimatione , & dignissimus omni fortunâ judicetur : quis tandem erit tam demens , qui dubitet , utrum se esse malit ?

NON. *Famulatur.*] Est enim genus injustæ servitutis , quum ii sunt alterius , qui sui possunt esse. Quum autem hi famulantur.

NON. *Infestum mare. Myoparo.*] Nam quum quæreretur ex eo , quo scelere
V vj

compulsus mare haberet infestum uno myoparone: Eodem, inquit, quo tu orbem terræ.

LACT. *lib. vi. cap. 8.*] Est quidem vera lex, recta ratio, naturæ congruens, diffusa in omnes, constans, sempiterna; quæ vocet ad officium jubendo, vetando a fraude deterreat: quæ tamen neque probos frustra jubet, aut vetat, nec improbos jubendo aut vetando movet. Huic legi nec obrogari fas est, neque derogari ex hac aliquid licet, neque tota abrogari potest. Nec verò aut per senatum, aut per populum solvi hac lege possumus. Neque est quærendus explinator, aut interpret ejus alius. Nec erit alia lex Romæ, alia Athenis; alia nunc, alia posthac: sed & omnes gentes, & omni tempore una lex, & sempiterna, & immortalis continebit; unusque erit communis quasi magister, & imperator omnium Deus. Ille legis hujus inventor, disceptator, lator: cui qui non parebit, ipse se fugiet, ac naturam hominis aspernabitur; atque hoc ipso luet maximas pœnas, etiamsi cetera supplicia, quæ putantur, effugerit.

LACT. *lib. v. cap. 19.*] Huic tu viro quas divitias objicies? quæ imperia? quæ regna? qui ista omnia putat humana, sua bona divina judicat.

PRISC. *lib. VIII.*] quibus assentior ; sollicitam & periculosam justitiam non esse sapientis.

NON. *Ubi genit. pro ablativo.*] Noster autem populus , sociis defendendis , terrarum jam omnium potitus est.

NON. *Largitas.*] Pyrrhi ridetur largitas a consule , aut Samnitium copiae Curius defuerunt.

NON. *Apud.*] Cujus etiam focum Cato ille noster , quum venerat ad se in Sabinos , ut ex ipso audiebamus , visere solebat , apud quem sedens , Samnitium , quondam hostium , tum jam clientium suorum , dona repudiaverat.

S. AUG. *lib. XXII. cap. 6.*] Nullum bellum suscipitur a civitate optima , nisi aut pro fide , aut pro salute.

S. AUG. *lib. XXII. cap. 4. Civit.*] Quorum non corpora sunt in coelum elata : neque enim natura pateretur , ut id , quod esset de terra , nisi in terra maneret.

S. AUG. *lib. XXII. cap. 6. Civit.*] Magis est in Romulo admirandum , quod ceteri , qui dii ex hominibus facti esse dicuntur , minus eruditis hominum seculis fuerunt ; ut fingendi proclivior esset ratio , quum imperiti facile ad credendum impellerentur. Romuli autem aetatem minus his sexcentis annis , jam inveteratis

479 PHILOSOPHICORUM

litteris atque doctrinis, omnique illo antiquo ex inculta hominum vita errore sublatò, fuisse cernimus.

S. AUG. *ibidem.*] Ex quo intelligi potest, permultis annis antè Homerum fuisse, quàm Romulum; ut jam doctis hominibus, ac temporibus ipsis eruditis, ad fingendum vix quicquam esset loci. Antiquitas enim recepit fabulas, fictas etiam nonnumquam inconditè. Hæc ætas autem, jam exculta præsertim, & erudita, omne, quod fieri non potest, respuit.

LACTANT. *lib. v. cap. 19.* SENECA *lib. xix. epist.*] Apud Ennium sic loquitur Africanus:

*Si fas endo plagas cælestium adscendere cuiquam est,
Mi soli cali maxima porta patet.*

Est verò, inquit, Africane. Nam & Herculi eadem ipsa porta patuit.

SENECA. *ibid.*] *Hic est ille situs, cui nemo civi', neque hostis*

Quivit pro factis reddere operæ pretium.

S. AUG. *lib. iii. cap. 15. Civit.*] Tantum est consecutus, ut, quum subito sole obscurato non comparuisset, deorum in numero collocatus putaretur: quam opinionem nemo umquam mortalis assequi potuit sine eximia virtutis gloria.

S. AUG. *lib. xxii. cap. 6.*] Propter

ea & istum non creditum inter deos receptum tali morte, quia fortasse quod erat in Romulo probatum, Romani vulgare noluerunt, si hoc & alteri tribueretur.

LACT. *lib. v. cap. 19.*] Vult planè virtus honorem; nec est virtutis ulla alia merces; quam tamen illa accipit facile, exigit non acerbè. Sed si aut ingrati universi, aut invidi multi, aut inimici potentes suis virtutem præmiis spoliant, næ illa se tamen multis solatiis oblectat, maximeque suo decore se ipsam sustentat.

S. AUG. *lib. xxii. cap. 6. Civit.*] Sed his pœnis, quas etiam stultissimi sentiunt, egestate, exsilio, vinculis, verberibus elabuntur sæpe privati, oblata mortis celeritate. Civitatibus autem mors ipsa pœna est; quæ videtur à pœna singulos vindicare. Debet enim constituta sic esse civitas, ut æterna sit. Itaque nullus interitus est reipublicæ naturalis, ut hominis, in quo mors non modò necessaria est, verum etiam optanda per sæpe. Civitas autem quum tollitur, deletur, exstinguitur, simile est quodammodo, ut magnis parva conferamus, ac si omnis hic mundus intereat ac concidat.

S. AUG. *lib. ii. cap. 21. Civit.*] Respublica est res populi. Populus autem

non omnis cœtus multitudinis, sed cœtus juris consensu, & utilitatis communione sociatus.

S. AUG. *ibidem.*] Respublica res est populi, quum bene ac justè geritur, sive ab uno rege, sive a paucis optimatibus, sive ab universo populo. Quum verò injustus est rex, quem tyrannum voco; aut injusti optimates, quorum consensus factio est; aut injustus ipse populus, cui nomen usitatum nullum reperio, nisi ut etiam ipsum tyrannum appellem; non jam vitiosa, sed omnino nulla respublica est, quoniam non est res populi, quum tyrannus eam, factione capefferat; nec ipse populus jam populus est, si sit injustus, quoniam non est multitudo juris consensu, & utilitatis communione sociata.

S. AUG. *lib. XXII. cap. 21. Civit.*] Ubi verò justitia non est, nec jus potest esse. Quod enim jure fit, profectò justè fit: quod autem fit injustè, nec jure fieri potest. Non enim jura dicenda sunt, vel putanda, iniqua hominum constituta, quum illud etiam ipsi jus esse dicant, quod de justitiæ fonte manaverit, falsumque sit, quod a quibusdam non rectè sentientibus dici solet, id jus esse, quod ei, qui plus potest, utile est.

S. AUG. *lib. IV. contra Pelagium.*]

An non cernimus, optimo cuique dominatum ab ipsa natura, cum summa utilitate infimorum datum? Cur igitur deus homini, animus imperat corpori, ratio libidini, iracundiæque, & ceteris vitiosis ejusdem animi partibus?

S. AUG. *ibidem.*] Sed & imperandi, & serviendi sunt dissimilitudines cognoscendæ. Nam, ut animus corpori dicitur imperare, dicitur etiam libidini; sed corpori, ut rex civibus suis, aut parens liberis; libidini autem, ut servis dominus, quod eam coërcet & frangit: sic regum, sic imperatorum, sic magistratuum, sic patrum, sic populorum imperia civibus sociisque præfunt, ut corporibus animus. Domini autem servos ita fatigant, ut optima pars animi, id est, sapientia, ejusdem animi vitiosas imbecillasque partes, ut libidines, ut iracundias, & perturbationes ceteras.

NON. *Mercatura.*] Phœnices primi mercaturis & mercibus suis avaritiam, & magnificentiam, & inexplebiles cupiditates omnium rerum supportaverunt in Græciam.

NON. *Confidentia.*] duas sibi res, quò minùs in vulgus & in foro diceret, confidentiam & vocem defuisse.

NON. *Proferre.*] Sapientia jubet proferre opes, amplificare divitias.

474 PHILOSOPHICORUM

NON. Periculum.] sed ut ipsi seu animum periclitentur, seu videant, quid se putent esse facturos.

NON. Impigritas. Numquam viri fortissimi fortitudinis, impigritatis, patientiæ.

PRISC. lib. vi.] Quid ergo illa sibi vult absurda exceptio, nisi quis Athonem pro monumento vult funditus efficere? quis enim est Atho, aut Olympus tantus?

NON. Vafri.] Non sunt in disputando vafri, non veteratores, non maligni.

DE REPUBLICA LIBER IV.

NON. Ubi accusativus pro genitivo.] Atque ipsa mens, quæ futura videt, præterita meminit.

NON. Mijs.] Quumque autumnio terras ad concipiendas fruges patefecerit, hieme ad conficiendas compresserit, vere ad effundendas relaxarit, æstate ac maturitate alias mitigaverit, alias torquerit.

NON. Aptam.] eademque soli objecta umbram noctemque efficiat, quum ad numerum dierum aptam, tam ad laborum quietem.

LAET. de Opif. Dei.] Nec voluntatem mihi defuisse, nec curam.

S. AUG. *lib. ix. cap. 9. Civit.*] Numquam comœdiæ , nisi consuetudo vitæ pateretur , probare sua theatris flagitia potuissent.

S. AUG. *ibidem.*] Quem illa non attigit , vel potius quem non vexavit ? cui pepercit ? Esto : populares homines , improbos in rempublicam , seditiosos , Cleonem , Cleophontem , Hyperbolum læsit : patiamur : etsi hujusmodi cives a censore melius est , quàm a poëta notari. Sed Periclem , quum jam suæ civitati maximâ auctoritate plurimos annos domi & belli præfuisset , violari versibus , & eos agi in scena , non plus decuit , quàm si Plautus noster voluisset , aut Nævius , P. & Cn. Scipioni , aut Cæcilius M. Catoni maledicere.

S. AUG. 6.] Nostræ contrà XII. tabulæ quum perpaucas res capite sanxissent , in his hanc quoque sancendam putaverunt , *Si quis attitavisset , sive carmen condidisset , quod infamiam afferret flagitiumve alteri.* Præclare , Judiciis enim , ac magistratuum disceptationibus legitimis propositam vitam , non poëtarum ingeniis habere debemus ; nec probrum audire , nisi eâ lege , ut respondere liceat , & judicio defendere.

S. AUG. *lib. II. cap. 10. Civit.*] Æschines Atheniensis , vir eloquentissimus , quum adolescens tragœdias attitavisset ,

republicam capessivit; & Aristodemum tragicum item actorem, maximis de rebus pacis ac belli legatum ad Philippum Athenienses sæpe miserunt.

S. AUG. *lib. II. cap. 12. Civit.*] Probris & injuriis poëtarum subjectam vitam famamque habere noluerunt, capite etiam puniri sancientes, tale carmen condere si quis auderet.

S. AUG. *lib. II. cap. 13. Civit.*] Quum artem ludicram, scenamque totam in probro ducerent, genus id hominum non modò honore civium reliquorum carere, sed etiam tribu moveri notatione censoriâ voluerunt.

S. AUG. *lib. II. cap. 14. Civit.*] Ad quos quum accessisset clamor & approbatio populi, quasi magni cujusdam & sapientis magistri, quas illi obducunt tenebras? quos invehunt metus? quas inflammant cupiditates?

NON. *Fingere.*] Ego verò eodem, quo ille Homerum redimitum coronis, & delibutum unguentis, emittit ex ea urbe, quam ipse sibi fingit.

MARCEL. *lib. XXX.*] Quumque nihil tam incorruptum esse debeat in republica, quàm suffragium, quàm sententia; non intelligo, cur, qui ea pecuniâ corruperit, poenâ dignus sit; qui eloquentiâ, laudem etiam ferat. Mihi quidem hoc plus mali

facere videtur, qui oratione, quàm qui pretio judicem corrumpit, quòd pecuniâ corrumpere prudentem nemo potest, dicendo potest.

NON. *Impurus & immanis.*] Sed juventuti nostræ minimè audiendus. Quippe si ita sensit, ut loquitur, est homo impurus; sin aliter, quod malo, oratio est tamen immanis.

NON. *Ignominia.*] Censoris judicium nihil ferè damnato affert, nisi ruborem. Itaque quia omnis ea judicatio versatur tantummodo in nomine, animadversio illa *ignominia* dicta est.

NON. *ubi dativus pro accusativo.*] Nec verò mulieribus præfectus præponatur, qui apud Græcos creari solet, sed sit censor, qui viros doceat moderari uxoribus.

NON. *Temulenta.*] Magnam habet vim disciplina verecundiæ. Carent temeto omnes mulieres.

NON. *Fama.*] atque etiam si qua erat famosa, ei cognati osculum non ferebant.

NON. *Clepere.*] Non modò ut Spartæ, rapere ubi pueri, & clepere discunt.

SERV. Apud Græcos opprobrio fuit adolescentibus, si amatores non haberent.

NON. *Jurgium a lite.*] Admiror, nec rerum solùm, sed verborum etiam elegantiam. *Si jurgant*, inquit: *benevolorum*

478 PHILOSOPHICORUM

concertatio , non lis inimicorum , jurgium dicitur.

NON. *ibid.*] Jurgare igitur lex putat inter se vicinos , non litigare.

NON. *Petulantia , Procacitas.*] Itaque a petendo petulantia , a procando , id est , poscendo , procacitas nominata est.

NON. *Fides.*] Fides enim nomen ipsum mihi videtur habere , quum sit , quod dicitur.

NON. *Blandimentum.*] In cive excelso , atque homine nobili , blanditiam , ostentationem , ambitionem , notam esse levitatis.

NON. *Portitor.*] Nolo enim eundem populum , imperatorem & portitorem esse terrarum : optimum autem & in privatis familiis , & in republica vestigal duco esse parcimoniam.

NON. *Pecuda.*] quum adhibent in pecuda pastores.

NON. *Excipere.*] quòd insepultos reliquissent eos , quos ex mari , propter vim tempestatis , excipere non potuissent , innocentes necaverint.

NON. *Proprium.*] Et noster Plato magis etiam , quàm Lycurgus , omnia prorsus jubet esse communia , ne quis civis propriam , aut suam rem ullam queat dicere.

NON. *de Doctr. ind.*] Nec in hac dis-

sensione suscepi populi causam, sed bonorum.

NON. *Auguro.*] Cui quidem utinam verè auguraverim.

NON. *Sanctitudo.*] eosdem terminos hominum curæ atque vitæ : sic pontificio jure sanctitudo sepulturæ.

PRISC. *lib. xv*] Non enim facilè valenti populo resistitur, si aut nihil impertias juris, aut parum.

PRISC. *Carm.*] Brachialia.

PRISC.] Armentum habeo.

DE REPUBLICA LIB. V.

S. AUG. *lib. II. cap. 21. Civit. Ennius:*

Moribus antiquis res stat Romana, virisque.

Quem quidem ille versum, vel brevitate, vel veritate, tamquam ex oraculo mihi quodam esse effatus videtur. Nam neque viri, nisi ita morata civitas fuisset, neque mores, nisi hi viri præfuissent, aut fundare, aut tam diu tenere potuissent tantam, & tam longè latèque imperantem rempublicam. Itaque ante nostram memoriam & mos ipse patrius præstantes viros adhibebat, & veterum morem, ac majorum instituta retinebant excellentes viri. Nostra verò ætas quum rempublicam sicut picturam accepisset egregiam, sed jam evanescentem vetustate, non mo-

dò eam coloribus iisdem, quibus fuerat; renovare neglexit, sed ne id quidem curavit, ut formam saltem ejus, & extrema tamquam lineamenta servaret. Quid enim manet ex antiquis moribus, quibus ille dixit *rem stare* Romanam? quos ita oblivione obsoletos videmus, ut non modò non colantur, sed etiam ignorentur. Nam de viris quid dicam? mores enim ipsi interierunt virorum penuriâ. Cujus tanti mali non modò reddenda ratio nobis, sed etiam tamquam reis capitis quodammodo dicenda causa est. Nostris enim vitiis, non casu aliquo, rempublicam verbo retinemus; reapse verò jampridem amissimus.

CIC. *lib. VIII. epist. ad Atticum.*] Ut enim gubernatori cursus secundus, medico salus, imperatori victoria; sic huic moderatori reipublicæ beata civium vita proposita est, ut opibus firma, copiis locuples, gloriâ ampla, virtute honesta sit. Hujus enim operis maximi inter homines, atque optimi, illum esse effectorem volo.

DIOMED. *lib. I.*] Excellunt.

NON. *Contemptio.*] Quæ virtus fortitudo vocatur, in qua est magnitudo animi, mortis dolorisque magna contemptio.

NON. *Lentum.*] Marcellus, ut acer & pugnax. Maximus: ut consideratus & lentus.

NON.

NON. *ubi nominativus, vel.*] Sed tamen ut bono patrifamiliâs colendi, ædificandi, ratiocinandi quidam usus, opus est.

GEL. *lib. XII. cap. 2.*] Menelao Lacedæmoni quædam fuit suaviloquens jucunditas.

Idem ib.] Breviloquentiam in dicendo colat.

NON. *Imbuere.*] Quæ quum Scipio dixisset, admodum probans; nimio enim erat odio rhetorum imbutus.

NON. *Ferocia.*] Qui comperit ejus vim & effrenatam illam ferociam.

CARIS. *lib. I. Orbi.*] Orbi terrarum comprehensos.

NON. *impertire.*] Quodd molestias senectutis suæ vestris familiis impertire posset.

NON.] Quod non modo singulis hominibus, sed potentissimis populis sæpe contingit.

DE REPUBLICA LIB. VI.

NON. *Prudentia.*] Totam igitur expectas prudentiam hujus rectoris, quæ ipsam nomen hoc nacta est ex providendo.

NON. *Tristis.*] Qui numeros optimatum, & principum obtulit his vocibus, & gravitatis suæ liquit illum tristem & plenum dignitatis sonum.

NON. *Expleri atque satiari.*] Graves enim dominæ cogitationum libidines, infinita quædam cogunt atque imperant;

quæ quia expleri atque satiari nullo modo possunt, ad omne facinus impellunt eos, qui illecebris suis incenduntur.

NON. *Samium.*] Oratio exstat, Læli, quam omnes habemus in manibus, quàm simplici pontificum diis immortalibus grata sint, Samiæque, ut hic scribit, capedines.

NON. *Firmiter.* & PRISC.] Firmiter enim majores nostri stabilita matrimonia esse voluerunt.

NON. *Comparare.*] Quamobrem se comparet hic civis ita necesse est, ut sit contra hæc, quæ civitatis statum pervertunt, semper armatus.

NON. *Seditio.*] Eaque dissensio civium, quod seorsum eunt alii ad alios, *seditio* dicitur.

NON. *de Doctr. ind.*] Et verò in dissensione civili, quum boni plus, quàm multi valent, expendendos ab his, non numerandos puto.

GEL. *lib. vi. cap. 16.* & NON. *Deprecari.*] Quod quidem eò fuit majus, quia quum in causa pari collegæ essent, non modò invidiâ pari non erant, sed etiam Claudii invidiam Gracchi caritas deprecabatur.

NON. *Maestare.*] Ferunt hos laudibus, maestant honoribus.

S. AUG. *lib. v. cap. 13. Civit.*] Alendus hic est gloriâ.

NON. *Desubito*] in his, ut meministis, concursu levissimæ multitudinis ære congesto funus desubito esset ornatum.

NON. *ubi genitivus pro nominativo*] Ut quemadmodum scribit ille, quotidiano in forum mille hominum cum palliis conchylio tinctis descenderent.

MACR. *lib. 1. Somn.*] Sed quamquam sapientibus conscientia ipsa factorum egregiorum amplissimum virtutis præmium est, tamen illa divina virtus non statuas plumbo in hærentes, nec triumphos arescentibus laureis, sed stabiliora quædam & viridiora præmiorum genera desiderat. Quæ tandem ista sunt? inquit Lælius. Tum Scipio, Patimini me (inquit) quoniam tertium diem feriati sumus. . . .

SOMNIUM SCIPIONIS.

SCIPIO LOQUITUR.

I. QUUM in Africam venissem, M. Manilio consuli ad quartam legionem tribunus (ut scitis) militum; nihil mihi potius fuit, quàm ut Masinissam convenirem, regem familiæ nostræ justis de causis amicissimum. Ad quem ut veni, complexus

me senex collacrymavit, aliquantoque post suspexit in cœlum : & Grates, inquit, tibi ago, summe Sol, vobisque reliqui cœlites, quod antè quàm ex hac vita migro, conspicio in meo regno, & his tectis P. Cornelium Scipionem, cujus ego nomine ipso recreor; ita numquam ex animo meo discedit illius optimi atque invictissimi viri memoria. Deinde ego illum de suo regno, ille me de nostra republica percunctatus est; multisque verbis ultro citroque habitis, ille nobis consumptus est dies. Post autem regio apparatu accepti, sermonem in multam noctem produximus, quum senex nihil nisi de Africano loqueretur, omniaque ejus non facta solum, sed etiam dicta meminisset. Deinde, ut cubitum discessimus, me fessum de via, & qui ad multam noctem vigilassem, arc-tior, quàm solebat, somnus complexus est.

2. Hic mihi (credo equidem ex hoc, quod eramus locuti; fit enim ferè, ut cogitationes sermonesque nostri pariant aliquid in somno tale, quale de Homero scribit Ennius, de quo videlicet sæpissime vigilans solebat cogitare, & loqui) Africanus se ostendit eâ formâ, quæ mihi ex imagine ejus, quàm ex ipso, erat notior: quem ut agnovi, equidem cohortui; sed ille, Ades, inquit, animo, &

omitte timorem, Scipio, & quæ dicam, trade memoriæ.

II. Videſne illam urbem, quæ parere populo Romano coacta per me, renovat priſtina bella, nec poteſt quieſcere? (oſtendebat autem Carthaginem, de excelſo, & pleno ſtellarum, illuſtri & claro quodam loco.) ad quam tu oppugnamdam nunc venis pene miles? hanc hoc biennio conſul evertes, eritque cognomen id tibi per te pattum; quod habes adhuc à nobis hereditarium. Quum autem Carthaginem deleveris, triumphum egeris, cenſorque fueris, & obieris legatus Ægyptum, Syriam, Aſiam, Græciam, deligere iterum conſul abſens, bellumque maximum conficies, Numaniam excindes.

3. Sed quum eris curru Capitolium inſectus, offeſdes rempublicam perturbatam conſiliis nepotis mei. Hic tu, Africane, oſtendas oportebit patriæ lumen animi, ingenii, conſiliique tui. Sed ejus temporis anſipitem video quaſi fatorum viam: nam quum ætas tua ſeptenos octies ſolis anſractus redituſque converterit, duoque hi numeri, quorum uterque plenus, alter altera de cauſa, habetur, circuitu naturali ſummam tibi fatalem confecerint; in te unum, atque in tuum nomen, ſe tota converteret civitas: te ſe-

486 PHILOSOPHICORUM

natus, te omnes boni, te facili, te Latini intuebuntur: tu eris unus, in quo nitatur civitatis salus: ac ne multa, dictator rempublicam constituas: oportet, si impias propinquorum manus effugeris. Hic quum exclamasset Lælius, ingemissentque ceteri vehementius; leniter arridens Scipio, Quæso, inquit, ne me e somno exciteris, & parum rebus: audite cetera.

III. Sed quò sis, Africane, alacrior ad tutandum rempublicam, sic habeto: Omnibus, qui patriam conservarint, adjuverint, auxerint, certum esse in cælo definitum locum, ubi beati ævo sempiterno fruantur: nihil est enim illi principi Deo, qui omnem hunc mundum regit, quod quidem in terris fiat, acceptius, quàm concilia cœtusque hominum jure sociati, quæ civitates appellantur: harum rectores & conservatores hinc profecti, huc revertuntur.

5. Hic ego, etsi eram perterritus, non tam metu mortis, quàm insidiarum a meis, quæsi vi tamen, viveretne ipse & Paulus pater, & alii, quos nos extinctos arbitraremur. Immo verò, inquit, ii vivunt, qui ex corporum vinculis, tamquam e carcere, evolaverunt; vestra verò, quæ dicitur vita, mors est: quin tu adspicias ad te venientem Paulum pa-

trem. Quem ut vidi, equidem vim lacrymarum profudi.

6. Ille autem me complexus, atque osculans, flere prohibebat. Atque ego ut primum fletu represso loqui posse cœpi, Quæso, inquam, pater sanctissime atque optime, quoniam hæc est vita (ut Africanum audio dicere) quid moror in terris? quin huc ad vos venire propero? Non est ita, inquit ille: nisi enim Deus is, cujus hoc templum est omne quod conspicias, istis te corporis custodiis liberaverit, huc tibi aditus patere non potest. Homines enim sunt hac lege generati, qui tuerentur illum globum, quem in hoc templo medium vides, quæ terra dicitur; hisque animus datus est ex illis sempiternis ignibus, quæ sidera & stellas vocatis: quæ globosæ, & rotundæ, divinis animatæ mentibus, circulos suos orbisque conficiunt celeritate mirabili.

7. Quare & tibi, Publi, & piis omnibus retinendus est animus in custodia corporis; nec injussu ejus, a quo ille est vobis datus, ex hominum vita migrandum est, ne munus humanum assignatum a Deo defugisse videamini. Sed sic, Scipio, ut avus hic tuus, ut ego, qui te genui, justitiam cole, & pietatem; quæ, quum sit magna in parentibus & propinquis, tum in patria maxima est. Ea vita,

via est in cœlum, & in hunc cœtum eorum, qui jam vixerunt, & corpore laxati, illum incolunt locum, quem vides: erit autem is splendidissimo candore inter flammæ circus elucens, quem vos, ut a Graiis accepistis, orbem lacteum nuncupatis: ex quo omnia mihi contemplanti, præclara cetera & mirabilia videbantur.

8. Erant autem eæ stellæ, quas numquam ex hoc loco vidimus; & eæ magnitudines omnium, quas esse numquam suspicati sumus: ex quibus erat illa minima, quæ ultima a cœlo, citima terris, luce lucebat alienâ. Stellarum autem globi terræ magnitudinem faciliè vincebant. Jam ipsa terra ita mihi parva visa est; ut me imperii nostri, quo quasi punctum ejus attingimus, pœniteret.

IV. Quam quum magis intuerer; Quæso, inquit Africanus, quousque humi defixa tua mens erit? nonne adspicis, quæ in templa veneris? novem tibi orbibus, vel potius globis, connexa sunt omnia: quorum unus est cœlestis, extremus, qui reliquos omnes complectitur, summus ipse Deus, arcens & continens ceteros; in quo infixi sunt illi, qui volvuntur, stellarum cursus sempiterni: cui subiecti sunt septem, qui versantur retrò contrario motu, atque cœlum: ex qui-

bus unum globum possidet illa, quam in terris Saturniam nominant: deinde est hominum generi prosperus & salutaris ille fulgor, qui dicitur Jovis: tum rutilus, horribilisque terris, quem Martem dicitis.

10. Deinde subter mediam ferè regionem Sol obtinet, dux, & princeps, & moderator luminum reliquorum, mens mundi, & temperatio, tantà magnitudine, ut cuncta suâ luce illustret, & compleat: hunc ut comites consequuntur, alter Veneris, alter Mercurii cursus: in infimoque orbe Luna, radiis Solis accensa convertitur: infrà autem jam nihil est, nisi mortale & caducum, præter animos generi hominum, munere deorum datos. Supra lunam sunt æterna omnia. Nam ea, quæ est media, & nona tellus, neque movetur, & infima est, & in eam feruntur omnia suo nutu pondera.

V. Quæ quum intuerer stupens, ut recepi, Quid? hic, inquam, quis est, qui complet aures meas tantus & tam dulcis sonus? Hic est, inquit ille, qui intervallis conjunctus imparibus, sed tamen, pro rata parte, ratione distinctis; impulsu & motu ipsorum orbium efficitur; qui acuta cum gravibus temperans, varios æquabiliter concentus efficit: nec enim silentio tanti motus incitari possunt,

& natura fert, ut extrema ex altera parte graviter, ex altera autem acutè sonent.

12. Quam ob causam summus ille cœli stelliferi cursus, cujus conversio est concitator, acuto & excitato movetur sono: gravissimo autem hic lunaris atque infimus: nam terra, nona, immobilis manens, inâ sede semper hæret, complexa medium mundi locum. Illi autem octo cursus, in quibus eadem vis est duorum, septem efficiunt distinctos intervallis sonos; qui numerus rerum omnium ferè nodus est: quod docti homines nervis imitati, atque cantibus, aperuere sibi redditum in hunc locum: sicut alii, qui præstantibus ingeniis, in vita humana, divina studia coluerunt.

13. Hoc sonitu oppletæ aures hominum obsurduerunt; nec est ullus hebetior sensus in vobis: sicut ubi Nilus ad illa, quæ Catadupa nominantur, præcipitat ex altissimis montibus, ea gens, quæ illum locum accolit, propter magnitudinem sonitûs, sensu audiendi caret. Hic verò tantus est totius mundi incitatissimâ conversione sonitus, ut eum aures hominum capere non possint; sicut intueri solem adversum nequitis, ejusque radiis acies vestra sensusque vincitur. Hæc ego admirans, referebam tamen oculos ad terram identidem.

VI. Tum Africanus, Sentio, inquit, te sedem etiam nunc hominum ac domum contemplari: quæ si tibi parva, ut est, ita videtur, hæc cœlestia semper spectato; illa humana contemnito. Tu enim quam celebritatem sermonis hominum, aut quam expetendam gloriam consequi potes? vides habitari in terra raris & angustis in locis; & in ipsis, quasi maculis, ubi habitatur, vastas solitudines interjectas: hosque, qui incolunt terram, non modò interruptos ita esse, ut nihil inter ipsos ab aliis ad alios manare possit; sed partim obliquos, partim averfos, partim etiam adversos stare vobis, a quibus expectare gloriam certè nullam potestis.

15. Cernis autem eandem terram, quasi quibusdam redimitam & circumdatam cingulis: e quibus duos maximè inter se diversos, & cœli verticibus ipsis ex utraque parte subnixos, obriguisset pruinâ vides; medium autem illum, & maximum, solis ardore torreri: duo sunt habitabiles; quorum australis ille, in quo qui insistent, adversa vobis urgent vestigia. Nihil ad vestrum genus. Hic autem alter subjectus aquiloni, quem incolitis, æerne, quàm tenui vos parte contingat: omnis enim terra, quæ colitur a vobis, angusta verticibus, lateribus latior, parva quædam insula est, circumfusa illo mari,

492. *PHILOSOPHICORUM*

quod Atlanticum, quod magnum, quem Oceanum appellatis in terris: qui tamen tanto nomine, quàm sit parvus, vides.

16. Ex his ipsis cultis notisque terris, num aut tuum aut cuiusquam nostrum nomen, vel Caucasum hunc, quem cernis, transcendere potuit, vel illum Gangem transnare? quis in reliquis orientis, aut obeuntis solis ultimis, aut aquilonis, austrive partibus tuum nomen audiet? quibus amputatis, cernis profectò, quantis in angustiis vestra gloria se dilatari velit. Ipsi autem, qui de vobis loquuntur, quàm loquentur diu?

VII. Quin etiam, si cupiat proles illa futurorum hominum deinceps laudes uniuscujusque nostrum a patribus acceptas posteris proderet; tamen propter eluviones exustionesque terrarum, quas accidere tempore certo necesse est, non modò non æternam, sed ne diuturnam quidem gloriam assequi possumus.

17. Quid autem interest, ab iis, qui postea nascentur, sermonem fore de te, quum ab iis nullus fuerit, qui antè nati sint, qui nec pauciores, & certè meliores fuerunt viri? quum præsertim apud eos ipsos, a quibus audiri nomen nostrum potest, nemo unius anni memoriam consequi possit: homines enim populariter annum tantummodo solis, id est,

unius aſtri reditu metiuntur : quum autem ad idem , unde ſemel profecta ſunt , cuncta aſtra redierint , eandemque totius cœli deſcriptionem longis intervallis retulerint , tum ille verè vertens annus appellari poteſt : in quo vix dicere audeo , quàm multa ſecula hominum teneantur. Namque , ut olim deficere ſol hominibus exſtinguique viſus eſt , quum Romulꝝ animus hæc ipſa in templa penetravit ; ita quandoque eâdem parte ſol , eodemque tempore iterum defecerit , tum ſignis omnibus ad idem principium , ſtellisque revocatis , expletum annum habeto : huius quidem anni nondum vicesimam partem ſcito eſſe converſam.

18. Quocirca , ſi reditum in hunc locum deſperaveris , in quo omnia ſunt magnis & præſtantibus viris ; quanti tandem eſt iſta hominum gloria , quæ pertinere vix ad unius anni partem exiguan poteſt ? Igitur altè ſpectare ſi voles , atque hanc ſedem , & æternam domum contueri ; neque te ſermonibus vulgi dederis , nec in præmiis humanis ſpem poſueris rerum tuarum : ſuis te oportet illecebris ipſa virtus trahat ad verum decus. Quid de te alii loquantur , ipſi videant ; ſed loquentur tamen : ſermo autem omnis ille , & anguſtiis cingitur iis regionum , quas vides ; nec umquam de ullo

perennis fuit; & obruitur hominum interitu; & oblivione posteritatis extinguitur.

VIII. Quæ quum dixisset, Ego verò, inquam, ô Africane, si quidem bene meritis de patria quasi limes ad cœli adiutum patet, quamquam a pueritia vestigiis ingressus patriis, & tuis, decori vestro non defui; nunc tamen, tanto præmio proposito, enitar multò vigilantius. Et ille, Tu verò enitere, & sic habeto, non esse te mortalem, sed corpus hoc: nec enim tu is es, quem forma ista declarat; sed mens cuiusque, is est quisque; non ea figura, quæ digito demonstrari potest. Deum te igitur scito esse: si quidem Deus est, qui viget, qui sentit, qui meminit, qui providet, qui tam regit, & moderatur, & movet id corpus, cui præpositus est, quàm hunc mundum princeps ille Deus: & ut mundum ex quadam parte mortalem ipse Deus æternus, sic fragile corpus animus sempiternus movet.

20. Nam quod semper movetur, æternum est: quod autem motum affert alicui, quodque ipsum agitur aliunde; quando finem habet motûs, vivendi habeat necesse est. Solum igitur, quod se ipsum movet, quia numquam deseritur a se, numquam ne moveri quidem desinit:

quin etiam ceteris, quæ moventur, hic fons, hoc principium est movendi; principii autem nulla est origo; nam ex principio oriuntur omnia: ipsum autem nulla ex re alia nasci potest; nec enim esset id principium, quod gigneretur aliunde. Quodd si numquam oritur, ne occidit quidem umquam: nam principium extinctum, nec ipsum ab alio renascetur, nec ex se aliud creabit; si quidem necesse est a principio oriri omnia. Ita fit, ut motus principium ex eo sit, quod ipsum a se movetur: id autem nec nasci potest, nec mori; vel concidat omne coelum, omnisque natura consistat necesse est, nec vim ullam nanciscatur, quâ, ut a primo impulsu moveatur.

IX. Quum pateat igitur, æternum id esse, quod seipsum moveat; quis est, qui hanc naturam animis esse tributam neget? inanimum est enim omne, quod pulsu agitur externo: quod autem animal est, id motu cietur interiore, & suo: nam hæc est propria natura animæ, atque vis: quæ si est una ex omnibus, quæ seipsa semper moveat; neque nata certè est, & æterna est. Hanc tu exerce in optimis rebus: sunt autem optimæ curæ, de salute patriæ; quibus agitur & exercitatus animus velocius in hanc sedem & domum suam pervolabit: idque

ociùs faciet , si jam tam , quum erit inclusus in corpore , eminebit foras , & ea , quæ extrà erunt , contemplans , quàm maximè se a corpore abstrahet.

22. Namque eorum animi , qui se corporis voluptatibus dediderunt , earumque se quasi ministros præbuerunt , impulsuque libidinum voluptatibus obedientium , deorum & hominum jura violaverunt , corporibus elapsi circum terram ipsam volutantur ; nec hunc in locum , nisi multis exagitati seculis , revertuntur. Ille discessit : ego somno solutus sum.

DE JURE CIVILI.

Librum de jure civili in artem redigendo scripsisse Ciceronem testes sunt Gellius & Carisius : quin ipse Tullius id sibi in animo fuisse declarat de Oratore lib. 1 , 190.

CARIS.] Aliquo eccellente ac nobili viro.

GEL. lib. VII. c. 22] Nec verò scientiâ juris majoribus suis Q. Ælius Tubero defuit , doctrinâ etiam superfuit.

DE AUGURIIS.

Citantur a Carisio & Servio Libri Ciceronis Augurales , ii fortasse , quos ille Cilicia proconsul ad Appium Pulchrum adornavit , Librorum ejusdem argumenti auctorem. Vid. Epist. ad familiares 3 , ii.

CARISIUS] Oscan.

IDEM. Avi. incertâ.

IDEM. Oscanis.

DE PHILOSOPHIA,
SIVE HORTENSIVS.

Tullius de Finibus 1 , 2. scribit hoc libro a se defensam & collaudatam esse philosophiam , quum esset accusata & vituperata ab Hortensio. Huic autem sermoni Q. Catulum , & L. Lucillum interfuisse censet Sigonius. Hunc librum longè omnium pulcherrimum fuisse , veterum , qui illum legerunt , testimonia multa confirmant. Sanctus quidem Augustinus non semel proficitur se illius potissimum lectione incensum esse ad veræ philosophiæ , id est , christianæ , contemplationem. De hoc eodem libro mentio fit de Divinatione lib. 1 , 1.

NON. Occupare.] & Paulum Marcellum occupavisse.

NON. *Annuere.*] Quod quum uterque nostrum annuisset, omnesque ad id tempus, quod erat dictum, postero die venissemus.

FRONTO.] Lucullo quidem noster adventus & gratus & jucundus fuisse.

IDEM.] Hic primum Catulus delectatur ipso loco.

NON. *Inanima.*] Nam quum omnis solertia admiranda est, tum ea, quæ efficit, ut inanima quæ sunt, vivere & spirare videantur.

NON. *Efferro.*] præter ceteras nostra extulit civitas.

NON. *Lentus.*] hunc Crassum, qui lentus (ut scitis) dicere solebat, ad imitationem quasi nostri generis contendisse.

NON. *Imbuere, sufficere.*] Ut ii, qui combibi purpuram volunt, sufficiunt prius lanam medicamentis quibusdam; sic literis talibusque doctrinis antè excoli animos, & ad sapientiam concipiendam imbui & præparari decet.

NON. *Subigere, segetes.*] Ut enim segetes agricolæ subigunt aratris multò antè quàm serant.

NON. *Grave, Acre, Mite.*] Quid enim aut Herodoto dulcius, aut Thucydide gravius, aut Philisto brevius, aut Theopompo acrius, aut Theophrasto mitius inveniri potest?

NON. *Cognoscere, Grave.*] Unde autem facilius, quàm ex annalium monumentis, aut res bellica, aut omnis rei publicæ disciplina cognoscitur? unde ad agendum, aut dicendum copia depromi major gravissimorum exemplorum, quasi incorruptorum testimoniorum potest?

NON. *Exorsum.*] Perge, quæso: nec enim imperitè exorsus es.

NON. *Contendere.*] Magna etiam animi contentio adhibenda est in explicando Aristotele, si legeris.

NON. *Comest.*] Se ad extremum pollicetur prolaturum, quæ seipsa comest: quod efficit dialecticorum ratio.

NON. *Relaxo. Remitto.*] Quæro enim, non quibus intendam rebus animum, sed quibus relaxem & remittam.

LACT. *lib. III. cap. 15.*] Quando philosophi esse cœperunt? Thales, ut opinor, primus. Recens hæc quidem ætas.

S. AUG. *lib. III. contra Acad.*] Id enim est sapientis providere: ex quo sapientia est appellata, prudentia.

SERVIUS.] Epicurei plures volunt esse cœlos.

NON. *Urgeo.*] Itaque tunc Democriti manus urgebatur: est enim non magna.

SERVIUS. *in 1 & 2. Æneid.*] Annum magnum esse voluerunt omnibus planetis in eundem recurrentibus locum: quod fit

500 PHILOSOPHICORUM

post XII. millia nongentos quinquaginta quatuor annos.

S. AUG. *lib. XII. cap. 4. Trin.*] Beati certè omnes esse volumus.

NON. *Differre.*] Quantum inter se homines studiis, moribus, & omni vitæ ratione differant.

NON. *Præfractum.*] Huic contrarius Aristo Chius, præfractus, ferreus, nihil bonum, nisi quod rectum & honestum est.

S. AUG. *de Trin. lib. XIII. cap. 5.*] Ecce autem non philosophi illi quidem, sed prompti tamen ad disputandum homines, omnes aiunt esse beatos, qui vivant, ut ipsi velint. Falsum id quidem. Velle enim quod non deceat, id ipsum miserrimum est; nec tam miserum est, non adipisci, quod velis, quàm adipisci velle, quod non oporteat.

LACT. *lib. 1. cap. 7.*] Si Deus unus est, quis beatus esse in solitudine queat?

NON. *Præcipere.*] Præcipiunt hoc isti, & facit nemo.

LACT. *lib. III. cap. 16.*] Profectò omnis istorum disputatio, quamquàm uberimos fontes virtutis & scientiæ contineat, tamen collata cum horum actis perfectisque rebus, vereor ne tantum videatur attulisse negotiis hominum quamdam oblectationem otii.

NON. *Lautum.*] Quæ est igitur philo-

sophia ; Socrates ? nec dubito , quin , quæcumque sit , lautum victum & elegantem , magnificè , neque minùs quàm deceret , colere instituisse.

NON. *De doct. ind.*] Vidi in dolore podagræ vel omnium maximum Stoicorum Possidonium , nihilò ipsum , quàm Nicomachum Tyrium , hospitem meum , fortio-
riorem.

NON. *Sublatum.*] Eloquentiam tueri , quam tu in cælum , Hortensi , credo , ut ipse cum ea simul adscenderes , sustulisses.

NON. *Eventus.*] Tu me & aliàs nonnumquam , & paulò antè adhortatus es , ut aliorum facta & eventa conquiram.

FRONTO.] Qui quum hodie bellum cum mortuo gerant.

NON. *Sumo.*] Quare velim dari mihi , Luculle , jubeas indicem tragicorum , ut sumam , si qui fortè mihi desunt.

NON. *Faceffo.*] Faceffant igitur omnes , qui docere nihil possunt , quò meliùs sapientiùsque vivamus.

S. AUG. *de Trin. lib. iv. cap. 2.*] Prudentiæ partes sunt , memoria , intelligentia , providentia.

S. AUG. *ibid.*] Si nobis , quum ex hac vita migraverimus , in beatorum insulis , immortale ævum , ut fabulæ ferunt , degere liceret , quid opus esset eloquentiâ ,

quum judicia nulla fierent? aut ipsis etiam virtutibus? nec enim fortitudinis indigeremus, nullo proposito aut labore, aut periculo; nec justitiâ, quum esset nihil, quod appeteretur alieni; nec temperantiâ, quæ regeret eas, quæ nullæ essent, libidines: ne prudentiâ quidem egeremus, nullo delectu proposito bonorum & malorum. Unâ igitur essemus beati cognitione naturæ, & scientiâ, quæ sola etiam deorum est vita laudanda. Ex quo intelligi potest cetera necessitatis esse; unum hoc, voluptatis.

NON. *Capere.*] deinde boni mores, & modestiores, & ad capienda præcepta molliores.

NON. *Aptum.*] Altera est nexa cum superiore, & inde, apteque pendens.

NON. *Spektare.*] Coeli signorum admirabilem ordinem, insatiabilemque pulchritudinem magis spectant.

S. AUG. *lib. iv. cap. 15. Civit.*] Ut easdem tenebras efficiat, quas effecit in interitu Romuli; qui in obscuratione solis factus est.

NON. *Increpo.*] Tunc pseudomenon, & foritem, & totam dialecticam aut illudis, aut increpas?

NON. *Pressum.*] Quis te aut est, aut fuit umquam in partiendis rebus, in definiendis, in explanandis pressior?

LACT. *lib. VI. cap. 2.*] Malo vel unum parvum de officio libellum, quàm longam orationem pro seditioso homine Cornelio.

NON. *Convenire.*] Nam quòd vereris, ne non conveniat nostris ætatibus ista oratio, quæ spectat ad hortandum.

NON. *Cedere.*] Aut tibi id ipsum pervertendum fuit, quod tu ne attigisti quidem; aut ejus partes, quasi membra quædam, cædendæ.

NON. *Æra.*] Quid tu, inquam? soles, quum rationem a dispensatore accipis, si æra singula probasti, summam quæ ex his confecta sit, non probare?

NON. *Scripta.*] Itaque tibi concedo, quod in duodecim scriptis solemus, ut calculum reducas, si te alicujus dati poenitet.

NON. *Gratificari.*] Quare egredere, quæso; & gratificare reipublicæ.

IDEM, *Tollere.*] nihil tamen esse, in quo se animus excellens tollat.

IDEM, *Capere.*] Captum me fortasse, inquis, tu putas, & id quod nollem, confiteri coactum.

IDEM, *Subducere.*] An quum videat me & meas comites, fortitudinem, magnitudinem animi, patientiam, constantiam, gravitatem, fidem, ipsa se subducatur?

504 PHILOSOPHICORUM

PRISC. *lib. vi.*] ut ait Ennius: *Refugiat timido sanguen, atque exalbescat metu.*

NON. *Præstare.*] Itaque nec in philosophia cuiquam cessit, & vitæ gravitate præstitit.

IDEM, *Contemptus.*] magnitudo animi, patientia laborum, mortis denique contemptio.

IDEM, *Detrahere.*] ut ea sibi ratio vera restituat, quæ consuetudo vitiosa detraxerit.

NON. *Despicere.* Consolabitur eum magnitudo animi, & humanarum opinionum alta quædam despectio.

IDEM, *Deductum.*] Habet enim ipsa certam & definitam viam, sed ex ea multis vitiis & erroribus depravata deducitur.

IDEM, *Vindicare.*] deinde imitator, ut sibi quidem videtur, naturæ mos vindicat.

IDEM, *Exsultare.*] Imbecillus autem est pudoris magister timor, qui si quando paululum aberraverit, statim spe impunitatis exsultat.

SERVIVS. *lib. ix. Æn.*] Sufficit ad gloriam benefacti conscientia.

NON. *Redundo.*] Tum intelligas, quàm illud non sit necessarium, quod redundat.

IDEM, *Glisco.*] Ad juvenilem libidinem, copia voluptatum gliscit illa, ut ignis oleo.

IDEM;

IDEM, *Verecundantur.*] Hi nostri amici verecundantur, capti splendore virtutis.

S. AUG. *Vita beata.*] Oratæ, homini ditissimo, amœnissimo, delicatissimo, neque ad voluptatem quidquam defuit, neque ad gratiam, neque ad bonam integramque valetudinem. Nam & prædiis quæstuosissimis, amicis jucundissimis, quantum libuit, & abundavit, & illis omnibus aptissimè ad salutem corporis usus est; ejusque (ut breviter totum explicem) omne institutum voluntatemque omnem successio prospera consecuta est.

NON. *Balneæ.*] Primus balneolas suspendit, inclusit pisces.

PRISC. *lib. x.*] & amœnitate summâ perfructus est.

NON. *Ostrea.*] solertiamque eam, quæ posset vel in tegulis profeminare ostreas.

IDEM, *Summus.*] Vixit ad summam senectutem valetudine optimâ.

IDEM, *Invitare.*] Voluptates autem nulla ad res necessarias invitamenta afferunt senibus.

S. AUG. *lib. contra Pelagium.* NON. *Conficere.*] An verò voluptates corporis expetendæ, quæ verè & graviter a Platone dictæ sunt illecebræ atque escæ maiorum? Quæ enim confectio est valetudinis, quæ deformatio coloris & corpo-

ris, quod turpe damnum, quod dedecus, quod non evocetur atque eliciatur voluptate? cuius motus ut quisque est maximus, ita est inimicissimus philosophiæ. Congruere enim cum cogitatione magna voluptas corporis non potest. Quis enim, quum utatur voluptate eâ, quâ nulla possit major esse, attendere animum, inire rationem, cogitare omnino quidquam potest? Quis autem tantus est gurgis, qui dies & noctes sine ulla minimi temporis intermissione velit ita moveri suos sensus, ut moventur in summis voluptatibus? Quis autem bonâ mente præditus non mallet nullas omnino nobis a natura voluptates datas?

S. *AUG. contra Pelag. lib. v. cap. 5.*] tunc obsequatur naturæ, quum sine magistro senserit, quid natura desideret.

NON. *Ubi genitivus pro ablativo.*] Et qui expectat, pendet animi, quia semper, quid futurum sit, incertum est.

NON. *Noxia a noxa.*] Et ceteris quidem in rebus, in quibus peccata non maxima insunt, noxias tamen inferunt.

NON. *Equuleus.*] Ut igitur domitores equorum non verbera solum adhibent ad domandum, sed cibum etiam subtrahunt, ut fame debilitetur equuleorum nimis effrenata vis.

NON. *Lentum.*] Qui quum publicas

injurias lentè tulisset, suam non tulit.

NON. *Continens.*] In continentibus quidem terris vestrum nomen dilatari potest.

NON. *Conficere.*] Ea facultas nostris majoribus erat, qui confectis senatusconsultis.

NON. *Acre.*] quod alterius ingenium sic dulce, ut acetum Ægyptium; alterius sic acre, ut mel Hymettium dicimus.

NON. *Fides.*] Ponendæ sunt fides, & tibiæ.

NON. *Severum.*] Aliud ex silvis severum & triste.

NON. *Tenuē.*] Eundem enim non modò ex mediocri pecunia, sed etiam ex tenui percipere possum.

NON. *Priores a Primores.*] Qui iidem nescio quid, quod in primoribus habent, ut aiunt, labris.

NON. *Subducere.*] non & sine ea cogitatione ineundis subducendisque rationibus.

S. AUG. *lib. iv. contra Pelagium.*] Ex quibus humanæ vitæ erroribus & ærumnis fit, ut interdum veteres illi sive vates, sive in sacris initisque tradendis divinæ mentis interpretes, qui nos ob aliqua scelera suscepta in vita superiore, pœnarum luendarum causâ natos esse

dixerunt, aliquid vidisse videantur; verumque sit illud, quod est apud Aristotelem, simili nos affectos esse supplicio, atque eos, qui quondam, quum in prædonum Etruscorum manus incidissent, crudelitate excogitatâ necabantur; quorum corpora viva cum mortuis, adversa adversis accommodata, quàm aptissimè colligabantur; ita nostros animos cum corporibus copulatos, ut vivos cum mortuis esse conjunctos.

NON. *Appendix.*] Vidit enim, quod videndum fuit, appendicem animi esse corpus, nihilque in eo esse magnum.

S. AUG. *lib. XIV. cap. ult. Trin.*] Quæ nobis dies noctesque considerantibus, acuentibusque intelligentiam, quæ est mentis acies, caventibusque, ne quando illa hebescat, magna spes est, aut si hoc quo sentimus & sapimus, mortale & caducum est, jucundum nobis, perfunctis muneribus humanis, occasum, neque molestam extinctionem, & quasi quietem vitæ fore: aut si, ut antiquis philosophis, hisque maximis, longèque clarissimis placuit, æternos animos, ac divinos habemus; sic existimandum est, quò magis hi fuerint semper in cursu, id est, in ratione & investigandi cupiditate, & quò minùs se admiscuerint atque implicuerint hominum vitiis atque erroribus.

bus, hòc illis faciliorem adscensum & reditum in cœlum fore. Quapropter, ut aliquando terminetur oratio, si aut extinguere tranquillè volumus, quum in his artibus vixerimus, aut si ex hac in aliam haud paulò meliorem domum sine mora demigrare, in his studiis nobis omnis opera & cura ponenda est.

M. CATO, SEU, LAUS M. CATONIS.

Catonem Uticensem Tullius cœlo æquavit eo libro, quem, ut scribit in Oratore 35. numquam attigisset, tempora timeris inimica virtuti, nisi M. Bruto hortanti, & illius memoriam excitanti, non parere nefas esse duxisset. Huic Cæsar Catonis inimicissimus, rescriptâ oratione, quam Anticatonem appellavit, velut apud iudices respondit cum maximis Ciceronis laudibus. Vide ad Atticum 12., 4. & 40. & lib. 13, 46. & de Divinatione, 2, 3.

GELL. lib. XIII. cap. 18.] Pronepos M. Catonis censorii.

MACR. lib. IV. cap. 2.] Contingebat in eo, quod plerisque contrà solet, ut majora omnia re, quàm famâ viderentur: id quod non sæpe evenit, ut ex-

510 PHILOSOPHICORUM

spectatio a cognitione , aures ab oculis
vincerentur.

DE GLORIA , LIB. I.

Librorum de Gloria meminit Cicero ad Atticum lib. 15 , 27. & lib. 16 , 2. & 6. & de Officiis lib. 2 , 3. Ex iis Gellius lib. 15 , 6. notat errorem Ciceronis , verba tribuentis Ajaci , quæ sunt apud Homerum Hæcloris. Vide Iliados 4 , 89.

CARIS.] In Tusculanum mihi nuntiabantur gladiatorii sibili.

FESTUS lib. XIII.] Oppidorum appellationem usurpatione appellatam esse existimo , quòd opem darent.

DE GLORIA , LIB. II.

GELL. lib. xv. cap. 6.] Apud eundem poëtam Ajax cum Hectore congregiendi depugnandi causâ agit , ut sepeliatur , si sit fortè victus , declaratque se velle , ut suum tumulum multis etiam post seculis prætereuntes , sic loquantur :

*Hic situs est vitæ jampridem lumina linquens ,
Qui quondam Hectoreo percussus concidit ense.
Fabitur hoc aliquis , mea semper gloria vires.*

CARIS.] Quo stante & incolume.

PHILARG.] Statuerunt gloria læna.

DE CONSOLATIONE LIBER.

Quanto dolore ex morte Tullia carissima filia Cicero exarserit, ipse ostendit in epistolis, quas tum ad Atticum misit, quæ exstant lib. 12 & 13. Acceptis eo tempore a pluribus, atque ab ipso Cæsare consolatoriis epistolis, se ipse per litteras consolatus est, scripsitque librum, quem Consolationem, vel de luctu minuendo inscripsit.

PLIN. præfatione.] Crantorem sequor.

LACT. lib. III. cap. 18.] Idcirco nati sumus, ut scelerum pœnas lueremus.

LACT. lib. II. cap. 19.] Non nasci, longè optimum, nec in hos scopulos incidere vitæ: proximum autem, si natus sis, quamprimum mori, & tamquam ex incendio effugere fortunæ.

LACT. lib. III. cap. 14.] Sed nescio qui nos teneat error, aut mirabilis ignoratio veri.

CIC. Tuscul. 1. 66. LACT. de Ira cap. 10. & Instit. lib. 1. cap. 5.] Animorum nulla in terris origo inveniri potest: nihil enim est in animis mixtum atque concre-

tum, aut quod ex terra natum atque fictum esse videatur; nihil ne aut humidum quidem, aut flabile, aut igneum: his enim in naturis nihil inest, quod vim memoriæ, mentis, cogitationis habeat, quod & præterita teneat, & futura provideat, & complecti possit præsentia; quæ sola divina sunt: nec invenietur umquam, unde ad hominem venire possint, nisi a Deo: singularis est igitur quædam natura atque vis animi, sejuncta ab his usitatis notisque naturis. Ita quidquid est illud, quod sapit, quod vult, quod viget, cœleste & divinum est; ob eamque rem æternum sit necesse est. Nec verò Deus ipse, qui intelligitur a nobis, alio modo intelligi potest, nisi mens soluta quædam & libera, segregata ab omni concretionem mortali, omnia sentiens & movens, ipsaque prædita motu sempiterno.

LACT. *lib. 1. cap. 15.*] Quum verò & mares, & feminas complures ex hominibus in deorum numero esse videamus, & eorum in urbibus atque agris augustissima templa veneremur; assentiamur eorum sapientiæ, quorum ingeniis & inventis omnem vitam, legibus & institutis excultam, constitutamque habemus. Quòd si ullum umquam animal consecrandum fuit, illud profectò fuit.

Si Cadmi, aut Amphionis progenies, aut Tyndari, in cœlum tollenda famâ fuit, huic idem honos certè dicandus est: quod quidem faciam, teque omnium optimam doctissimamque, approbantibus diis immortalibus ipsis, in eorum cœtu locatam, ad opinionem omnium mortaliū consecrabo.

LACT. *lib. III. cap. 19.*] Nec enim omnibus iidem illi sapientes arbitrati sunt eundem cursum in cœlum patere: nam vitiis & sceleribus contaminatos deprimi in tenebras, atque in cœno jacere docuerunt; castos autem, puros, integros, incorruptos, bonis etiam studiis atque artibus expolitos, levi quodam ac facili lapsu ad deos, id est, ad naturam sui similem pervolare.

LACT. *lib. III. cap. 28.*] Cedo, enī manum tollo.

DE SUIS CONSILIIS.

Citatur a Boëtio liber Ciceronis de consiliis suis, quem librum eundem esse putat Sigonius, atque eum, quem Asconius, in commentario orationis in toga candida vocat Expositionem consiliorum suorum.

BOET. *lib. 1. Mus.*] Sed ut aliquā similitudine adductus, maximis minima con-

514 PHILOSOPHICORUM

feram, ut quum vinolenti adolescentes, tibiæ etiam cantu, ut fit, instincti, mulieris pudicæ fores frangerent, admonuisse tibicinam, ut spondeum caneret, Pythagoras] dicitur: quod quum illa fecisset, tarditate modorum, & gravitate cantûs, illorum furentem petulantiam refedisse.

DE VIRTUTIBUS.

Patricius censet Ciceronem in hoc libro; quæ copiosè in libris de Officiis traderat, breviter comprehensa litteris consignavisse.

CARIS. lib. II.] Illud neutiquam probares.

CHOROGRAPHIA.

Hic liber in Prisciano citatur, errore fortasse librarii, tamquam Ciceronis; sed est planè Chorographia Varronis.

PRISC. lib. VI.] Ibi quercorum rami ad terram jacent, ut fues, quasi capræ ex ramis, glande pascantur.

ACADEMICORUM LIB. I.

Fragmenta hæc ex Academicis, ad eos libros pertinent, qui erant posterioris editionis. Nonius, dum quartum esse putat ejus editionis, qui est prioris secundus, fecit ut quarti libri fragmentum certum demonstrari nullum possit.

NON. *Digladiari.*] Quid autem stomachetur Mnesarchus, quid Antipater digladietur cum Carneade tot voluminibus?

ACADEMICORUM LIB. II.

NON. *Adamare.*] Qui enim seriùs honores adamaverunt, vix admittuntur ad eos, nec satis commendati multitudini possunt esse.

NON. *Exponere.*] Frangere avaritiam, scelera ponere, vitam suam exponere ad imitandum juventuti.

NON. *Hebes.*] Quid? lunæ quæ lineamenta sint, potesne dicere? cur ejus nascentis aliàs hebetiora, aliàs acutiora videantur cornua?

NON. *Purpurascit.*] Quid? mare nonne cœruleum? at ejus unda, quum est pulsa remis, purpurascit: & quidem aqua tinctum quodam modo & infectum.

516 PHILOSOPHICORUM

NON. *Æquor.*] Quid tam planum videtur, quàm mare? ex quo etiam *æquor* illud poëtæ vocant.

NON. *Alabaster.*] Quibus etiam alabaster plenus unguenti putere videatur.

NON. *Siccum.*] Alius adultis, alius senibus: alius ægris, alius sanis: alius siccis, alius vinolentis.

NON. *Urinari.*] Si quando enim nos demersimus, ut qui urinantur, aut nihil superum, aut obscurè admodum cernimus.

NON. *Perpendicularum.*] Atqui, si id crederemus, non egeremus perpendicularis, non armis, non regulis.

NON. *Gallina.*] Quum ovum inspererant, quæ gallina peperisset, dicere solebant.

DIOMED.] Opera affixa.

ACADEMICORUM LIB. III.

NON. *Ingenerari.*] In tanta animalium varietate, homini ut soli cupiditas ingeneraretur cognitionis & scientiæ.

NON. *Vindico.*] Aliqua potestas si sit, vindicet se in libertatem.

NON. *Digladiari.*] Digladiari autem semper, depugnare cum facinorosis & audacibus, quis non quum miserrimum, tum etiam stultissimum dixerit?

NON. *Exsulto.*] Et ut nos nunc sede-

mus ad Lucrinum , pisciculosque exultantes videmus.

LACT. *lib. VI. cap. 24.*] Quòd si liceret, ut iis, qui in itinere deerravissent, sic vitam deviam secutis, corrigere errorem pœnitendo, faciliior esset emendatio temeritatis.

EX LIBRO INCERTO

ACADEMICORUM.

LACT. *lib. III. cap. 15.*] Mihi autem non modò ad sapientiam cæci videmur, sed ad ea ipsa, quæ aliqua ex parte cerni videntur, hebetes & obtusi.

MARCIAN. *lib. V.* FORTUN. *lib. III.*] Latent ista omnia, Varro, magnis obscurata & circumfusa tenebris.

S. AUG. *lib. III. contra Acad.*] Academico sapienti ab omnibus ceterarum sectarum, qui sibi sapientes viderentur, secundæ partes dantur, quum primas sibi quemque vindicare necesse sit: ex quo potest probabiliter confici, eum rectè primum esse iudicio sito, qui omnium ceterorum iudicio sit secundus. Fac enim, verbi causâ, Stoicum adesse sapientem: nam contra eos potissimùm Academicorum exarsit ingenium. Ergo Zeno, vel Chrysippus si interrogentur, quis sit sapiens, respondebit, eum esse, quem ipse

518 *PHILOSOPHICORUM*

descripserit. Contrà Epicurus , vel quis alius adversariorum negabit , suumque potius peritissimum voluptatum aucupem , sapientem esse contendet. Inde ad jurgium. Clamat Zeno , & tota illa porticus tumultuatur , hominem natum ad nihil aliud quàm honestatem : ipsam suo splendore in se animos ducere , nullo prorsus commodò extrinsecus posito , & quasi lenocinante mercede ; voluptatemque illam Epicuri solis inter se pecoribus esse communem , in quorum societatem & hominem , & sapientem trudere nefas esse. Contrà ille , convocatâ de hortulis in auxilium quasi liberâ turbâ temulentorum , quærentium tantùm , quem incomptis unguibus bacchantes asperoque ore discerpant , voluptatis nomen , suavitatem , quietem teste populo exaggerans , instat acriter , ut sine ea beatus nemo esse posse videatur. In quorum rixam si Academicus incurrerit , utrosque audiet trahentes se ad suas partes : sed si in illos , aut in istos concesserit , ab eis , quos deserit , infanus , imperitus , temerariusque clamabitur. Itaque quum & huc & illuc aurem diligenter admoverit , interrogatus quid ei videatur , dubitare se dicet. Roga nunc Stoicum , quis sit melior , Epicurusne , qui delirare illum clamat ; an Academicus , qui sibi adhuc de re tanta

deliberandum esse pronuntiat. Nemo dubitat Academicum prælatum iri. Rursus te ad illum converte, & quære, quem magis amet, Zenonem, a quo bestia nominatur, an Arcesilam, a quo audit, Tu fortasse verum dicis, sed requiram diligentius: nonne apertum est totam illam porticum insanam, Academicos autem præ illis modestos cautosque homines visum iri Epicuro?

S. AUG. *lib. II. contra Acad.*] Talia mihi videntur omnia, quæ probabilia, vel verisimilia putavi nominanda: quæ tu si alio nomine vis vocare, nihil repugno; satis enim mihi est te jam bene accepisse, quid dicam, id est, quibus rebus hæc nomina imponam. Non enim vocabulorum opificem, sed rerum inquisitorem decet esse sapientem.

S. AUG. *lib. III. contra Acad.*] Mos fuit Academicis occultandi sententiam suam, nec eam cuiquam, nisi qui secum ad senectutem usque vixissent, aperiendi.

EX LIB. DE NATURA DEORUM III.

LACT. *lib. II. cap. 9.*] Primum igitur non est probabile, eam materiam rerum, unde orta sunt omnia, esse divinâ pro-

videntiâ effectam, sed habere & habuisse vim, & naturam suam. Ut igitur faber, quum quid ædificaturus est, non ipse facit materiam, sed eâ utitur, quæ sit parata; fictorque item e cera; sic isti providentiæ divinæ materiam præstò esse oportuit, non quam ipsa faceret, sed quam haberet paratam. Quòd si non est a Deo materia facta, ne terra quidem, & aqua, & aër, & ignis a Deo factus est.

LACT. *lib. II. cap. 3.*] Non sunt ista vulgò disputanda, ne susceptas publicè religiones disputatio talis exstinguat.

EX LIB. I. DE DIVINATIONE.

DIOMED. *lib. I.*] Præterea similiter cohortatione circum conciliabula antecellunt.

EX LIB. I. DE LEGIBUS.

LACT. *lib. V. cap. 8.*] Sicut unâ eâdemque naturâ mundus omnibus partibus inter se congruentibus cohæret ac nititur; sic omnes homines inter se naturâ confusi, pravitate dissentiunt, nec se intelligunt esse consanguineos, & subjectos omnes sub unam eamdemque tutelam: quod si teneretur, deorum profectò vitam omnes viverent.

EX LIB. II. DE LEGIBUS.

LACT. *lib. i. cap. 20.*] Magnum audaxque consilium Græcia suscepit, quod Cupidinum & Amorum simulacra in gymnasiis consecravit.

EX LIB. V. DE LEGIBUS.

MACR. *lib. vi.*] Visne igitur, quoniam sol paululum a meridie jam devenus videtur, neque dum satis ab his novellis arboribus omnis hic locus opacatur, descendamus ad Lirim, eaque, quæ restant, in illis alnorum umbraculis persequamur?

EX LIBRO INCERTO DE LEGIBUS.

LACT. *lib. iii. cap. 19.*] Gratulemurque nobis, quoniam mors aut meliorem, quàm qui est in vita, aut certè non deteriore est allatura statum. Nam sine corpore, animo vigente, divina est vita: sensu carenti nihil profectò est mali.

S. AUGUST. *lib. xxi. Civit.*] Octo pœnarum genera in legibus continentur, damnum, vincula, verbera, talio, ignominia, exsilium, mors, servitus.

EX LIB. DE FATO.

GEL. *lib. v. cap. 3.*] Chrysippus æstuans, laboransque quonam pacto explicet, & fato omnia fieri, & esse aliquid in nobis, intricatur hoc modo.

MACR. *lib. III.*] Nam quum esset apud se ad Lavernium Scipio, unaque Pontius; allatus est fortè Scipioni acipenser, qui admodum rarè capitur, sed est piscis, ut ferunt, in primis nobilis. Quum autem Scipio unum & alterum ex iis, qui eum salutatum venerant, invitasset; pluresque etiam invitaturus videretur; in aurem Pontius, *Scipio*, inquit, *vide quid agas: acipenser iste paucorum hominum est.*





TIMÆUS,

S E U

DE UNIVERSITATE.

S. Hieronymus de Timæi Ciceronianâ translatione ita judicavit: Obscurissimus Platonis Timæus ne Ciceronis quidem aureo ore fit planior.

1. **M**ULTA sunt a nobis & in Academicis conscripta contra physicos, & sæpe cum P. Nigidio, Carneadeo more & modo disputata. Fuit enim vir ille quum ceteris artibus, quæ quidem dignæ libero essent, ornatus omnibus; tum acer investigator, & diligens earum rerum, quæ a natura involutæ videntur. Denique sic judico, post illos nobiles Pythagoreos, quorum disciplina extincta est quodam modo, quum aliquot secula in Italia Siciliaque viguissent, hunc exstitisse, qui illam renovaret.

2. Qui quum me in Ciliciam proficiscentem, Ephesi exspectavisset, Romam ex legatione ipse decedens; venissetque

§24 PHILOSOPHICORUM

eódem Mytilenis mei salutandi & visendi causâ Cratippus , Peripateticorum omnium , quos quidem ego audiverim , meo iudicio faciliè princeps ; perlibenter & Nigidium vidi , & Cratippum cognovi. Ac primum quidem tempus salutationibus , reliquum percuntatione consumpsimus. *** *Desunt multa.*

II. Quid est , quod semper sit , neque ullum habet ortum ? & quod gignatur , nec umquam sit ? Quorum alterum intelligentiâ & ratione comprehenditur ; quod unum semper , atque idem est : alterum , quod affert opinionem per sensus , rationis expers ; quod totum opinabile est , id gignitur & interit , nec umquam esse verè potest. Omne autem quod gignitur , ex aliqua causa gigni necesse est : nullius enim rei , causâ remotâ , reperiri origo potest. Quocirca si is , qui aliquod munus efficere molitur , eam speciem , quæ semper est eadem , intuebitur , atque eam sibi proponet exemplar , præclarum opus efficiat necesse est : sin autem illam , quæ gignitur ; numquam illam , quam expetet , pulchritudinem consequetur. Omne igitur cælum , sive mundus , sive quovis alio vocabulo gaudet , hoc a nobis nuncupatus sit.

4. De quo id primùm consideremus , quod principio est in omni quæstione

considerandum , semperne fuerit , nullo generatus ortu , an ortus sit ab aliquo temporis principatu. Ortus est , quandoquidem cernitur , & tangitur , & est undique corporatus. Omnia autem talia sensum movent ; sensusque moventia quæ sunt , eadem in opinatione consistunt , quæ ortum habere gigni que diximus : nihil autem gigni posse sine causis. Atque illum quidem quasi parentem hujus universitatis invenire , difficile ; & quum jam inveneris , indicare in vulgus , nefas.

5. Rursus igitur videndum , ille fabricator tanti operis utrum sit imitatus exemplar , idne , quod semper unum & idem , & sui simile ; an id , quod generatum ortumque dicimus. Atqui si pulcher est mundus hic , & si probus ejus artifex ; profectò speciem æternitatis imitari maluit : sin secus , quod ne dictu quidem fas est ; generatum exemplum est pro æterno secutus. Non igitur dubium , quin æternitatem maluerit exsequi , quandoquidem neque mundo quidquam pulchrius , neque ejus ædificatore præstantius. Si igitur generatus , ad id est effectus , quod ratione sapientiæque comprehenditur , atque immutabili æternitate continetur. Ex quo efficitur , ut sit necesse , hunc , quem cernimus , mundum , simulacrum æternum esse alicujus æterni.

526 *PHILOSOPHICORUM*

Difficillimum autem est in omni inquisitione rationis, exordium. De iis igitur, quæ diximus, hæc sit prima distinctio.

- III. In omni oratione cum iis rebus; de quibus explicandum, videtur esse cognatio. Itaque quum de re stabili & immutabili disputatur; oratio talis sit, qualis sit illa, quæ neque redargui, neque convinci potest. Quum autem ingressa est imitata & efficta simulacra; bene agi putat, si similitudinem veri consequatur. Quantum enim ad id, quod ortum est, æternitas valet; tantum ad fidem veritas. Quocirca si fortè de deorum natura ortuque mundi differentes, minùs id, quod avemus, animo consequimur, ut tota dilucidè & planè exornata oratio sibi constet, & ex omni parte secum ipsa consentiat; haud sanè erit mirum, contentique esse debebitis, si probabilia dicentur. Æquum est enim meminisse, & me, qui disseram, hominem esse; & vos, qui iudicatis: ut si probabilia dicentur, nil ultra requiratis.

- 7. Quæramus igitur causam, quæ eum impulerit, qui hæc machinatus sit, ut originem rerum, & molitionem novam quæreretur. Probitate videlicet præstabat: probus autem invidet nemini. Itaque sui similia omnia generavit. Hæc nimirum gignendi mundi causa iustissima. Nam

quum constituisset Deus bonis omnibus explere mundum, mali nihil admiscere, quoad natura pateretur; quidquid erat, quod in cernendi sensum caderet, id sibi assumpsit, non tranquillum & quietum, sed immoderatè agitatum & fluctuans; idque ex inordinato in ordinem adduxit. Hoc enim judicabat esse præstantius. Fas autem nec est, nec umquam fuit, quidquam nisi pulcherrimum facere eum, qui esset optimus.

8. Quum rationem igitur habuisset, reperiēbat nihil esse eorum, quæ naturâ cernerentur, non intelligens, intelligente, in toto genere, præstantius; intelligentiam autem ulli rei adjunctam esse, sine animo nefas esse. Quocirca intelligentiam in animo, animum conclusit in corpore. Sic ratus est opus illud effectum esse pulcherrimum. Quam ob causam non est cunctandum profiteri, si modò investigari aliquid conjecturâ potest, hunc mundum animal esse, idque intelligens, & divinâ providentiâ constitutum.

IV. Hoc posito; quod sequitur, videndum est, cujusnam animantium Deus in fingendo mundo similitudinem secutus sit. Nullius pro'ectò eorum quidem, quæ sunt nobis nota animantia. Sunt enim omnia in quædam genera partita, aut inchoata, nulla ex parte perfecta. Im-

528 *PHILOSOPHICORUM*

perfecto autem nec absoluto simile, pulchrum esse nihil potest. Cujus ergo omne animal quasi particula quædam est, sive in singulis, sive in diverso genere cernatur, ejus similem mundum esse dicamus.

9. Omnes igitur, qui animo cernuntur, & ratione intelliguntur animantes, complexu rationis & intelligentiæ, sicut homines hoc mundo, & pecudes, & omnia, quæ sub adspæctum cadunt, comprehenduntur. Quod enim pulcherrimum in rerum natura intelligi potest, & quod ex omni parte absolutissimum est, quum Deus similem mundum efficere vellet, animal unum, adspæctabile, in quo omnia animalia continerentur, effecit. Rectène igitur unum mundum dixerimus; an sint plures, an innumerabiles, dictu verius & melius? Unus profectò, siquidem factus est ad exemplum.

10. Quod enim omnes animantes eos, qui ratione intelliguntur, complectitur, id non potest esse cum altero. Rursus enim alius animans, qui eum contineat, sit necesse est, cujus partes sint animantes superiores; cælumque hoc, simulacrum illius ultimi sit, non proximi. Quorum ne quid accideret, atque ut hic mundus esset animanti absoluto simillimus, hoc ipso, quòd solus atque unus esset;

esset ; idcirco singularem Deus hunc mundum , atque unigenam procreavit.

II. Corporeum autem , & adspectabile , itemque tractabile omne necesse est esse , quod natum est. Nihil porro , igni vacuum , videri potest ; nec verò tangi , quod careat solido ; solidum autem nihil , quod terræ sit expers. Quamobrem mundum efficere moliens Deus , terram primum , ignemque jungebat. Omnia autem duo ad cohærendum , tertium aliquid requirunt , & quasi nodum vinculumque desiderant. Sed vinculorum id est aptissimum atque pulcherrimum , quod ex se , atque de his , quæ adstringit , quàm maximè unum efficit. Id optimè assequitur , quæ Græcè ἀναλογία , Latinè (audendum est enim , quoniam hæc primum a nobis novantur) comparatio , proportiove dici potest.

V. Quando enim trium vel numerorum , vel figurarum , vel quorumcumque generum contingit , ut quod medium sit , uti primum proportionem , ita id postremo comparetur , vicissimque ut extremum cum medio , sic medium cum primo conferatur ; id quod medium est , tum primum fit , tum postremum ; postrema verò , & prima media fiunt. Ita necessitas cogit , ut eadem sint ea , quæ devincta fuerunt. Eadem autem quum

530 *PHILOSOPHICORUM*

facta sint, efficitur, ut omnia sint unum.

13. Quòd si universitatis corpus, planum & æquabile explicaretur, neque in eo quidquam esset requisitum; unum interjectum medium, & se ipsum, & ea, quibus esset interpositum, colligaret. Sed quum soliditas mundo quæreretur; solida autem omnia uno medio numquam, duobus semper copulentur; ita contigit, ut inter ignem & terram, aquam Deus, animamque poneret, eaque inter se compareret, & proportionem conjungeret; ut quemadmodum ignis, animæ; sic anima aquæ: quodque anima, aquæ; id aqua, terræ proportionem redderet. Qua ex conjunctione cælum ita aptum est, ut sub aspectum & tactum cadat. Itaque & ob eam causam, & ab iis rebus numero quatuor mundi est corpus effectum, eâ constructum proportionem, quâ dixi: ex quo ipse se concordiam quadam amicitia & caritate complectitur; atque ita aptè coheret, ut dissolvi nullo modo queat, nisi ab eodem, a quo est colligatus.

14. Earum autem quatuor rerum, quas supra dixi, sic in omni mundo omnes partes collocatæ sunt, ut nulla pars hujusce generis excederet extrâ, atque in hoc universo inessent genera illa universa. Id ob eas causas, primum ut mundus animans possit ex perfectis partibus esse

perfectus; deinde ut unus esset, nullâ parte, unde alter gigneretur, reliqtâ; postremò ne quis morbus eum possit, aut senectus attingere. Omnis enim coagumentatio corporis, vel calore, vel frigore, vel aliquâ impulsione vehementi labefactatur & frangitur, & ad morbos senectutemque compellitur. Hanc igitur habuit rationem effector mundi, molitorque Deus, ut unum opus totum atque perfectum ex omnibus totis atque perfectis absolveretur; quod omni morbo & senio vacaret.

VI. Formam autem & maximè sibi cognatam & decoram dedit. A quo enim animante omnes reliquos contineri vellet animantes, hunc eâ formâ figuravit, quâ unâ omnes reliquæ formæ concluduntur; & globosus est fabricatus; quod *σφαίρειος*, Græci vocant. Cujus omnis extremitas paribus a medio radiis attingitur: idque ita tornavit, ut nihil effici possit rotundius, nihil ut asperitatis haberet, nihil offensionis, nihil incisum angulis, nihil amfractibus, nihil eminens, nihil lacunosum; omnesque partes simillimæ omnium, quod ejus judicio præstabat dissimilitudini similitudo.

16. Omni autem totam figuram mundi lævitate circumdedit. Nec enim oculis egebat, quia nihil extrâ, quod cerni

posset, relictum erat; nec auribus, quia ne quod audiretur quidem; neque erant animâ circumfusa extrema mundi, ut respirationem requireret; nec verò desiderabat aut alimenta corporis, aut detractionem confecti & consumpti cibi. Neque enim ulla decessio fieri poterat, neque accessio; neque verò erat unde. Ita se ipse consumptione & senio alebat sui, quum ipse per se, & a se & pateretur, & faceret omnia. Sic enim ratus est ille, qui ista junxit & condidit, ipsum se contentum esse mundum, neque egere altero.

17. Itaque nec ei manus affinxit, quia nec capiendum quidquam erat, nec repellendum; nec pedes, nec alia membra, quibus ingressum corpore sustineret. Motum enim dedit cœlo eum, qui figuræ ejus sit aptissimus, qui unus ex septem motibus mentem atque intelligentiam cohiberet maximè. Itaque unâ conversione atque eadem ipse circum se torquetur & vertitur. Sex autem reliquos motus ab eo separavit. Itaque eum ab omni erratione liberavit. Ad hanc igitur conversionem, quæ pedibus & gradu non egeret, ingrediendi membra non dedit. Hæc Deus is, qui erat, de aliquando Deo futuro cogitans, lævem eum effecit & undique æquabilem, & a medio ad summum

pàrem, & perfectum atque absolutum ex absolutis atque perfectis.

18. Animum autem ut in ejus medio collocavit, ita per totum tetendit: deinde eum circumdedit corpore, & vestivit extrinsecus: cœloque solivago, & volubili, & in orbem incitato complexus est, quod secum ipse propter virtutem facile esse posset, nec desideraret alterum; satis sibi ipse notus & familiaris. Sic Deus ille æternus hunc perfectè beatum Deum procreavit. Sed animum haud ita, ut modò locuti sumus, tum denique, quum corpus ei effecisset, inchoavit. Neque enim esset rectum minori parere majorem. Sed nos multa inconsideratè ac temerè dicimus.

VII. Deus autem & ortu, & virtute antiquiorem genuit animum, eumque ut dominum atque imperantem, obedienti præfecit corpori; idque molitus tali quodam est modo. Ex materia, quæ individua est, & quæ semper unius modì, sui que similis, & ex ea, quæ corporibus dividua gignitur, tertium materiæ genus in medium admiscuit, quod esset ejusdem naturæ, & quod alterius; idque interjecit inter individuum, atque id, quod dividuum esset in corpore. Ea quum tria sumpsisset, unam in speciem temperavit; naturamque illam, quam alterius

diximus, vi cum eadem conjunxit, fugientem, & ejus copulationis alienam. Permiscens autem cum materia, quum ex tribus effecisset unum, id ipsum in ea, quæ decuit, membra partitus est.

20. Jam partes singulas ex eodem, & ex altero, & ex materia temperavit. Fuit autem talis illa partitio. Unam principio partem detraxit ex toto: secundam autem primæ partis duplam: deinde tertiam, quæ esset secundæ sesquialtera, primæ tripla: deinde quartam, quæ secundæ dupla esset: quintam inde, quæ tertiæ tripla: tum sextam octuplam primæ: postremo septimam, quæ septem & viginti partibus antecederet primæ. Deinde instituit dupla & tripla intervalla explere, partes rursus ex toto defecans; quas intervallis ita locabat, ut in singulis essent bina media: vix enim audeo dicere medietates, quas Græci *μεσότητες* appellant: sed quasi ita dixerim, intelligatur; erit enim planius. Earum alteram, eâdem parte præstantem extremis, eâdemque superatam: alteram pari numero præstantem extremis, parique numero superatam.

21. Sesquialteris autem intervallis, & sesquitertiis, & sesquioctavis sumptis ex his colligationibus in primis intervallis, sesquioctavo intervallo, sesquitertia om-

nia explebat, quum particulam singulorum relinqueret. Ejus autem particulæ intervallo relicto habebat numerus ad numerum eandem proportionem, comparisonemque in extremis, quam habent CCLVI cum CCXLIII, atque ita permistum illud, ex quo hæc secuit, jam omne consumpserat. Hanc igitur omnem conjunctionem, duplicem in longitudinem diffidit; mediæque accommodans mediam, quasi decussavit: deinde in orbem torsit, ut & ipsæ secum, & inter se, ex commissura, quæ e regione esset, jungerentur: eoque motu, cujus orbis semper in eodem erat, eodemque modo ciebatur, undique est eas circumplexus.

22. Atque ita quum alterum esset anteriorem amplexus orbem; illum, ejusdem naturæ; hunc, alterius nominavit: eamque, quæ erat ejusdem, detorsit a latere in dextram partem; hanc autem citimam, a media linea direxit ad lævam: sed principatum dedit superiori, quam solam individuum reliquit. Interiorem autem quum in sex partes divisisset, septem orbes dispares duplo & triplo intervallo moveri jussit, contrariis inter se cursibus. Eorum autem trium fecit pares celeritates: sed quatuor, & inter se dispares, & dissimiles trium reliquorum.

VIII. Animum igitur quum ille pro-

536 PHILOSOPHICORUM

creator mundi Deus ex sua mente & divinitate genuisset, tum denique, omne, quod erat concretum atque corporeum, substernebat animo, interiusque faciebat: atque ita medio medium accommodans copulabat. Sic animus a medio profectus, extremitatem cœli a suprema regione rotundo ambitu circumjecit, seseque ipse versans, divinæ, sempiternæ, sapientisque vitæ induxit exordium. Et corpus quidem cœli spectabile effectum est, animus autem oculorum effugit obitum.

24. Est autem animus ex omnibus, rationis concentionisque (*ἀπαιρέσις* Græcè) sempiternarum rerum, & sub intelligentiam cadentium, compos & particeps; quo nihil ab optimo & præstantissimo genitore melius procreatum: quippe qui ex eadem vinculus, alteraque natura, adjunctâ materiâ, temperatione trium partium, proportionē compactâ, se ipse conversans, quum materiam mutabilem arripuisset, & quum rursus individuam atque simplicem, per quam omnis movetur; discernit, quid sit ejusdem generis, quid alterius, & cetera dijudicat, quid cuique rei sit maximè aptum, quid quoque loco, aut modo, aut tempore contingat, quæque distinctio sit inter ea, quæ gignantur, & ea, quæ sint semper eadem.

25. Ratio autem vera, quæ versatur

in iis, quæ sunt semper eadem, & in iis, quæ mutantur, quum in eodem, & in altero movetur ipsa per se sine voce, & sine ullo sono, quum eandem partem attingit, quâ sensus cieri potest: orbis illius generis alterius immutatus & rectus omnia animo mentique denuntiat: tum opiniones assensionesque firmæ veræque gignuntur. Quum autem in illis rebus vertitur, quæ manentes semper eadem, non sensu, sed intelligentiâ continentur; tum intelligentia scientiaque necessario efficitur. *** *Desunt multa.*

IX. Ratione igitur & mente divinâ, ad originem temporis, curriculum inventum est solis & lunæ. *** Corpora autem eorum singulorum quum effecisset Deus, ea ad eas conversiones collocavit, quas alterius circuitus conficiebat, quæ sunt septem, ut & illa septem. Ita vim suam natura convertit, ut terram lunæ cursus proximè ambiret, eique supra terram proxima solis circumvectio esset. Lucifer deinde, & sancta Mercurii stella cursum habent solis celeritati parem, sed vim quamdam contrariam: eâque conversione, quam inter se habent Lucifer, Mercurius, Sol, alii alios vincunt, vicissimque vincuntur. Reliquorum siderum quæ causa collocandi fuerit, quæque eorum sit collocatio, in sermonem aliump

538 *PHILOSOPHICORUM*

differendum est, ne in eo, quod attingendum fuit, quàm in eo, cujus causâ id attigimus, longior ponatur oratio.

27. Quando igitur unum quodque eorum siderum cursum decorum est adeptum, e quibus erat motus temporis consignandus, colligatisque corporibus vinculis animalibus, tum animantia orta sunt: eaque imperio parere didicerunt: tum ex alterius naturæ motione transversa, in ejusdem naturæ motum incurrentia, in eoque hærentia atque impedita, quum alia majorem lustrarent orbem, alia minorem, tardiùsque majorem, celeriùsque minorem, motu verò unius ejusdemque naturæ; quæ velocissimè movebantur, ea celeritate vinci a tardioribus, & quum superabant, superari videbantur. Omnes enim orbis eorum quasi Helicis inflexione vertebantur: quam bifariam contrariè simul procedentia efficiebant; ut quod esset tardissimum, id proximum fieret celerrimo.

28. Atque ut esset mensura quædam evidens, quæ in istis octo cursibus celeritates tarditatesque declaret; Deus ipse solem, quasi lumen, accendit ad secundum supra terram ambitum, ut quàm maximè cælum omnibus colluceret, animantesque, quibus jus esset doceri, ab ejusdem motu, & ab eo quod simile esset,

numerorum naturam vimque cognoscerent. Nox igitur, & dies ad hunc modum, & ob has generata causas, unum circuitum orbis efficit sapientissimum atque optimum: mensis autem, quando luna lustrato suo cursu solem consecuta est: annus, ubi sol suum totum confecit & peragravit orbem.

29. Ceterorum autem siderum ambitus ignorantes homines, præter admodum paucos, neque nomen appellant, neque inter se numero commetiuntur. Itaque nesciunt, hos siderum errores, id ipsum esse, quod ritè dicitur tempus, multitudine infinitâ, varietate admirabili præditos. Attamen illud perspicere & intelligi potest, absoluto perfectoque numero temporis, absolutum perfectumque annum tunc compleri denique, quum se octo ambitus, confectis suis cursibus, ad idem caput retulerunt, quumque eos permen- sus est idem, & semper sui similis orbis. Has igitur ob causas nata astra sunt, quæ per cælum penetrantia solstitiali se & brumali revocatione converterent: ut hoc omne animal, quod videmus, esset illi animali, quod sentimus, ad æternitatis imitationem simillimum.

X. Et cetera quidem usque ad temporis ortum impressa ab illis, quæ imitabatur, effinxerat: sed quia nondum

omne animal in mundo intus incluſerat; ex ea parte deficiebat ad propoſitum exemplar imaginis ſimilitudo. Quot igitur, & quales animalium formas mens, in ſpeciem rerum intuens, poterat cernere, totidem & tales in hoc mundo ſecum cogitavit effingere.

31. Erant autem animantium genera quatuor: quorum unum divinum atque cœleſte: alterum pennigerum & aërium: tertium aquatile: terreſtre, quartum. Divinæ animationis maximè ſpeciem faciebat ex igne, ita ut ſplendidiffimus eſſet, & adſpectu pulcherrimus: quumque ſimilem univerſitatis naturæ efficere vellet, ad volubilitatem rotundavit, comitemque eum ſapientiæ quàm optimæ mentis effecit, circumque cœlum æqualiter diſtribuit, ut hunc hac varietate diſtinctum, bene Græci *κοσμος*, nos lucentem mundum nominaremus.

32. Dedit autem divinis duo genera motûs: unum, quod ſemper eſſet in eodem æquè, & idem in omnibus, atque uno modo celeraret: alterum, quod in anticam partem a converſione ejuſdem, & ſimilis pelleretur. Quinque autem reliquis motibus orbem eum eſſe voluit expertem, immobilem, & ſtantem. Ex quo genere ea ſunt ſidera, quæ infixæ cœlo non moventur loco, quæ ſunt animan-

tia, eaque divina, ob eamque causam suis sedibus inhærent, & perpetuo manent. Quæ autem vaga & mutabili ratione labuntur, ita generata sunt, ut suprâ diximus. Jam verò terram, altricem nostram, quæ trajecto axe sustinetur, diæ noctisque effectricem, eandemque custodem, antiquissimam corporum voluit esse eorum, quæ intra cœlum gignerentur.

33. Flexiones autem deorum, & inter ipsos deos concursiones, quæque in orbibus eorum conversiones antecessionesque eveniant, quumque inter se pene contingant, eos, qui propè copulentur contrariâ regione, & ponè quos, aut antè labantur, quibusque temporibus a nostro adspectu oblitescant, rursusque emersi errorem incutiant rationis expertibus, si verbis explicare conemur, nullo posito sub oculis simulacro, earum rerum frustra suscipiatur labor. Sed hæc satis sint dicta nobis. Quæ de deorum, qui cernuntur, quique orti sunt, natura præfati sumus, habeant hunc terminum.

XI. Reliquorum autem, quos Græci *δαίμονας* appellant, nostri (opinor) Lares, si modò hoc rectè conversum videri potest, & nosse, & nuntiare ortum eorum, majus est, quàm ut profiteri scribere nos audeamus. Credendum nimirum est veteribus & priscis, ut aiunt, viris,

qui se progeniem deorum esse dicebant. Itaque eorum vocabula nobis prodiderunt. Nosse autem generatores suos optimè poterant : ac difficile factu est , a diis ortis , fidem non habere ; quamquam nec argumentis , nec rationibus certis eorum ratio confirmatur : sed quia de suis rebus ac sibi notis videntur loqui , veteri legi morique parendum est.

35. Sic igitur , ut ab his est traditum , horum deorum ortus habeatur , atque dicatur : ut Oceanum Salaciamque Coeli fatu , Terræque conceptu generatos editosque memoremus : ex his Phorcyn , Saturnum , & Opem , deinceps Jovem , atque Junonem , reliquos , quos fratres inter se , agnatosque usurpari atque appellari videmus , & eorum , ut utamur veteri verbo , prosapiam. Quando igitur omnes , & qui moventur , palamque ostenduntur , & qui eatenus nobis declarantur , quoad ipsi volunt , creati sunt ; tum ad eos is Deus , qui omnia genuit , fatur hæc : Vos , qui deorum fatu orti estis , attendite. Quorum operum ego parens effectorque sum , hæc sunt indissoluta , me invito ; quamquam omne colligatum solvi potest : sed haudquaquam boni est , ratione vinctum velle dissolvere. Sed quoniam orti estis , immortales vos quidem esse , & indissolubiles non

potestis: neutiquam tamen dissolvemini, nec vos ulla mortis fata periment, nec fraus valentior, quàm consilium meum, quod majus est vinculum ad perpetuitatem vestram, quàm illa, quibus estis tum, quum gignebamini, colligati. Quid sentiam igitur, cognoscite.

36. Tria nobis genera reliqua sunt, eaque mortalia: quibus prætermis-
sis, cœli absolutio perfecta non erit. Omnia enim genera animalium complexu non tenebit: teneat autem oportebit, ut eodem ne quid absit, quæ a me ipso effecta sint, quod deorum vitam possit adæquare. Ut igitur mortali generentur conditione, vos suscipite, ut illa gignatis, imiteminique vim meam, quâ in vestro ortu me usum esse meministis: in quibus qui tales creantur, ut deorum immortalium quasi gentiles esse debeant, divini generis appellentur, teneantque omnium animantium principatum, vobisque jure & lege volentes pareant: quorum vobis initium statusque traditur a me. Vos autem ad id, quod erit immortale, partem attexitote mortalem. Ita orientur animantes, quos & vivos alatis, & consumptos sinu recipiatis. Hæc ille dixit.

XII. Deinde ad temperationem superiorem revertit: in qua omnem animum

universæ naturæ temperans permiscebat, superiorisque permixtionis reliquias fundens æquabat, eodem modo fermè, nisi quòd non ita incorruptas, ut ea, quæ semper idem; sed a diis secundum sumebat, atque tertium. Toto igitur omnino constituto, sideribus parem numerum distribuit animorum, & singulos adjunxit ad singula, atque ita quasi in curram universitatis imposuit, commonstravitque leges fatales ac necessarias, & ostendit primum ortum unum fore omnibus, eumque moderatum atque constantem, nec ab ullo imminutum: satis autem, & quasi sparsis animis, fore uti certis temporum intervallis oriretur animal, quod esset ad cultum Deorum aptissimum.

38. Sed quum duplex esset natura generis humani, sic se res habebant, ut præstantius genus esset eorum, qui essent futuri viri. Quum autem animis corpora cum necessitate insevisset, quumque ad corpora tum accessio fieret, tum abscessio; necesse erat, sensum exsistere unum, communemque omnium, vehementiore motu excitatum, conjunctumque naturæ: deinde voluptate & molestiâ mixtum amorem: post iram, & metum, & reliquos motus animi, comites superiorum, & his etiam contrarios dissidentes: quos qui ratione rexit, justè vixit.

rit; qui autem his se dediderit, injuste.

39. Atque ille, qui recte & honeste curriculum vivendi a natura datum confecerit, ad illud astrum, quocum aptus fuerit, revertetur: qui autem immoderate & intemperate vixerit, eum secundus ortus in figuram muliebrem transferet. Et, si ne tum quidem finem vitiorum faciet; gravius etiam jactabitur, & in suis moribus simillimas figuras pecudum & ferarum transferetur; neque malorum terminum prius adspiciet, quam illam sequi coeperit conversionem, quam habebat in se ipse, ejusdem & unius, simul innatam & insitam. Quod tum eveniet, quum illa, quæ ex igne, aëre, aqua, atque terra, turbulenta & rationis expertia infederint, denique ratione depulerit, & ad primam atque optimam affectionem animi pervenerint.

XIII. Quæ quum ita designasset, seseque, si quid postea fraudis, aut vitii evenisset, extra omnem culpam causamque posuisset: alios in solem, alios in lunam, alios in reliquas mundi partes, quæ sunt ad spatiorum temporis significationem notæ constitutæ, spargens quasi ferebat. Post autem rationem eam, diis, ut ita dicam, junioribus permisit, ut corpora mortalia effingerent, quantumque esset reliquum ex humano animo, quod

deberet accedere, id omne, & quæ sequentia essent, perpolirent & absolverent: deinde ut huic animanti principes se, ducesque præberent, vitamque ejus pulcherrimè regerent & gubernarent; quatenus non ipse bene factus suâ culpâ sibi aliquid miseriæ quæreretur. Atque is quidem, qui cuncta composuit, constanter in suo manebat statu. Qui autem erant ab eo creati, quum parentis ordinem cognovissent, hunc sequebantur.

41. Itaque quum accepissent immortale principium mortalis animantis, imitantes genitorem & effectorem sui, particulas ignis, & terræ, & aquæ, & aeris a mundo, quas rursus redderent, mutuabatur, easque inter se copulabant, haud iisdem vinculis, quibus ipsi erant colligati, sed talibus, quæ cerni non possent propter parvitatem, crebris quasi cuneolis injectis, unum efficiebant ex omnibus corpus; itemque in eo influente atque effluente animi divini ambitum illigabant. Itaque illi in flumen immersi, neque tenebant, neque tenebantur; sed vi magnâ tum ferebant, tum ferebantur. Ita totum animal movebatur illud quidem, sed immoderatè, & fortuito, ut sex motibus veheretur. Nam & antè, & ponè, ad lævam, & ad dextram, & sursum, & deorsum, modò huc, modò illuc, ***

Desunt nonnulla. Sex oras , regionesque versùs errans procedebat. *** Jam verò earum imaginum quæ finguntur & redduntur in speculis , eorumque , quæ splendida & lævia sunt , rationem perspicere , haud difficile est. Nam ex ignis utriusque externi atque interni communione inter ipsos , quum unus per singulas partes effectus , & multis modis concors & apertus redditus in lævore confedit. ***

XIV. Sed si in splendore confedit : tum vel eadem species , vel interdum immutata redditur. *** Omniaque hujusmodi necessariò in speculo referuntur , *** quum ignis oculorum cum eo igne , qui est ob os offusus. *** in re lævi , & splendida , *** se confudit , & contulit. Dextra autem videntur , quæ læva sunt , quia contrariis partibus oculorum , contrarias partes attingunt *** præter morem usitatum adjectionis & commissuræ. *** Respondent autem dextra dextris , læva lævis , conversione luminum , quum ea inter se non cohærescunt. Id fit , quum speculorum lævitas hinc illincque altitudinem assumpsit : & ita dextra detrusit in lævam partem oculorum , lævaque in dextram. Supina etiam ora cernuntur depulsione luminum : quæ convertens inferiora reddit , quæ sunt superiora.

43. Atqui hæc omnia ex eo genere

§48 *PHILOSOPHICORUM*

sunt, quæ rerum adjuvant causas : quibus utitur ministeriis Deus , quum optimi speciem , quoad fieri potest , efficit. Sed existimant plerique non hæc adjuvantia causarum , sed has ipsas esse omnium causas , quæ vim habeant frigoris & caloris , concretionis & liquoris ; careant autem omni intelligentiâ atque ratione , quæ nisi in animo , nulla alia in natura reperiantur. Animus autem sensum omnem effugit oculorum. At ignis , & aqua , & terra , & aër , corpora sunt , eaque cernuntur. Illum autem , qui intelligentiæ sapientiæque se amatorem profitetur , necesse est , intelligentis sapientisque naturæ primas causas conquirere : deinde secundas causas rerum earum , quæ necessariò movent alias , quum ipsæ ab aliis moventur. Quocirca nobis sic cerno esse faciendum , ut de utroque nos quidem dicamus genere causarum ; separatim autem de iis , quæ cum intelligentia sunt efficientes pulcherrimarum rerum , atque optimarum : & de iis , quæ vacantes prudentiâ , inconstantia , perturbataque efficiunt. Ac de oculorum quidem causis , ut haberent eam vim , quam nunc habent , satis fermè esse dictum puto.

44. Maxima autem eorum utilitas , donata humano generi deorum munere , deinceps explicetur. Rerum enim opti-

marum cognitiones nobis oculi attulerunt. Nam hæc, quæ est habita de universitate oratio a nobis, haud umquam esset inventa, si neque sidera, neque sol, neque cœlum sub oculorum adspectum cadere potuissent. Nunc verò dies, noctesque oculis cognitæ, tum mensium, annorumque conversiones ad numerum machinatæ sunt, & spatium temporis demensæ sunt, & ad quæstionem totius naturæ impulerunt. Quibus ex rebus philosophiam adepti sumus: quo bono nullum optabilius, nullum præstantius, neque datum est mortalium generi deorum concessu, atque munere, neque dabitur, *Multa desiderantur.*

Aliud ex Timæo.

PRISC. lib. 1. Part. Defensatrix.



NOTANDA ET CORRIGENDA.

Numerus alter paginam, alter lineam indicat.

P. 2. L. 3. *In Mario.* Marius poema Ciceronis, quo res gestas a Mario municipe suo adulescens explicarat.

4, 7. *Et Athenis.* Vulgati auctiores, & *verumne sit Athenis*, quod additamentum Ursini codex, & alii plures ignorant.

Ibid. 16. *Vel severitas.* Ita Turnebi & Gruteri codices. Vulgata lectio, *vel veritas*, conjecturâ solâ nititur.

Ibid. 20. *In isto periculo.* Lambinus interpretatur *opus*, quod sit ab artifice, experiendi tantum & periclitandi ingenii gratiâ.

Ibid. 27. *Ad veritatem quæque referantur.* Ita liber Ursini, & veteres editi, melius, quam in vulgatis *ad veritatem, Quinte, referantur.*

5, 21. *Nihil potest esse jucundius.* Ultima vox mendosa. Repone vel cum Lambino *jucundius*, vel cum Manutio *jejunius*.

6, 2. *Successere huic Gellii.* Vitiosè scribitur in mss. *Bellii*. Emendarunt Gulielmus, & Vossius, a quo memorantur Sextus & Cn. Gellii historiarum scriptores. Vulgò *Gellius*.

Ibid. 9. *Ad summam impudentiam.* Nonnulli codices habent *dacio summa impudentia*, unde Sigonius legebat, *in mendacio summa impudentia*.

8, 14, *In cantu ceciderat.* Ita Manutius & Gruterus, & editio Veneta. Lambinus & Davissius e conjectura *remiserat* aut *reciderat*. Vide de Oratore I, 254.

9, 23. *Et hæc quidem adire sic placet.* Ita Ursino teste libri veteres, melius quàm in vulgatis, & *hæc quidem adire, si placet.*

14, 8. *Caput viri optimi.* i. e. decretum, si-
ve sententiam maximè ratam Epicuri. Ita Aldus
emendavit, probatque Pearcius, quum in mss. vi-
tiosè scribatur *capituli optimi*. Victorius dedit *ca-
put libri optimi*, minus rectè.

15, 6. *Si . . . parent ii, multò etiam magis.
Parent autem &c.* Ita e duobus mss. & Venetâ edi-
tione anni 1471. locum restituit Davisius. E vul-
gata lectione, *Si . . . parent, multò etiam magis
parent huic, &c.* sensus commodus erui non potest.

Ibid. 18. *De natura hominis.* Ita Victorius,
probatque Davisius: de sola enim natura hominis
nunc agit Cicero. Turnebus dedit *de natura omni.*

Ibid. 19. *Et nimirum ita sunt.* Gruterus trans-
positâ syllabâ, mallet, & *mirum ni ita sunt.*

16, 9. *Neque ullo alio ingenio.* Davisius, quem
sequimur, legendum esse monuit, *neque ullo alio
in genere.*

17, 1. *Obscuras, nec satis enodatas intelli-
gentias.* Scil. attribuit homini. Ita cum Davisio &
Pearcio legimus, & eòdem alludunt Turnebus,
Gulielmius, & Lambinus. Victorius dedit *obscu-
ras, nec satis intelligentias enudavit*: Alii *obscuras
& necessarias intelligentias enudavit*, contra men-
tem scriptoris.

19, 2. *Discendi quidem facultas par.* Ita teste
Davisio Harleianus codex ab emendatrice manu,
& editio pervetus. Vulgata lectio prorsus abso-
na, *discendi quidem facultate par.*

20, 20. *Jus, quod dicam, naturâ esse.* Vul-
gati, omisâ primâ voce, habent, *quod dicam na-*

zuram esse, nullo sensu. Emendavit Pearcius, cui Turnebus ferè præiverat.

21, 6. *τὰ τῶν φίλων*, &c. Græca hæc desiderantur in mss. dubitatque Victorius an illa sint, quæ Cicero intelligit, quod iis receptis haud bene connectitur oratio. Vide de Officiis 1, 56.

22, 17. *Naturâ esse jus*. Ita Lambino teste quidam codices, idque Davisius rectè præfert vulgato, *naturâ jus esse*.

24, 5. *Sine illius sufficientis*. Epicurum intelligit, qui se prædicabat homines mortis & deorum metu expiasse, i e, liberasse.

27, 10. *Notas res efficit eas, quas . . . inchoavit*: Ita verissimâ conjecturâ Pearcius. Mendosa vulgata lectio, *notas res efficit, easque . . . inchoavit*.

Ibid. 31. *Nos ingenia juvenum naturâ judicamus; non item virtutes . . . judicabuntur?* Ita e vestigiis trium mss. emendavit Pearcius locum, qui in vulgatis corruptus plane est: *nos ingenia juvenum, non item ad ingenia; naturâ virtutes . . . judicabuntur?*

29. 17. *Nihil exprimit præmii*. Ita codices & veteres editi. Receptiores dederunt, *nihil expetit*.

30, 18. *Erubescunt pudici etiam de pudicitia loqui. Ac me nimis, &c.* Ita codices, ut edidere Victorius, Turnebus, Gruterus. Alii vitiosè, *erubescunt, & pudet impudica loqui? ac me nimirum &c.*

34, 2. *Sed ex iis*. Nempe XII tabulis. Mallet Turnebus, *sed ex XII*.

Ibid. 18. *Quapropter hoc dijudicari*. Notat Davisius primæ voci locum hic non esse. Pearcius
autem

autem voces *inter hæc* revocat huc e versu precedenti, ubi sensum turbant, legitque, *inter hæc dijudicari*.

Ibid. 27. *Nam quæ adhuc a me dicta sunt ***.* Explendæ lacunæ Lambinus addebat, *e media philosophia ducta sunt: tu autem alicujus civitatis leges fortasse requiris. Q. Equidem nec Lycurgi &c.*

37, 6. *Dicuntur.* Lego cum Lambino *ducuntur*.

42, 24. *Postquam Theseus.* Vulgò *priusquam.* Emendarunt, ut sensus constet, Pet. Faber & Passeratius, quos sequitur Pearcius.

45, 15. *A parvis.* Legit Ursinus, *a pueris.*

46, 1. *Rem gessisse tantam, fortitudinis lege.* Liber vetus præfert, *rem gessisse tantæ fortitudinis, lege &c.*

Ibid. 19. *Item quum in homine est perfecta.* Ita rectè codices & Gruterus. Alii malunt *perfecto* aut *perfectum*.

49, 1. *At Theophrastus . . . meâ quidem sententiâ (meliorem multi) nimirum censent esse, nominat.* Ita Pearcius emendavit locum in vulgatis corruptum. *At Theophrastus . . . meliorem multi nominant*, nullo sensu.

51, 1. *Ut in veteribus XII.* Ita Gulielmius. Sed quum vitiosè codices habeant *ex his*, Schefferus censet scripsisse Ciceronem *ut in veteribus scis*, i e, senatusconsultis.

Ibid. 27. *Itaque, ut cadant.* Ita Pearcius e codice Turnebiano. Mendosè vulgati, *itaque, ut ita cadat.*

52, 28. *Judices duo sunt.* Scripti codices habent, *judices ne sunt*, unde Schefferus reponit *judicesque sunt*.

53, 9. *Quod sive curriculo, sive certatione corporum fiat.* Ita quidem Manutius, sed videtur

legendum esse cum editis recentioribus, quod sine curriculo & sine certatione corporum fiat, ut distinguantur ludi circenses à theatralibus & scenicis, in quibus adhiberi jubet moderationem musicæ, quæ nulla erat in circensibus. Vide infra n. 38.

Ibid. 25. *Hos letho datos.* Vocem *hos* compendium esse scripturæ censet Schefferus, pro *homines*. Davisius legit *suos letho datos*,

54, 19. *Atque mea quidem sententia est.* Hæc procul dubio corrupta sic refingit Schefferus: *At tu, Quinte? Q. Eadem mea sententia est. M. At ne longum fiat &c.* & sic omnino legendum videtur.

55, 6. *Sumptu... addito.* Ita liber vetus Ursini, pro *adhibito*.

56, 29. *Nam illud vitiosum Athenis.* Ante hæc verba deesse quædam notat Turnebus ex Lactantio, qui lib. 1, 20, sic habet, *magnum Cicero audaxque consilium suscepisse Græciam dicit, quod Cupidinum & Amorum simulacra in gymnasiis consecravit.* Deinde subdit, *Virtutes enim oportere, non vitia consecrari:* quæ manifestum est ex hoc Ciceronis loco citari.

57, 6. *Quod si fingenda sunt nomina, Vicæ Potæ potiùs vincendi, potiundique, stassandique cognomina Statoris, & Inviçii Jovis, rerumque expetendarum nomina,* nempe fingenda sunt. Ita locum in vulgatis miserè depravatum emendavit Nic. Faber ex Memmianis & Pithœanis codicibus.

58, 6. *Cum fide tuendarum religionum.* Ita legimus cum Lipsio, pro vulgato *confitendarum*.

Ibid. 14. *Omnem castitatem peti.* i e, tum corporis, tum multò magis animi. In vulgatis legitur *pati*. Emendarunt Turnebus & Lambinus, probatque Pearcius.

Ibid. 25. *Neque multi tamen, ne esset infinitum, neve ea ipsa &c.* Vulgò *neque multorum... neque ut ea ipsa &c.* Correxerit ex conjectura Davisius.

63, 3. *Sint corporum certatione.* Vulgò *certationes.* Emendavit Pearcius. Paulò pòst, *caveæ* nimirum constitutis *cantu, voce.* Hanc ultimam vocem cum eodem Pearcio delevimus, quam abesse a veteri codice testatur Manutius. Vide suprà n. 22.

Ibid. 30. *Nunc ut eadem exsultent.* Videtur legendum additâ voce cum Lambino, *nunc videtis, ut eadem exsultent*, nisi malis cum admiratione, *nunc ut eadem exsultant! ut... torquent!*

66, 31. *Tantum ponam, erui.* Ultimam vocem cum Pearcio delevimus; abest enim, teste Manutio, a duobus mss. nec ullo alio codice nititur, in quibus scribitur *merui* aut *metui*.

69, 1. *Aut ullo omnino? Ergo, quod &c.* Hæc non videntur sana. Turnebus & Lambinus reponunt *aut luminum?* Pearcius legit ac distinguit, *aut ullo omnino, nisi quod &c.*

70, 15. *Quod est partitio &c.* Hunc locum sic emendat Pearcius, *quod est partitionis caput: si in testamento ut centum nummi deducantur scriptum sit, ipsique &c.* quam emendationem confirmant ea quæ sequuntur n. 53.

72, 2. *Super dicebant qui quid cepisset.* i e, dicebant eum, qui quid cepisset *super*, seu plus quàm &c. Hæc est lectio omnium mss. quâ rejectâ Lambinus dedit vulgatum, *superiores dicebant.*

Ibid. 11. *Alligata sacris. Venio nunc &c.* Explendæ hoc loco lacunæ Lambinus partim ex

ora codicis antiqui, partim ex Plutarcho adornavit ea, quæ hic habes formâ litterarum Italicâ, quæque retineri posse censuit Gulielmius.

Ibid. 31. *Extèra sacra*. Ita rectè emendavit Pearcius, quum in vulgatis legatur *extra sacra*, nullo sensu.

73, 14. *Quod genus sacrificii lare vervecibus fiat*. Hæc procul dubio mendosa. Suspiciatur Davisius scriptum fuisse, *quod genus sacrificii in exverris fiat*. *Exverra* autem sunt, ut habet Festus, *purgatio quædam domûs, ex qua mortuus ad sepulturam ferendus est, quæ fit per everriatorem, certo genere scoparum adhibito, ab extra verrendo dictæ*.

74, 7. *Et corpus incensum est*. Hæc lectio nullo codice nititur, & sententiæ scriptoris repugnat. Codices habent, & *corpus cesus* aut *orsus est*: unde Turnebus legit, & *corpus ejus est*, i e, & corpus sepulcri factum est, & in eo conditum.

Ibid. 8. *In omnibus sepultis penitus, humati dicuntur*. Mendosam lectionem emendat Lambinus, *in omnibus sepultis ponitur, ut humati dicantur*.

75, 15. *Domina honoris*. Ita quidem plures mss. At in quibusdam scribitur, *numa* aut *mina*: unde Davisius conjicit legendum *numini honoris*.

76, 14. *De unctura: quibus servilis unctura tollitur*. Davisii codex unus habet tantum, *de unctura tollitur*: unde rejectis superfluis, legit *unctura tollitor, omnisque circumpotatio*.

Ibid. 17. *Ne acerræ pratercant*. Ita rectè Pal. 4. Mendosè vulgati, *nec acerræ pratercantur*.

82, 30. *Nihilque aliud*. Has voces omiserat Victorius & Turnebus, quas tamen servant codices, & vetustiores edici,

83, 16. *Qui nunc regnantur*. Ita Clericus & Davisius, pro vulgato *qui nunc regnant*.

87, 13. *Proposita, in arario cognita agunto*. Hæc corrupta sic emendat Davisius, *promulgata, populo placita, in arario condita sunt*.

Ibid. 14. *Quàm de singulis rebus*. Addunt Vulgati, *semel aut simul*, quam vocem ignorant plerique codices & Victorius.

Ibid. 23. *Censores fide legem custodiunt*. Ita Ascensius & Victorius, & sic habent duo codices Davisii. Mendosè vulgati, *censoris aut censorum fide &c.*

Ibid. 26. *Discedite*, nempe ad ineundum suffragium. Ita omnino legendum esse monuit Davisius. Codices habent *discere* aut *dicere*, editio Veneta, *discedere*. Vulgatum *disce rem*, est ab Ascensio.

89, 3. *Ab Academica familia*. Ita ingeniosè Schefferus, e codicibus, in quibus scribitur. *ab ac familia*. Vulgò *ab hac familia*.

92, 5. *Qua enim ille non edidit?* Ita codices plerique, quod rectè Scheffero placuit præ Vulgato, *quem enim ille non edidit*.

94, 10. *Quin ipsum Tib. Gracchum... sublatus intercessor fregerat*. Ita Bentleius locum restituit; qui variè admodum & corruptè scribitur in mss. Nullo codice nititur vulgata lectio, *quin per ipsum Tib. Gracchum... sublatus intercessor fuerat*.

Ibid. 21. *Quum deni creentur: nonnullos &c.* Ita Muretus Var. Lect. 4. 3. emendavit locum, qui planè mendosus in vulgatis, *quum deni creantur, nullos &c.*

96, 23. *Populare id sanè, neminem, &c.* Ita Turnebus correxit mendosam lectionem, *popularem sanè neminem &c.*

Ibid. 28. *Ejus decreta rata sunt.* Vocem *rata* omittunt vulgati, quam servant Turnebi codices & Davisii.

97, 10. *Et censorem quærit interpretem.* Ita dedimus, obsecuti Turnebo, cui meritò displicet vulgata lectio, & *censorem quærat interpretem.*

100, 13. *Graviora judicia... exstant vocis.* Ita codices plerique & vulgati, præter Gruterum, qui prætulit *voces.*

101, 6. *Doluitque, quoad vixit.* Veterem hanc lectionem revocavit Pearcius, cujus loco dederat Turnebus, *docuitque*, & sic vulgati.

102, 8. *Et utantur boni.* Vulgò *bonis.* Emendavit certissimâ conjecturâ Franc. Odinus.

105, 10. *Reipublicæ opem ferre.* Ita Manutius, Turnebus, Lambinus. Alii non rectè *referre.*

Ibid. 23. *Scitum esse & jussum.* Ita rectè Turnebus & Lambinus, pro vulgato *scitum est & jussum.*

107, 21. *Leges a librariis lego.* Mendum est in ultima voce, pro qua reponerat Lambinus *peti.*

112, 11. *Qui se jam illis ferè æquarunt.* Ita codices. Grævius, quia non reperit in suis pronomen *se*, maluit, *qui jam illos ferè æquarunt.*

113, 5. *Scribere ad te aliquid hoc tempore.* Ita voces ordinantur in regio codice, quem unum longè optimum in his libris de Officiis excussimus. Infra, & *auctoritati meæ gravissimum.* Ultimam vocem omittunt vulgati, quam cum Manutio servat regius.

117, 13. *Earumque progressus.* Pearcius mallet *prægressus*, ut habent cum regio nonnulli codices.

Ibid. 30. *Ad rem gerendam.* J. F. Gronovius legebat *ad rem quærendam*, idque etiam placet Grævio.

119, 10. *Excitaret sapientiā.* Faernus pro *sapientiā* reponebat *sui* : sed ne sic quidem locus Pearcio sanatus videtur, censetque legendum, *mirabiles amores (ut ait Plato sapientiā) excitaret sui.*

120, 13. *Ordo autem.* Videtur admittenda Pearcii conjectura *legentis, ordo item.*

125, 27. *Iustitiæ genus.* Hæc duo verba pro spuriiis habet Pearcius, & meliùs abessent.

127, 5. *Ut non reddere depositum, etiam promissum non facere.* Ita cum Lambino codex regius. Vulgati utrobique omittunt negantem particulam.

Ibid. 26. *Nec... contra officium est, majus anteponi minori.* Ita codex regius, ut voluere Lambinus, Gruterus, & Pearcius. Vulgati plenam distinctionem ponunt post vocem *promiseris*, & ante verbum *anteponi* negationem inferunt, quam ignorant mss.

130, 17. *Hostilius.* De quo Livius 43, 6. & 11. Ita hic & infra dedimus ex observatione J. F. Gronovii, quam confirmat Perizonius Animad. Hist. cap. 10 : Vulgati *Pompilium* nominant ; quo nomine nullus tunc imperator in Macedonia.

131, 8. *Lenitate verbi tristitiam rei mitigatam.* Ita J. Gronovii codices, quibus accedit & regius. Vulgò *lenitate... mitigante.*

132, 27. *Fidem hosti datam fallere.* Hic Lambinus & Gruterus inserunt locum de captivis ab Annibale ad senatum missis, & de perfuga Pyrrhi, quem Fabricius regi constrictum tradidit. Sed de his nihil omnino in editis vetustioribus, nec in mss. si Langii unicum excipias ; & eadem iterantur iisdem ferè verbis lib. 3, nn. 86, & 113.

136, 8. *An imitari.* Ita rectè codex regius cum

editis vetustioribus. Recentiores minùs rectè, *an non imitari.*

Ibid. 25. *Sine iudicio, vel modo, in omnes repentino quodam.... impetu animi incitati.* Hanc lectionem Victorii & veterum editorum, quam confirmant ferè omnes mss. revocavit Pearcius. Recentiores habent, *sine iudicio, vel morbo, in omnes, vel repentino &c.* obscuro & impedito sensu.

138, 9. *Nihilò minùs ut ipsi luceat.* Ita Turnebi codices & regius, pro vulgato, *nihilò minùs ipsi lucet.*

141, 18. *Quid quisque nobiscum, vel sine nobis.* Ita quidem codex regius & alii plures: sed rectè suspicatur Pearcius duplicem olim fuisse hujus loci lectionem, rejectisque superfluis, legendum censet, *quid quisque sine nobis &c.*

145. 1. *Ut quisque altissimo animo est, gloria cupiditate.* Ita codex regius, ut voluere Gruterus, Grævius, & Pearcius. Alii, *ut quisque est altissimo animo & Gloriae cupido*, quæ lectio nullo codice nititur.

146, 25. *Vacandum est... voluptate nimia... ut tranquillitas animi & securitas adsit.* Ita codex regius, quod præstat vulgato, *vacandum est... voluptate animi, ut tranquillitas & securitas adsit.*

151, 5. *In quo invadi.... me audio.* Ita rectè codex regius, & editi veteres, pro vulgato, *in quod invadi.... audio.*

Ibid. 8. *Concedat laurea laudi. Laus est togæ & forensium actionum præmium, laurea armorum.* Ita omnino legendum ex mss. optimis, & ex ipso Cicerone in Pisonem n. 74. Malè in editis recentioribus, *concedat laurea linguæ.*

Ibid. 15. *Arma impia*. Ita cum J. Gronovio dedimus ex mss. in quibus compendiosè scribitur *ipia*, unde vulgatum *ipfa*, quæ vox nihil hîc loci habere potest.

152, 21. *Fortis verò & constantis est*, nempe *viri*. Vulgò *fortis verò animi*; quæ vox postrema ab aliquo explanatore adsuta est: quis enim ferat *fortis esse animi... præsentis animi uti consilio*.

154, 19. *Evertit ad extremum omnia*. Ita Turnebi codices & regius. Alii *vertis*.

155, 3. *Ergo magisque magisque viri &c.* Ita Lambinus cum Mureto, quem vide Var. Lect. 6, 14. Vitiosè vulgati, *Ergo postque magisque &c.* quod natum inde videtur, quòd sæpe librarii vocem iteratam semel tantum ponerent.

156, 27. *Altitudo*. Est hoc loco *altitudo* in capiendis incommodis, & maximè injuriis, ut loquitur in Part. Orat. n. 60.

161, 25. *Natis sepulcro ipse est parens*. Mallemus cum J. F. Gronovio, *Natis sepulcro ipse sit parens*, ut oratio tyranni personâ digna sit.

165, 18. *Alter... libero dignus; alter ne homine quidem*. Ita cum Manutio & Lambino dedimus. Alii transpositis vocibus, legunt, *alter... homine dignus; alter ne libero quidem*; quæ lectio haud satis digna Cicerone videtur.

Ibid. 31. *Nisi voluptatem*. Vulgò *voluptate*. Regium codicem sequimur.

168, 8. *Ut Sulla M. Crassum videbamus*. Crassus Sullam enixè coluit, ejusque gratiâ ad illas divitias & honores evectus est. Mendosè vulgati, *ut Sullam & M. Crassum videbamus*. Correxerit ex suo primo codice Grævius.

Ibid. 14. *Alium quemque*. Vocem posteriorem delet Grævius, & in ea variant codices, in

quibus scribitur aut *alium aliquem*, aut *aliū quidem*.

169, 2. *Propriam naturam sequamur*. Gruterus ejectionis duabus primis vocibus, legit e vestigiis mss. *nostram sequamur*.

173, 6. *Plerique... deducimur*. Ita ex Nonio Fabricius & Grævius, pro vulgato, *plerumque... deducimur*.

174. 4. *Ut fortuna nonnumquam tamquam ipsa mortalis, cum immortalī natura pugnare videatur*. Ita cum vulgatis regius. Locum non uno modo corruptum existimat Pearcius, quem sic refingit: *constantior est, quā fortuna, ut ipsa (scil. fortuna) tamquam mortalis cum immortalī, cum natura pugnare videatur*.

Ibid. 18. *Diffuere*. Codex regius, & Langio teste libri veteres habent *diluere*, metaphorā ductā a pictoribus, colores diluentibus, ut extenuentur.

177, 8. *Difficilibus ad eloquendum*. Ita Gruterus & Grævius e vestigiis mss. pro vulgato, *difficilius ad eloquendum*, quod non cohæret cum præcedentibus.

178, 2. *Nec orationis obscantitas*. Vel lege cum Manutio & Grutero, *nec oratio obscantitate*.

Ibid. 14. *Et omne... fugiamus*. Ita cum regio Gruteri & Grævii codices. Vulgò, *ab omni... fugiamus*.

182, 6. *Sed utcumque aderunt res*. Ultimam vocem haud rectè delevit Lambinus, & omittunt vulgati.

Ibid. 8. *Nec similiter*. Voculam *nec*, quam ignorat regius & codex unus Pearcii delevimus.

Ibid. 25. *Id agendum etiam*. Vel lege cum Grutero, *id agendum tamen*.

200, 12. *Quantum superfuerat amicorum.... temporis.* Ita e mss. Victorius, Gruterus, & editi quique vetustiores, quibus accedit regius. Mallet Græuius *temporibus* aut *tempori*.

201, 5. *Sive ratio..., ducitur.* Ita codices & veteres editi, idque præstat vulgato *quæritur*.

204, 11. *Obesse plurimum.* Addunt vulgati, *vel prodesse*; quas voces non agnoscunt Gruteri & Grævii codices, quibus & regius accedit: nec tamen otiosæ videntur, si quo niterentur codice.

205, 6. *At deductus aquarum.... quæso, unde habere possemus?* Ita cum Gulielmio & Grævio codex regius. Vitiosè vulgati, *adde ductus aquarum... quæ, unde habere possemus.* Non enim hic agitur de aquæ ductibus, quos luxus excogitavit, sed de aquis exundantibus deducendis ex iis locis, quæ colantur ab hominibus.

206, 10. *Commodis.* Nonius in verbo *commodare*, legit *commodandis*, quod non spernendum.

207, 8. *Primum hoc statuo.* Ita Grævii codex optimus, & Pal. pr. idque præstat vulgato, *proprium hoc statuo*.

Ibid. 22. *Ex quo quidque gignatur.* Hæc numero multitudinis efferunt editi quidam, sed invitis mss. optimis.

210, 15. *Paretque quum maximè mortuo.* Ita Grævii codex optimus. Hæc in aliis defunt, aut corrupta sunt.

211, 28. *Nec eum fefellit.* Addunt vulgati quidam *opinio*; quam vocem meliores libri non agnoscunt.

214, 20. *Ad cuiusque vitam institutam.* Ita codices, & Græuius. Vitiosè vulgati *instituendam*:

Ibid. 28. *Propemodum*. Legit J. F. Gronovius; *pari modo*.

223, 15. *Ala alteri*. Posteriolem vocem delet Grævius, natam ex iterata voce *ala*.

Ibid. 26. *Gratiores sunt*. Ita cum Victorio, Manutio, Lambino codex *regius*, pro vulgato *gravior*.

225, 29. *Pro Sardis Julius*. Codices & vulgati vitiosè, *pro Sardis*, P. M. *Albucio Julius*: quæ Grævius sic refingit, *pro Sardis Julius*: P. *Mucius Albucium*, scil. reipublicæ causâ in iudiciu vocavit.

226, 21. *Nocentem... modò ne nefarium... defendere*. Ita locum restituit Grævius e suo codice pervetusto, idque jam antè conjecerat ex Nonio Fabricius. In vulgatis desiderabantur voces *modò ne*, sensu prorsus a mente Ciceronis alieno.

229, 15. *Gladiatoriiis muneribus*. Ita Gruteri & Grævii codices, quibus accedit *regius*, pro vulgato *gladiatorum muneribus*.

230, 8. *Si emere cogantur*. Ita *regius* codex, pro *cogerentur*, ut habent vulgati.

233, 26. *Ut his beneficiis quàm plurimos afficiamus*. Ita plerique codices, inter quos *regius*, pro vulgato, *ut hos beneficiis quàm plurimis afficiamus*.

239, 13. *Utentior sanè sit. i e*, majores sumptus in se tuendo faciat. Ita e suis mss. Turnebus, & sic habet *regius*, & Grævii vetustissimus. Vitiosè vulgati, *potentior* aut *locupletior*.

245, 12. *Possessiones moveri*. Ita *regius* codex & Grævii optimus, idque præstare videtur vulgato, *possessiones movere*.

246, 22. *Habitent gratis in alieno?* Ita e suis mss. Turnebus, quem sequitur Lambinus. Alii, *habitant gratis in alieno.*

247, 17. *At verò hic noster victor, tunc quidem victus, quæ cogitarat, tum ea perfecit.* Ita teste Langio codex Moguntiacensis, & eodem ducit regius. Vulgati minùs rectè, *at verò hic nunc victor, tum quidem victus, quæ cogitarat, ea perfecit.*

257, 13. *Et non perfecisset.* Has voces non agnoscunt plures mss. easque pro spuris habent Gruterus & Muretus, quem vide Var. Lect. 15, 9.

261, 29. *Vicit igitur utilitas honestatem?* immo verò *honestatem utilitas consecuta est.* Ita e Pal. pr. & e suo veteri libro locum restituit Muretus Var. Lect. 15, 9. idque probatur J. F. Gronovio, præ vulgato, *vicit ergo utilitas honestatem: immo verò honestas utilitatem secuta est.*

263, 31. *Multò magis efficit.* Ita codex regius cum Victorio & Lambino. Alii malunt *exigit.*

264, 13. *Detrahare autem de altero.* Ita mss. complures, qui sequentia verba *sui commodi causâ* non agnoscunt. Sed hæc tota periodus suspecta Grutero est, tamquam repetita de n. 21.

266, 20. *Quæ vacent justitiâ.* Hæc obscura. Muretus Var. Lect. 15. 9. monet veterem scripturam depravatam fuisse, *cevantem justitiam*: unde ille facit, *servantem justitiam.*

Ibid. 25. *Ad nullam partem utili.* Quidam mutant *ad nullam rem utili*; sed invitis codicibus & plerisque editis.

Ibid. 31. *Ne ipse frigore conficiatur.* Mureti liber vetus, *ne ipse algore pereat.*

267, 9. *Sin autem id non sit ejusmodi.* Muretus e suo veteri libro legit, *sin non sis ejusmodi,*

268, 12. *A communi tamquam humanitate corporis.* Muretus & Grævius mallerent, *a communi tamquam humanitatis corpore.*

269, 30. *Commoveri necesse est.* Huc e sequentibus retrahit vocem *animi* J. F. Gronovius, legitque, *commoveri necesse est animum; sed si quum attenderis.*

271, 24. *Ut ferunt fabulæ.* Hæc verba propriis habet Langius, & quidem non videntur esse Ciceronis.

Ibid. 27. *Magnitudine invisitatâ.* Ita hic & aliis similibus locis in Livio & Cicerone reponunt Gronovii, pro vulgato *inusetatâ.*

272, 26. *Quamquam potest id quidem.* Dubitanter, ut Academicus, de providentia & natura divina loquitur, ut notat Gulielmius.

275, 11. *Si eum teneremus.* Grævius legit, *si ea rogaremus:* & sic Pithœi excerpta.

Ibid. 21. *Phintiam.* Regius scribit *Pityam.*

279, 21. *Quam tritici utilitas.* Nec malè Passeratius, *quam tritici vilitas.*

280, 15. *Injustè & improbè.* Vulgò *an improbè.* Regium codicem & Pithœi excerpta sequimur.

281, 23. *Quum quid reticeas.* Ita codex regius, pro vulgato, *quidquid reticeas.*

282, 3. *Quòd si vituperandi sunt.* Ultimam vocem delevimus, quam ignorat codex regius.

283, 8. *Nomina facit.* Addendam hic vocem *Pythius* censet J. F. Gronovius, eò quòd creditoris sit *nomina facere*, debitoris dissolvere.

284, 18. *Nec qui contrà asse liceatur, emptor apponet.* Vulgò, *nec qui contra se liceatur, emptor opponet.* Emendavit Muretus Var. Lect. 14, §. & favet regius, in quo scribitur *apponet.* Ut venditor dolosè apponit, qui pluris liceantur;

Ita emptor, qui minoris, ut sibi facilis res ad-
dicatur. Assum autem pro minimo pretio veteres
dicebant.

Ibid. 28. *Ut si minoris, quàm potuisset, emis-
set.* Ita Grævius ex editis veteribus reposuit, pro-
vididisset: quam vocem servat quidem regius,
sed alio scriptam atramento. Locus videbitur sa-
mus, si legeris, qui minoris etiam, si potuisset,
emisset.

c 293, 11. *Hereditates convertere.* Ita codices
& editi, præter Lambinum, qui dedit *convertere*.

294, 14. *In Rostra... escenderent.* Antiquè
dictum pro *adscenderent*. Mendosè vulgati, *descen-
derent*. Correxerit Muretus.

295, 18. *Se quis convertat in belluam.* Ita re-
gius codex. Vulgò *conferat*.

298, 26. *Sin ipsa opes expetuntur quoquo modo,
non poterunt &c.* Turnebus ex codice perantiquo
legit, *sin ipsa opes expetuntur, quomodo poterunt
utiles esse cum infamia?*

299, 21. *Potius diceret non esse aquam &c.*
Hæc Grævio videntur vel invitis libris sic legenda:
*potius diceret non esse utilem reipublica, quia non
esset aqua, quàm quum &c.*

Ibid. 30. *Utilitate, ut putat, officium dirigit.*
Ita mss. ferè omnes & vetustiores editi, non ut
vulgò recentiores, *utilitate putat officium dirigi*.

300, 13. *Quid si una tabula sit, duo naufragi,
hique sapientes.* Ita Gronoviorum codices, &
veteres editi, nec multum discrepat regius. Vul-
gati cum Grutero, *quid si in una tabula sint duo
naufragi æquè sapientes.*

301, 8. *Qui vinum fugiens, quod scilicet durare
& ætatem ferre non potest.* Ita ex Nonio Græ-
vius cum Manutio, idque procul dubio verum.

licet plerique codices præferant pro *vino*, *venenum*.

302, 28. *Atque insanus... deflagravit*. Ita veteres editi, quos sequitur Grævius. Vulgò, *atque is... deflagravit*.

305, 4. *Fide sacratum jus*. Ita Victorius. Sed Langius & Fabricius ex plerisque codicibus reponunt *fides sacrata jus*. Veteres dixere *fides* aut *fide*, pro *fidei*.

Ibid. 26. *Quem censet?* Ita cum Victorio, Camerario, Langio J. Gronovius. Alii, *quæ* aut *quid censet?*

309, 4. *Non modò summum malum*. Ita codices, & sic solent scriptores optimi, pro *non modò non*.

310, 8. *Perduellium numero definitus*. Ita Grævii codices & regius. Mendosè vulgati, *ex perduellium numero definitus*.

312, 4. *Quod idem non honestum sit, nec quia utile, honestum, sed &c.* Ita codex regius. Minus rectè vulgati, *quod idem non honestum, nec quia utile, honestum est, sed &c.*

314, 25. *Acilius autem, qui &c.* Periodum hanc censet Pearcius locum occupare non suum, & reponi debere post hæc verba numeri superioris, ad *Annibalem duceretur*.

317, 16. *Finis bonorum & malorum*. Duas voces, & *malorum*, censet Muretus ab hominibus fortasse minimè malis, sed certè non satis intelligentibus, additas esse.

321, 21. *Tanta inest stultitia inconstantia*. Ita Langii, & Grævii codices, quibus accedunt duo regii, quos in libris de Senectute & de Amicitia, & in Paradoxis excusimus, pro vulgato, *tanta est inconstantia stultitiæ*.

323, 2. *Querelis meorum aequalium...* *qua &c.* Quidam legunt *quas* aut *queis*. Sed Cato non tam ad verba quàm ad sententiam respicit, quod Atticis est familiaris.

324, 3. *Nec... si ego Seriphins essem, ignobilis.* Vulgò *nobilis*, sed invitis codicibus Gulielmii, Gruteri, Grævii, & nostris, qui constanter scribunt *ignobilis* aut *innobilis*. At huic sententiæ repugnat Plato, aliique. Non mirum, inquit Gulielmius, si Cato & senex, & in rebus Græcis, quas serò attigit, voluntate & commodo Ciceronis, hallucinetur memorià, quod idem in Laerte sercorante, & in Pelia recocto evenisse illi, negari non potest. Paulò pòst codex Celderbensis, teste Grutero, id habet scriptum ad marginem, quod dedimus, pro vulgato, *neque enim in summa inopia levis esse senectus potest ne sapienti quidem, sensu parum ad mentem Catonis accommodato.*

Ibid. 30. *Quintoque anno pòst ad Tarentum quæstor: acinde ædilis, quadriennio pòst factus sum prætor, quem magistratum &c.* Hunc locum pessimè habitum a librariis, persanarunt ex historia Catonis Langius & Pighius, quos sequimur, deletis vocibus *ædilis & prætor*. Q. Maximus legem Cinciam suasit Tuditano & Cethego consulibus, quæstore Catone, quo anno sacra Idææ Matris accepta sunt: mortuus est autem quatuor annis antè, quàm Cato prætor esset. Vide infrà n. 45. & de claris oratoribus n. 60.

325, 22. *C. Flaminio tribuno plebis... dividenti.* Ita vulgò editur: sed Pighius, quem sequimur, ex Sesipatro citante hunc locum, reposuit *C. Carvilio & C. Flaminio tribunis plebis... dividentibus*; & sic scriptum reperimus in uno e regiis codicibus: quo ipso tacitè declaratur, cur

Sp. Carvilius quieverit, ne scil. consanguineo aut gentili adversaretur.

326, 2. *Mortem M. filii*. Ita vulgati. Præno-
men delevisimus, quod idem filio & patri fuit.

328, 22. *Flexere viam*. Antiquè dictum pro *via*.
Ita Turnebus Adv. 13, 6. Vulgò *flexere viâ*. Sed
versus unâ curtior syllabâ.

329, 26. *Quintus hic & tricesimus est annus*.
Et paulò pòst; *decem annis*. Ita Contarenus ex
tribus codicibus, quibus accedit unus e regiis. Vul-
gò *hic tertius & tricesimus &c. & novem annis*.

330, 5. *Sed ratione, & consilio, & sententiâ*.
Ita regii codices, pro vulgato; *sed consilio, ra-
tione, sententiâ*.

332, 16. *Quamquam in aliis*, quæ scil. ad se
pertinere arbitrantur, *minùs hoc mirum*. Ita codi-
ces nostri, ut de suis testatur Lambinus. Vulgò
in illis.

340, 6. *Dominatur in suos*. Notat Lambinus
libros veteres habere, *vindicet jus suum*, & sic
etiam Pithœi excerpta, quam esse manum certis-
simam Ciceronis censet Grævius. Notum est quàm
invisum fuerit vocabulum *dominari* & *dominus* in
libertate.

346, 17. *Hoc ego non desiderare dico esse ju-
cundius*. Addunt vulgati *quàm frui*, quas voces
ignorant Lambini codices, & regii: & verò ad-
jectas esse ab aliquo interprete res ipsa loquitur.

348, 29. *Contra avium minorum morsus*. Tur-
nebus reperisse se ait in latebrosis bibliothecis,
contra inimicarum avium morsus.

351, 26. *An ulla beator esse possit?* Non-
nulli codices & editi habent *an ulla vita*. Sed
ultimam vocem rectè omittunt Langius, Gruterus,
Grævius.

353, 11. *Comem erga Lysandrum*. Codex unus e regis, & plures Græviani scribunt *communem* eodem sensu, & hanc esse manum Tullii censet Grævius.

Ibid. 30. *Virtuti tua fortuna conjuncta est*. Mallet Passeratius, *fortuna tua virtus conjuncta est*.

354, 19. *Illud elogium unicum*. Vide de Finibus 2, 116.

355, 23. *Lacedamonem esse... domicilium*. Ita Jac. Gronovii codices, & regii, pro vulgato *Lacedamone esse &c.*

356, 9. *Ut quisque ætate antecedit*. Vulgò *antecellit*. Regios codices & Manutium sequimur.

360, 9. *Senectutis autem nullus*. Addunt codices quidam & editi, *est terminus*, quæ voces ab oscitante librario e superiori versu malè iteratæ sunt.

Ibid. 11. *Et tamen mortem contemnere*. Has voces abesse a codice manuscripto testatur Ursinus.

361, 6. *Neque Funera lessum*. Vide ad Tusc. Disp. 1, 34.

Ibid. 10. *Jam sensus moriendi aliquis esse potest, isque ad exiguum tempus*. Ita codices nostri, ut de suis testantur Gulielmius & Gruterus. Vulgò editur, *jam sensus moriendi si aliquis esse potest, is ad exiguum tempus durat*, quod quidem correctoris alicujus manum sapit.

364, 30. *Memoriam sui tuerentur*. Ita in uno codice reperit Gulielmius, probatque Grævius, pro vulgato, *teneremus*, quod mendosum.

365, 22. *Sic me colitote ut deum*. Verborum Xenophontis hic sensus est, & *animum meum venerantes, facite quæ dico*.

367, 3. *Peliam recoxerit*. Non Peliam Medea, sed Æsonem e sene juvenem reddidit: quum au-

tem recepiſſet idem ſe facturam Peliaë, effecit ut infelix ſenex natarum ſuarum manibus concideretur: niſi fortè Catoni ſeni lapſum memoria tribuit Cicero, perſonæ ſerviens. Vide Muretum Var. Leſt. 6, 10. ſic ſuprà n. 54. Laertem facit ſtercorantem, quem Homerus inducit purgantem & ablaqueantem arbores.

372, 1. *Sunt iſta.* Addunt vulgati *vera*, quam vocem ignorant Gulielmii & Langii codices, & e duobus regiis alter.

Ibid. 20. *Qualem in tota Græcia neminem.* Ita Grævius, & ſic e regiis duobus optimus & Pithœi excerpta. Vulgò *in reliqua Græcia.*

375, 26. *Ad ſuperos videatur deos.* Ultimam vocem omittunt vulgati, quam ſervant Langii & Gruteri codices & unus e noſtris, quo modo Horatius *ſuperis deorum Gratus & imis.*

376, 24. *In quiete per viſum.* Somnium illud Scipionis exiſtat in fragmentis deſcriptum a Macrobio.

382, 7. *Bonâ ſpe præluceſcit.* Ita Viſtorius, Manutius, Gruterus, & ſic duo regiî codices. Lambinus & Grævius maluerunt *bonam ſpem.* Paulò poſt pro vulgato, *verum etiam amicum*, dedimus, *verum etenim amicum*, ut habent regiî codices, & Ursini vetus liber.

Ibid. 18. *Benevolentia conjunctionem.* Ita duo regiî codices, & veteres editi. Langius e ſuis libris repoſuit *vinctionem*; id autem ortum ex eo cenſet Grævius, quòd *junctio* & *vinclio* in mſſ. eodem modo ſcribebantur.

387, 14. *At ii... longè diſſentiunt.* Vulgò *ab iis... longè diſſentimus.* Correxit e duobus Florentinis Fucciolatus, & ſic etiam de duobus ſuis mſſ. annotarat Gulielmius.

389, 18. *Eorum querelâ inveteratas... familiaritates.* Ita e Palat. 2. Gruterus & Grævius, Vitiosè in vulgatis legitur, *eorum querelâ inveteratâ.*

391, 16. *Quid attinet dicere... impetraturum non fuisse?* Vulgò scio *impetraturum non fuisse?* Primam vocem a mala manu profectam delevimus, abestque ab uno e regijs codicibus.

Ibid. 22. *Et minimè tunc quidem C. frater.* Ita Grævius cum Victorio, Langio, Lambino &c. & sic habent duo regii. Vulgò, & *minimus*, quod Gulielmus & Gruterus exponunt, & *lenissimus*, *minimè vehemens*, contra usum linguæ Latinæ.

392, 28. *Magnâ aliquâ re in remp. peccantibus.* Ita editi veteres, quæ lectio confirmatur uno e regijs mss. & Pithœano. Vulgati in *magnam aliquam rem peccantibus*, quod meritò improbat Grævius.

393, 25. *Consilium dare.* Legit Joan. Clericus *dari*, idque rectum videtur.

399, 2. *Indulgeri novis.* Ita cum Manutio & Lambino duo regii, pro vulgato *indulgere*.

402, 13. *Blanditiis & assentando.* Ita codices nostri & editi veteres. Quidam recentiores præferunt *blanditiis & assentationibus*.

403, 5. *Quasi equis tentatis.* Ita cum Langio & Grævio codices nostri. Alii *quasi aquis tentatis*, aut *equis temperatis*, ineptè.

Ibid. 20. *Obscuratum iri arbitrantur.* Ita plures Gruteri codices sine pronomine *se* ante verbum *arbitrantur*.

405, 30. *Ut in ipso equo.* Ita plures mss. pro vulgato, *atqui in ipso equo*.

408, 6. *Ad honores amplissimos producere.* Ita

optimè, teste Grutero, Pithœanus codex, & sic etiam unus e regiis. Vulgò *perducere*.

409, 2. *Nec... Trojam Neoptolemus capere potuisset*. Omnes de Achille id narrant, quod de Neoptolemo ait Lælius, nisi fortè Cicero de industria concedit ei Græcanicarum fabularum, ut illà ætate, ignorationem.

410, 21. *Contumeliæ generentur*. Ita cum Palat. 2. duo regii, idque præstat vulgato *gignuntur*.

411, 22. *Ut se ipse*. Error typographicus. Lege *ut se ipsa diligant*.

415, 27. *Una illa subeunda offensio est*. Ita Facciolatus, ut sensus postulat. Vulgatam lectionem *sublevanda* mendosam esse, multis probat Grævius.

Ibid. 28. *Ut & veritas*. Ita duo Manutii codices, quos sequuntur Lambinus & Grævius. Vitiôsè vulgati, *ut & utilitas*.

416, 21. *Verum audire nequeant*. Ita duo regii pro vulgato, *nequeat*.

Ibid. 23. *Catonis, ut multa. Melius &c.* Ita regii codices, ut edidit Lambinus & Grævius. Alii, *Catonis: multò melius &c.*

417, 14. *Ad voluntatem loquentium*. Ita duo regii cum plerisque aliis mss. idque rectè probat Grævius præ vulgato, *ad voluptatem loquentium*.

Ibid. 27. *Tam devium*. Mallet Grævius *tam tenerum*, ut alibi loquitur Tullius.

418, 19. *C. Papirius consul*. Ultimam vocem, Langio & regiis duobus mss. obsecuti delevimus. Hanc enim concionem Papirius habuit tribunus plebis, decem ampliùs annis ante suum consulatum.

Ibid. 26. *Ducem populi Romani, non comitem*. Voces *non comitem*, profectas a mala manu, non

agnoscit Pithœanus codex, easque cum Grævio delevimus.

419, 11. *Re magis, quàm summâ auctoritate.* Ita quidem regii cum vulgatis: sed Pithœanus, quem sequimur cum Grævio, *rei veritate magis &c.* & sic legendum esse declarant sequentia.

Ibid. 14. *Quòd si in scena.* Addunt vulgati, *id est, in concione*, quod ineptum glossema delevimus, auctoribus Langio & Grævio.

421, 9. *Versaris atque luseris.* Mallet Grævius, *atque unxeris*, ut verba translata sint a piscibus, qui dum assantur, versantur atque unguuntur.

424, 7. *Virtutem locetis.* Videtur legendum cum Grævio, *virtutem colatis*.

426, 5. *De continentia, de morte.* Valkerus legendum conjicit, *de contemnenda morte*, idque probat Th. Beptheius. Non enim de morte ipsa, sed de contemptione mortis differebat Cato.

428, 24. *Sed hæc videri possunt obscuriora, quum lentiùs disputantur.* Hoc totum esse a glossa censet Gruterus, atque adeo reselandum.

435, 5. *Et perpetua constantia.* Copulam rectè delet Grævius.

Ibid. 18. *A philosophis, inquit, ista sumis.* Ita Th. Bentleii codices, & e duobus regiis alter. Vulgò *inquis*.

437, 1. *Rerum modum fingere.* Mallet Lambinus, *rerum modum figere*.

Ibid. 8. *In syllaba te peccare dices?* Vulgò, *ut in syllaba &c.* Sed voculam *ut* ignorant Langii codices & regii.

Ibid. 11. *Si visa sunt breviora, leviora videantur. Qui possint videri &c.* Ita cum Victorio & Langio regii codices. Alii mendosè, *quæ si visa sunt breviora, leviora qui possint videri &c.*

576 NOT. ET CORRIGENDA.

Ibid. 19. *Rebus advincam necessariis*. i e , in-
victis argumentis probabo. Alii aliter legunt. Ma-
nutium & Grævium sequimur. Porro quarti hu-
jus paradoxo solum hoc exstare principium censet
Scioppius. Reliqua , quæ sequuntur aliud probare
intendunt, *solum scil. sapientem civem esse, omnes
autem stultos esse exsules.*

439 , 23. *Et me exsulem*. Ita Maratius & Lam-
binus. Alii vocem omittunt *exsulem*, quam pariter
omittit regius alter.

440 , 5. *Num appellatur inimicus, qui &c.* Hæc
non videntur sana. Facciolatus reponebat, *non ex-
pelleitur is, qui &c.*

443 , 10. *In magna stultorum familia*. Vocem
stultorum cum Langio & Grævio delevisimus, tam-
quam ineptè inculcatam a librariis.

Ibid. 13. *Ac topiari; pari stultitia sunt*. Ita Græ-
vius e vestigiis corruptissimæ mss. lectionis locum
emendavit. Vulgati habent, *ac topiarii stultitiæ
sua, vel ac tu pari stultitiâ sunt*, nullo sensu.

446 , 24. *Te judicet*. Ita Grævii codices & re-
gii, Vulgati mendosè *se judicet*.

449 , 11. *De re loquar*. Vulgò *de te loquar*. Cor-
rexerit ex Pithœano Grævius.

Ibid. 13. *In casu positas possessiones*. Vulgati
omittunt vocem ultimam, quam cum Victorio &
Manutio servant regii codices.


486 , 9. *Et parum rebus, audite cetera*. Hæc
corrupta sic ingeniosè refungit Buherius; & *parum
per audite cetera*.

489 , 27. *Pro rata parte, ratione distinctis*.
Hæc est, teste Jac. Grönovio, omnium lectio
mss. Editi vulgò, *pro rata portione distinctis*.

FINIS.



41 955134







*image
not
available*